



قيسا اؤيكولر توپلوسو (۲)
رسول قديرى

دېلمانچ

رسول قديرى

انتشارات
بهاردخت

Dilmanc

Qısa öykülər toplusu (2)

Rəsul Qədiri



Sonunda, sözü gedən ilin günlərinin birində, ancaq ki radio onun sözlərinə cavab verdi! Qoca dayı günü-gündən bu yeni dil açan körpə cihaza marağı çoxalır, başqa tərəfdən qızılçılıq işindən bezirdi. Ancaq atasının zoruna görə, dayanmağa çarəsiz idi. İllər boyu hər axşam radiosu ilə dərdləşir, onunla danışdı. Bir gün ailəsinə acı bir xəbər yetişdi. Atası səfərlərinin birində bir qəza sonucunda dünyadan getmişdi. O günlər iyirmi yaşı olan qoca dayının! bir gözü ağlayır, bir gözü gültürdü

Dilmanc öyküsti səh. 73-74



انتشارات
بهاردخت



گئجه قوشولو غوما دؤزن،
چای - چۆره ییمی ایش ماساما دوزن
یولداشیما سونورام...

سرشناسه : قدیری، رسول، ۱۳۴۷-
عنوان و نام پدیدآور: دیلمانج / رسول قدیری.
مشخصات نشر : تبریز: بهار دخت، ۱۳۹۶.
مشخصات ظاهری : ۲۶۲ص.
شابك : ۸-۰۹-۸۶۱۴-۶۰۰-۹۷۸
وضعیت فهرست نویسی: فیپا
موضوع : داستان های کوتاه ترکی - ایران - قرن ۱۴
موضوع : Short stories, Turkish -- Iran -- ۲۰th century :
رده بندی کنگره : ۱۳۹۶ ۹۴۰ق/۳۱۴ PL
رده بندی دیویی : ۸۹۴/۳۶۱۳
شماره کتابشناسی ملی: ۴۸۲۲۵۵۳

د یلمانج

قیسا اویکولر توپلوسو (۲)

رسول قدیری





د یلمانج
(قیسا او یکولر توپلو سو (۲))
رسول قدیری

○ ناشر: انتشارات بهاردخت

○ اندازه: رقعی ۲۶۲ صفحه ○ تیراژ: ۱۰۰۰ جلد

محل چاپ: تبریز

نوبت چاپ: اول تابستان ۱۳۹۶

چاپ: سبز / صحافی: امین

طرح روی جلد: مریم علوی میلانی

عکس پشت جلد: استودیو یشیل

شابک: ۸-۰۹-۸۶۱۴-۶۰۰-۹۷۸

ISBN: 978-600-8614-09-8

○ قیمت: ۱۷۰۰۰۰ ریال

نشانی: تبریز، روبروی مصلی، انتشارات بهاردخت

bahardokhtpub@yahoo.com - ۰۹۱۴۸۰۲۰۴۲۴

■ ايچىندە كىلر ■

- ۸ ----- اۋن سۆز
- ۱۳ ----- مشە مىكايل
- ۲۷ ----- دئمە بىلمەدى ھاا
- ۳۰ ----- سۇيەلەين عىسكىرانلى بى گلىسين
- ۴۸ ----- شانس
- ۷۲ ----- دىلمانچ
- ۸۹ ----- باش ساغلىغى
- ۹۳ ----- سەنە درمان يوخ دور
- ۱۰۲ ----- كارلار كەندى
- ۱۱۵ ----- سەن سوسماليسان
- ۱۲۶ ----- بىز توپ آتەنمازدىق
- ۱۳۲ ----- سونجوقلايان قودوق
- ۱۴۱ ----- ايتى-قوردو مەنەم اوستومە كوشكورتمە
- ۱۴۷ ----- مەرتىيە پەرس خەبەر آزانسى
- ۱۵۲ ----- دەنە-دەنە يىيىلەن مەنەلەر اونلاردىر
- ۱۵۷ ----- سارى ياغ كۆپەسى
- ۱۶۱ ----- قارىنپا
- ۱۶۴ ----- اۋلەكەدە ايتى اوت دادمايان يوخ دور
- ۱۷۰ ----- مەن ھىچ نە بىلمەيم
- ۱۹۰ ----- اوۋچودور سوچلو
- ۱۹۷ ----- اونوتما شاھ ھەر نە وئرسە يارىيىق

۲۰۴	میکروب عمی
۲۱۰	اینام
۲۱۵	من برمکی لردن دئیيلم
۲۲۳	صیدی خالاقیزی
۲۲۶	لوطو اسکندر
۲۳۳	قورخما سنین باشینی کسمرم
۲۴۱	سنی هئچ بؤیومییه یدین
۲۴۵	سۆزلوک

اولو تانرینین آدی ایله

اُون سۆز

۱۳۹۴-جو ایلین سونلاریندا، ۲۳ قیسا اویکونو ایچریمکده اولان «گول آخیتدی» عونوانلی توپلوم چاپ اولوب، دیرلی اوخوجولارین آینه چاتدیریلدی. او اثر منیم رسمی شکیلده یایینلانان بیرینجی کیتابیم ایدی. بیر بئیت فارسجا شعرین مضمونوندا بئله دئییلیر: «بیر شخص دانیشمایینجا، عیبی ایله هونری گیزلی قالار!» بو دوغرودان دا چوخ دوز بیر سۆزدور. او کیتاب یایینلاناندان سونرا، چئشیدلی شخصیتلردن هم آلقیشلایان هم ده تنقید ائدن گۆزل تپکیلر آلدیم. هر ایکی قروپدان درین میننتدارلیق بیلدیرمه‌یی گۆره‌ویم سانیب، آغزینیز، قلمینیز، فیکرینیز وار اولسون دئییرم. آلقیشلایانلار، سانکی منه -توتدوغون یولدا داواملی اول- دئدیلر؛ تنقید ائندلردن ده هم اویرندیم هم ده فیکیر موباديله‌سی آپاراراق، بعض اونلارین دا یانلیشی واریدیس اوزه چیخیب، بلکه اونلار دا بیر شئیلر اویرندیلر؛ معلوم‌دور، دیلیمیزده رسمی شکیلده تحصیل ائتمک ایمکانی اولمایینجا، بیزلر بیر-بیریمیزدن اویرنمهلیمک.

بو سطیرلری یازماقدا، او اترین چاتیشمامازلیقلارینی یاخود سهولرینی اؤرت-باسدیر ائدیب، یئرسیز مودافیعه ائتمک نیتینده دئییلیم، آنجاق بونلاری دا قئید ائتمک یئرسیز دئییل دیر کی، دیلیمیزین اؤزل دورومونو، قوللانیلان آلیفبانین بیر یازار-اوخوجویا یاراتدیغی چاتیشمامازلیقلاری نظرده توتاراق (اؤزلیکله سسلی حرفلره بیر سسی ایفاده ائدن حرفلرین

چوخلوغو اوجباتيندان)، ھم دە ديليميز ساحەسىندە پئشەكار رىئاكتورلارلا
تتقىدچىلار بولما ماسى، ھامىنىن قبولو اولان، بوتون سورونلارى
جاوابلايا بىلن، عاغىلا سىغان يازى قىلاووزونون ھلە دە يارانما ماسى
كىمى فاكىتلارنى گۆز اۋنوندە توتماقلا، بىر يازارين ياراتدىغى بىرىنجى
اثرىنىن بىرىنجى چاپى االبته سورونسوز اولما ياجاق دىر. اوستەلىك بورادا
داھا اينجە بىر قاوراما دىققەت يىتتىرمەك گرکىر؛ سۆزسوز بىر يازىچىنىن
اثرىنى اينجەلەمەك اىستەيندە، اونون سورديوو عۆمرونون اىللىرىنى يوخ،
يازىچىلىق ياشىنى نظردە توتماق لازىم دىر كى، تام صمىمىت و
تواضوعكارلىقلا بو ساحەدە گنج بىرى اولدوغوما اعترىف ائتمەلىيم.

بوتون بونلارى نظردە توتاراق، االىنيزدە اولان بو اىكىنجى توپلونون
چاپا حاضىرلانماستىندا، اۋىكولرىن بىر چوخونون خىلى زامان بوندان
اۋنجدەن حاضىر اولماغىنا باخما ياراق، تلىسمەيە كسىنلىكلە يول
وئرمەمىشم. بىر ايلدن چوخ زاماندا، اونلارى دۋنە-دۋنە اوخويوب
چاتىشمايان يئرلىرىنى دوزەلتەمەيە چالىشمىشام. االبته يازارلار اىچىندە بىر
دئىمىدە دئىيلىر: «عىبسىز بىر كىتاب ھلە يازىلمايىب دىر!». او يۋندن
سۆزسوز بو اثر دە عىبسىز دئىيلىدۇر، آنجاق اوغورلو بىر يازارين گۆرەوى،
تجروبه قازاندىقجا عىبلىرىنى سايىنى اُن دوشوك بىر درجەيە ائندىرمەك
اوغوروندا چالىشماق دىر. مەن ايسە بو اثردە، وار گوجوملە بو اوغورو الدە
ائتمەيە چالىشمىشام. سۆزسوز دىرلى اوخوجولار، نە قدر بو چاپادا اوغورلو
اولدوغوما قارار وئرجىلر.

االىنيزدە اولان كىتاب، اىيىرمى يىددى قىسا حكاىەنى اىچىرمەكدە دىر.

گۆرۈندۈيۈ كىمى، بو ائرى بيرىنچى توپلو ايله توتۇشدوراندە ھەم
 عونولارېن سايىسىندا، ھەم جەمدە، ھەم دە ايچىندە كىلر باخىمىندان
 فرقىلى بير ائردىر. «گول آخىتدى» كىتايىندا يازىلان اۋىكولرېن بير
 چوخونون ھاۋاسى، شىفاهى خالق اديياتى ھاۋاسى اولدوغو خالدا، بو
 ائردەكى حكاىلەر، گىتل اۋىكو آنلامىنا داھا چوخ ياخىنلاشىپ دىر. البته
 يئنه دە اونلارېن چوخونون قاۋرامى، گلەنكلە ايلگىسىنى كسمە يەر،
 بوتون طبقەلەرە فايدالى اولە بىلەجەيى دوشونولوب دور.

يازى قايدالارېنا دىققەت يىتىردىكە، كەملەرى ايكى قولە آيىرماق
 اولار: بيرىنچىسى تورە كۆكلۈ سۆزلەردىر؛ اونلارى يازاراق ھەم راحت،
 ھەم دە دوزگون اوخونا بىلەجكلرى نەزەردە توتولوب دور؛ دولايىسى ايله ھەر
 سۆزجو يو يازاركن، اوخونوشو قوشقولو اولماماغى شرطى ايله، اولدوقچا آن
 از حرف قوللانيلماغىنا چاليشىلىپ دىر. اوزون كەملەر راحت اوخونسون
 دئە، اونلارى ايكى تىكە يە آيىرىپ، يارىم آرا ايله بير-بىرىن يانيندا
 يازمىشام. ايكىنچى سىرا كەملەر، دىلېمىز دە ياد اولان، باشقا دىللەردە
 (اۋزلىكلە فارسجا ايله عربجەدە) بورچ آلىنەن كەملەردىر. بير سىرا
 اوستادلارېن باخىشىنا گۆرە، دىلېمىز دە، اونلارى يىيەسى اولان دىلدەكى
 كىمى يازماق گرەك. آنجاق مەن بونولا راضىلاشا بىلمىرەم. سۆزسوز ھەر
 بير سۆزجو كى بير دىلدەن باشا بير دىلە كۆچدۈك دە، قوناق گىتدىيى دىلېن
 آغىزىنا اويمالى دىر. بو حقيقتى گۆز اۋتونە آلاراق، ھەمىن يابانچى
 سۆزجوكلرى ايكى حىصصە يە آيىرماق اولار، بيرىنچىسى دىلېمىز دە
 ايشلە دىلەرەك تلففۇزو دىيىشمەن كەملەردىر؛ اونلارى آنا دىلېندە نە

ساياق يازىلدىغى كىمى قئىد ائتمىشم؛ بورادا او سىرا سۆزجوكلردن، «حساب»لا، «احتياط» سۆزجوكلرينه ايشاره ائتمك ايسه يىرم. آتجاق ايكىنجى سىرا ياد كلمه لرین دئىمى، دىلیمیزه گلدیکده تام فرقلی دیر؛ اونلاری دا، دىلیمیزده دئىلیدی، هم ده معیار دیل ایله اویغون بیر شکیلده یازماغا چالیشمیشام. منجه بو سىرا سۆزجوكلردن گۆزل آلاهییمیزین آدینا ایشاره ائتمك يئترلی دیر. بیلدیینیز كىمى كۆكو عربجه اولان اولو تانرىمیزین آدینا، اۆز آنا دىلینده «الله» دئىلیر؛ بو موقددس كلمه فارسچایا گلدیکده ده دئىمى هئچ دیشمه دن، گلدیى حالدا یازىلیب اوخونور، آما بیزیم دىلده كىمسه اونو عربجه ده یازىلدىغى كىمى تلفوظ ائتمه ییب، اىستىناسیز هامى اونو «الله» تلفوظ ائدیر؛ بیر كۆیلو قادین اوشاغینا دوعا ائدنده، هئچ زامان «الله كىمین اولسون» دئمز، بلکه همیشه «الله كۆمه یین اولسون» دئمکده دیر.

كىتابدا چتىن، آز ایشله ن سۆزجوكلرين آچىقلاماسىنا گلدیکده، اونلارین آنلامىنى بىلمك، عزیز اوخوجولارا داها ألؤرىشلى اولدوغونو نظره آلاراق، هر واراغین آتیه یینده آچىقلاما گتىرمىشم؛ آچىقلامالاری یازماغا، رحمتلىك بهزاد بهزادی، سايین جنابلار، پرویز زارع شاهمرسى، بیر ده قدیر گلکارىانین سۆزجوكلرىندن فايدالانمىشام؛ او بؤيوك اوستادلارین رحمته گئدینه اولو تانرىدان مغفرت، قالانلارینا دا ساغلىقلى، داها دا اوغورلو اوزون عۆمر آرزولایىرام. اوسته لىك باشقا حكايه لرده ده تکرار اولان همین لوغتلرین آنلامىنا راحتلىقلا آل چاتماق اوچون، او لوغتلرین هامىسىنى، «سۆزلوك» باشلىغى ایله بیر داها كىتابىن سونوندا

تکرارلامیشام. بلکه بعضی اوستادلار، دیلیمیزده بیر سیرا آز ایشله‌نن سۆزجوکلرین ایشله‌دیلمه‌سی حاقدا منه تنقید ائتدیلر، آنجاق منجه بیر کیتابی سونا وئرن اوخوجویا، اوخودوغو کیتابدان لذت آلاجاغینین یانیندا، بیر نّچه گۆزل، یئنی سۆزجویون اؤیرنیلمه‌سی ده داها موکمل بیر سونوج اولاییلر.

سون اولاراق اثرلریمین حاضیرلانماسیندا همیشه آلقیشجیم اولوب، معنوی یاردیمینی هئچ زامان اُسیرگه‌مه‌ین، «ثمین کتاب ایرانیان مؤسسسه‌سینین» قوروجوسو و مودیری، سرکار خانیم دکتر اُحمدی‌یه سونسوز تشککور ائتمه‌یی اؤزومه بورج بیلیرم. هم ده ساین اوخوجولاریمدان اؤنجه‌دن تشککور ائدیپ، دیرلی باخیشلارینی ائشیتمه‌یی گۆزله‌ییرم.

رسول قدیری

یای-۱۳۹۶

«مشه ميكايل»

آخسام ساعات سڪيز ياريم-دوققوز آراسى، مشه ميكايل دكترون سونونجو بيليطينى آليب ايتتظار اوتاغيندا سيرادا اوتوردو. دكتر، اوندان اونجه بئش نفرى گوږمهلى ايدى. هميشهكى كيمى نفس آلاندا، سينهسى يامان خيسيلدايىردى. كلينيكه گليب چاتينجا، يول يثريب پيللهلرى چيخديغينا باخاراق، سينهسينين خيسيلتيسى داها دا چوخاليب، آغير-آغير تۆوشه ييردى^۱. آغير گوڭده سيني^۲ چتين ليكله دولانديرير، كۆكلويونه بير درمان ائده ييلميردى. ياغ، سانكى دوستاق^۳ كيمى هر يثرينى حاصارا سالميشدى. اوتوراجاقد^۴-واى دده- دئيىب اوتوران كيمى، بلكه اورتوراجاق دا -واى جانيم- دئيىب جيريلدادى. چتين ليكله اونون آغيرليغينا تاب گتيرديى بللى ايدى. مشهدى اوڭزو، بو مسالهنى داها ياخشى باشا دوشوردو؛ اونا، آرامليقلا آغيرليغينى اوتوراجاغين اوستونه ساليب گوڭتورمك چوخ زور بير ايش اولسا دا، احتياطلا اوتوروب قالخماغا چاليشيردى. او گونهك نئچه اوتوراجاغين جانينا قىيىب، اوڭزو ده يثره سريلميشدى.

اوتورار-اوتورماز يئنه فيكي ره جومدو. باشينا گلنلر، هئچ اونو راحت

^۱ تۆوشه مك: نفس نفس زدن، لهله زدن.

^۲ گوڭده: بدن، نئش.

^۳ دوستاق: زندان، محبس.

^۴ اوتوراجاق: صندلى

بوراخمیردی. خسته لر بیر-بیر ویزیت اولدولار. سیرا مشه میکایلا چاتینجا، آیاغا قالخیب دکترون اوتاغینین قاپیسینی تیققیلدا دیب، ایچری کئچدی. سالام وئردی؛ دکترباشینی کاغیذدان قالدیراراق اونا جاواب وئردی:

- آی علیکم‌السلام مشه میکاییل؛ کیشی بس سن هارالارداسان؟ آخی چوخ زامان دیر گل میرسن. منی قورخوتدون؛ اؤزومله دئییردیم بلکه ایراق جانیندان، بو کیشینین باشینا بیر ایش گلیب! سونرا دا دئییردیم یوخ، اولماز ائله شئی؛ بلکه ده داها منی ییه نمیر، اؤزونه بیر هوشلو-باشلی دکتربا پیب دیر...

دکتربو سؤزلری دئییب اوجا سسله گولدو؛ مشه میکایلا ایسه، تۆشومک هله جاواب وئرمک ماجالی وئرمیردی.

- دکتربه هئچ سورما باشیما گلنلری! دوز سامیش می شسان؛ ائله اؤلموشدوم، تزه دن دیر یل دیم. باشیما اوزون احوالات وار...

- گل بورادا اوتور گؤروم. سانکی سنده سؤزلر واردیر.

مشه میکاییل دکترون یانینداکی اوتوراجاقدا اوتورارکن، دکتربو زنگی سسلندیریپ قاپیچی سینی چاغیردی.

- بویورون دکتربئی،

- باشقا خسته ده وارمی؟

- یوخ دکتربو آغا سونونجو ایدی.

- یاخشی، داها کیمسه یه بیلیط وئرمه لوظفن؛ اؤزون ده گنده

بیلرسن. آرخانجا قاپینی ایشگیلله مه یی اونوتما؛ یورولما یاسان.

- ساغ اولون دکتربئی. سیز ده یورولمایاسیز.

قاپچی قاپینی اورتوب گتدی. دکتربئی اوز توتوب مشه میکاییلا دئدی:

- یاخشی مشهدی ایندی راحت دانیش؛ دئی گوروم باشینا نه ایش گلمیشدی...

مشه میکاییل دانیشماغا باشلادی؛ او دانیشاراق، دکتربئی اونون تانسیونونو^۵ توتماقلا یوخلاماغینا مشغول اولدو.

- دکتربئی، اوزوندن ایراق، تخمینن آی یاریم بوندان اؤنجه ایدی؛ بیر گون ائوه قایدیب ناھار یییهندن سونرا بیرآز اوزانماق ایسته دیم. نه قدر زامان کئچمیشدی دئیهمم، آنجاق چئوره مدہ کی^۶ سس-کویه اویاندیم. آما نه اویانماغی، نه گوزومو آجا بیلیردیم، نه ده هئچ بیر یئریمی ترپه ده بیلیردیم. نه بیلیم، سونرالار ائشیتدیم بونا نفسین گیزلنمه سی دئییرلر؛ هر سؤزو، اولایی^۷ آپ-آیدین ائشیدیر، بیلیردیم، آنجاق هئچ بیر رئاکسییا^۸ گؤستره بیلیردیم. باشیمین اوستونده جیغان-ویغان سسی ائشیدیردیم. هر ه بیر سؤز دئییردی؛ خانیم دئییردی: «نئجه کیشیم آلدن گتدی!» اوشاقلار آغلاشیردی. قارداشیمین دا سسینی تانیدیم، اونو دا چاغیرمیشدیلار؛ قونشولار دا تۆکولموشدو. سانکی طایفانین هامیسی

^۵ تانسیون: فشار خون.

^۶ چئوره: محیط، پیرامون، دور و بر.

^۷ اولایی: واقعه، حادثه، اتفاق.

^۸ رئاکسییا: عکس العمل.

بیزدهیدی. هامیسنین سسینی آیدین ائشیدیردیم. اؤنجه بو غریب حاللار، عجایب سۆزلره مات قالمیشدیم؛ هاچاندان هاچانا باشا دوشدوم کی، اۆلدویومو ظن ائدیلمر. قونشولارین بیرى دئدی: بئله اولماز کی، گئدک بیر حکیم چاغیراق گلیب باخسین. نه ایللاه ائله دیم سنین آدینی دئیم، یوخسا موبایلیمدان نؤمره نی تاپیب، سنه زنگ آچماقلارینی ایستهم، ائده بیلمه دیم. سانکی حقیقتن ده یاریم جان اولموشدوم. چوخلو ایتتیاردان سونرا چاغیردیقلاری دکتّر گلدی. من ایسه آلا-آلا ائدیردیم باری دکتّر اؤلمه دییم ییلسین. آنجاق نه یازیق کی، او دا یانیلدی.^۹ البته بلکه کیمسه ده سوچ^{۱۰} یوخ ایدی؛ اوره ییمین آتیشی یواشلامیش، سینه مین خیسیلتیسی دا تام کسيلمیشدی. او یازیق، منیم گؤؤده مده اولان بیر بئله یاغین آلتیندان نبضیمین سسینی نئجه دویا بیلردی! اؤزلیکله^{۱۱} خانیمین اویدورماقلاری^{۱۲}، توپلانانلارین دا قوپاردیقلاری های-هارا یین ایچینه...

- نه اویدورماسی مشهدی؟!

- خانیم حکیمه دئیردی: شوبهه سیز اؤلوب دور؛ رحمتلیک!، ساغ اولان زامان یامان خیسیلتی ایله نفس آلاردی. گؤرورسونوز، ایندی نفس آلمادیغینا گؤره خیسیلتی دا یوخ دور!

^۹ یانیلماق: اشتباه کردن، منحرف شدن، خطا کردن.

^{۱۰} سوچ: گناه، تقصیر.

^{۱۱} اؤزلیکله: مخصوصاً، بویژه.

^{۱۲} اویدورماق: فریب دادن، گول زدن

دکتر معاینه‌نی دایاندیریپ، داها دیققتلی قولاق آسماغا باشلادی.
 - سونرا نه اولدو؟
 - نه اولاجاق دکتر بی، باشیم اوسته گتیریلن دکتر، اولوم ورقه‌سینی
 دولدوروب قول قویدو!
 دکتر، داها اؤزونو ساخلایا بیلمه‌دی؛ قهقهه چکه‌رک گولوب آرتیردی:
 - یاواش-یاواش هیجانلانیرام. باشینا غریبه اویون گلیب‌دیر. سانیرام
 قالانی داها دا ائشیتمه‌لی اولام...
 - هه دا گول، نییه گولمزسن؟ سنین باشینا گلمه‌ییب‌دیر کی؛ آما بیر
 بیله‌یدین او گونلر نه چکدیییمی...
 - اوره‌یینه آما کیشی؛ آرتیق هر شئی قورتولوب گئدیب‌دیر. آنجاق
 قبول ائت بو گون ائشیدنده، آدام گولمه‌یه بیلیم. سانکی خیال عالمینده
 بیر ناغیل ائشیدیرم.
 - یعنی دئدی‌کلریمه اینانمیرسان دکتر؟!
 - اینانماسی چوخ زور‌دور، آنجاق سنی تانیدیغیم اوچون سؤزلرینه
 قوشقوم^{۱۳} یوخ‌دور.
 - عینی باشیما گلنلری دانیشیرام.
 - یاخشی، داوام ائت؛ سونرا نه اولدو؟
 - جانیم سنه دئسین، حکیم گئندن سونرا آغلاشلارلا بیر‌گه، زنگ
 آچمالار دا باشلاندی. اؤنجه اؤلو داشییان اوتومبیل شیرکتینه زنگ آچیب

^{۱۳} قوشقو: تردید، شک.

مسألەنى آنلاتدىلار؛ گلمەين طايفانى دا چاغىردىلار. بىر كۆينك اوزاق اولانلار، گليب فاتىحه اوخويوب گىتىلەر؛ اُن ياخين تانىشلار ايسە دايانيب قالدىلار. من بونلارين هاميسىنى ائشيدىردىم. اوتومبيل گلدی؛ منى اونا قويوب مزارليغا آپاردىلار. ايكى يىردە شانس گىتىردىم دىكتەر...

- ياخشى، بىر آن دايان لوطفن. شانسلارىنى سايمادان اۇنجه، قوی ايكى اىستىكان چای تۆكۈم بوغازىنى ياشلا سونرا قالانىنى دانىش. گۆرۈرم، دىل-داماغىن قورويوب.

- آلاھ سندن راضى اولسون دىكتەر؛ لاپ يىرىنە دوشەر.
دىكتەر آياغا قالخدى؛ اوتاقدان ائشيبە چىخىپ، كلينىكە اولان چاىخاناسىنا گىتتى. بىر آزدان ايكى اىستىكان چای، بىر قىندىق قىند چاىچىندە اولان سىنى ایلە گىترى قايتىدى. سىنىنى ماسانىن اوستونە قويوب دىدى:

- اىچ چاىنى مشەدى، او قدر دە اىستى اولماسىن گر.
چايلارىنى اىچدىلەر. مشە مىكايل يىنىدن دانىشماغا باشلامادان سورۇشدۇ:

- دىكتەر، ادىسىزلىك اولماسىن بورادا سىغار چىمىك اولارمى؟
- آى كىشى، باشىنا گلن بو قدر اويۇندان سونرا، يىنە دە آل چىمەيىسن سىقارتىدن؟!

- من آل چىكىرم ائى، او آل چىكىرم مىندن.
اىكىسى دە گۈلدۈلەر؛ دىكتەر آرتىردى:
- چىك نىلىك. گىجەدىر، صاباھا كىمى دە قوخوسو چىكىلەر.

مشه میکایل جیییندن بیر پاکات «تیر» سیقارئتیی چیخارتدی. بیرینی دوداقلارینین آراسینا قویوب کیریت ایله آلیشیدردی. درین بیر نفس ایله توستونو ایچری چکیب سۆزونون آردینی^{۱۴} توتدو:

- دئییردیم، شانسیمین بیرری اوراسیندایدی کی، یول اوزونو قارداشلاریم اوتومبیل سوروجوسو ایله دانیشاندا، ناھار چاغی ساعات ایکیدن سونرا اؤللو باسدیریلمادیغینی ائشیدینجه سئویندیم. ایکینجی شانسیم دا اوندان عیبارت دیر کی، مزارلیق سوروملولاری^{۱۵} منی تحویل آلان زامان، سویودوجولاردا^{۱۶} یئر اولمادیغینی دئییب گوؤده می ائله سالونون اورتاسیندا بیر تاختین اوستونه اوزاتدیلا؛ یوخسا سویودوجولاردا یئر اولسایدی، سحره دک بلکه دونموش لئش اولاجاغیدیم. اینیمده بیرجه ترلیک، شورت، بیر ده ائو شالواری وار ایدی. قارداشلاریم، صاباح سحر تئزدن، ایداره لر آچیلان زامان، اؤلونون دوغوم ورقه سی ایله میلی کارتینی، بیر ده اؤلوم آراییشینی^{۱۷} گتیریب قنبر آلمالیسینیز- دئدیله. بونلاری ائشیتدیکجه جانیم تیتترمه دوشمک ایسته دی؛ آنجاق آسقیریغنین سسینی آغزیندا بوغان آداملار کیمی، سانکی منیم ده تیتترتم ایچیمده بوغولدو. هئچ بیر ایش گوْره بیلیمیردیم. قرارلار دئییلندن سونرا، بیزیمکیلر بیزیم ائوه گئتمیشدیله. بیر آزدان، آخشام شیفتی

^{۱۴} آرد: ادامه، دنباله.

^{۱۵} سوروملو: مسؤول

^{۱۶} سویودوجو: سردخانه، یخچال

^{۱۷} اؤلوم آراییشی: گواهی فوت.

قورتولدوقدا، اورانین ایشچیلری ده قاپیلاری قیفیلاییب، یاپینی^{۱۸} ترک ائدیله. بیر من قالدیم بیر ده چئوره‌مده کی اؤلور. خئیلک ساعات کئچدی. او ساعاتلاردا نه چکدیییمی، کیمسه بیلهمز. یاتاق خسته‌لری^{۱۹} بئله، آن آزی گؤزلری آچیق اولور، دیلدن دوشمورلر، بدنلرینین بعضی حیصه‌لرینی ترپه‌ده بیلیرلر؛ آما من تام اؤلوم-قالیم سینیریندا^{۲۰} دورموشدوم. بیر آیاغیم او تایدا، بیر یی ده بو تایدا ایدی. اونجا ساعاتی دوزمک، هئچ راحت بیر ایش دئییل؛ نه ایسه، خیلی زاماندان سونرا فیلملرده اولان کیمی، گؤؤده‌مه دامجی-دامجی حرکت حیصه‌سینین قاییتدیغینی دویدم^{۲۱}. اؤنجه آستا-آستا بارماقلاریم ترپندی. سونرا گؤزلریمی آچدیم. سانکی یئئیدن آنادان اولوردوم. بیر توو آل-آیاغیما حیصه‌س قاییتماغینا باخمایاراق، اونلاری ترپه‌ده بیلیمیردیم. کوره‌کلریم قوروموشدو؛ عضله‌لریم تیر چکیلیمیشدی. تخمینن یاریم ساعتین ایچینده بوتوو حرکتیم قاییتدی. احتیاطلا تاختدان یئره ائدیم. اعتراف ائتمه‌لییم کی، ایلک^{۲۲}، چئوره‌مده کی اؤلورلی گؤرونجه قورخدوم؛ سونرا اؤزومو آله آلاراق^{۲۳}، اؤزومله -آی رحمتلی اوغلو رحمتلیک، اؤلونون نه‌ییندن قورخورسان؟! بونلار هئچ اود اولسالار دا اؤزلرینی یاندیرا بیلملر.

^{۱۸} یایی: بنا، ساختمان

^{۱۹} یاتاق خسته‌سی: بیماری که در بستر خود خوابیده و قادر به حرکت نیست.

^{۲۰} سینیر: مرز

^{۲۱} دویماق: (Duymaq) حس کردن، درک کردن.

^{۲۲} ایلک: ابتدا، اول

^{۲۳} اؤزونو آله آلماق: به حال عادی برگشتن، خود را جمع و جور کردن.

دیریلردن قورخماق گرکیر کی، هر ایش آلریندن گلر- دئدیم. اورادا دوواردان آسيلمیش بیر ساعات وار ایدی. دوز اولسایدی، گنجه یاریسی ساعات ایکینی اون دقیقه نی گؤستیریدی. ایشچیلر، بلکه ده اؤلور قورخماسینلار دئی، یاپنین چیراقلارینین بیر سیراسینی یانلق قویوب گنتمیشدیلر. همیشه بئله دیر؛ جامعات دؤرد دوواریندان انشییی داها اؤزونونکو بيلمیر؛ ائویندن انشییه اورهک یانديرمیر. آلتیه بو مسأله آزاجیق منه یاردیمجی^{۲۴} اولدو. قاپینی یوخلادیم، قیفیللی ایدی. پنجره لر باخدیم، ایچریدن آچیلسا دا، هامیسینین انشیکدن حاصاری وار ایدی. پنجره لرین بیرینی آچدیم. انشیک، سیرا ایله دوزولن چیراقلارین ایشیغیندان لم-لم یانیردی، آنجاق «قو دئیردین قولاق توتولوردو»^{۲۵}. جیرجیرالارین سسی، بیر ده اوزاقلاردا هوروشن ایتلرین سسیندن باشقا هئچ نه انشیدیلیمیردی. ایندییه دک جیرجیرالارین سسینی او قدر سئومه میشدیم. بوتون ایچریده گؤردوکلریم اؤلوم ایشارتلریدی، انشیکدن ایسه حیات سسی گلیردی. سسلرینی انشیدیب، اؤزلرینی گؤرمه دییم جیرجیرالارلا ایتلر، سحر سازاغینین تأثیریندن، چیراقلار ایشیغی آلتیندا آستاجا دانس ائدن یارپاقلارینین رنگی بوزا چالان آغاجلار، همین آغاجلارین آیاقلاری آلتینا سريلمیش چمن، منه حیاتدان دانیشیردیلار. بیر اوتوراجاق آلتیما چکیب آرخام^{۲۶} اؤلومه، اوزوم یاشاما طرف اوتوروب انشییه باخدیم. اؤزومله،

^{۲۴} یاردیمجی: کمک کننده.

^{۲۵} قو دئیردین قولاق توتولوردو: کنایه از سکوت.

^{۲۶} آرخا: پشت، عقب.

بلکه بیررسی اورالاردان سووولدو دوشونوردوم. بیر ساعات کئچمه‌دن اوزاقدان بیرنین اورایا یاخینلاشدیغینی حیسس ائتدیم؛ آیاغا قالخیب اوزومو پنجره‌نین حصارلارینین عکس طرفینه یاپیشدیریپ، آیاق سسی گلن طرفه باخدیم. بیر آزدان خیابانین قارشى^{۲۷} طرفیندن یاپییا ساری گلن، عسگر گئیملی بیر گنجی^{۲۸} گۆردوم. خوللو بۆرکو باشیندا، سیلاحی چییننده، دیل‌آلتی بیر ماهنی زومزومه ائده‌رک یاخینلاشیردی. بیر آن زامانلا مکانیمین نه یئرده اولدوغونو اونوتدوم. او ساعتین خلوتینده، ایچریده‌کیلرین هامیسینى اؤلۆ سانیب ائشیکده یئرین بیر گنجی، اؤلۆلر ساراییندان سسله‌مه‌یین نه قدر قورخونج اولدوغونو هئچ دوشونمه‌دیم؛ یئردن بیر تیکه داش تاپیب گۆتوردوم؛ عسگر یاپینین قارشیسینا چاتینجا، شوشه‌نی جینگیلده‌رک -عسگر، آی عسگر بری باخ- دئییه سسلندیم. جاوان، ایلک حئیرتله او یان-بو یانینا باخدی؛ سونوندا پنجره آرخاسیندا منی گۆرونجه، گۆزلری دۆرد اولوب آل-آیاغی تیتره‌مه‌یه باشلادی. سیلاحی چیینندن یئره دوشوب شاققیلدادی. سس‌سیزلیکده، دمیرین بتون اوستونه دوشوب شاققیلداماسیندان، مزارلیق تیتره‌ییب بلکه اؤلۆلر بئله دیکسیندیله‌ر. اوغلان، قیشقیرا-قیشقیرا قاچیب اورادان اوزاقلاشدی؛ بیر داها دا قاییتما‌دی. بو صحنه‌نی گۆرونجه، هم اۆزومو سوچلایب دانلادیم، هم ده -بویور بو دا بیزیم اۆلکه‌نی ساخلایاجاق قورخماز عسگریمیز- دئییه گولومسوندوم...

^{۲۷} قارشى: مقابل، روبرو.

^{۲۸} گنج: جوان.

سۆز بوراسینا چاتینجا، دکتر یئنه اوجا سسله گولدو. مشه میکاییل دا اونا قاتیلدی. مشهدی، ماسانین اوستونه بوراخدیغی پاکاتدان بیر دنه سیقارت گۆتوروب دوداقلارینین آراسینا قويدو؛ دکتر دا آل آتیب کيبریتی همین ماسانین اوستوندن گۆتوروب، مشهدينين سيقارتيینی آليشديراراق دئدی:

– یاخشی مشهدی، سونرا نه اولدو؟

مشهدی درین بیر نفس آلیب، دکترین سیقارتنی آليشديران آئينين اوستونه ايکی ضربه ووراراق —ألرینه قوربان اولوم دکتر— دئدی. سيقارتيين توستوسونو آغيزيندان، بورنونون دليکليريندن ائشييه اؤتورندن سونرا، دانیشيغينين آردینی توتدو:

– چاره نه ایدی؟ یئنه اوتوروب گۆزله ديم؛ بیر داها اُدان چکيلنده، قاپی آرخاسيندان آياق سسی ائشيتديم. دئمک، اورانين قورويوجوسو^{۲۹} ایدی. گئجه لر سانکی اورادا کئشیک دورورموش. سالونا آچیلان اؤلولر سارايينين ايکی تاغلی قاپيسينين هر تاغينين اورتاسيندان بیر آز اوستده، ائی-بویو اوتوز سانتيمتر قدر اولان بیر تیکه دورو شوشه سی وار ایدی؛ من شوشه نين آرخاسيندان اونو گۆروردوم. یاشلی بیر کیشی ایدی. قاپينين آرخاسيندا اولان اوتاغين سينکينده دستماز آماغا گلmişدی. جورابلارینی چيخارديب، قوللارینی چيرمامیشدی. باشينداکی بورکونو ده مسح چککک اوچون خوللو قويوموشدو. من آياق سسينه ساری گئديب

^{۲۹} قورويوجو: نگهبان.

قاپیا چاتینجا، او، آرخاسینی منه طرف چئویریب ذیکرلر اوخویاراق، دستماز آماغا باشلامیشدی. اؤزومله —یاخشی اولدو، آدام آلاسه آدامینا بنزه‌ییر؛ بو قوجا کیشی گونده چئشیدلی اؤلولر گؤردویو، هر گئجه‌سی بورادا کئچدییینه گؤره، اینشالله منی گؤرنده قورخماز — دئییه دوشوندوم. کیشی آیقلارینا مسح چکن زامان، اوو جومو یوموب، بارماقلاریمین بندلرینین قاتلانان یئری ایله قاپینی تیققیلداتدیم؛ کیشی دیک آتیلدی. آرخایا چؤنوب منی گؤرونجه، ائله بیل جین گوردو؛ بیر تهر قاچدی کی، بؤرکو باشیندان دوشوب، آیاق آلتی لارینین^{۳۰} بیر تایی آیاغیندان چیخب یئرده قالدی.

دکتر یئنه قهقهه چکیب گولدو؛ مشه میکاییل دا اونا قوشولدو. آنجاق مشه‌دینین گولوشلری، هئچ دکترون گولوشلرینه بنزه‌میردی؛ درین لییینده آجی خاطیره‌لی آغیر بیر حوزنون ایزینی^{۳۱} سئچمک اولوردو...

— بیر توو قاپیلاری سیلکه‌له‌دیم، آما فایدا وئرمه‌دی؛ ایکی تاغین بیرلشدییی یئرن، جانلی بیر سالاما قیفیل^{۳۲} تاغلارا تاخیلیب، اونلاری بیر-بیرینه قیفیللامیشدی. رحمتلیک اوشاقلاری سانکی اؤلولرین دیریلیب قاچماغیندان قورخوردولار! یئنه چاره‌سیز دوروموما^{۳۳} قایتیدیم؛ گئری دؤنوب پنجره‌نین قارشیسینداکی اوتوراجاغیمدا اوتوردوم. اورانین

^{۳۰} آیاق آلتی: دمپایی.

^{۳۱} ایز: اثر، نشانه، علامت

^{۳۲} سالاما قیفیل: قفل آویز.

^{۳۳} دوروم: وضعیت، موقعیت.

پنجره لرى مزارليغىن قاپيسىنا سارى باخىردى. هاوا، ياواش-ياواش ايشىقلانماغا باشلادى. ساعات آلتى يارىمدا مزارليغىن قاپىلارنى آچدىلار. جاماعاتىن گليشمه سىنى ايزلەيىردىم. اۆز قىرىلمىشلارنى دا اونلارنى ايچىندە سىچدىم. هامىسى قارا گىيىملر گىيىپ آغلاشا-آغلاشا گليردىلر. خانىم، هردن بير باشىنا دۆيوردو. بير نىچە كىشى لاپ اۋندە گليردىلر؛ سونرالار، اۋندە گلنلرني اۋلو يويانلار اولدوقلارنى بىلدىم. بير آزدان، آچار قىفيلين ايچىندە دولانىپ، قاپىلار آچىلدى. همين اۋندە گلن آلتى كىشى ايچرى گيردىلر. بئشى اورتا ياشلى، بىرى ايسە ايبىرمى-ايبىرمى ايكي ياشلى بير جاوان اوغلان ايدى. آياغا قالخىپ اونلار سارى گىتىدىم. سالام وئردىم؛ او بئش نفر اورتا ياشلى كىشى، منى گۆرچك گىرى قايىدىپ قىشقىرا-قىشقىرا قاچدىلار؛ آنچاق او جاوان اوغلان دىم-دىك قاباغىمدا دوروب گۆزلىرىنى گۆزلىرىمە زىللەمىشىدى. منىم او حالىم دا، داھا مىرتا چئويىلمىشىدى. اوغلانا دىدىم: -آى ساغ اول قورخماز جاوان! اوغول، بس سن مندن هئچ قورخمادين؟! اوغلان - مەمە مەمە...- دىدى. گۆردوم يازىق اوشاغىن قىچىندان باشقا، دىلى دە توتولوب دور. أصليندە قاچا بىلمە دىيىندن دايانىپ قالمىشىدى. ايرەلى يىرييب، اوغلانين كورەيىنى اووراق، اونو تومارلايا-تومارلايا باشىما گلنلردن دانىشىدىم؛ قورخولاچاق بير شئى اولمادىغىنى دىدىم. هاچاندان-هاچانا اۋزونه گليب هراسى كىچدى. ياواش-ياواش هامى مسالەنى باشا دوشوب قورخولارى تۆكۈلدو...

سۆز قورتولونجا دىكر بير آز تومدو. سونرا آياغا قالخىپ -مشه

میکاییل سانیرام تزه دم بیر چای یاپیشار؛ سن بیر سیقارئت چکینجه، من حاضیرلایارام- دئیهرک چایخانایا ساری گتتدی. چایلار ایله قاییداندا، مشه میکاییلا باخیب دئدی:

- بیر ده سن اولاسان منیم نؤمره می اوشاقلارینا وئرمه میش اولمایاسان! بلکه گلن دفعه اولنده منی آرایالار کی، بیردن سنی دیری- دیری آپاریب قبییره سوخمایالار. اینسان همیشه شانسلی اولماز... ایکسی ده اوجا سس ایله گولوب چایلارینی ایچدیلر...

دئمه بيلمه دى هااا!

أسكى^۱ زامانلاردا بير كيشى ييرتيق باشماغىنى، تعمير اوچون
اياق قابى تعميرچىسىنه آپاير. تلسدىي اوچون، تعميرچىدن اياق قابىنى
ييرتيغىنى آنندا تىكىب، وئرمه سىنى ايسته يير. تعميرچى بير آز نازا
قوياندان سونرا راضىلاشيب، اونا بير جوت اياق آلتى وئير:

- زحمت اولماسا اياق قابىلارنى چىخارت، بونلارى گئى. ييرتيق
باشماغىنى دا وئر منه گوروم نه ائتمه ليم! اوزون ده گل قارشىمدا اوتور.
اونوتما هااا، هئچ تعميرچى موشتيرنى اوره يىنين باشىندا اوتوردوب، ايش
گورمز! اما منيم يوكومده قاچاغيم يوخ دور؛ اوتور، باخ گور نئجه
اياق قابىلارنى آلدیغين گوندن ده ياخشى دوزه لده جه يم.

كيشى دوعا-ثانا ائديب بير آلینی دووآرا سؤيكه يه رك، بير-بير
اياق قابىلارى چىخا ديب، اياق آلتىلارى گئیدی؛ ييرتيق باشماغى
تعميرچيه سارى اوزالديب، سونرا كوكسونو اوتوره رك^۲ قارشىداكى
كتيلين^۳ اوستونده اوتوردو.

- يا آلا له مشه دى!

- آلا له كؤمه يين اولسون اوستا!

تعميرچى ييرتيق اياق قابىنى آلب، ايش ماساسىنين اوستونه قويدو.

^۱ أسكى: قديمى، كه نه.

^۲ كوكسو اوتورمك: آه كشيدن.

^۳ كتيل: چهارپايه.

ألینده اولان باشقا آياق قابینی بیر قیراغا بوراخیب، دیزلرینین اوستونه سالدیغی یئکه گؤن تیکه سینی هامارلاشدیراندان^۴ سونرا، کیشینین آياق قابیسینی گؤتوروب ایشینه باشلادی. تعمیرچینین بارماقلاریندا، گؤن تیکه سینین اوستونده گؤزه چارپدیغی کیمی، أسکی چاپیقلار^۵ گؤرونوردو. دوکانین بیر بوجاغیندا، توز باسمیش بیر کؤهنه رادیو حزین-حزین اوخویوردو.

قدیم زامانلاردا، باشماق تعمیرچی لرینین هامیسینین ماسالارینین اوستونده بیر کاسا سو اولاردی. گؤن قورو اولدوغونا باخاراق، اونون اوستونده ایش گؤرمک چتین دیر؛ اونا گؤره ده، گؤنلر یوموشالیب ایشله مک راحت اولماغی اوچون گئجه دن اونلاری سویون ایچینده ایسلادیب، صاباحیسی کسب تیکردیلر. کاسانین سویونون رنگی گئت-گنده دیشهرک، پالیدی^۶ چؤنردی.

او تعمیرچینین ده ماساسینین اوستونده ائله او سایاق بیر کاسا وار ایدی. تعمیرچی ایسلاتدیغی گؤنلری چیخارتمیشدی. گؤنلرین ائتکی سیندن^۷ آلومینیوم کاسانین ایچینده اولان سویون رنگی زیل قهوه رنگینه دؤنموشدو. باشماغینی تعمیره گتیرن کیشینین گؤزو، بیر آن سویا ساتاشاراق اونو دوشاب سانیب تعمیرچییه دئدی:

^۴ هامارلاشدیرماق: صاف کردن.

^۵ چاپیق: اثر زخم، جای زخم.

^۶ پالیدی: قهوه ای کم رنگ، به رنگ بلوط.

^۷ ائتکی: تأثیر.

- اوستا سحر یئمه‌یی یئمه‌میشم. اینانیلماز قدر آجام. نئچه وئیریم او دوشابیندان دویونجا ایچیم؟!

تعمیرچی، کیشینین ساده‌لؤوح‌لییینی باشا دوشوب، -سحر-سحر بیر آز میرت ائدک نه اولار؟- دئییه، کاساداکینین سو اولدوغونو آچیب، آغارتمادان^۸ مینن-مینن ائدیپ دئدی:

- آی کیشی سن اؤزگه‌سی دئییلسن کی! ایکی قیران وئر، ایچه بیلدیین قدر ایچ!

کیشی او ساعات ایکی قیران وئریب کاسانی آلدی. اونو بیر نفسه سون دامجی سینادک ایچیب گئیرندن^۹ سونرا دئدی:

- آمما یوداش! دئمه کیشی ساده‌لؤوح ایدی بيلمه‌دی هااا! دوشابینین هئج دادی یوخ ایدی!..

^۸ آغارتماق: در اینجا فاش کردن، بر ملاء کردن.

^۹ گئیرمک: آروق زدن.

سۆیله یین «عسکرانلی»^۱ بی گلسین...

زیرپی بیر هیئیکلی وار ایدی؛ اوجا بویو، ایری گۆزلی، زَحملی باخیشی، ائشمه بیغلاری، ساللاق دوداقلاری، اؤنه^۲ وئردییی سینهسی، وَرَدیش^۳ گوجونه یوغونلامیش قوللاری ایله بودلاری حریفلرینن هامیسینین جانینا قورخو سالاردی؛ یئکه آلریندن او گونه دک قورتولان اولمامیشدی. پهلوان آدینی داشییاردی؛ آنجاق پهلوانلیق تکجه هیئیکلین زیرپیلیغینا، قوللارین زورونا دئییل کی. پهلوانلیق مرام ایستر. هر آتاسی کور اولانا «کوراولغو» دئییلمز؛ اولاردان بیر چوخو کور کیشینین یاراماز اوغلودور! ائله پهلوانلیغا دا ایگیتلیک گرکدیر؛ اوند ايسه بو اؤزلیک یوخ ایدی. اونا، پهلوان یوخ، یول کسن دئییلسهیدی داها یاراشیقلی اولاردی. شهر-شهر گزیر، معرکه لر قورور، وارلیلاردان باج آلیردی. اولارا دئییردی:

- یا منیم کوره ییمی یئرله اؤپوشدورن بیر حریف تاپیب گتیرین، تاپا بیلمه دیینیز تقدیرده، گرک ایسته دییم پولو منه وئره سینیز!

اؤزو ده نئجه دئیه رلر، دامارا باخیب قان آلاردی؛ شهرین

^۱ «عسکرانلی» ۱۳۴۰-نجی ایللرده تبریزین عسکران بۆلگه سینده یاشامیش رثال بیر شخص دیر. هیئیکل باخمیندان بیر او قدر ده بؤیوک اولماسا، چوخ زکاو تلی، هوشلو بیر ایمنیش. سۆیله نیلن بو ماجرا ايسه دوغرو دان دا ایتتیفاق دوشموش بیر اولای دیر.

یازنینن ایچینده آدب آرکانیندان ایراق اولان سۆزلر خصوصدا عوذر ایسته ییرم. اومارام منی باغیشلا یارسینیز. آنجاق منیم فیکریمجه بو ماجرا دوشوندوروجو بیر اولای دیر. ایچیندن درین معنالی سونوجلارا وارماق اولار.

^۲ اؤن: جلو، پیش.

^۳ وردیش: ورزش، تمرین.

بۇيوكلويونه باخىب، ايسته دىيى باجين مىقدارىنى تەيىن اندردى.
 تبريزه ايلك گليشى ايدى، آنجاق اوراسى، ايپك يولونون قيراغيندا
 يئرلشيب، اُسكى زامانلاردان اُن بۇيوك، اُن اؤنملى^۴ شەرلردن بىرى
 اولدوغونو چوخ ائشيتميشدى. ايشلك بازارينين، باشقا شەرلر ايله اولان
 بۇيوك حجملى آل-وئرينين خبرلرى قولاغينا گئديب چاتميشدى. تبريزه
 گيرن كيمي اؤنجه شهرى دولاندى. گوردويو آداملاردان بازارين يئرلىنى
 اؤيرندى. دوكان-بازارلار هله ايشه باشلاماميشدىلار. قيرقيرالار^۵ چكىلى
 ايدى. دوكانلاردين هاميسينين آچيلماسىنى، آل-وئرجيلرين گئت-گلينين
 چوخالماسىنى گؤزلەدى. قيزيلچيلار بازارىنى، ايسته يىنه چاتماق اوچون
 اُن اويغون يئر اولدوغونو دوشونوب اورايا گئتدى. راستانين دهليزىنه گيرن
 كيمي اوجا بير نعره چكدى. اونون باغىرتيسىنا دوكانچيلار ائشييه
 چىخىب، آچىق آغيزلارلا اونا باخدىلار. آل-وئره گلنلر دوتوب يئرلرينده
 قالمىشدىلار؛ ائله همين اوجا سس ايله ده دانىشماغا باشلادى:

- بىلر! اوزاق يئرلردن شهرينيزه گلميشم؛ منيم سىزىنلە بير قراريم
 اولاجاق دير؛ لاپ دوغروسو، سىزه ايكي تكليفيم وار، بيرىنى
 سئچمه ليسىنيز؛ يا منيم آرخامى يئره گتيره جك بير حريف تاپاجاقسىنيز، يا
 دا منه يوز تومن پول وئرمه ليسىنيز؛ اوچونجوسو يوخدور! كيشى كيمي
 سىزه سؤز وئيرىم، منى يئنن^۶ حريفىنيز اولارسا، سس سىز-سمير سىز

^۴ اؤنملى: مهم، ضرورى. اؤنم: اهميت، لزوم.

^۵ قيرقيرالار: كركره.

^۶ يئنمك: مغلوب كردن، مغلوب شدن.

چکيب يولومو شهرينيزدن گئدرم؛ آنجاق اولمازسا، ايسته دييم پولو
 سؤرسوز-سورغوسوز تاييب وئرمسه نيز، واي حالينيز؛ دوکانلارينيزي
 باشينيزا اوچورداجاغام. اينديليک گئديرم؛ شهرين مئيدانيندا
 پهلوانلارينيزين يولونو گؤزله ييرم؛ کيمسه گلزمسه، آخشام چاغی قاييديب
 پولومو آلاجاغام.

کيشينين سؤزلري قورتولان کيمي يئنه بير نعره چکيب، بازاردان
 چيخيب، مئيدانا ساري گتتدي. دوکانچيلارين جانينا قورخو اوتوروب،
 قيرقيرالاري يئندن آشاغي چکيب، دئدي-قودويا باشلاديلار:

- ايلاهي بو بلا دا هارادان نازيل اولدو؟!

- اونو تانييان وارمي؟

- يوخ! ائشيمه دينيزمي، دئيير اوزاق شهرلردن گلديمش.

- آما من بير شئير ائشيتيمش، دئييشلره گؤره بو پهلوانين ايشي
 شهرلره گئديب، باج آلاق دير. دئييرلر اينديه دک، هئچ يئرده اونون
 کوره ييني تورپاغا سورتن اولماييب! گؤردويونوز کيمي دئو کيمي بير
 شئي دير!

- بي لر! بو سؤزلردن فايدا يوخ دور؛ بير او قدر ده واختيميز يوخ دور! نه
 ائتمه ييميزي دوشونون.

- نه ائده بيليرک؟!

- نه ائده بيله جه ييميز بللي دير! هاميميز دا بير يئره ييغيشاق، بو
 راحتليغا آخشامادک يوز تومن پولو حاضيرلايا بيلميرک. حاضيرلايا
 بيلسک بئله، شهرين آبروسو اورتادا! نه آنلامی وار، اوزاقلاردان بيري گله،

بو آسانلىغا بىزى كسيب گنده؟ بىزدن سونراكى نسيللره نه جاوايىمىز
اولار؟

- ائلهدير. آتجاق كيشى چوخ زورلويما بنزه ييردى. تيريزده اونا حريف
اولا بيلن بىرىنى تانىمىرام. اۋنرين^۷ نهدير قارداش؟!

- دوكانلار بىن قالانىنى دا باغلايىن؛ بۇلوشوب هرهمىز بىر محلهيه
گندهجه بىيك؛ هر يترده بىر گوجلۇ آدم وارسا چاغىرىن گلسين؛ اۋدانا
ياخشى بىر اۋدول^۸ ده بويون اولون. يوز تومن وئرمهلى اولساق دا، اۋز
يوردداشىمىزما وئرسك، باخ منىم اوچون نوش دور. سونراسىنى باخاريق
گۈرهك نئيله بىرىك.

دوكانلار بىن قالانى دا باغلاندى. دوكانچىلار آرالارىندا بۇلوشوب
هرهسى بىر محلهيه گتتى. جاماعات بىر-بىرىنى خبر ائديب، بۇيوك بىر
جمعيت شهرين بۇيوك مئيدانىنا توپلاشدىلار. معركه قورولدو؛ پردهلر
آسىلدى؛ دئدى-قودو چوخ ايدى؛ هرهنين اورتايا قويدوغو بىر باخشى وار
ايدى. بىر سىرا شخصلر ده مرجلشيب، باغلاشماغا^۹ حاضىرلىقلى
گلمىشىدىلر. شهرين بوتون پهلوانلارى، اُن گوجلۇ آداملارى گلدىلر.
گولشلىر^{۱۰} باشلاندى؛ بىرىنچى، ايكىنچى، اوچونجو،... مئيدانا گىرن هر
شخص، ياد پهلوانا ئىنئىلدى؛ كىمسه او قولا حريف دئىلدى؛ بعضى سىنى

^۷ اۋنرى: پيشنهاده.

^۸ اۋدول: جايژه.

^۹ مرجلشمك، باغلاشماق: شرط بندى.

^{۱۰} گولش: كشتى. گولشمك: كشتى گرفتن.

سو ایچمک کیمی، آزاراغینی بیرآز چتین لیکله، آنجاق کی هامینی بیخیردی. آستا-آستا اومیدلر آزالماغا باشلادی، شهرده ده داها آدلیم بیر پهلوان قالمامیشدی؛ یاد پهلوان معرکه ده گزیب، مییدان اوخووردو. یوخاری رقلی اؤدول هامینی وسوسه ائتسه ده، کیمسه داها جسارت ائدیپ ایره لی گنده بیلیردی. بو آرادا بیر جاوان گلین بازار اهلینه ساری گئدیپ، ارنین زورلو بیر کیشی اولدوغونو ایددعا ائتدی؛ نم-نیشاندان کیمسه اونو تانیماسا دا، گلیب او دا شانسینی سیناماسیندا^{۱۱} بیر ضرر اولمادیغی اوچون، دالینجا بیر ائلچی گؤندردیلر. بو آرادا یاد پهلوان دا اوتوروب بیر آز دینجینی آلدی. کیشی گلهمزلیک ائله سه ده، زورلا اونو چکیب گتیردیلر. چوخ نرمال بیرسی ایدی. هئج زورلو بیرینه بنزه میردی؛ جاماعات آراسیندا یئنه دئدی-قودو باشلاندی:

- آششی پهلوان دئیلن بودورمو؟

- سانکی. آما ائله لیینه باخماین بلکه ده بیر فن باجاریر.

- دوزدور، بعضی واختلار یئکه لیک ایشه یارامیر. گرک فن باجارسان.

- منیم کی گؤزوم سو ایچمیر. «اؤلمز خدیجه، گؤره نوه نتیجه»!

یاد پهلوان او جو رو کیشینی گؤرن کیمی اوجادان گولدو:

- آششی منی سُرچه ایله گولشدیره جکسینیزمی؟ زورلو پهلوانلارینیز

بیر ایش گؤره بیلمه دییی یئرده، سانماین بو جوجه نین آلدنن بیر ایش گله!

^{۱۱} سیناماق: امتحان کردن، سنجیدن، آزمایش کردن.

گلین ارىنى آلقىشلايلاق قاباغا ايتىلهيىر، اؤدولون يوخارى رقمىنى
خاطىرلادير، آنجاق كىشى —من هارا، بو دئو هارا!— دئىهر كى گىتمىزلىك
اىدىردى. سونوندا اونو معركه يه ايتىلهيىب، پهلوانين قارشىسىنا سالدىلار.
اونلار، ائله ايلك بىر-بىرى ايله توققوشدوقلارى آن، پهلوان يازىق
كىشىنىن بىر قىچى، بىر قولوندا ياپىشىب، اونو باشى اوستى قالدىرىپ،
بىر-ايكى دؤور فىرلاداندان سونرا، اوجا بىر نىره چكهرك، كورەيى اوستى
يئره چالدى. كىشىنىن سوموكلى شاققىلدايىب، زارىماغا باشلادى. هامى
گولوشوب، او جاوان گلنى ساتاشماغا باشلادىلار:

— آى خانىم! اسلانين بئلى سىندى سانكى.

— اوزولمى، بلكى ده هله آل-قولو قىزىشمامىشدى.

— بلكى بو گون سحر چاغى اونا شىرىن چايىنى وئرمەمىشدين.

— هاهاها

...

گلین ايسى باشىنى يئره تىكىپ، دىل آلتى-آخى بو لووا قالمىش
اؤده مىن چوخ راحت يىخاردى! — دئىهر كى ارىنىن سؤيكەيىنە گىرىپ،
اونو معركه دن چىخارتماغا گىتتى.

يئنه هر شئى پانجا^{۱۲} قايتتى. ياد پهلوان حريف آختارىر، شىهرده
ايسى داها كىمسە قالمادىغىنا باخاراق، بازار اهللى آستا-آستا اومىدلرىنى

^{۱۲} پانچ: ابتدا، اول، نىست.

ایتیریب، نه سایاق ایسته نیلن پولو اؤده یه جکلرینی^{۱۳} دوشونوردولر...

تبریزه گلدی بیر قوی هئیکل،

یئکه پر بیر کیشی ایدی سانکی کل!^{۱۴}

اوجابوی، چاتماقاش، اوزون قوللو،

ایری گۆز، ائشمه بیخ، بۆرکو خوللو،

کوره یی ائتلی، سینه سی قاباریق،

دوداغی پارچا-پارچا بورنو سینیق،

اؤزونه پهلوان آدی قویמוש،

آما یولدان کتچن لری سویמוש،

شهره گیرجک یۆنلدى^{۱۵} دوز بازارا،

نعره لر چکدی باشلادی آزارا،

سؤیله دی: ائی دوکانچی تاجیرلر،

وارلیلار، وارلاری جواهرلر،

ایکی تکلیف وئریم سیزه دوشونون،

یوخسا بازارینیز اوچار، اوشونون^{۱۶}،

یا منه بیر حریف تاپین گولشیم،

مغلوب اولسام، سیز ایله یوخ دور ایشیم،

^{۱۳} اؤده مک: تأدییه کردن، پرداخت کردن.

^{۱۴} کل (kəl): گاو میش نر، گاو میش آخته، پر قدرت، زورمند.

^{۱۵} یۆنلمک (yönəlmək): جهت گیری کردن، سویی رهسپار شدن.

^{۱۶} اوشونمک: ترسیدن.

يا منىم چون حريفيز اولمازسا،
 منى مغلوب اندىب قازانمازسا،
 يوز تومن پول گرک منه وئره سيز،
 يوخسا پيس حاللارى دؤزوب گؤره سيز!
 ولوله دوشدو وارليلار جانينا،
 يئكه گلدى بو سؤز جاوانلارينا،
 يوز تومن چوخ پول ايدى او آنلار،
 ساتيلايدى گرک كى، دوكانلار،
 معركه قوردولار اوجا يئرده،
 آسديلار هر طرفده بير پرده،
 شهرين پهلوانلارى گلدى،
 هاى دوشوب نعره لر ده يوكسلدى،
 «يا على» لر دئىنلرين سايبسى
 چوخودو، آنجاق اونلارين هاميبسى،
 بيرجه ديقه ايچينده مات اولدو،
 توججارين كؤنلونه عذاب دولدو.
 آياغا قالخدى بير جاوان آرواد،
 قاباغا گلدى سۇيله دى ائى داد،
 وار منىم بير اريم قدر-قودرت،
 قارشيسيندا چتين اولار طاقت!
 ائلچيلر گئتديلر كيشى گلدى،

بو زامان پهلوان دا دینجلدی.
 کیشینی گۆردو پهلوان گولدو،
 سوردو: بو سترچه دی یا بولبولدو؟!
 آششی یلر منه حریف اولمور،
 آلریمدن ده کیمسه قورتولمور،
 سترچه ایله عاریم گلیر گولشم،
 بوندا جان یوخدو من بونا دیره شم^{۱۷}،
 بیر، ایکی، اوچ ساینجا او کیشینی،
 آلدی باش اوسته قورتاریب ایشینی،
 کیشیین بلکه ده بئلی سیندی،
 آروادی قورخدو، برک دیکسیندی،
 جاماعات گولدولر اونا بیردن،
 دئدی آرواد بیز ائوده کن هردن،
 گولشر دیک کیشییه گونده بیر آز،
 منی راحت ییخاردی او یاراماژ!
 الغرض چاغ کئچیب زامان دولدو،
 یئکه پر هر کسی اودان اولدو...

بو های-هایدا، هامیین اومیدی سولارکن، خالق ایچیندن بیر
 تجروبه لی، زامانین ایستی-سویوغونو چکمیش، آجی-شیرینی دادمیش

^{۱۷} دیره شمک (dirəşmək): دست و پنجه نرم کردن.

قوجا آياغا قالخېب، بازار اهلينه سارى گلەرك، بئله دانىشماغا باشلادى:
 - بىلر! اوميدىنىزى نيه ايتىرسىنىز؟ هله هئچ نه بيتمه يىب دىر!^{۱۸}
 - قوجا دايى! داها نه انده بيلريك؟ گوردويون كىمى بو پهلوان چوخ
 زورلودور؛ كىمسه اونو يئنە بيلمەدى. شەهرده داها گوجلۇ بىر آدمىمىز
 قالمايىب دىر كى! بىزە وئردىيى مەلتدن ايسە لاپ چوخ توتساق، ايكى
 ساعات قالير. گوردونمو، بو اروادخايلاغى دا لاپ بىزى رذيل ائتدى.
 - گوردوم، گوردوم! آنجاق هر پهلوانى دا قول گوجو ايله يئىمزلر
 كى...
 - نئجه يعنى؟ منظورونو هئچ باشا دوشموروك! نه اولور بىزى باشا
 سال.

- هامىنىز «عسكرانلى» نى تانىيىرسىنىز؛ من ايسە اونو داها آرتىق
 تانىيىرام. او، هوشلو-عاغىللى بىرى دىر؛ منجه بىرىنى يوللايىن اونو
 چاغىرسىن؛ اولانلارى اونا آنلاتسىن. بلكە او عاغلىنىن گوجو ايله بو ايشە
 بىر چارە قىلدى؛ بىر ايش دە باشا سالا بىلمزسە، يئنە دوروم ايندىكىندىن
 پىس اولماياجاق كى. نئجه دئىەرلر: توتار قاتىغىنى يئىەرلىك، توتماز
 سوتونو ايچەرلىك!

تاجىرلرلرلر هامىسى قوجانىن فىكرىنى بىەندىلر. اولار تئزجە بىرىنى
 عسكرانلىنىن دالينجا يوللايىب، گلركن اونا اولانلار حاقدى آيرىنتىلى^{۱۹}
 بىلگىلر وئرمەك بارەدە، قازانىرسا بۇيوك اؤدول آلاجاغىنى دا دئەك

^{۱۸} بيتەك: پايان يافتىن، تمام شدىن.

^{۱۹} آيرىنتىلى: با جزئيات. آيرىنتى: جزئيات.

خصوصدا آرخابینلیق وئرمه‌یینی تاپشیردی‌لار. بو آرادا یاد پهلوان معرکه‌نین ائن-بویونو گزیب سینه‌سینه دؤیه‌رک اؤزونه یئنی حریف آختاریر، هردن باغیرارق دئییردی:

- بی‌لر! داها گوندن بیر شئی قالمادی هااا! یاواش-یاواش واختینیز قورتولور. منه یاخشی بیر حریفینیز یوخ‌دورسا، اؤز-نوزو یورمايین. ایسته‌دیییمی وئرن، یولومو چکیب گئدیم!

تاجیرلردن بیرى دئدی:

- دایان بیر آز پهلوان! آن گوجلو پهلوانیمیز یولدادیر؛ بیر آزادان گلر. سن دینجینی آل؛ قاباقدا آغیر یاریشین واردیر!

یاد پهلوان، بیر آز فیکره دالدى. بیر بوجاقدا اوتوروب نئچه قورتوم سو ایچدی. بو طرفدن عسکرانلینین داليجا گئدن ائلچی اونو تاپیب، نه‌لر اولدوغو حاقدا بیلگی‌لندیریب، مسأله‌نین نه دورومدا اولدوغونو، بو یاریشین پول-پارا بیر قیراقدا، شهرین آبروسو ایله ایلگیلی اولدوغونو آچیقلا‌دی. بازار أهلی، اودارسا اونا یوخاری رقملى اؤدول بویون آلدیقلا‌رینی دئمهی ده اونوتما‌دی.

عسکرانلی ایله ائلچی، بیرلیکده یولا دوشدولر. عسکرانلی یول اوزونو درین بیر فیکره جومدو. ائلچینین دئدی‌کلرینه فیکر ائدیپ، پهلوانا قول گوجو ایله حریف اولما بیلمه‌یه‌جه‌یینی باشا دوشدو. اونسوز دا او هئچ گوجلو بیرى دئییلدی. نه اوجا، یونولموش بویو وار ایدی، نه ده زورلو بیله‌یی؛ هله قالسین کی، یاد پهلوان دال‌بادال یورولمايیب، دایانمادان شهرده‌کی پهلوانلارین هامی‌سینین آرخاسینی تورپاغا سورتوموشدو. دئمک

عسکرانلى دوزگون بىر دئو ايله ياريشماغا گئىردى!

سونوندا، عسکرانلى آرخاسيجا گئدن ائلچى ايله بىرلىكده معركه يه چاتدىلار. پهلوان يوكسلن سسلردن عسکرانلىن گليب چاتدىغىنى باشا دوشهرك، دؤنوب گئرييه باخان كىمى، يئنه ده اوجا سسله گولميه باشلادى. سانكى كؤنلونه قونان آنلاشيلماز قورخو قوشو بىر آندا پىرلايىپ اوچدو.

– ائشى سانكى بو گون، بو شهرده بىز جوجه لرله ده گولشمه لييك؛
شهرينىزىن بىرىنجى پهلوانى بودورمو؟

عسکرانلى هئچ نه دئمه دن معركه يه گىردى. آنجاق گؤز آلتى ياد پهلوانا باخىپ گولومسوندو. اونون اوزوندن سئچىلن گوونجىله^{۲۰} قورخما مازلىق پهلوانى بىر داها دوشوندوردو. اونا گؤره ده بىر آز احتياطلى بو سونونجو ياريشما ياناشماغى اويغون گؤردو. دوكانچىلار يىن عسکرانلى حاقدى گوونجىله دانىشماقلارى دا اونو دوشوندوردو. – (بلكه ده بو كىشى اورتا بويو ايله منىم باجارما ديغىن بىر فن ايشله ده جك، احتياطدا فايدا وار) – دئيه دوشوندوردو.

اونلار آلتى-يئددى متر آرا ايله بىر-بىرىنىن قارشىسىندا دا ياندىلار! توپلانان خالق سس سىزلىدىلر. آرتىق زىنقروو^{۲۱} سسى ايله ياريش باشلاندى. حريفلر، بىر توو گؤز آلتى بىر-بىرىنى سوزوب، يوخلادىلار. عسکرانلى گلر ك دوشونموشدو:

^{۲۰} گوونج (güvənc): اطمىنان.

^{۲۱} زىنقروو؛ زنگوله، جرس.

- (اۇنجه من مئيدانى آله آلدیمسا قازانا جاغام).

اونون اوچون، آرتیق دایانمادان، گۆزونو یاد پهلواندان گۆتورمه دن، چالینان ناغارانین ضربی ایله آددیملا یارق، مئیدانی یاریم دؤور ووروب، اینینده کی کؤینه یینی چیخاردیب، یئر تونله دی؛ یوموروقلارینی دویونله ییب سینه سینه دویه رک، بیر-ایکی تئل سینه سینین توکوندن یولوب، توپوره رک یئر آتدی؛ سانکی بئله لیکله اؤز گوجونو یاد پهلوانین اوزونه چکدی؛ سونرا یئنه ناغارانین ضربینین آهنگی ایله یئرینه قاییتدی. بو دؤنه سیرا یاد پهلواندا ایدی؛ او دا ائله او سایاق یاریم دؤور ووروب، کؤینه یینی اینیندن آلیب، یئر تونله دی؛ اوجا بیر نعره چکیب، یوموروقلارینی سینه سینه دؤیدو؛ یوموروقلانمیش ایکی آلی ایله خئلیک توک سینه سیندن یولوب، یئر توپوره رک گویه سوووردو؛ سونرا او دا ووردوغو یاریم دؤورو گئری قاییدیب، اؤز یئرینده دایاندی. ایکی طرف نئچه ثانیه یئنه گۆز آلتی بیر-بیرینی سوزدولر. بو یول عسکرانلی عکس جهته یاریم دؤور داها فیرلانیب، شالوارینی دا سیییریب، یئر آتدی، بیر ایکی دفعه آشاغی-یوخاری آتیلیب، نعره لر چکیب، یئرینه قاییتدی. پهلوان بیر آز ترددود ائدیپ، آغزی آچیق، شاشقینلیق^{۲۲} ایچینده اونا باخیردی. سونوندا او دا همین ایشلری گۆردو؛ - (حریفین قارشیسیندا اؤزو کیمی دورماق گرکیر)- دئییه دوشوندو.

عسکرانلی یاریم دؤور داها ووردو؛ گۆز لرینی پهلوانا زیلله یه رک

^{۲۲} شاشقین: حیرت زده، سرگردان، گیج، مڭ، متعجب.

دوداغىنىن اوجو قاچدى؛ گولومسونەرک، بىردن شورتونو دىزى اوستونە قدر اشاغى چکىب چۆمبەلەتمە اوتوروب، بىر نوخودجا بۆيۈک ايشىنىدن يىرە قىنقىتدى! سونرا يىنە شورتونو اوستە چکىب، قايدىد بىرىندە دايدى. بىر آن، ھامى شاشىب قالدیلار؛ ناغارانىن سسى کسىلدى؛ سانكى نفسلر دە بىلە، سىنەلردە حبس اولدو؛ پهلوانىن گۆزلرى کللەسىنە قدر آچىلمىشدى؛ بو نە ساياق يارىشما ايدى؟! عاغلىنا بىر شى چاتمىردى. دىقەھ كىچمەدن جاماعات آراسىندا يىنە دىدى-قودو سسى اوجالدى:

- سانمىرام، يىكەلىيىنە باخمايىن؛ اونون ايشى دىيىل!
- منجە پالتارلارنى گۆتوروب گىدەجک.
- ھلە بىر دۆزون گىجلىک باشىندان اوچسون گۆرەك نىلەيىر.
- يانى سىزجە بىر نوخودجا دا يوخودو؟ اوزدن گىدەجک يعنى؟!
- ...

ھرە بىر سۆز آتىردى. عسکرانلى دا گۆزونو دوز پهلوانىن گۆزلرىنىن ايچىنە زىللەيىب، حريف گزن باخىشلارلا گولومسونوردو. سونوندا ياد پهلوان توتومونو^{۳۳} توتوب، شورتونو يارىيا قدر سىيىرىب اوتوردو؛ حىرىنىدن وار زورونو ووروب بوتون قارنىنداكىنى يىرە بوشالتدى! - (حريفىن قاباغىندان قاچماق اولارمى؟ بىرىنە ايكى گلەمسىن غلبە چالىنارمى؟ بو يول گل گۆروم سىن كىمسىن، مىن كىمم!) - كىمى فيكىرلر

ده باشیندا فیرلاندی. سونرا دا شورتونو یوخاری چکیب، یئرینه قاییتدی. یئنه توپلاناں جاماعات سوسدولار. ناغارا یئیندن چالماغا باشلادی. عسکرانلی ناغارانین ضربی ایله هاوالاناراق، نوخودجا قینقیتدیغنین باشینا قاییتدی. اوتوروب بارماقلارینین اوجو ایله اونو یتردن گۆتوروب، گۆزلینی یومارق، آغزینا قویوب بیر آن ایچینه اوددو!

جاماعات گولوشمه‌یه، بیر سیراسی چیمچشیب^{۲۴} دئینمه‌یه باشلادیلار. ناغارانین سسی بیر داها کسیددی. آغیر بیر سس سیزلیک چئوره‌یه چۆکدو. تک ائشیدیلن سس، یاد پهلوانین ایشینه ساری آتیلان تیتیک آدیملارینین سسی ایدی. او، گلیب تایاسینین باشیندا دوردو. قاشلاری اینانیماز درجه‌ده چاتیلیمشدی؛ نه ائتمه‌یین شاشیب قالیمشدی. آخی بو قدر آغیر یوکو، نه ائتمک اولاردی؟! قان، آستا-آستا کلله‌سینه توپلاشیپ رنگی چوغوندور کیمی قیزاردی. او یئکه‌لیکده هئیکلین گۆزلینده یاش یووارلاندی^{۲۵}. سونرا بیر نعره چکیب، گئری دؤندو؛ چۆمبه‌له‌تمه یئر اوتوروب، عسکرانلینی سؤیوب یامانا باساراق، ساغ آلینین آرخاسینی یئر چالیب، یئیلدیینی بویون آلدی. سونرا پالتارلارینی گۆتوروب اینمز-دینمز معرکه‌دن اوزاقلاشدی. او یول کسن تبریزدن چیخب گئتدی. بیر داها دا دؤنمه‌دی. جاماعات ایسه معرکه‌نین ایچینه تۆکولوب، عسکرانلینی آلرینین اوستونه آلاراق، بیر-ایکی دؤور معرکه‌ده گزدیردیلر...

^{۲۴} چیمچشمک: چندش آمدن، مشمئز شدن.

^{۲۵} یووارلانماق: جمع شدن، گرد آمدن.

ايرهلى گلدی بیر قوجا عاقیل،
 سۆيلىه دی سیز دایانمادان عاجیل،
 یوللايین عسکرانلى بى گلسين،
 بو قولون حاققینی اونا وئرسين،
 قول گوجونده اونا حریف یوخسا،
 عاغلینى عسکرانلى قوللانسا^{۲۶}،
 بلکه ده او حریف اولا بو قولا،
 هوشلودور، من اینانمیشام اوغولا.
 گئتدیلر عسکرانلى یا دئدیله،
 اوز وئرن هر نه وارسا سۆيلىه دیله،
 یول گلرکن او چوخلو فیکر اتتدی،
 اؤز-اؤزویله دانیشدی ذیکر اتتدی،
 شهرین آبروسو اونا باغلی،
 گرکیدى او ایشله ده عاغلی،
 یئتیشرکن یئنه او معرکه یه،
 پهلوان گولده باخجاغین گئرییه،
 عسکرانلى باخیب گولومسوندو،
 بیر یاریم دؤور وورجاغین دؤندو،
 کۆینه یینی چیخارتدی لوت اولدو،

^{۲۶} قوللانماق: بکاربردن، بهره جستن.

سینه‌سیندن بیر-ایکی توک یولدو،
 پهلوان دا همین ایشی گۆردو،
 گۆزلرین زیلله‌دی اونا، دوردو.
 گۆز-گۆزه دوردولار اوزاق-اوزاغا،
 هانسی جورأت اندر گنده قباغا؟
 عسکرانلی اوجالتدی بیر نعره،
 شالوارین دا چیخارتدی آتدی یئره،
 پهلوان دا چیخارتدی شالوارینی،
 اؤپدو قویدو قیراغا اؤز عارینی،
 عسکرانلی یئنه بیر آز گزدی،
 گۆز آتیپ پهلوانی بیر سئزدی^{۲۷}،
 ایللیب شور تو چکدی دیز اوسته،
 پهلوان مات باخیردی دم‌بسته،
 اوتوروب بیر نخودجا قینقیتدی!،
 بو ایش ایله او شرری سیرتیلندی،
 پهلوان گۆرجه‌یین بو ماجرانی،
 دوشونه بیلمه‌دی نه‌دیر قالانی،
 او دا ایلشدی دوردوغو یئرده،
 آز گتیرمک اولارمی بو یئرده؟

^{۲۷} سئزمک: متوجه شدن، زیرچشمی نگاه کردن.

يئكە قارنين بوشالتدى ھر نيينى،
 بورنونو توتدو دويماسين اييينى،
 عسكرانلى بير آز گولوب دۇندو،
 ايشيني قويدو اغزا اودقوندو!
 پهلوان مات باخيردى اۆز پو...نا،
 چيمچشيردى اونا باخا، توخونا،
 بير كيلوجان قويوب يئره تايانى،
 ھاراسيندان يئيه قالا ھايانى؟!
 قاش-قاباق ساللاميشدى اۆز ايشينه،
 چكە بيلميردى اۆز پو...ن ديشينه،
 قايدىب عسكرانليني سۇيدو،
 آلينين آرخاسين يئره دۇيدو،
 اودوزوب دور، اونو قبول اتتى،
 گئيينيب پالتارين چيخىب گئتتى.

ھر زامان قول گوجو ايشه گلمز،
 عاغىلى ايشلەدن ضرر گۆرمز،
 فيل گۆرەرسن بۇجک^{۲۸} آلينده أسير،
 اوندا كى، فيكر گۆسترە تائير،
 سونا چاتدى بو سۆز يوروم سيزدن،
 بو دا بير خاطيره يدى تبريزدن...

^{۲۸} بۇجک: حشرە.

شانس...

آدامین هئچ ایشی دوز گلمیردی؛ نئجه دئیهرلر، قیزیلا آل آتیردیسا میس اولوردو. کور کیشیین شیل قیزینا ائلچی گئدیردی، آما او قیز دا اونو بیه نهمیردی. ایشلرین دوز یولا گیرمه سی اوچون هر ه اونا بیر یول گؤستریردی: بیر کیتاب باشی آچدیرمانی اؤنریردی، باشقاسی ایستیفار ائدیپ داها آرتیق عیادت ائتمه یی تاپشیریردی، بیر آیرسی، یوخسوللارا احسان ائدیپ اولارین خئیر دوعاسینی قازانماغی فایدالی گؤروردو، نه بیلم او بیرسی ده آچیلیشی آتا-آناسینا داها آرتیق قوللوق ائتمکده بیلیردی...

اوغان بو ایشلرین هامیسینی یئرینه یئتیردی؛ کنده، بؤیرونده دوعا کاغذی قویلانمیش قیر قالمادی، عیادت اوچون مسجدیه بیر او قدر تئز گئدیپ یوبانمیشدی کی، مسجدین خادمی آلیندن جانا گلمیشدی؛ بعضی سحرلر قاپینی اوزونه آچمیردی بئله! آلینده اولان هر نه یینی یوخسوللارا پای-پولوش ائتدیکدن سونرا، یاواش-یاواش داها اؤزو ده یوخسوللار توپلومونا^۱ قاتیلیب، احسان وئرمه لی یوخ، خئیرات آلمالی اولموشدو؛ آتا-آناسیندان دا خئیر دوعادان باشقا بیر سؤز ائشیتمه دیینه باخمایاراق یئنه ده ایشلرینده آچیلیش گؤرسنمیردی. هئچ بیر ایشی دوز گلمیردی!

^۱ توپلوم: جامعه.

گونلرین بیرینده تک اوتوروب، فیکیره جومموشدو . - اوغلان اولمایا
 سنین شانسین یاتیب- دئیهن یولداشینى بیر آن یادینا سالدی. او زامان
 اونون سۆزلری اونا چوخ گولونج گلیمیشدی. آنجاق آرتیق داها گولونج بیر
 سۆزه بنزه میردی. آستا-آستا او سۆزلره اینانماغا باشلایردی. گئدیپ
 همین دوستونو تاپیب، اونولا شانسین یاتماغی حاقدا دانیشماق قرارینا
 گلدی. اوتوردوغو یئردن دیک قالخیب، یوبانمادان یولداشینین سوراغینا
 گتتدی. ائوین قاپیسینا چاتدیقدا، دایانمادان قاپینی کسینتی سیز دؤیدو. بیر
 آزادان قاپی آرخاسیندان دوستونون سسینی ائشیتدی:

- کیمن؟ بس قاپینی نییه سیندیریرسان؟! (سانکی باش گتیریب!)
 - منم دوست، آچ قاپینی...

قاپی آچیلدی. اوغلانین رنگی قاچمیشدی، گۆزلری حقه دن چیخان
 کیمی ایدی. یولداشی اونو گۆرجک دوروخدو. سالام وئریب سوروشدو:
 - آی اوغلان نه اولوب؟ اولماسین آزار. نییه بئله تۆوشه ییرسن؟ بیرى
 سنى قووالا ییمى؟...

- سالام دوست، نئجه سن؟ قورخما بیر شئی یوخ دور. آنجاق...
 - دایان بیر آز. بورادا اولماز، ایچرى گل، آزاجیق دینجل، نفسین
 یئرینه گلندن سونرا دانیشاریق.

بیرلیکده ایچرى کئچدیلر. حیطین او باشیندان یولداشینین آناسینین
 سسى ائشیدیلدی:

- آی بالا کیم ایدی قاپی دؤیه ن؟
 - آنا اؤزگه سی دئیل، یولداشیم دیر. بیز بو باشداکی اوتاقتا اوتوروروق؛

زحمت اولماسا بیزه بیر چایدان چای دمله، بیر آزادان گلیم گۆتوروم.

- اولسون اوغول. راحت اولون، یولداشینا دا سلام یتتیر.

اوغلان دا اوجادان سلام وئریب -چوخ ساغ اولاسان آنا جان، زحمت وئیریم- دئییب، دوستو ایله بیرلیکده ایجری کئچدیلر. بیر آز اورادان-بورادان دانیşاندان سونرا، یولداشی گئدیپ سینیده بیر چاینیک چای، ایکی ایستیکان، بیر قندقابی قند گتیریب، چایلاری ایستکانا تۆکه رک دئدی:

- یاخشی دوستوم، ایندی راحت دانیş گۆروم نه اولوب؟ سنی بو حالا سالان نه دیر؟

- نه اولماسینی سن مندن یاخشی بیلیرسن؛ ائله همین اُسکی درد دیر. ایشلریمین دوز گلمه دییندن خبرین واردیر. هر کس هر نه دئدی ائتدیم، آنجاق بیر فايدا گۆرمه دیم. بو گونلر سنین سۆزلرین هئی قولاغیمدا جینگیلده ییر. یادیندادیرمی بیر گون منه -بلکه شانسین یاتیب، گئدیپ اونو تاپیب آییلتمالیسان- دئمیشدین؟ او زامان من سنین سۆزلرینه گولدوم. آنجاق داها دوداقلاریم گولمه یین نه تهر بیر شئی اولدوغونو اونودوب. یاواش-یاواش سۆزلرینه اینانماغا باشلامیشام. آما آخی اولا بیلر می ائله شئی؟ دوغرودان دا شانس دئییه بیر شئی وارمی، یوخسا او گون منله ظارافات ائدیردین؟

یولداشی گولومسونوب دئدی:

- قولاق آس دئییم؛ ائشیتدیییمه گۆره، اینسانلارین هامیسی دونیادا ائکیز یارانیلار، اۆزلری ایله شانسلاری. اینسانلارین شانسلارینین

هامیسی بیر یئرده توپلانیب، اۆلکه میزین باتیسیندا^۲ چوخ اوزاق بیر مکاندا یاشاییرلار. اۆزلرینه اۆزل اولان بیر اۆلکه لری ده بئله واردیر. بیزلرین ایشینین نه قدر یاخشی کئچیب-کئچمه مه سی، دوز گلیب-گلمه مه سی ده ائله اونلارین اورادا نه دورومدا اولدوقلاری ایله باغلی دیر. بیرینین شانسى چالیشقان دیرسا ایشلری ده چوخ گوجلۇ ایره لی گئدیر، عکسینه بیرینین شانسى اورادا یاتمیش دیرسا، ایشلری سنین کیمی پیرتلاشیب، دوز گلمز.

- او دئدییین یئری نئجه تاپیب تانیمالیام؟

- دئدییم کیمی باتیا گئده جکسن. نئچه اۆلکه دن اۆتدوکدن سونرا اوجسوز-بوجاقسیز بیر آران^۳ا چاتاجاقسان. اورادا چوخلو اینسان گۆره جکسن؛ بیر سیراسینی آغیر ایشله مکده گۆروب، باشقالارینین یاتدیغینی گۆره جکسن. ایشلینلری بوش وئر؛ یاتانلارین ایچینه ایه تام اۆزونه اوخشیان بیرینی آختار؛ اونو تانیماغینین دا یولو بودور: سانکی گوزگوده^۴ اۆزونه باخیرسان کیمی گۆرونه جک؛ او سنین شانسین دیر. اونو آییلدیپ قایتسان یئر...



اوغان صاباحیسی گون، اثرته دن حاضیرلیقلاری یئرینه یئتیردی. یولونا گرکن پالتارینی، اۆزو ایله آپارا بیله جه یی یئمکلری، بیر آز دا یول خرچی اوچون پول گۆتوروب یولا دوشدو. داینامدان یول گئدیردی؛

^۲ باتی: غرب.

^۳ آران: جلگه، دشت، زمین پست.

^۴ گوزگو: آینه.

یئتیشیدی شهرلرین، کندلرین باش بیلن لریندن مقصدی حاقدا سوروشوردو. نچه هفته یول گئندن سونرا، بیر مئشه یه^۵ چاتدی. آخسام ساعاتلاری ایدی. سیخ آغاجلارین کۆلگه سی، مئشه یه گئجه گورونتوسو سرمیشدی. بیر ساعات قدر یالقیزجاسینا یئریدیکدن سونرا، او گئجه گورونتوسو اوغلانی بیر آز دیکسیندیریردی. قورخوسوندا ایشقیرماغا باشلامیشدی. هر دن اوجا سسله، های-هارایلا بیر شیلر اوخویوردو. - قوی مئشه ده بیر تیجی بیر حیوان اولورسا، سسیمدن قورخوب قاچسین- دئییه دوشونموشدو. آینه ده بیر جانلی دینه نک گؤتورموشدو. بیر آن، خافخافدان^۶، آغاجلارین بیرینین آرخاسیندا ائرکک بیر آسلان ائشییه آتیلیب باغیردی؛ دوداقلارینی چکه رک، ایتی دیشلرینی آغارتدی. بونونون دولغون توکلری باغیردیقا بیز-بیز دوروردو. گؤؤده سینی آرخا طرفه بیغراق آتیلماغا حاضیرلاشدی.

اوغلانین قیچلاری تیرمه مه یه باشلادی. اوزونون رنگی آتدی. بیر آن قاقماغی دوشوندو، آنجاق قاقماغا هم گئچ اولموشدو، هم ده قیچلاریندا آرخاسیجا گله جک گوج قالمادیغینی دوشوندو. قیچلاری قیفلانمیشدی. بو فیکیرلرین هامیسی گؤزونو یوموب-آچینجا بئینیندن کئچدی. چاره نی دایناماقدا گؤروب، ایستر-ایستمزدن آئینده کی دینه نی باشی اوستونه قووزایاراق، آسلانا ساری اوزولمک دورومونو گؤستردی. بو حالدا ایشلر ترسینه دؤنوشدو؛ اوره یی آز قالا یئریندن چیخان اوغلان، دینه نی

^۵ مئشه: جنگل.

^۶ خافخافدان: یکهوی، بطور ناگهانی.

باشينين اوستونه قالدیرینجا، آسلان یوماق کیمی بیر یئره ییغیشدی! گۆزلرینین اوجوندان قورخان آداملار کیمی اوغلانا باخیردی. سسینین تونو دیشدی. کۆتک یئمیش ایت کیمی حزین-حزین اولاماغا باشلادی. سانکی اوغلانا یالواریردی؛ بلکه -نه اولور منی وورما، یازیغام!- دئییردی. قورخانلا قورخودانین یئری دیشمیشدی. بو حالی گۆروب اؤزونو آله آلان اوغلان، آسلانین دورومونو گۆرونجه هم شاشدی، هم ده جورأت لنیب ایرهلی یئرمهیه باشلادی؛ یئرییه رکن ده اؤزو ایله بیر شئیلر دوشونوردو: (باشینا داش دوشسون بئله آسلانین! هله پیس-پیس اوتانمادان اؤزونو مئشه نین سولطاننی بیلیر.) آسلانین باشی اوستونه یئتیشرکن، آسلان دالی-دالی یئرییه رک یالوارماغا باشلادی:

- نه اولور منی اؤلدورمه آی ایگید! عالیه مه رحم ائت، بالالاریمی آتاسیز ائتمه!

اوغلان، قورخاق آسلاندان اونا بیر زیان گلمه یهجه ییندن آرخا یین اولونجا، دیه نه یینی آشاغیا ائندیردی. غضبله اونون اوستونه باغیرراق دئدی:

- باشینا داش دوشسون بئله آسلان! نییه بو قدر قورخاقسان؟ دوزدور قورخاق اولماسایدین ایندی منی تیکه-پارچا ائتمیشدین، آنجاق بئله قورخاقلیغین دا هئچ خوشوما گلمه دی...

- هئچ اؤزوم ده بیلیمرم اوغول. سن حاقلیسان، آنجاق اؤزوم دورومودان راضی قالدیغیمی دوشونورسنسه یانیلیرسان. اوزون زامان دیر بو درد منده تاپیلیب. مئشه ده آبیردان-حیادان دوشموشم. داها چاققالاردا

مندن قورخمور! اونلار مندن قورخماق یئرینه، یالنیز گزه رکن اونلاری
گۆره رسم، آلریندن قاچمالی اولورام. منی قووالاییب، سونرا دا دایانیب
یالیم گولورلر. عالیله مین یانیندا دا باشیم آشاغی اولوب، اوشاقلاریمین
اوزونه دیک باخا بیلمیرم. دئی گۆروم سن کیمن؟ هارادان گلیب هارایا
گئدیرسن؟

- من ده بیر آلاسه بنده سییم. سنه تای منیم ده بیر دردییم واردیر.
اوزون زامان دیر ایشلریم دوز گلیمیر. هر نه ائتدیم، بیر فایداسی اولمادی؛
سونوندا یولداشلاریمدان بیرری منه شانسیمین یاتدیغینی دئییب، بیر
آدرس ده وئردی. ایندی شانسیمین سوراغینا گئدیرم.

- هه، من ده او حاقدا بیر شیئر ائشیتیمیشم. دئیهرلر اینسانلارین
اکیزی اولور. ایسته سن سنه مئشه دن چیخینجا یولداشلیق ائدرم. آنجاق
نه اولور سن ده شانسینی تاپسان، منیم ده دردیمن درمانینی اوندان
سوروشاغین حاقدا منه سؤز وئر!

اوغلان آسلانلا راضیلاشیب، بیرلیکده یولون آردینی توتدولار. نئچه
گون مئشه ده یئریدیکدن سونرا مئشه نین سونونا چاتدیلا. اوغلان
آسلانلا ساغوللاشاراق، اونون دا دردینین علاجینی سوروشاغینا، بیر
داها آرخابینلیق وئردی.

نئچه گون داها اؤتدو. گونلرین بیرینده، آخسام چاغی اوغلان، اوجو-
بوجاغی گۆرونمز بۆوک بیر تارلایا^۷ چاتدی. تارلانیق قیراغیندا، ائنلی بیر

^۷ تارلا: مزرعه، کشتزار.

چاين گور آخماغينا باخمياراق، گۆزلەنيلن قدر آباد دئىلدى. آغاچلارنى يارپاقلارنىن رنگى آلا-بولا ايدى. يئردەكى يىتگىلردە كئفسىزلىك بىللى ايدى. تارلانين اورتاسىندا بىر ائو گۇرونوردو. اوغلانين يورغون گۆزلىرى ائوين ھندەورىندە ياشلى بىر ادامى سئچدى؛ اونا ياخىنلاشىپ سالام وئردى:

- عليكم السلام.

- آلاھ قووات وئرسىن دايى.

- ساغ اول بالا، خوش گلدن.

- خوش گونونە گلک دايى.

- اوغول سن ھارا بورا ھارا؟ آخشامىن بو گون باتان چاغى ھارادان

گليب، ھارايىا گئدىرسن؟! يامان يورغون گۇرونورسن آى اوغول!

- اوزاقلاردان گليرم آى دايى. شانسىمى آختارماغا گئدىرم.

- بوراسى، بو اۆلكەنىن سىنىرى سايىلىر. بورادان سونرا نئچە گونلوک

يول گئدىنچە ھىچ آوادانلىق يوخدور. گل بو گئجەنى منە قوناق اول. من

دە يالقىزام. اوتوروب بىر آز دانىشىپ دردلىشريك. بىر تىكە يىوان

چۆرەيىمىزى دە دادارسان.

اوغلان آلاھدان آختاران كىمى راضىلاشىپ، ايكىسى دە آل-

آياقلارىنى يويوب ائو گئدىلر. ائو يىبەسى سوفرنى آچىپ ائويندەكى

يئمىكلردن سوفرىە گئىردى. يئدىلر، اىچدىلر، سوفرىە يىغىشىلانندان سونرا

دا دانىشماغا باشلايدىلار:

- اوغول يانىلماسام شانسىنى آراماغا گئدىيىنى سۆيلەدېن؛

اښه دیرمی؟

- هه دای. دوز اښیتیمیسن. دوغروسونو آختارسان، سون واختلار
ایشلیریم هئچ دوز گلیمیر. بیرى دئدى بلکه شانسن یاتیب، سونرا دا
شانسلار اؤلکه سینین آدرسینی وئریب منی یولا سالدی؛ من ده گئدیرم
اونو تاپیب اویادام.

- آی بالا من ده رحمتلی آتامدان اښه بیر شئی اښیتیمیشم.
بیلیرسنمی منیم ده بیر دردیم وار، شانسنینی تاپسان، اولارمی منیم ده
دردیمین درمانینی اوندان سوروشاسان؟

- نه دن اولماسین آی دای. من بو گنجه سنین دوز-چؤره یینی
داددیم. ایندی داها بوینومدا حاققین واردیر، آما مسأله نه دیر؟ آنلاتسانا...
- بیلمیرم گلرکن فیکیر وئردین یا یوخ، بو تارلا بیر ده یانینداکی باغ،
بول محصول وئرمک اوچون گرکن هر شئی یییه لندیی حالدا، هر نه
قدر ده زحمت چکیرسم، منه گؤزله نیلن قدر محصول وئرمیر. باخ
گۆردویون کیمی سویوموز هم شیرین هم ده بول دور؛ تورپاغینین دا سؤزو
یوخ دور. بورانین هاواسی دا گؤزل هاوادیر، نه چوخ سویوق، نه ده چوخ
ایستی. بوتون قونشولاریم تارلا لاریندان بول-بول محصول گۆتوره لر.
من ده حسرتله دوروب اونلارین حاصیلاتینا باخیب، اؤز حالیما کؤؤره لرم.
حاصیلاتین ییغیشیلان واختی، ایشسیزلیکدن قونشولارا یاردیم ائدیرم،
بلکه ایل بویو کتچینه جه ییم اوچون منه ده بیر شئیر وئرسینلر. تکجه
منیم یئرلریمده بیر شئی اولمور. هامی دا بو ایشه مات قالیب دیر. کیمسه
ده نه دنینی بیلمیر. چوخ آجینا جاقلی دورومدا یام...

قوجا دایی بو سۆزلری دانیشدیقجا آزاجیق گۆزلری یاشاردی. ایللردن
بری اوره یینه آغیرلیق ائدن دردی دئشیلیب، اؤزونو گؤستردی.
- باشیم اوسته دایی؛ آرتیق اوزولمه یینه گرک یوخ. شانسیمی
تاپارسام، سنین ده دردینین درمانینی اوندان سوروشارام.
- آی رحمت اؤنلرینه!

اونلار بیر آز دا دانیشانلار سونرا یاتدیلا. صاباحیسی سحر یئمهیینی
ده بیرلیکده یئدیله. قوجا دایی اوغلانین یولونا دا بیر آز یئر-یئمهل
قویوب، یئنه دؤنه-دؤنه مسأله سینین سوروشاغاغینی اوغلانا
خاطیرلاندان سونرا، اونو یولا سالدی. قوجا داینین دئییمی کیمی،
اوغلان نئچه گوندن سونرا اؤلکه نین سینیرلارینا چاتدی. سینیردان
کچرکن، سینیر کئشییینه دوران ایکی عسگر اونا یاخینلاشدیلار. اوندان
کیم اولدوغونو، هارادان گلیب هارایا گئتدییینی سوروشدولار. اوغلانین
یانیتلارینی^۸ ائشیدینجه اؤنجه گولمه یه باشلا دیلار، اونلارلا ظارافات
ائتدییینی دوشوندولر. آنجاق اوغلان دوغرودان دا شانسینین دالینجا
گئتدییینده قرارلی اولدوغونو بیلدیردیکده، اوندان شوبهه لیب غضبلندیلر.
اوغلان، اونلاری آله سالدیغینی، نئجه دئیهرلر، یوکونده قاچاق اولدوغونو
تخمین ائتدیله. سونرا دا شوبهه لرینه دایاناراق اونون آلرینی باغالییب،
اؤلکه نین حاکیمینین قوللوقونا آپارماق قرارینا گلدیلر.

عسگرلر آلی-قولو باغلی گیروو شاهی قهرینه یئتیریب ایچری

^۸ یانیت: جواب، پاسخ.

گیردیلر. قصردن غریبه سسلر ائشیدیلیردی. سانکی ایکی نفر ساواشیر، اوجا سسله بیر-بیرینین اوستونه باغیریردیلار. ایچ-ایچه اوتاقلاردان، اوزون سالونلاردان کئچیب دربارا یئتیشدیلر. اوغلان آددیمینی ایچری قویار-قویماز، شاهین قارشیسیندا ایکی قات آییلیب حؤرمه ائله دی. گۆزه تچیلر مسألنه شاهین قوللوغونا چاتدیردیلار. سونرا شاه اونلاری آزاد ائدیپ، أسیر اوغلانلا تک قالدی. اؤزو ده بیر داها اوغلانلار کیم اولدوغونو، هارادان گلیب هارایا، نه آماجلا گئتدییینی سوروشدو. اوغلان دئدی:

- شاه ساغ اولسون! عسگرلره دئیمیشدیم، اونلار دا سیزه دانیشدیلار.

- اولسون اوغول بیر داها اؤزوندن ائشیتمه یی سؤیرم.

اوغلان بیر داها کیم اولدوغونو، هارادان گلیب هارایا گئتدییینی، سفرینین مقصدینی آیریتیلاری ایله شاه ائلاتدی. شاه، اوغلانین دوزلویونو باشا دوشوب، اونون دئدیکلرینه اینانماغا باشلادی. اؤزو اونون آللرینی آچماغلا مشغول اولدو. اوغلانین آرخاسی اونا اولدوغو حالدا اونا بئله دئدی:

- سنه یولونون آردینی توتماغا ایجازه وئرهجه ییم. باشقا اؤلکه لرден

کئچدییینده، بیر چتین لیین اولماسین دئییه، سنه بیر کیملیک ورقه سی^۹ ده وئریلمه سی حاقدا فرمان وئرهجه ییم. قالان یولونو راحت گنده جه بین اوچون ده سنه بیر یاخشی آت وئرهجه ییم، اؤلکه میزدن راحتلیقلا

^۹ کیملیک ورقه سی: کارت شناسایی.

سوووشماغینا، کیمسه یولونو کسمه‌مه‌یی اوچون ده یانینجا ایکی عسگر
قوشاجاغام، آنجاق بیر شرطیم وار...

- سیز جان ایسته‌یین. شرطینیز هر نه‌دیرسه گۆزوم اوسته قویارام.
- ایندی یاخشى قولاق آس! دوغرودان دا ائله بیر یئر اولورسا،
شانسینی تاپیب اویدارسانسا، منیم ده بیر سورغومو اوندان سوروشماغینی
ایسته‌ییرم.

- شاه ساغ اولسون، قولاق آسیرام.
- اونجه دئ گۆروم سنه گوونه^{۱۰} بیلریمی؟ آخی دئیجه‌کلریمی سیرر
کیمی اوره‌یینده ساخلاماغی ایستیه‌جه‌یم.

- البته! باشیم گئدر، سۆز وئرمه‌رم. لاپ آرخاین اولای بیلر سینیز...
شاه اوغلاندان آیریلیب، اونجه قاپییا طرف گئدیپ، قاپی آرخاسیندا
کیمسه دایانمادیغیندان آرخاین اولاندان سونرا، پنجره‌یه ساری گئتدی.
أللرینی آرخاسیندا بیرلشدیریپ، درین بیر آه چکدی؛ سونرا بئله دانیشماغا
باشلادی:

- رحمتلی آتام اوئلندن سونرا، من بو اؤلکه‌نین شاهى اولموشام، آنجاق
هئچ زامان آتامین ایقتیداری منده اولماییب‌دیر. آلمین آلتینداکی‌لار، باش
وزیردن توتدو دربارین قوللوقچولارینادک، آمرلیمی چئینه‌ییر، گرک‌دی
کیمی یئرینه یئتیرمیرلر. گون اولماز درباردا بیر-بیری ایله ساواشماسینلار.
وئردیییم جزالاردان دا بیر فایدا گۆرمه‌میشم. شانسینی تاپارسا منیم ده

^{۱۰} گوونمک: اعتماد کردن.

دردیمند اونا دانیش. اوندان منیم نه ائده بیلجه ییم حاقدا، دویونومون
نئجه آچیلجاغی باره ده سوروش!

اوغلان باش اوسته دئدی. شاه باش وزیرینی چاغیرتدیریب، اوغلانی
اؤزونون اؤزل قوناغی کیمی وزیره تانیتدی. اوغلانا، اؤلکه ده قوناغ
اولدوغو گونلر سوره جینده، دینجلمه یی اوچون اؤزل بیر یئر ایختیصاص
وئرلمک باره ده فرمان وئردی؛ هم ده ألوان یئمکلرله قوناغا قوللوق
ائدیلجه یی، قوللوقچولار هر آن قوللوغوندا حاضر اولماغی حاقدا
تاپشیردی.

ایکی گون سونرا، سؤز وئریلدیی کیمی، قوناغین کیملیک ورقه سی،
بیر کهر آت، بیر آز یئیجه ک، بؤیوک رقلی یول خرجی، بیر ده یول
اوزونو باشقا گرکن شئیر، قصرین دروازاسیندا حاضر ایدی. شاه اؤزو
اونلاری قوناغا وئریب، اؤلکه سینده داها بیر چتین لیکله قارشیلانماغی
اوچون، ایکی عسگری ده اؤلکه نین قارشى طرفده کی سینیرلارینی
کئچینجه اوغلانا قوشدو. اونلار نئچه هفته دایانمادان یول گئندن سونرا
سینیرا چاتدیلا. شاهین اوغلانا قوشدوغو عسگرلر اوندان ایریلیب،
اوغلان شاهین قول قویدوغو کیملیک ورقه سینی گیردی اؤلکه نین
گۆزه تچیلرینه گۆستریب یولونون آردینی توتدو.

ألغرض آدام بیر نئچه اؤلکه دن ده کئچندن سونرا، بیر گون بیر
گدییه ^{۱۱} یئتیشیب، گدییین زیروه سینه چیخدی. گدییین آرخا طرفین

^{۱۱} گدیک (Gədik): گردنه، بلندی کوه.

آشاغیسیندا، اینسانلارلا دولو بۇيوك بير آران گۆردو. اینسانلارین بیر چوخو بئل-کولونگ آلرینده ایشله مەیه مشغولودولار. باشقالاری آل-آله وئریب رقص ائیدیردیلر. قادینلار قازانلار آسیب یئمک بیشیریردیلر. اوشاقلار قووالا-قاچیدیدايدیلار. بو آرادا بیر سیرالاری دا یاتمیشدیلار. اوغلان اۆز-اۆزو ایله -(شانس آداملاری اۆلکه سی ائله بوراسی اولمالی دیر)- دوشوندو. او یانیلمامیشدی. سونوندا آیالارلا اختاردینی مقصده وارمیشدی^{۱۲}. آشاغی ائنیب، آداملارین ایچیندن کئچرک، یاتان اینسانلارین آراسیندا اۆز ائکیزی آراماغا باشلادی. یولداشینین سۆزلیرینی نظریندن کئچیرتدی؛ -او، سنین گوزگویه دوشن شکلین کیمی دیر- دئدیینی یادینا سالدی. ایشله یین شانس آداملاری سانکی هئچ اونو یاخود بیر-بیرلرینی گۆرموردولر. نچه گون اونلارین ایچینده گزندن سونرا، یاتمیش بیر شانس آدمینی گۆردو. اونو گۆرونجه بیر آن هویوخدو؛ سانکی اۆزو ایدی اورادا یاتیب دیر! هئچ اۆزونوزو یاتمیش حالدا گۆروبسونوزمو؟! بیر آن غضبدن گۆزلیرینین اۆنو قارالدى. چتین لیکله اۆزونو آله آلدی. اۆزو ایله دوشوندو:

- (من بو قدر چالیشیردیم، جانیم چیخیردی، آجی چکیردیم، دئمه بس بو اینصافسیز شانسیم یانديغیندان ایشلیریم دوز گلیمیش!)
 یان-یۆره یه^{۱۳} گۆز گزديریب، بیر دولچا تاپدی؛ اونو سو ایله دولدوروب شانسینین باشی اوستونه قاییتدی. خافخافدان دولچانین

^{۱۲} وارماق: نائل شدن، رسیدن.

^{۱۳} یان-یۆره (yan-yörə): دور و بر، اطراف، حول و حوش، محیط پیرامون.

سویونو شانسینین اوستونه بوشالتدی. اؤز جانینا دا بیردن بیره اوشوتمه اوتوردو. جانی گیزیلدهییپ، گؤؤدهسی تیتردهدی. شانس، دیک قالخیپ اوتوردو. باش قالدیریپ اوغلانا باخینجا تئز آیاغا قالدی:

—سلام ارباب. سن منیم یییه اولمالیسان!

— نه سالامی؟ نه علیکی؟ هه، من سنین باشی داشلی یییهنم! معلوم اولدوغو کیمی سن ده منیم عارسیز شانسیمسان. آخی ائوین ییخیلسین، بورادا شیرین-شیرین یاتاندا، هئج منیم حالیمی دوشونمهدینمی؟! آدام! منیم فایداسیز ایشله مکدن جانیم چیخدی آخی! بیر آن باشینی گزدير، باشقالارینین چالیشقان شانسینی گؤر، بلکه بیرآز اؤزوندن اوتاناسان.

اوغلانین شانس اوتانیدیغندان باشینی یئر تیکمیشدی. سونرا قاجیب اؤزونه بئل-کولونگ گتیریپ ایشله مهیه باشلادی. اوغلانا دا اؤتن نچه ایلین عوضینی آچماق حاقدا سؤز وئردی. او دئدی:

— ائی منیم یییه! بوندان بئل گئجه لر ده چالیشاجیغمدان آرخایین اولا بیلرسن. باشقالارینین شانس گئجه لر یاتاندا دا، من یاتمایپ ایشلییه جهیم. سن اؤزون یاتدیغین حالدا دا شانسینن آییق اولدوغونون نه آنلامی اولدوغونو گؤره جکسن.

اوغلان بو سؤزلری ائشیدندن سونرا بیر آز حیرصی سویودو. اونا تاپشیریلان سورغولارین دا جاوابینی سوروشاندان سونرا، شانسیندان بیر داها یاتمایاجاغی حاقدا کسگین^{۱۴} سؤز آلیپ، اونولا ساغوللاشیپ گئری

^{۱۴} کسگین: قاطع، جدی.

قايىتماغا باشلادی. او ساعاتدان كيشينين دورومو تام ديشيىلدى. اينانيلماس
 آنلامدا ايشلرى دوز گليردى. اۆلكه لرى بير-بير آرخادا قويوب، اونا سورغو
 تاپشيريغى شاهين اۆلكه سينين سينيرلارينا يئتيشدى. خبرچيلر اونون
 قايىتماغىنى شاها خبر وئرديلر. شاه دايانمادان اوغلانى قوللۇغونا
 گتيريلمه سىنى امر اتتى. سونرا چوخ دۆزومسوزلوكله اوغلانلار
 سوروشدو:

- ياخشى غريبه، دئمك قاييتدين؛ نه ائده بيلدين؟ ائله بير اۆلكه وار
 ايديمى هئچ؟ شانسىنى گۆره بيلدىمى؟
- شاه ساغ اولسون! هه وار ايدى، ياتان شانسىمى دا تاپيب آيىلتيديم.
- منيم سورومو سوروشماغى اونوتمادين كى؟
- بوخ اونوتماديم، سوروشوب جاوابلا قوللۇغونوزا گلالميشم.
- ياخشى دى گۆروم شانسين نه دئدى؟
- اوغلان بير ساغ-سولونا باخيب دئدى:
- شاه ساغ اولسون، سىزىنلە يالئىز دانىشماق ايستەيىرم.
- دانىشاجاقلاريمى بلكه ده باشقالارينين ائشيتمه سىنى ايستەمزسينىز.
- شاه امر اتتى بوتون حضورونداكىلار اورانى ترك ائديب قاپيلارى
 باغلاديلار. اوغلانلا بيرليكه قالديقدان سونرا دئدى:
- ايندى راحت دانىش.

- شاه ساغ اولسون، شانسىم دئدى كى، او اۆلكه نين شاھى ائركك
 دئيىل! او ائركك قىليغينا گيرميش بير قادين دير. بو مسأله نى كيمسه
 بيلمه سه ده، اونونلا بۆيويىن آداملار اونون اوشاقلىق خاطيره لرینی، قىز-

خانیم یانا داورانیشلارینی^{۱۵} گۆروب، اونو شاه کیمی قبول ائده بیلیرلر. او دئدی کی، شاهین دردینین تک چارهسی، بیر کیشی ایله ائولنوب، شاهلیغی اونا بوراخیب، اؤزو ایسه اؤلکه نین ملکه سی اولماق دیر...

سۆز بورایا چاتینجا، شاه تاختیندان قالخیب دولانماغا باشلادی؛ باشیندا اولان بۆرکونو گۆتوردو؛ اوزون ساچلاری قایادان^{۱۶} آخان شالاه^{۱۷} کیمی کوره بینین اۆتکلرینه دک تۆکولوب، گونشین پنجره دن ایچری دوشن زولقلاری^{۱۸} قارشیسیندا پاریلدادی. بیر قدر درین خیالا جومدو. سونرا دانیشماغا باشلادی:

– منیم آتام بو اؤلکه نین کرای^{۱۹} ایدی. اونون اوغلو اولمادی. من آتا-آنامین ایلک اوشاغی ایدییم. ائشیتدیییمه گۆره من دونیا یا گۆز آچان زاماندان – اوغلو اولونجا بو اوشاغی هامیا اوغلان کیمی تانیتدیرین – دئمیشدی. اوستومه ده اوغلان آدی قویدولار بئله. آنجاق نچه دؤنه باشقا قادینلارلا یئیندن ائولندیینه باخمایارق، هئچ زامان آتامین اوغلو اولماییب، منیم قیز اولدوغومو دا کیمسه بیلمه دی. اوچ ایل بوندان اؤنجه، آتام دونیاسینی دئییشدی. من تاختا چیخمالی اولدوم، آنجاق تاختا چیخان گوندن نفسیمین کسه ری اولمادی. دربارداکیلار گرکن قدر منی حسابا

^{۱۵} داورانیش: رفتار، سلوک.

^{۱۶} قایا: سخره، سنگ.

^{۱۷} شالاه: آبشار.

^{۱۸} زولاق: خط، پرتو، شعاع، نوار.

^{۱۹} کرای: پادشاه، سلطان.

آلماديلار. ايندى، منيم گيزيمدن خبرى اولان بير سنسن بير ده اولو^{۲۰} تانرى. گل بير ايش گۆرهك؛ سندن خوشوم گلدی؛ سنى دوز آدام گۆردوم. وئردیین سۆزو توتوب، وئردییم گۆرهوی ده کیمسه بيلمەدن یئرینه یئتیردین؛ هم ده سنى هوشلو-باشلى، قورخماز آدام تانیدیم. بير طرفدن ده درباریمداکیلاردان کیمسهنى سئومه میشم. سن گل ائله منیمله ائولن؛ اؤز آللریمله تاجیمی باشینا قویارام، سن بو اؤلکه نین کرایى اولارسان، من ایسه ملکه سی. نه دئییرسن، راضیسانمی؟
اوغلان بير آن دوروخدو^{۲۱}. بئله بير اؤنرینی هئچ گۆزله میردی. بير آز توموب فیکیرلشندن سونرا دئدی:

- چوخ ساغ اولون. آنجاق من اؤز اؤلکه مه قاییتمالییم. اورادا آتا-
آناملایولداشلاریم وار. یولومو گۆزله ییرلر؛ بورادا قالا بیلرم.
او، اؤزو ایله بئله دوشونوردو:
- (منیم داها شانسیم قالخیب، کراللیق نه ییمه گرک دیر؟!)
- ئئیلک، آرتیق ایصرار ائتمیرم، نئجه ایسترسن ائله اولسون. اوندان
بیر-ایکی هفته بورادا قال. توی تۆرنیمده^{۲۲} سنین ده اولماغینی
ایسته ییرم. بو موددتده ده اؤلکه مده ایسته دییین کیمی کئیفینه باخ!
- امر اندرسینیز.
ائله او گون، خانیم لشکریندن سؤدیى سوای آداملاردان بیرینه

^{۲۰} اولو: بزرگ، متعالی.

^{۲۱} دوروخماق: مکث کردن، به فکر فرو رفتن، درنگ کردن.

^{۲۲} تۆرن: مراسم، مجلس.

اوردو کوماندانلیغی^{۳۳} روتبه‌سی وئریب، اونا دا مسأله‌نی آنلادیب، ائولنمه تکلیف ائندی. او گنج ایسه سئوینه-سئوینه قبول ائدیب، یوبانمادان ائولیلیک ایشلرینه باشلادیلار. اؤلکه‌ده تام یئددی گون یئددی گتجه توی شنلیکلری اولدو. توی شنلیکلری قورتولان گونون صاباحیسی، اوغلان ملکه‌نین قوللوغونا یئتیشیب، گتتمک اوچون ایذین ایسته‌دی. ملکه، کرال ایله بیرلیکده اونو یولا سالدیلار. یئنه اونون یولونا گرکن هر شئی، یتمکدن توتدو، گئییمه‌دک وئردیلر. اوغلان بیر نئچه گون یول گئندن سونرا یئنه بیر آخشام چاغی، بیر گتجه اورادا قوناق اولدوغو تارلایا چاتدی. اوزاقدان، تارلانیل یییه‌سینی چالیشاراق گؤروب سالام وئردی:

- سلام آی دایی...

- آی علیکم‌السلام. قاییتدین دئمک، یورولمایاسن. نئجه‌سن آی اوغول؟

- چوخ ساغ اول دایی. لاپ یاخشییام. سن نئجه‌سن؟ آلاسه قووات وئرسین کیشی!

- سنی ساغ اولاسان. عؤمرون اوزون اولسون.

- هه دایی قاییتدیم هم ده آلی دولو. شانسیمی دا آیلتدیم، سنین سورونو دا سوروشدوم.

- هله گل گئدک ایچری، بیر تیکه شام یئیک. سونرا آیریتیلی

^{۳۳} اوردو کوماندانلیغی: فرماندهی ارتش. کوماندان: فرمانده.

دانشاریق!

اونلار یئنه آل- اوزلرینی یویوب ائوه گتدیلر. شام یئیپ، چای ایچندن سونرا، کیشی چوبوغونو آلیشدیریب بیر-ایکی نفس ووراندان سونرا دئدی:

- یاخشی اوغول، ایندی دئ گوروم نئجه اولدو؟ شانسین منیم سورومو نئجه یانیتلادی؟

- دایی، دئدییم کیمی گنڈیب شانسیمی یوخودا یاخالادیم. اونو آییلدیب بیر داها یاتمایا جینا سؤز آلدیم. سنین سورونا گؤره ایسه، شانسیم بئله دئدی: او کیشینین ائوینین گونئیینه، ائودن یوز مترلیک اوزاقلیقدا، یئرین آلتیندا یئددی کوپ^{۳۴} قیزیل، یئددی کوپ گوموش قویلانیب دیر. اونلارین اشعه سی تارلادا اکینه جه یین یاخشی اولماماسینین نه دنی دیر. - او کیشی اونلاری تورپاغین آلتیندان چیخاردارسا هر شئی یولونا گیرهر- دئدی.

- آمان آلاهییم، بو نئجه سؤزدور! یعنی سنجه ائله شئی اولا بیلرمی؟
- نه دئییم؟ آنجاق منه دئدی سؤزلر بونلار ایدی. صاباح باخاریق.
آما دایی سن او اولکه نی گورمه ییسن؛ گورسه ییدین بلکه داها ائله بیر شئین اولا بیله جه یینه شوبه ه ائتمه یه ییدین...

اوغانلا دایی، یاتاجاق یئرلرینی حاضیرلا ییب اوزاندیلار، آنجاق هئچ بیرنین گؤزونه یوخو گلیمیردی. دایی او گونه دک گئجه او توب سحرین

^{۳۴} کوپ، کوپه: خمره، کوزه ی بزرگ.

آچىلاجاغىنا بو قدر تىلىمەمىشىدى. آخ كى ائىتتىدىى بو سۆزلر دوز اولسايدى، او نه قدر زنگىن بىر آدام اولاجاق ايدى! صاباحىسى، دان يىرى سۆكولوب-سۆكولمەمىش^{۲۵}، بىرلىكدە بىل-كولونگ گۆتوروب، ائودن گونئيه دوغرو يوز متر سايىب قازماغا باشلايدىلار. اوچ متر قدر يىرى قازاندان سونرا، بىردن-بىره كولونگون اوچو بىر شئيه دىيب جىنگىلدەدى. دىمك، بىلەلىكلە آرتىق اىلك كوپەنىن آغزىنا چاتمىشىدىلار. دايى ھىچ بىلمىردى ئىلەسىن. گۆزلرى سئوئىنجدن دۆرد اولموشدو. دايانمادان گولور، كوپەدەكى قىزىللارلى اۆزو اىلە قوناغىنىن باشىنا سوووروردو. قوجالىغىنا باخمايلاق، قوناغىنى قوجاقلايىب، آياقلارىنى يىردن اوزوب، ايكى دۆور اۆز دۆورەسىنە فىرلاندى دا بىلە! ايكى گون ايشلەمكدن سونرا، بوتون كوپەلر يىردن چىخارىلىپ، دايىنىن ائوينە داشىندى. ائودە قىزىل-گوموش آلەندىن يىر يوخودو. كوپەلرىن آغزىندان، گىجەلر ائوە ايشىق يايىلىردى. سانكى آى اونلارا گولور، اونلار دا آيا گۆز ووروردو. اوچونجو گىجە دايى اوز توتوب اوغلانا بىلە دانىشىدى:

- ياخشى يولداش! بىرلىكدە تر تۆكوب ايشلەدىك؛ كوپەلرى چىخارتدىق. بو قىزىل-گوموشلردە، سىنىن دە آن آزى من قدر پايىن واردىر. خبرىنى سن گىتىردىن، چىخارتماسىندا دا ياردىمىجى اولدون. سەن بىر اۆنرىم واردىر. گىتمە، منىم يانىمدا قال. من دە بىر تىك آدامام. ائولندىيىم يولداشىملا منىم ھىچ اوشاغىمىز اولمادى. نىچە ايل اۆنجه، او

^{۲۵} دان يىرى سۆكولمك: كىنايه از طلوع آفتاب. دان: فجر، سپىدەدم، صبح كاذب.

دا منی تک قویوب، گئدر-گلمز یوللارا گتتدی. قوجا چاغیمدا، بیر بئله وار-دؤولتی ئیلهیه بیلرم. هر نه ییم وار یاری بؤلهجه ییم، سیککه لرله تارلانی دئییرم. بو گونلر کیمی بیرلیکده ایشله یه ریک؛ من اولندن سونرا دا، هامیسی سنه قالار، نه دئییرسن؟

اوغلان یئنه اؤز-اؤزونه - (من وار-دؤولتی ئیله ییرم؟ داها منیم شانسیم قالخیب.)- دوشوندو. سونرا دئدی:

- یوخ دای، سنی ساغ اولاسان، آتا- آنامین گؤزو یولدادیر. اونلارین یانینا، اؤز ماحالیمیزا قایتمالییام. بورادا قالا بیلرم.

دای، -آتا-آنانی دا بورایا گتیره ریک- دئیهرک، اوغلانی راضیلاشدیرماغا چالیشدی؛ آنجاق نه قدر یالوار-یاخار ائتسه ده، اوغلانی قالماغا ماراقلاندىرا^{۲۶} بیلمه دی. اونلار بو دانیشیقدان سونرا یاتدیلار. صاباحیسی گون، قوجا کیشی اوزگون بیر حالدا اوغلانین یولونا بیرآز چای-چؤرک قویاندان سونرا، اونو یولا سالدی.

اوغلانین اوزون سفری داها سونونا یاخینلاشیردی. نئچه گون یول گتتدیکن سونرا، مئشه یه چاتدی. یئنیجه مئشه یه چاتدیغی چاغ، تانیدیغی آسلانی، اونون یولونو گؤزله دییی حالدا گوردو. عادتی اوزره ایلک یئنه قورخدو. آنجاق اونو تانییب، قورخاقلیغینی یادینا سالاندان سونرا قورخوسو تۆکولوب، گولومسوندو. آسلان سوروشدو:

- دئمک گئدیپ، قایتدین.

^{۲۶} ماراقلاندىرماق: علاقمند کردن. ماراقلانماق: علاقمند شدن.

- هه، گۆرورسن کی بورادایام!
- سفرین نئجه ایدی؟ شانسینی تاپیب، آییلدا بیلدینمی؟
- هه. تاپدیم دا، آییلتدیم دا.
- منیم سورومو سوروشماغی اونوتمادین کی؟ سوردونمو اونا؟
- سوردوم، سوردوم.
- یاخشی، نه دئدی؟
- دئدی، او آسلانی نئچه آی اؤنجه بیر اووچو قووالاییب، اونا ساری
- نئچه گولله ده اتمیش دیر. گوللهلر اونا دیمهسه ده، بو قورخاقلیق ائله
- او زاماندان اونون اوستونده قالیبدیر.
- نئجه دئییب، ائله دیر. یاخشی درمانی دا وارمی؟
- البته کی واردیر. شانسیم - او آسلان بیر سارساق^{۲۷} آدامین بیینی
- یئسه، قورخوسو تۆکولر - دئدی.
- آسلان بیر آز فیکیره جومدو؛ سونرا دایانمادان اوغلانین اوستونه
- آتیلیب، بیر گۆز قیریمیندا^{۲۸}، اونو یئره اوزالیدی، پنجه لیرینی سینه سینین
- اوستونه قویدو. اوغلانین سسی تیتره مه یه باشلاییب، دیلی توتار - توتماز
- شاشقینلیقلا سوروشدو:
- آی آلاهیین حیوانی نئیله بیرسن؟ بو ایشلر نه دیر؟
- ایسته بیرم باشینی اوزوب بیینی یئیم!
- بس منیم کینی نبیه؟ سن بیر آخماق آدامین بیینی یئمهلین!

^{۲۷} سارساق: احمق، ابله.

^{۲۸} بیر گۆز قیریمیندا: در یک چشم به هم زدن.

- سندن آخماق کیم اولا بیلر کی؟! رحمتلیک اوغلو، آدامین شانسی
 آییق اولاندا، گۆی یئرہ گلمز کی! اؤتدویون اؤلکده او ملکہ سنہ کراللیق
 تکلیف ائدیر، قبول ائتمیرسن؛ سنہ، او قوجانین تارلاسیندا، او بؤیوکلوکده
 خزینہ یہ بیر ده تارلایا اورتاقلیق^{۲۹} سونولور^{۳۰}، ردد ائدیرسن! هئچ
 دوشونمہ دین کی، سنین شانسینین قالخدیغیندان او تکلیفلر سنہ اولونور؟
 آدام! سنین شانسینین یاتماغی ایله دورماغی، سنین دوروموندا بیر
 ائتکی سی اولا بیلمه دییی یئرده، سندن آخماغی اولا بیلر می؟
 - سن کیمن؟ آخی بس بونلاری هارادان بیلیرسن؟
 - ائله من ده سنین بیر شانسینام. ائکیزین یاتدیغی حالدا قورخو
 جانیمی بوروموشدو. آما بیلدییین کیمی، ایندی او گئجه-گوندوز
 آییق دیر. من ده سندن آخماغینی بو گونه دک گؤرمه میشم...
 آسلان بو سؤزلری دئییب، اوغلانین بوینونو اوزدو؛ بئینینی چیخاردیب
 یئدی. اونون قورخوسو تۆکولسه ده، نه یازیق بیزیم ناغیلیمیزا آجی،
 قورخونج^{۳۱} آنجاق عیبرتلی بیر سونوج یازدی...

^{۲۹} اورتاقلیق: شراکت. اورتاق: شریک.

^{۳۰} سونولماق: تقدیم شدن، ارائه شدن.

^{۳۱} قورخونج: ترسناک، مخوف.

دیلمانچ

اۋتن آلتیمیش بئش ایلده اولدوغو کیمی، سحر چاغی ساعات سککیز اولمامیش، چتین لیکله دوکانین قیرقیرایا تاخیلمیش قیفیلینی آچدی. نئچه ایل اۋنجه دن داها آللری تیره ییر، گۈزلی قیفیلین آچار تاخیلان یئرینی یاخشی سچمیردی. اونا گۈره، سون ایللرده همیشه سول آلی ایله قیفیلی ساخلایار، گۈۋده سینی باجاردیغی قدر قیفیلدان اوزاق توتار، گۈزلینین اولوب-قالان ایشیغینا، بوزوشموش بارماقلارینین توخونما حیسیسینی قاتیب، ساغ آلینده تیترتدی بی آچار ایله قیفیلی آچاردی.

آچدیغی قیفیلی حلقه لری بیرینه تاخیب، یئنه ده قیفیلادی. آچارلاری جیبینه قویاندان سونرا قیرقیرانی یوخاریا قالدیرمالییدی. بو گونلرده الکتریک گۈجو ایله چالیشان، اوزاق کوماندانلار^۱ ایشله یین قیرقیرالار، دوکانلارین چوخونا یاراشدیریلماغینا باخمایاراق، قوجا دایى بو قونودا اوشاقلاری ایله قونشولارینین ایصرارینی اۋنمسه میردی.^۲ اونلارا — بئله گئتسه، بوتون قول گوجوموزله گۈردویوموز ایشلری ماشینلار گۈردورسک، بیر گون گلر، هامی تنبیلیی بوتۈۋلۈکله بوینونا آلیب، هم ده جاوانلارین چوخو ایشسیز-گۈجسوز قالار- دئییردی. بو نه دنله، دوکاندا اونونلا ایشله یین اوغلو، آتاسی قیرقیرانی قالدیراندا او قدر ده اینجیمه سین

^۱ اوزاق کوماندان: کنترل از راه دور.

^۲ اۋنمسه مک: اهمیت دادن.

دئیە، قیرقیرا ایچینده گئت-گل ائتدی ی شیریملار^۳ تئز-تئز قارا یاغ سورتردی.

قوجا داینین رحمتلیک آتاسی، بیر زامانلار تیجارت ایشی ایله مشغول اولموشدو؛ اۆلکه ایله آوروپا آراسی گئت-گل ائدردی. اۆلکهده اولمادیغی چاغلار، هم فیکرینین راحت اولماغینا، هم ده اوغلونون بوشونا آریقلاردا دولانماغینا گۆره، اونو اون یاشیندان قیزیلچیلیق صنعتینده چالیشان قارداشینین یانیندا شاگیردلییه بوراخمیشدی. او، بو ایشده چوخ یتتهنکلی اولسا دا، بو صنعتدن او قدر ده خوشالانمیردی. أصلینده قیزیلین آریدیلمهسی واخت، چئورهنی بوروین قوخونو سئومزدی. آتاسی سفرلرینین بیرینده، ائولرینه بیر قرامافون گتیرمیشدی. قرامافون پلاترلریندن^۴، یاییلان ماهنیلارین دیلینی باشا دوشمهسه ده، اونلارین موسیقیسی اونون روحونو رقصه گتیرهردی. اۆلکهده رادیو ادارهسی یولا دوشونجه، یتنه ده آتاسی یتنی بیر تۆحفه ایله سفردن گلدی. گتیریلن رادیو ۱۳۲۶-نجی ایله دک سسسیز-سمیرسیز طاخچانین بیر بوجاغیندا قالمیشدی. اوغلان رادیودان نه لر یاییلا بیلدی حاقدا، آتاسی سؤیلهدی حئکایه لره آغزی-گۆزو آچیق قولاق آساردی. بیر توو هر آخشام ایشدن قایداندا، او رادیو ایله دانیشار، رادیو اونون سۆز لرینی دینلیردی. سونوندا، سۆزو گئدن ایلین گونلرینین بیرینده، آنجاق کی رادیو اونون سۆز لرینه

^۳ شیریم: شیار.

^۴ پلاتر: صفحه.

جاواب وئردى! قوجا دايى گونو-گوندن بو يىنى ديل آچان كۆرپه جيهازا ماراغي چوخالير، باشقا طرفدن قيزيلچيلىق ايشيندن بئزيردى؛ آنجاق آتاسينين زورونا گۆره، دايانماغا چاره سيز ايدى. ايللر بويو هر آخسام راديو سو ايله دردلشير، اونونلا دانىشيردى. بير گون عاليله سينه آجى بير خبر يئتيشدى. آتاسى سفرلرينين بيرينده، بير قضا سونوجوندا دونيادان گتتميشدى. او گونلر ايبيرمى ياشى اولان قوجا دايينين بير گۆزو آغلاير، بير گۆزو گولوردو! ياس تۇرنى قورتولوب-قورتولماز، قيزيلچيلىق ايشينى بوراخيب، آتاسيندان قالان ايرث پايى، بير ده ايللر بويو ايشله ييب، توپلادىغي پول ايله، اۇنجه راديو تعميرچيلىك دۇوره سيني كئچيرديب، ايندىكى دوكانى آليب، سۇدييى ايشى گۆرمه يه باشلادى. يىنى ايشينين باشلانيشيندا، هم راديونون آل-وئرينه هم ده تعميرينه باخيردى؛ ايللر كئچدى؛ آل-وئر بازاريندا آل چوخالينجا، آستا-آستا آل-وئريني دايانديرىب، بوتون ديققتيني تعميره يۇئلتتى^۵. سونرالار تيلويزيون عرصه يه گلدییى ايللرده، توپلومون بير چوخو تيلويزيونا اوز چئويرديينه باخراق، اونون دا دۇوره سيني كئچيرديب، هر ايكي جيهازين تعميرينه باخاردى. اۇتن ياخين كئچميشلرده، يىنى نسيل تيلويزيونلار عرصه يه گلدییى زامان، قوجا دايينين ياشى داها اونلارلا ماراقلانماغا آل وئریشلى دئييلدى. اونون اوچون، اونلارين تعميريني اۇيرنمه يه اوغلونو يوللادى. بونلارين هاميسينا باخميا راق او هله ده هر سحر دوكانيني آچير،

^۵ يۇئلتمك (Yöneltmek): سوق دادن، جهت دادن، برگرداندن.

دوکانداکی تیلویزیونلارلا دانیشیر، آیدا-ایلدە بیر رادیو یوخسا اُسکی مدل تیلویزیون دا تعمیرە گتیریلندە، مشترینی قایتارماییب، اؤزو اونلاری تعمیر ائتمکله ایلگی لنیردی! ^۶

قوجا دایی قیرقیرانی آزاجیق یوخاری قالدیریب، قیرقیرانین آرخاسیندا بوجاغا دایادیغی آغاجی گۆتوروب، اوندان یاردیم آلاراق، قیرقیرانین قالانینی دا یوخاری قالدیردی. یولو اوسته آلیب تورباسینا قویدوغو یاریم دنه یاغلی کۆکه ایلە یوز قرام پئندیری یئردن گۆتوروب، جیبیندن یئنه آچارلارینی چیخاردیب، دوکانین دا قاپیسینی آچدی. ایچری گیرن کیمی سالام وئردی! ویتیرنین آرخاسیندا گۆرونتوسو پر-پر چالان اُسکی مدل تیلویزیون سالامینی آلدی:

- سا...لا...م قو...جا دا...یی!...

- نئجه سن آی بالام؟!

- نئ...جه او...لا...جا...غام؟! یور...غون!...

- حاقلیسان جانیم. یورولمایاسان؛ گئجه آییق قالماق راحت دئییل!

آنجا ق نئیلیمک؛ کئچن گئجه نین کئشییی سنه دوشموشدو. دوکاندان گۆز اولوب، چیراغینی یانیق ساخلادیغین اوچون ساغ اول. داربخما! ایندی سنی سؤندوره جه یم. سونرا میشیل-میشیل یاتا بیلرسن!

تیلویزیون تئز-تئز اُسنه بیردی. قوجا دایی دویمه نی باسیب اونو

^۶ ایلگی لنمک: ارتباط برقرار کردن، مشغول شدن، با شور و شوق کار کردن.

سۆندوردو. او، ایچدن بیر آه چکیب آغیر یوخویا دالدى. قوجا دایى ألىنده کى آغاجى، قاپنین دالىندا دووارا دایاييب، ایشیقلارى يانديریب، قاپنى بوتوؤ آچدى. یوخارى باشا کئچیب، توربانى ماسانين اوستونه بوراخدى. ماسانين اوستونده کى چايدانى گۆتوروب، اونا سو تۆکدو؛ جيبيندن کيبريتىنى چىخارديب، ماسانين يانيندا اولان پيکنيک گاز اوجاغىنى وام آياقدا أليشديريپ، چايدانى اوستونه قويدو. قاييديب بير-بير تيلويزيونلارى يانديرماغا باشلادى. اؤنجه گۆرونتوسو گئتميش پلاسما تيوينى يانديردى. سالام وئريب، صاباحين خئير دئدى:

- نه سالامى؟! نه خئيرى؟! کور اولموشام! گۆزليم هئچ بير يئرى گۆرمور؛ بس سن منه نيه باخميرسان کيشى؟!

- آى بالام من يوخ، اوغلوم سنه باخاجاق. نه تئز داريخدين؟ تزه دونن آخشام سنى بيزه گتيريلر! اوتانمادين من ياشدا بير قوجانين سالامىنى، صاباحين خئيرىنى جاوابلامادان دئينمه يه باشلادين؟!

- باغيشلا قوجا دايى! آخى گۆرمورم کى؛ هارادان بيلهجه يديم قوجا اولدوغونو؟! سالام؛ سنین ده صاباحين خئير. أمما منى قيناما؛ بيلميرسن کى کورلوق نه يامان درددير؛ اوسته ليک، نئچه گون ده ائوده بو حالدا قالميشام. ييبه مين ائوينده، أسكى مدل باشقا بير تيلويزيونو دا واردير. منى تعميره گتيرمه يه نه وخت ائديردى، نه ده چوخ تلسيردى! بير بيله يدين بو گونلر نه چکميشم؟!

- چوخ دا بيلمز دئييلم؛ بيز اينسانلار دا خسته اولاريق؛ حکيمه گئدريک؛ بعضن عمل اوتاغينا دا يولوموز دوشر. آيريجا، ياواش-ياواش

من ده سنه تاي اولورام؛ گۆزلريمين ايشيغي يامان آزاليب. اوشاقلارين يانيندا بويون آلماسام دا، دوغروسو بودور. گئت شوكر ائت كي سن هله جاوانسان؛ گۆزلرين، كئچيجي اولاراق گۆرمهسه ده، قولاقلارين ياخشى ائشيدير. آنجاق من نئجه؟ سسينى ائشيتمك اوچون سنى قيشقيرتماليام!

آما داريخما؛ اوغولم گلسين، دئهرم بو گون سنه باخار.

پلاسما تيلويزيونا گولومسوندو. بو آرادا قوجا دايى اونون سسينى آزاجيق آليب، لئد تيوني^۷ يانديردي. لئد تيونين اوزونون بير تيكهسى قيزارميشدى؛ قوجا دايى اونا دا سالام وئريب، سحرين خئير دئدى:

- سن نئجهسن آي بالام؟

- سالام قوجا دايى. سنين ده سحرين خئير. ياخشى دئييلم آي دايى؛ اوزوم آجيشير. هله ده باشيم گيجه لير؛ دوكان، يولداشلار باشيمين دووره سينه فيرلانير. بس منه هاچان باخاچاسينيز؟! نئجه گون دور آغرى ايچينده يم.

- سنين ايشين بير آز چتين دير!

- نيه؟!

- سن تزه مدل ليين كوٲته ييني يئيرسن. اوزون ديشيلملى دير؛ آنجاق سنين اوزوندن بو شهرده يوخ دور. اوغلان ايكي-اوچ گون قاباق تاپشيريپ بيريني يوللاسينلار. او گونه دك دوژه ليس!

- آي قوجا دايى سنه بير كلمه سؤز دور؛ آما بير طرفدن ده سنده نه

^۷ لئد تيوى: تلويزيون LED

گونه وار؟ سوچ، ائوده توپ اوینایان اوشاغینکی دیر. دئیهن اولمادی، آخی اوشاق تیلویزیون اولان ائوده توپ اوینامازلار کی! بونو دا دئییم هاا، اوشاغین آتاسی اونون قولاغینی ائله بوردو کی، سانیرام ایندی منیم اوزوم آجیشان کیمی اونون دا قولاغی آغرییر. بیر طرفدن ده اونا یازیغیم گلیر.

- حاق بوتونلوکله سنله دیر. آنجاق بیر ایش گورمک اولماز؛ دؤزمه لیسن.

لئد تیوی زارییا-زارییا، قوجا دایی اونون دا سسینی بیر آز آلیب، ماساسینین اوستونده آرخا قاپاغی آچیلیمیش، اُسکی مدل تیلویزیونون قارشیسینا کئچیب، اونو دا یاندیردی. رنگی قاچمیش تیلویزیون قوجا دایینی گورجک گؤزلری دولدو. قوجا داینین اؤزونو ده غم چولغالادی.

سانکی بو تیلویزیونلا داها یاخینلیق حیسیسی دویوردو!

- سلام... سنین ده صاباحین خئیر اُسکی دوست!

- سلام. ساغ اول دوستوم! سنله بئله.

- بو گون نئجه سن؟

- ائی یی... دونن کی کیمی، قاباکی گونلر کیمی. آنجاق، باشقا بیر مسأله ده واردیر.

- او نه دیر آی قاداسینی آلدیغیم؟!

- آرخا قاپاغیم! دونن آچیب یئرله قویوبسان اونو...

بو آرادا لئد تیوی بیر سؤز آتدی:

- نه اولوب؟ اولمایا گئجه دالینی سویوق آپاریب؟!

لئد تیوی بو سؤزلری دئییب، گولمه یه باشلادی؛ پلاسما تیوی ده

باخار کورلار سایاگی گوله‌رک اونا قاتیلدی. قوجا دایی اونلارا آجیقلى-
آجیقلى باخیب آرتیردی:

- بس دیر گولدویونوز! سانکی اؤز دردینیز اؤزونوزو گؤرمور؛ هله
باشقاسینی دا لاغا^۸ قویورسونوز؟ تلمه‌یین بو گونلردن سیزه ده واردیر،
باخماین بو گون جاوانسینیز، جانینیز ایستی‌دیر، گؤزده‌سینیز؛ بیر دؤزون،
یئنی مدلر قارشینیزا چیخاجاق، اونلار دا سیزه ساتاشاندا دادینی
بیلرسینیز. بیر زامانلار، سیزین بابالارینیز تزه عرصه‌یه گلنده، ائله گؤزل
قوتولاردا گلردیلر کی، ایکی گؤز ایسته‌ییردی تاماشاسینا! تزه گلینلر
کیمی پارلاق دونلارا بورونموش، دیک‌دaban آياق‌قاييلار گئیمیش! ایندی
اونلاردان نه قالیب‌دیر؟ یوخ! یئنه اونلارین بیر سیراسیندان گؤزل بیر
قوتو قالیب‌دیر؛ اؤرنه‌یین^۹، اودور دوکانین بوجاغیندا او گؤزل قوتویا بیر
باخین؛ هله ده پار-پار پاریلدا ییر! من اونو کمد کیمی قوللانیرام؛ گؤره‌ک
سیزدن نه قالاجاق؟!...

لئد تیوی دئدی:

- باغیشلا قوجا دایی؛ ایستکدن بیر ظارافات ائتدیم.
- یونگول-یونگول شوخلوقلاری هئچ سؤمم؛ بیر ده مندن یوخ،
دوستومدان باغیش دیله‌مه‌لیسینیز^{۱۰}.
- منی باغیشلا آغ ساققالیمیز! پیس نیتلی دئییلدیم.

^۸ لاغ: مسخره، استهزاء، لاغا قویماق: مسخره کردن.

^۹ اؤرنه‌یین: بعنوان مثال.

^{۱۰} دیله‌مک: خواستن، درخواست کردن.

ماسا اوستونده کی اُسکی مدل تیلویزیونسا دئدی:

- بالا اؤنملی دئییل! داها آیشمیشام بو ظارافاتلارا. ظارافات یانا پیس ده دئمه دین. دوغروسو بو پاییز گئجه لرینده هاوا سویوق اولور. گئجه قاپاغیم آچیق قالدیغینا گؤره، یامان اوشوموشم. دردییم درد اوسته گلیب دیر. بیر ده سنین شوخلوغون منه دیمز! بیر جوره جان-جیبیه ریمسن. آدمالارین منی سایما ماقلا ری داها چوخ جانیمی آجیدیر. اونوتقان^{۱۱} اولدوقلاری، تزه بازارا گلینجه، کؤهنه نی اؤنمه مه دیکلری، گؤزدن سالدیقلاری، توز ایچینده بورا خدیقلاری. ائه هه...

لد تیوی ایله پالاسما تیوی باشلارینی آشاغی سالدیلار. اُسکی مدل تیلویزیونون گؤزلری دولدو. ائله قوجا دایی دا فیکیره جوموب، گؤزلری دولموشدو. سونرا دئدی:

- سن بوس-بوتون حاقلیسان دوستوم. آنجاق سنی بو حالدا بورا خدیغیمین بیر عاغیلا سیغان نه دنی وار دیر. سندن دانماغا گلمز، اوره یین چوخ ضعیفله ییب دیر! یامان دا قانسیزلامیسان. دردینین تک چاره سی شوک دور! کئشکه قانیندان تاپیلایدی، اونو دیشیه دیدیم! آنجاق چوخدان دیر کی داها قانیندان گلیمیر. چاره سیزلیکدن اوره یینه الکتریکی آغیر بیر شوک وئرمه لییم. اونون ایسه آغریسی چوخ دور. دونن آخشام چاغی شوک وئریب، سنی او حالدا بورا خیپ گئتمه یه قییمادیم؛ ایسته دیم گئجه نی راحت یاتاسان؛ ایندی، سحر یئمه ییندن

^{۱۱} اونوتقان: فراموشکار، کم حافظه.

سونرا، اۆزوم يانيندا اولان واخت او شوکو وئرهجهيم.

- سونرا نه اولاجاق؟

قوجا دایی جاواب وئرمه دن بير آز دا ياندى. قاشلاری چاتيلدى. سونرا مينن-مينن ائده رک دئدى:

- ائههه... بير آز داها ياشايا بيله جکسن. سونرا بوتون جانلي لارين باشيندا اولدوغو کیمی، عؤمرون سون دوراغينا چاتاجاق. سنى يالان يئره اوميدلنديرمک ايسته ميرم. اصلينده، بو شوک سنى اُسكى گونلرينه قايتارما ياجاق؛ آنجاق قوجاليق عؤمرونو بير آز چوخالدا جاق. بير ده سنى هئچ اويدورماق دا ايسته ميرم؛ امما سن اولندن سونرا بلکه پارچالارين باشقا تيلويزيونلاردا ايشله يه بيلدى. نه بيليم؛ بلکه بو سؤز سنه آزاجيق توختا قلیق وئره بيلر...

قهر، اُسكى مدل تيلويزيونون بوغازينا قيغيل ووردو؛ داها بير شئی دئيه بيلمه دى. آنجاق اؤزو-اؤزو ايله -اونسوز دا اينسانلارين گؤزوندن دوشموشم آرتیق- دئييب، خياليندا چوخ اوزاق کتچميشلرينه، جاوانليق چاغلارينا دالدى. سانكى حياتينين لحظه لرینين فيلميني ايزلمه يه باشلادی.

بو آرادا او جاق اوستونده کی چايدانين قايناماغی، قاپاغینی تيترتدی. قوجا دایی بير دسماللا، چايدانی اوجاغين اوستوندن گؤتوروب اوجاغی سؤندوردو. اُسكى مدل تيلويزيونون رۇياسينين ناواری قيريليب دئدى:

- کيشی هر شئی بير قيراقدا، گؤزله بو دفعه قاينار سويو اوستومه تۆکوب، پؤشله يه-پؤشله يه جانیمی آلماياسان!

- یوخ یولداش آرخابین اول. هله بیر او قدر قوجالمامیشام؛ هوشوم باشیمدایر.

بو دؤنه هامیسی گولوشدولر. قوجا دایی چایدانا قورو چای تۆکوب، اونو دمه قویدو. کمدون ایچیندن سوفره سینی گۆتوروب، ماسانین بوش یئرینه آچدی. تورباسیندان کۆکه سینی ده گۆتوروب، سوفره یه قویدو. پئندیری نایلونوندان چیخارتدی. اونو بشقابا قویوب، اوستونه سو توتاندان سونرا سوفره باشینا گتیردی. ایستکانینی دا همین کمدان گتیره رک ایچینه بیر آز شکر تۆکدو. سونرا دم چکمیش چایدان، ایستکانا بوشالتدی. بیر چای قاشیغی ایله شیرین چایینی قاریشدیرب، یئمیه باشلامادان اؤنجه، کمدان طرف قاییتدی؛ کمدون اوستوندن گۆزلرینی اونا تیکمیش، آتاسی گتیردییی رادیو نو یاندیردی. رادیو سوزارمیش سس ایله دئدی:

- دئدیم بس منی اونودوبسان!

- بو نه سۆزدور دانیشیرسان؟ هئچ سنی اونوتماق اولارمی؟ سن،... سن منیم آن اُسکی دوستوم، سیرداشیمسان! هئچ بیلیرسنمی سن منه نه لرلی خاطرلادیرسان؟ آجی-شیرین خاطرلریمی، هم اوزوجو هم سؤیندیرجی خبرلری، آتامی، یئنیند دوغولدوغومو! بونلاردان باشقا، سن منه بیر گۆزلوک کیمیسن! دونیانین پنجره لرینی، منیم اوزومه اؤنجه سن آچدین. ائوده اوتورا-اوتورا گئدیب دونیانی سیاحت ائتمه یی منه سن اؤیرتدین!

- من ده سندن دانیشماغی اؤیرنمیشم دوستوم! ایللر بویو او قدر منله دانیشدین کی سونوندا دیلیم آچیلدی. من ده بونو اونودان دئییلیم.

دانیشماغیمی سنه بورجلویام!

ایکیسی ده بیر توو سوسوب، بیر-بیرینه باخدیلار. سونرا قوجا دایی بوتون وارلیغیندان جوشان محبتله، آلینی رادیونون باشینا چکیب، ماساسینا قاییتدی؛ آستا-آستا یئمهیینی یئمهییه باشلادی. ساعات دوققوزو ایییرمی دقیقهنی گۆستریردی.

بئش-اون دقیقه سونرا دوکانین قاباغیندا یوخاری مدل بیر اتومبیل ساخلادی. گۆزلرینه گونش گۆزلویو تاخمیش سوروجوسو، اتومبیلی سۆندوروب، آشاغی ائندی. قاپینی باغلايیب، دوکانا ساری گلدی. ایچری گیردی:

- سلام.

- سلام اوغول؛ سحرین خئییر. بویور بیر تیکه پئندیر چۆرک یی.

- ساغ اول عمی؛ سنین ده سحرین خئییر؛ لاپ جانینا نوش اولسون؛

سحر یئمهیی یئمیشم.

- نه ایشینیز وار ایدی؟

- بورادا اولتد تیویلره^{۱۲} ده باخیرسینیزمی؟

- من یوخ، اوغولوم باخار. من آنجاق اونلارلا دانیشارام!

-نجه؟ باشا دوشمه دیم!

قوجا دایی گولومسونوب، آرتیردی:

- هئج؛ اؤزومله دانیشیردیم؛... نه باش وئریب؟ دردی نه دیر؟ بس

^{۱۲} اولتد تیوی: یکی از جدیدترین نوع تلویزیونها انواع منحنی و OLED TV می باشد که از وضوح بالایی برخوردار است.

قارانتیسی یوخ دورمو؟!

- یوخ ائی، شانسسیزلیقدان قارانتیسی کئچن هفته قورتولوب. بیر ده آی عمی، بو قارانتیلاری قارانتی ائدن کیم دیر؟! نه ایسه، دوندن شوشه نین اورتاسینا بیر خط دوشوب دور. قورخورام قالا، باشیمیزا بؤیوک ایش آچا.

- خط، سولدان ساغا دوشوب دورمو، یوخسا اوستدن آشاغیا؟
- سولدان ساغا.

- قورخما! ائله اؤنملی بیر شئی اولمامالی دیر. سانیرام کیچیک پارچالارینین بیرى دیشیلسه دوزه لر. گتیر قوی دوکانا؛ بو ویزیت کارتینی دا آل قوی جیبینه؛ اوغلان یاریم ساعاتا کیمی گلر؛ ناهار هنده وری زنگ آچیب، اؤزو ایله دانیشا بیلرسن.

کیشى اتومبیلینه ساری گئتدی. آرخا قاپیسینی آچیب، آغ قابلی اولئد تیوینی اوتوراجاقلارین اوستوندن گؤتوروب دوکانا گتیردی. اونو یئره قویاندان سونرا دئدی:

- عمی! سانیرام تاپشیرماق لازیم دئییل؛ آنجاق بیلدیین کیمی بونلار چوخ باهالی تیلویز یونلار دیر. اوغلونا تاپشیرمالیلاری اؤزون تاپشیر لوظفن.

- آرخابین اول! گئت آلاسه راست گتیرسین؛ دئدییم کیمی ناهارا یاخین بیر زنگ آچیب اوغلانلا دانیشارسان.

کیشى قوجا دایی ایله ساغوللاشیب، اتومبیلینه قاییتدی. استارت ووروب، اورادان اوزاقلاشدی. قوجا دایی دا سحر یئمهمینی بیتیریب،

چایینی ایچندن سونرا، سوفره سینی ییغیشدیردی. هر شئی تمیزله ییب
اؤز یئرینه قویدو. سونرا اولئد تیوی یه ساری گئدی، اونون کابلینی
الکتریک چیخیشینا^{۱۳} تاخدی. دویمه نی باسیب، یاندیردی:

- واه- واه بورا هارادیر؟! منی کیم بورایا گتیردی؟ سن کیمسن آی
قوجا!

- اؤنجه سالام! ایکینجیسی بورا منیم دوکانیم دیر. سنی ده بییه ن
تعمیر اوچون بورایا گتیریب دیر. نئجه؟ بورانی، منی بیه نمه دینمی
مادمازل؟!

- منیم بییه مین باشینا داش دوشسون! ائله سونرادان گؤرموشه
قیسمت اولسان، بوندان یاخشی اولماز! کیشینین جانینی آل، پول-پاراسینا
دیمه! بورادان یاخشی یئر تاپا بیلمه دیمی؟! سن منیم دردیمدن نه باش
چیخاردا جاقسان آی مین اوچ یوز اُسکینین قوجاسی؟! سنین بیر آیاغین
گوردادیر؛ منسه هله بیر تزه گلینم!...

پلاسمه تیوی اونون سؤزونون قالانینی قیردی:

- آی قیز! آغزین دئییه نی قولاغین دویسون. بیرینجیسی، بیر
آغساقاللا بئله دانیشیلماز! ایکینجیسی، سنه سالام وئرمه یی، اُن آزی
جاوابینی آلماغی اؤیرتمه ییبلرمی؟ اوچونجوسو، نه بیلدین بورانین پیس
اولدوغونو؟ دؤردونجوسو، سن هله تزه گلیسن؛ ایندیلیک لال اول!
سیران یئتیشنده دانیشارسان؛ بئشینجیسی ده بودور کی، سن درده جر

^{۱۳} الکتریک چیخیشی: پریز برق.

حالیندا بئله دانیشیرسان، ساغلام اولسایدین نه دئیهردین؟

- سن ده چوخ دانیشیرسان هالا کور قارینپا...

لئد تیوی دۆزه بیلمه‌دی:

- اصلینده سن چوخ دانیشیرسان ایری-ویرو! گئت آلاهینا شوکر
ائت کی سنی تنز گتیریلر؛ یوخسا بیر آز دا یوباتسایدیلار باشین قیریلیب،
اووچونا دوشه‌جه‌یدی! بس سنه أدب اویرتمه‌ییلرمی؟ آخی بوراداکیلارین
هامیسی سندن بؤیوک‌دور!

- آن آزی سن دانیشما اوزو یارا! اؤزون مندن نئچه یاش بؤیوکسن
کی بؤیوکلوکدن دانیشیرسان؟

أسکی مدل تیلویزیون دا دیله‌گلدی:

- قوجا دایی! سانکی بو قیزین دیلینی ییز بیلیمیه‌جه‌ییک. بلکه اونا
أدبلی اولماق پارامترلری یاراشدیرماغی اونودوبلار!

- حاقلیسان دوستوم؛ هامیسیندان یاخشیزی بودور کی من اونو
سؤندوروب، اوغلوام گلینجه اونا تاپشیرام؛ هر نئجه ده اولسا او جاوان‌دیر؛
بو چاغین گنجی‌دیر؛ بونلارین دیلینی او یاخشی بیلر.

قوجا دایی بو سؤزلری دئییب، اولئد تیوینین جیغان-ویغانینا
باخمادان، دویمه‌نی باسیب، اونو سؤندوردو؛ سونرا اؤز ماساسینین آرخاسینا
قاییدیب، أسکی مدل تیلویزیونا شوک وئرمه‌یه گرکلی اولان وسیله‌لری
توپلاماغا باشلادی. بیر آز کئچمه‌دن، ساعات اونا اون دقیقه قالاندا اوغلو
دوکانا گیردی:

- سلام آتا؛ صاباحین خئیر اولسون؛ یورولما یاسان.

- سلام اوغول؛ آلاسه سنی ساخلا سین. خوش گۆردوک سنی.
 - ساغ اولاسان... کیشی آخی نییه یئنه آلا قارانلیق دوکانا گلیرسن ؟
 ییزیم ایشده سحر اثرته سی مشتری گلمز کی. بونلاری سنه دئمکدن
 یورولدوم. بو یاشدا بیر آز آرتیق دینجلمه لیس.

- منیم قایغیما قالدیغین اوچون سنی ساغ اولاسان؛ دئدی کلرینی
 بیلیرم. آنجاق، داها ایلر دیر چوخو دا مشترینین گلیب-گلمه دییی اوچون
 دوکانا گلمیرم! بیلیرسنمی؟... آخی نئجه دئییم؟... من بورانی دا اؤزومه ائو
 کیمی بیلیرم. سنین آنادان اولدوغونو، بؤیویوب بویا-باشا چاندیغینی
 گۆردویوم کیمی، بو صنعتین ده اؤلکه ده دوغولدوغونو، بؤیودویونو
 گۆرموشم؛ دئمک اولار، ائله بونلار دا بیر تهر منیم بالالاریم ساییلیر.

- نئيله مک، بو قونودا سنی یاخشی باشا دوشمه سم ده، اؤزون بیلن
 یاخشی دیر. من همیشه سندن اؤیرنمیشم، هم اوستام اولوبسان، هم
 آتام... هر حالدا، بو اولئد تیوی بورادا نئيله بیر؟ نه تتر خاراب اولوب دور؟!
 - اونو بیر آغا گتیردی؛ دئدیینه گۆره اورتاسینا بیر خط دوشوب دور؛
 باخارسان، آنجاق اؤنجه بو پلاسمایا باخ، قارا شوشه سی منی داریخدی ریر.
 من ده بو اوزاق ایللریمین یولداشینین یورولموش اوره یینه بیر شوک
 وئره جه یم.

- کیشی قوی قالسین، اونا دا اؤزوم باخارام.
 - یوخ! سئویرم بو ایشی اؤزوم گۆرم. لئد تیوینین پانئلیندن نه خبر؟
 - دوز دانیشسالار، صاباح سحر ائیمیزده اولاجاق...
 - یاخشی!

اوغلان پلاسم تپوی ایله اوغراشماغا^{۱۴} باشلادی. قوجا دایی ایسه اؤنجه اُسکی مدل تیلویزیونون کابلینی، الکتریک چیخیشیندان آییریپ، سونرا دؤنه-دؤنه اونا شوک وئردی. اونا شوک وئرهرک غریب بیر حیسی واریدی. سانکی اؤز اورهیینین قالان گوجونو اونا کؤچوروردو! ایش قورتولاندان سونرا، چوخ سلیقه ایله اونون قاپاغینی یئرینه باغلاپ، یئیندن الکتریک کابلینی چیخیشا تاخدی. آستا-آستا گلیب، ماساسینین آرخاسیندا اوتوردو. غریب بیر حالی واریدی؛ کئچمیشلرده خاطیرلامادیغی یورغونلوق جانینا اوتورموشدو. سول چیینده آنلاشیلماز آغری واریدی. چتین لیکله بارماغینی اوزالیدیپ تیلویزیونو یاندریدی؛ سونرا باشینی ماساسینین اوستونه قویوب، آستا-آستا گؤزلیرنی یومدو. اُسکی مدل تیلویزیونون شوشه سی ایشیقلانینجا، بیردن-بیره بوتون تیلویزیونلار هالای-هالایلا قوجا دایینی آلقیشلاماغا باشلادیلار. اُسکی مدل تیلویزیونون ایسه، سئوینجدهن هئچ بیلمیردی نه دئسین:

- گؤزلیمه اینانا بیلیم! سن بیر داهی سن دوستوم! یئنه هر یئری آیدین گؤرورم؛ گتیر او بوزوشموش آلریندن اوپوم.

آنجا قوجا دایی داها هئچ نه ائشیده بیلمیردی. کمد اوستونده کی رادیونون ایسه، عادی وئریلیشلری^{۱۵} کسلیپ، هئچ قیریلما دان چکیلیمیش، دیشمز بیر سس یاییلماغا باشلادی...

^{۱۴} اوغراشماق: با یک امری مشغول شدن، در باره ی چیزی تلاش کردن.

^{۱۵} وئریلیش: پخش (رادیویی)، برنامه ی رادیو و تلویزیون.

باش ساغلیغی

یوردوموزون قادینلارینین بیر چوخو کیمی، «هوراند» ماحالیندا دا هر بیر سۆزه کیسه سینده حاضر جاوابی اولان بیر خانیم وار ایمیش؛ کیمسه «حجر» خانیم ساتا شماغا جسارت ائتمزیمیش. البته بعضی واختلار کیشیلرین بیر سیراسی بيله-بيله اونو دانیشدیریب، سرت^۱ جاوابلاریندان قیزارا-قیزارا گولرمیشلر. نئجه دئیهرلر، ائله اؤزونه گۆره بیر کیشیمیش حجر خانیم! ترسینه اری «مشه قوربان»، چوخ االسیز-ایاقسیز بیر کیشیمیش. (نه دن دیر بیلیمرم، طبیعتین ایشی بئله دیر، چوخ گۆرموشم عاجیز-آوارا قادینلارا، چوخ بیلیمیش کیشیلر، ایکی ائششه بین آریاسینی بؤله بیلیمهین کیشیلره ایسه، باجاریقلی، دیللی-آغیزلی خانیملار توش گلیب دیر. البته بلکه ده بئله اولماسایدی خالقین عملی آشمازدی!)

نه ایسه، اونلار یاشادیغی کئنده، کئندلریمیزین چوخوندا اولدوغو کیمی، بیر چایخانا دا واریمیش؛ کیشیلر آخشام اوستو چؤل-باییردان قایتدیقلاری زمان اورادا توپلاشار، بیر-ایکی ایستیکان چای ایچر، سیگار چکر، اورادان-بورادان دانیشارمیشلار. اؤزلیکله قیش گونلرینین ایشسیزلییینده سانکی کئندین بوتون اهلی چایخانادا توپلانتی قورارمیشلار کیمی! ایینه سالماغا یئر اولمازیمیش.

ائله او قیش گونلرینین بیرینده، حجر خانیم گیلین ائششه یی اؤلور!

^۱ سرت (Sərt): سخت، محکم.

خبر، تئزلیكله كنده یاییلیر. خبرسزلیكدن هرکیمی گۆرسهیدین، اؤلن
 ائششهیین سۆزونو دانیشیردی. بو آرادا خبرین چایخانایا سالدیغی ولوله،
 اوتورانلاری چاخشادیرمیشدی! چایخاناداکیلارین دا دیلینه یئنی سۆز
 باغلانمیشدی؛ کیشیلر دئییب، گولمكدن دویماق بیلمیردیلر! چایخانادا
 اوتوران یازیق مشه قوربانا، هره بیر سۆز آتیردی. او ایسه مال-مال
 باخیب، بیر جواب وئره بیلمیردی. بیردن چایخانانین دیییندن کیشیلرین
 بیرى سسلندی:

- آغالار! آجیغینیزا گلمه سین، آما بیزلر نئجه یئر-یورد بیلمه یین،
 یاخشی-پیس آنلامایان جاماعاتیق! حجر خانیم گیلین ائششه یی
 اولوب، اؤزو ده طؤیله لرینده کی عزیز-دوردانه تک ائششکلی، بونا
 باخمایاراق بیز بورادا اوتوروب دئییب گولوروك! اونون ورینه من دئییرم
 دورون، باخ هامیلیقجا گئدک، مشه قوربانا دئدییمیزه تایی، حجر خانیم دا
 «باشین ساغ اولسون» دئییک!

چایخانایا بیر داها هممه دوشدو. میرتیندان اؤترو ده اولموش اولسا،
 هامی او کیشیین اؤنریسی ایله راضیلاشدیلار. یاآلاه-یاآلاه دئییب،
 آياغا قالدیلار. یازیق مشه قوربان دا آرخالاریجا گئدیپ، هم ده ایچینی
 یئییردی کی، گۆره سن بو ایشین سونو نه اولاجاق؟ یول اوزونو گئندلری
 گۆروب، ماجرانى ائشیدنلر ده اونلارا قوشولدو. حجر گیلین قاپیسینا
 چاتینجا، خئیلک آدام توپلاشدی؛ آز گئتدیلر، چوخ گئتدیلر، آنجاق کی
 حجر خانیم گیلین قاپیلارینا یئتیشدیلر. بیرى قاباغا یئرییب، قاپینی
 دؤیدو؛ حجر خانیم قاپی دالیندان سسلندی:

- قاپى دۇين؟ كىمسن؟!

جاماعات سس - سسە وئريب دئدىلر:

- بىزىك حجر باجى؛ آچ قاپىنى.

قاپى آچىلدى؛ حجر خانىم ساغ ئلىنى قاپىيا قويوب، سول ئلىنى بئلىنە
ووروب سىنەسىنى قاباغا وئريب، سورشىدو:

- نە اىستەيىرسىنىز؟!

يازىق آرواد مشە قوربانى گۇرمەدىيى اوچون بىر آز قورخمشىدو. بىر
آن فىكىرلىشىدى، بلكە آرلىن بىر اىش گلىبدىر؛ آنجاق گىللىرىن
گولر اوزو، اونو آزاجىق آرخاينىلاتدى؛ جاماعاتدان بىرى مسألەنى آچىپ،
دئدى:

- قورخولاجاق بىر شىئى بوخدور حجر باجى؛ هامى گلىب
ائششەيىنىزىن اولومونە گۇرە سنە باش ساغليغى وئرسىن!

هر آغىزدان بىر سس چىخدى:

- آلاە صبر وئرسىن!

- سون غمىن اولسون!

- باشىنىز ساغ اولسون!

- هاچان اوتوراجاق سىنىز؟!

...

سۇز بورايا چاتىب هامى سس سىزلىشىدىن سونرا، حجر خانىم، چوخ
متانت ايله دانىشماغا باشلادى:

- هامىنىزىن آياقلارىنىز آغرىماسىن! زحمت چكىپ، گلمىسىنىز؛

شادلیقلارینیزدا عوضینی آچاق! آنجاق دوغروسو، منیم هئچ عاغلیما دا
 گلمه میشدی کی، بیزیم ائششهیین بو قدر قوهوم—قارداشی واردیر...

سنه درمان یوخ دور...

او زامانلار «دکتر حاجی زاده» «تمل علملر» له^۱ «فیزیوپاتو»^۲ دؤوره لرینی اوغورلا سوووب، بیر ایل عرضینده کئچیریله جک «اینترن لیک»^۳ دؤوره سینه باشلامیشدی. او دا یولداشلاری ایله بیرگه چئشیدلی^۴ خسته خانالارین بؤلمه لرینی^۵ دولانیب، عملی تجربه لر قازانیردی. دوستلارینین بیر سیراسی گؤز، باشقالاری اوره ک، آیریلاری عمومی، بعضیلری ده سینیق خسته خاناسینا دوشموشدولر. دکتر حاجی زاده ایسه روحسال خسته لیکلر خسته خاناسینا گئدیردی.

اورادا هر چئشید خسته وار ایدی؛ قوجالی-جاوانلی، خانیملی-آغالی، ساوادلی-ساوادسیز. اونلارین ایچینده بیر فلسفه دکترو دا بئله وار ایدی. او، چوخ ساوادلی بیریدی. دئییشلره گؤره، سانکی خسته خانایا گتیریلمه میشدن اؤنجه، حتی اونیوئرسیتتلرده اؤیرنجیلره درس دئیهرمیش. نه بیلیم بلکه ده چوخ اوخویوب آراشدیرماق اثرینده هر شئی بیر-بیرینه قاریشدیرمیش ایدی.

^۱ تمل علملر: علوم پایه، یکی ایل سورهن حکیملیک تحصیلین بیرینجی آساماسی.

^۲ فیزیوپاتو: فیزیوپاتولوژی. حکیملیک تحصیلینده تمل علملردن سونراکی آشاما؛ فیزیوپاتو دؤنمی دؤرد ایل دیر.

^۳ اینترنلیک: انترنی؛ طب تحصیلین سونونجو آساماسی اینترنلیک دؤوره سی دیر؛ بو دؤوره نین بیر ایلی عرضینده، اؤیرنجیلر چئشیدلی تخصصو صلرین خسته خانالارینی دولانیب، خسته لرله بیرباشا قارشیللاشاراق، عملی تجربه لر قازانارلار.

^۴ چئشیدلی: متنوع، مختلف. چئشید: نوع، جور، طور.

^۵ بؤلمه: بخش، قسمت، شعبه.

«دکتر نوحی» چوخ گۆزل گئینیر، اودکولونلانااردی. پروفیسور یانا ساققالی، همیشه آئینده اولان چوبوغو، بیر ده گئیدی آسقیلی شالوار ایله، باشقا خسته لردن سچیلردی. چوخ زامانلار بیر اوتوراجاغین اوستونده اوتوروب، قیچینی قیچینین اوستونه آشیریب، درین باخیشلی گۆز لرینی هارایاسا زیلله یه رک چوبوغونو چکردی. خسته خانایا بیرینجی دفعه گلن اینسانلار، اونولا خسته خانا رئیسینی، (خسته خانا رسمی فورماسی آئینده اولمادان البته) بیر یترده گۆر سهیدیلر، سۆز سوز خسته خانا رئیس هانسی اولدوغو حاقدان یانلاردیلار. ائله دکتر حاجی زاهنین خسته خانایا ایلك گلیشینده ده همین اولای باش وئرمیشدی. او گولونج حادثه ایکی دکتر آراسیندا بیر کۆرپو ووروب، اونلارین بیر-بیرینه اولان موناسیبتلرینی خسته-دکتر ایلیشگی سیندن داها آرتیق، ایکی دوست ایلیشگی سینه چئویرمیشدی. دکتر حاجی زاده خسته خانایا گلینجه دکتر نوحی چوخ سئوینجک اونو قارشیلاییب، بیرلیکده بؤلوملری دولاناردیلار. البته بو ماراق بیر طرفلی دئییلدی. دکتر حاجی زاده ده بو خسته سینی چوخ سئوهردی. اونون داورانیشلاری بیر او قدر نرمال ایدی کی، هردن اونون دوغرودان دا خسته اولدوغونا شوبهه لردی. حتی بعضی زامانلار، دکتر حاجی زاده - بلکه ده بو آدام بیله رکدن، اوستو اؤرتولو نه دنلره گۆره اؤزونو خسته گؤستریب، رول اویناییر- دئییه دوشونموشدو. اونلارین دوستلوقلاری گونو-گوندن گوجلنیر، دکتر نوحی نین دورومو دا جاوابسیر بیر تاپماجا کیمی داایما دکتر حاجی زاده نین افکارینی اؤزونه جلب ائدیردی.

سون زامانلاردا دکتر حاجی زاده واختی اولدوغو گونلر، خسته خانا سوروملولاریندان ایذین آلاق، خسته خانادان چیخارکن دکتر نوحی نی ده اؤزو ایله دولانماغا آپاریب، آخسام چاغی قایتاریردی. آرتیق بو بیر عاده دؤنوشوب، سوروملولار دا چوخ چتین توتموردولار. دکتر حاجی زاده چوخ وارلی عالیه نین اوشاغی اولماسا دا، گنجه-گوندوز دایانديغی نؤوبتلرین قازانجی ایله اؤزونه گوموشو رنگده بیر «رنو بئش» اوتومبیلی آلمیشدی. تعطیل آخساملارینین بیرینده، دکتر حاجی زاده سحر اثرته دن خسته خانایا گلیب، بؤلوملری دولانمادان، ایشینی باشلامادان اؤنجه، دکتر نوحی نی تاپیب اونا بئله دئدی:

- دکتر سنه خوش خبریم واردیر. یئنه بو گون دولانماغا گنده جه ییک. سن بیر ساعاتادک حاضیرلان، من ده خسته لرین ویزیتینه باشلایم، بیتیره-بیتیرمز گئدیپ «شاه گؤل» نو دولانماق اوچون، اؤزومه ده، سنه ده ایجازه آلاجاام.

دکتر نوحی چوخ أدب-نزاکتله تشککور ائدیپ آرتیردی:

- دکتر بی، سیز همیشه منی اوتانديریرسینیز. آخی سیزه یوک اولماق ایسته میرم .

- نه یوکو جانیم! بیلدیین کیمی منیم عالیم باشقا شهرده یاشاییر . من ده بورادا سوبای-سالیق تک بیریم. بو هفته سونونو شهریمیزه گتیمییه جه ییم. همیشه اولدوغو کیمی بیرلیکده گئدیپ، دولانیب بیر آز هاوامیزی دیشدیره ریک.

دکتر نوحی یئیندن تشککور ائدیپ، حاضیرلاشماق اوچون حکیمیندن

آیریلدی. خستهلرین ویزیتى سونا چاتینجا، دکتر حاجی زاده خسته خانانین مودیرینین یانینا گئدهرک اونیوئرسیتتده ایداری ایشی اولدوغونو بیلدیریب، هم اؤزونون هم ده دکتر نوحی نین ایدیننی آلدی. دکتر نوحی چوخاندان بری حاضیرلانمیش، چیخیشدا دایانمیشدی. بیرلیکده خسته خانادان چیخدیلار. اوتومبیلده اوتوروب، تهلوکه سیزلیک قورشاغینی^۶ باغلادیلار. دکتر حاجی زاده اوتومبیلده استارت ووروب، آلیشیدردی؛ آتجاق یولا دوشمدهن اؤنجه ساغ طرفینده اوتوران دکتر نوحی یه باخیب دئدی:

- دکتر، اونیوئرسیتتده ایداری بیر ایشیم واردیر. ایداره لر باغلانمامیش ایدین وئرسه نيز ایشیمی یئربه یئر ائدیم، سونرا سؤز سنینکی دیر، هر هارایا سؤسن گئدهریک، «آغا دئدی سور دره یه، سور دره یه»!

- بو نه سؤزدور دکتر؟! ایندی منیم ایختیاریم سیزده دیر. دئمک من سیزین قوناغینیزام. قدیمدن ده دئمیشلر: «قوناق ائو یییه سینین دوه سی دیر»...

دکتر نوحی بو سؤزلری دئییب اوجا سس ایله گولدو. سونرا بیرلیکده یولا دوشدولر. اونیوئرسیتتده یئتیشرکن، دکتر حاجی زاده اوتومبیلدن ائیب یاپنین ایچینه گتتمک ایسته دیکده، دکتر نوحی دن بیر نئچه دقیقه اونو گؤزله مہیینی ایسته دی. داریخماسی اوچون ده، او قایدینجا سئودی کاستی سسلندیریب، قولاق آسماسینی اؤزدی.

^۶ تهلوکه سیزلیک قورشاغی: کمر بند ایمنی.

دکتر حاجی زاده نین گندیب، قاییتماسی بیر آز اوزون چکدی. تخمین ائدیله بیلدی کی می تعطیل اؤنجه لری ایداره لرین ایش واختینین سونونجو ساعاتلاریندا، بیر سیرا اُمکداشلار^۷ ساعتلیق ایذین آماقلا، ایداره دن تئز چیخیرلار، بو دا ایشله یین اُمکداشلارین آزادلیغینا گؤره اوتاقلاردا قالا بالیغا نه دن اولوب، ایشلر یوبانار. ائله دکتر دا او نه دنله سؤز وئردییی زاماندا بیر آز چوخ یوباناندا سونرا، آنجاق تخمین قیرخ بئش دقیقه دن سونرا اوتومبیلین یانینا قاییدا بیلدی. یئنه تخمین ائدیله بیلدی کی می، بو نیسبتن اوزون زاماندا دکتر نوحی ده اوتومبیلین ایچینده آرتیق قرارلاشا بیلمه ییب، ائنیب چوبوغونو آلیشدیریپ، یان-یؤرده گزیشه رک توستونو هاوایا اؤتوروردو. دکتر حاجی زاده تووُلو گلیب اوتومبیلین سوروجو اوتوراجاغیندا اوتوروب، استارت وورماق ایسته ینده، دکتر نوحی ائله چوبوغو دا دیشلرینین آراسینداکن، باشینی قاباق یولچو اوتوراجاغینین شوشه سیندن ایچری کئچیردیب دئدی:

– اُل ساخلا دکتر!

دکتر حاجی زاده بوردوغو آچاری یئرینه قایتاراراق، شاشقین-شاشقین

سوروشدو:

– نییه؟ آز یوبانمامیشیق هااا...

– یوباندیغیمیزی بیلیرم آما، سیز گئدینجه من آشاغیا دوشدوم،

اوتومبیلینیزین دؤوره سینده گزیشه رکن بیر شئی گؤزوم ساتاشدی.

^۷ اُمکداش: همکار.

- یاخشی...

- یاخشی‌سی، اوتومبیلین قاباق تکرلرینین بیرینین اوچ بوراگی^۸
آچیلیب‌دیر؛ ایندی او تکر آنجاق بیر بوراق اوسته فیزلانیر. بیلدینیز کیمی
بو دا چوخ تهلوکه‌لی‌دیر؛ گئدرکن او دا آچیلسایدی، اوتومبیل مایاللاق
وورا بیلردی؛ قالانینی اؤزونوز تخمین ائده بیلرسینیز...

- شوخلوق ائتمه دکتر، اولماز ائله شئی.

- نه شوخلوغو جانیم؟ منیم سنله ظارافاتیم وارمی؟ زحمت اولماسا،
بیر آن آشاغی ائن، ائله اؤز طرفینین قاباق تکرینه باخیب، گؤزلرینله گؤر.
دکتر حاجی زاده آشاغی ائنیب تکره باخدی. دئییش دوز ایدی.
دکترون قاش-قاباغی سالاندی. آنینا قیریش دوشدو؛ بیر نچه ثانیه
هوروت-هوروت^۹ تکره باخیب، سونرا دوداقلارینی بیر آن بوزه‌رک دکتور
نوحی‌یه باخیب دئدی:

- دکتور بی، سانکی بیزیم بو گون دولانماغا گئتمه‌ییمیز باش
توتمایاجاق. من سیزی تاکسی ایله خسته‌خانایا یئتیره‌جه‌یم، سونرا ابزار
بازاریندان اوچ بوراق آلیب بورایا قاییدا‌جagam. اوزولمه‌یین لوطفن،

^۸ بوراق: پیچ. (فارسجادا «پیچ» آدلانان سؤزجویه، باخدیغیم سؤزلوکلرده هنج بیر قارشیت (معادل) تاپا
بیلمه‌دیم. حتی آذربایجان جمهوریتینده باشایان سویداش، دیلداشلاریمیز دا بو لوغت اوچون روسجadan
آلینمیش «Vint» سؤزجویونو ایشلمکده‌دیرلر. اونا گؤره ده دیلیمیزده «بورماق» (پیچاندن) کؤکونون
اولدوغونا باخراق، او آنلامی یئتیرمک اوچون، بیرینجی کز اولاراق «بوراق» سؤزجویونو اؤنرمه‌یی
اویغون گؤردوم. سانیرام بو سؤزجویو قبول ائدرسک، فارسجادا «پیچ‌گوشتی» دئییلن آله ده
«بوراق‌آجان» ایشلمک هنج ده یئرسیز اولمایاجاق‌دیر.)

^۹ هوروت-هوروت (Hürüt-hürüt): گیج و منگ، مات و مبهوت.

دولانماغا گئتمه ییمیز باشقا بیر گونه قالسین، اولارمی؟!

دکتر نوحی بیر نئجه ثانیه فیکیرلشندن سونرا دئدی:

- اولار، نه دن اولماسین، آنجاق باشقا بیر یول دا واردیر کی، نه شیش یانسین نه کاباب؛ هم بو گون ایلنجه میزدن^{۱۰} قالما یاق هم ده آرخاین چیلیقلا گئدک...

- ؟

- دکتر جان، سانیرام اوتومبیلده تکر بوراگی آچیب-برکیتک اوچون آچارین اولمالی دیر.

- هه وار، نئجه؟

- یاخشی، منجه بیر چتینلیک یوخ دور؛ هر تکر دن بیر بوراق آچیب، بوراقلاری آچیلیب، دوشن تکره باغلایاق؛ اوندا منیم حسابلاریم دوز اولسا، بیر تکرین دؤرد بوراگی، باشقالارینین دا هره سینین اوچ بوراگی اولار؛ بیز ده آرخاینلیقلا اؤنجه بیر ائزار ساتان دوکانا سوروب، اُکسیک بوراقلاری دا آلیب باغلایاندا سونرا دولانماغیمیزا گئدیرک...

دکتر حاجی زاده، آچیق آغیزلا بو سؤزلری دینله ییردی. سونرا دا سس سیز-سمیر سیز، آرخالغینی اوتومبیلین آرخا اوتوراجاقلارینین اوستونه آتیب، قوللارینی چیرماییب، ایشه باشلادی. ایشیندن قورتولدوقدا آلرینی ده یویوب، اوتومبيله استارت ووروب ایشلتدی. بو دؤنه آرخاین چیلیقلا یولا دوشدولر.

^{۱۰} ایلنجه: تفریح.

داها اورتام^{۱۱} بیر آز دیشمیشدی. دکتر نوحی اورادان-بورادان دانیشر، آنجاق دکتر حاجی زاده درین بیر خیالا جوموب هئچ نه دانیشمیردی. اوتومبیل بیر داها ابزار ساتان دوکانین قارشیسیندا دایاندی. دکتر حاجی زاده ائنیب، اُکسیک بوراقلاری دا آلیب قاییتدی. آچارلا اونلاری دا یئرلرینه باغلاییب برکیتدی. سونرا یئنین اوتومبیلده اوتوردو. آما یولا دوشمه دن اؤنجه دکتر نوحی یه اوز توتوب، چوخندانان بری فیکرینی مشغول ائدن سورغوسونو بئله سوروشدو:

- دکتر...

- جانیم!

- ... چوخندانان بری سندن بیر سورغو سوروشماق ایسته بیرم؛ بو گونکو سؤزلرینی ائشیدینجه شوبهیم لاپ چوخالیدی.
- دوستوم مسئله نه دیر؟

- دوغروسو سندن شوبهه لنیرم، آخی دئی گوروم سن دوغرو دان دا خسته سن، یوخسا اؤزونو خسته لییه وورویسان؟!
دکتر نوحی یئنه ده اوجا سس ایله گولوب دئدی:

- اوتانما راحت سوروش؛ دئمک منیم دلی اولدوغومدان شوبهه لنیرسن؟ ائله دیرمی؟!

- نه دئییم، ایندی کی دئیل، چوخ زامان دیر شوبهه لنمیشم. مندن قورخما، دوغروسونو دئی؛ سنه سؤز وئریرم بیر گیز^{۱۲} کیمی آرامیزدا

^{۱۱} اورتام: محیط.

^{۱۲} گیز: راز، سر.

قالار...

بیر آن دکتر نوحی نین خسته لیلی اؤزونو گؤستریب، دکتر حاجی زاده یه اوزونو توتوب دئدی:

– هه دکتر، من دلییم، آنجاق سنین دورومون مندن داها آغیر دیر. من داوا-درمان یئییب توختایا جاغام، آما سن سفته سن، آخماقسان؛ سنه درمان یوخ دور. بوندان آرتیق دا دانیشماغا هئچ گرک یوخ دور؛ سور گئدک باری دولانماغیمیزدان قالما یاق...

کارلار کندی...

اوروجلوق آیینین ایییرمی یئددینجی گونو ایدی. او ایل اوروجلوق یاییں لاپ اورتاسینا دوشموش، اونا گۆره ده اوروج توتانلار، آن آزی اون آلتی-اون یئددی ساعات آج-سوسوز قالمالییدیلار. زمیلردن اُکینه جکلر ییغیلماقادی؛ بیچین چیلر چوخلاندان بری بیچین ایشلرینه باشلامیشدیلار؛ اونلارین بیر چوخو اوروجلوق گونلرینین ناھار ایستیلرینده ایشله مک چوخ چتین اولدوغونا باخاراق، سحر اثرته سی، آلاقرانلیقدا، ائولریندن زمیلره طرف یولا دوشور، هاوا بوتوو ایشیقلا نمدان ایشه باشلاییر، گون اورتا چاغلار ایسه ائولرینه قاییدیب، آخشام اُذانینادک دینجلیردیلر. گون اورتادان سونرا، آنجاق تکه-توک اوروج توتا بیللمه یین مو شکوللو آداملاری زمیلرده گۆرمک اولوردو.

آنجاق کن دین چوبانی، آخشام چاغی گون باتانا قدر قویونلارینی چۆلده دولان دیریب اوتارمالییدی. اۆزگه یه ایشله مک چتین بیر ایش دیر. ایختیارین اۆزونده دئیل. اینسان اۆزونه نؤکر اول، آنجاق اۆزگه یه هئچ آغا دا اولمایا! او دا هر گون آلا تورانلیقدا^۱، داوار سوروسونو ائولرین طۆیله سیندن توپلاییب، قباغینا قاتیپ چۆله آپارمالییدی. بیچیلن زمیلرده، یاماجلاردا^۲ دولان دیریب اوتارمالییدی. اوروجلوغون باسقی سیندان^۳،

^۱ آلا تورانلیق (alatoran): گرگ و میش.

^۲ یاماج: دامنه ی کوهپایه، سراسیمی کوه.

^۳ باسقی: فشار، تضییق.

گون اورتا چاغلار، بیر آج کۆلگهسی تاپیب سورونو کۆپکلرینه تاپشیراندان سونرا، بیر ساعات قدر اوزانیب دینجینی آلاراق، گونشین غضبیندن دالالاناردی. اونون قولاقلاری، ماحالین اهلینین بیر چوخو کیمی اثشیتمزدی؛ ایلر اؤنجه ماحالا دوشن یولوخوجو^۴ بیر خسته لیک اوجباتیندان^۵، او ماحالدا یاشایان اینسانلارین چوخو، یا کار اولموشدولار، یا دا چوخ آغیر اثشیدردیلر. اوراسی، غریبه بیر ماحال ایدی. اورادا نرمال دانیشیق، یالیز اوشاقلارلا گنجلر آراسیندا کئچرلی ایدی؛ اورتا یاشدان یوکسک یاشلاری اولان اینسانلاردا ایسه آلرله قاش-گۆز کیمی عوضولر، دیلردن داها چوخ دانیشاردی.

چوبانین یئرہ سانجدینی دَیه نهیی، ناہار چاغی ساعات ایکی-ایکی یاریمی گؤستریردی. او گون، یابین چوخ ایستی گونلرینین بیرى ایدی. او قدر ایستی ایدی کی، بولودلار بئله گؤیدن کوسوب گتمیشدیلر. یئر-گؤیده آنجاق گونش سولطانلیق ائدیردی. چوبان، سوروسو ایله بیرلیکده سککیز-دوققوز ساعات دولانیب، لاپ آياقدان دوشموشدولر. یاماچدا یئکه بیر آج وار ایدی؛ چوبان، آنجاق اولوسونو او آجین کۆلگه سینه چاتدیریب، چیبینیندن خورجونونو، آلیندن دَیه نه یینی یئرہ آتدی. سویونون چوخو چکیلیمیش آرخین قیراغینا گئدیب، اوز-گؤزونه سو ووردو؛ آخار سو بئله قیزیب، ایلیقلاشمیشدی؛ سونرا قاییدیپ آجین کۆلگه سینده

^۴ یولوخوجو: مسرى، واگیردار.

^۵ اوجباتیندان: به دلیل، به علت.

اوتوراراق اونا دایاندی. آز کئچمه‌دن یوخو کیرپیکلریندن آسلانیب، گۆزلرینین قاپاغینی یومماغا باشلادی. ساغ-سولونا باخیب، قویونلارین دا اوتوروب، دینجلمه‌ییندن آرخایین اولاندان سونرا، خورجونو باشینین آلتینا چکیب درین بیر یوخویا گتتدی.

یاریم ساعات کئچمه‌دن، داغین زیروه‌سینده بیر قورد اوزونو گۆستردی؛ قورد یاخینلاشماسا دا، اونا گۆرن قویونلار یئرلریندن قالخیب چاخناشماغا^۶ باشلادیلار. اونلار ایکی دسته‌یه بۆلۈنوب، یاماجین اۆتکلرینه طرف قاچماغا باشلادیلار. ایکی کۆپه‌یین هره‌سی بیر دسته ایله گئدیپ، قویونلارین قاچماغنین قارشیسینی آلا بیلمه‌سه‌لر ده، اونلارین یانلاریجا گئدیپ، داغیلماقلارینی اؤنله‌دیله^۷. ایکی دسته، آستا-آستا بیر-بیریندن اوزاقلاشیب گۆزدن ایتدیله. چوبانی ائله آغیر بیر یوخو چولغالامیشدی کی، سوروسونون قاچیب گتتمه‌سینی هئچ دویمادی. بیر ساعات داها کئچدی؛ هاوانین حیرسی آزاجیق سویویوب، سرین بیر کولک، اویوموش^۸ چوبانین ترله‌میش اوزونو تومارلاماغا^۹ باشلادی. چوبان یوخودان اویانیب، اوتوردو. گۆزلرینی اوووشدوروب گرنشیدی^{۱۰} زامان، سوروسونون گتتیدیینی گۆرونجه دیک یئریندن قالخیب دۆرد دۆره‌سینه فیرلاندی؛ آنجاق قویونلاردان بیر ایز گۆره بیلمه‌دی. یاماجین اۆتکلرینده،

^۶ چاخناشماق: بهم خوردن، متلاطم شدن، متشنج شدن.

^۷ اؤنله‌مک: پیشگیری کردن، ممانعت کردن.

^۸ اویوماق: خوابیدن، ساکت و بی‌حرکت شدن، غافل بودن.

^۹ تومارلاماق: نوازش کردن، تیمار کردن.

^{۱۰} گرنشمک: خمیازه کشیدن.

اوزاقلاردا گزن گۆزلىرى، زميسينده ايشلهين تك بير اكينچينى سئچدى. اؤزو ايله - سورو داغا طرف يوخ، ائيشه طرف گتميش اولمالى دير؛ ائله ديسه، بلكه بو كيشى سورونون هاراي اگتديينى گۆرموش دور. بلكه اوندان گتديب سوروشماغيم يارارلى^{۱۱} اولدو...- دوشوندو. خورجونو ايله ديه نهينى گۆتوروب كيشينين زميسينه طرف يولا دوشدو.

اكينچى كيشى، چوبان گيلين كندينين اهلى اولما دينا باخمياقاراق، او يولوخوجو خسته ليك اونو دا ساغ بوراخمايشدى. اونون قولاقلىرى كارلىقدان بير آز او يان-بو يان ايدى. بير سؤزو ائشيمه يي اوچون باغيراق^{۱۲} دانيشماق گر كيردى. چوبانين بيلمه دىيى داها بير شئ ده وار ايدى؛ سورونون ايكي دسته يه بۆلنوب اورادان اوزاقلاشدينى زامان، ائله او اكينچى ده يوخودايدى. اكينچى ازاجيق چوباندا اؤنجه دوروب، ايشينين باشينا كئچميشدى؛ هر حالدا، چوبان اكينچى نين قارشيسينا يئتيشركن سالام وئريب، آلايه قووات وئرسين دئدى. اكينچى اونون سسينى ائشيمه سه ده، اونون سالام وئرديينى باشا دوشوب - عليكم السلام، چوخ ساغ اول- دئدى. چوبان سوروسونو ايتيردييندن دانيشيب، اكينچى دن اونلارى گۆروب-گۆرمه دىيى حاقدان سوروشدو؛ يوخ، داها بو دانيشيق چوخ اؤزل^{۱۳} ايدى. اكينچى اونون دئديكلرينى ائشيمه دىيى اوچون، چوبانا چوخ آغير ائشيتديينى ائلاتماق اوچون، ايكي

^{۱۱} يارارلى: مفيد، مناسب، شايسته.

^{۱۲} باغيرماق: فرياد زدن، نعره كشيدن.

^{۱۳} اؤزل: خصوصى، ويژه.

ألینی قولاقلارینا طرف آپاراراق، -اوغول بیر آز اوجا دانیش، منیم قولاقلاریم چوووخ آغیر ائشیدر- دئدی. دئیهرلر «کار ائشیتمز یاراشدیرار»؛ چوبان دا اُکینچینین بو داورانیشیندان بئله یاراشدیردی کی، -سورونون یاریسی ساغا، یاریسی دا سولا گئتدی- دئییر! چوبانین شانسینین آفاق اوسته اولماغیندان، ائله حقیقت ده او ایدی. چوبان هؤولهسک^{۱۴} اُکینچی دن تشککور ائدهرک، اوندان آیریلیب، دایانمادان ساغ طرفه قاچدی. اُکینچی ایسه مات-مات اونون آرخاسیجا باخاراق، شاشیب یئرینده قوروموشدو...

چوبان سورونون یاریسینی اُکینچینین ساغ طرفینده تاپیب توپلایانندان سونرا، کسه یوللا اُکینچینین سول طرفینه ساری گئتدی. تخمین ائتدییی کیمی ایکینجی یاریسینی دا آزاجیق آختارانندان سونرا تاپیب سورونو بیرلشدیردی. سورونو یوخلاماغا باشلادی؛ ایللرین چوبانی داوارلاری بیر-بیره تانیییردی. سوروده هئچ بیر اُکسیکلیک گؤرمه‌دی. دیه‌نه‌یینی بوینونون آرخاسیندا، قوللارینین بوکویونون آراسیندا ساخلایب، بیر آن فیکیره جومدو. اؤزو ایله اؤزگه قویونلارینین باشینا بیر ایش گلسه‌یدی، اونلارین بیرى بئله آج قوردلارا یئم اولسایدی، نه‌لر باش وئره بیله‌جه‌یینی دوشوندو... سونرا سوروسونو ساغ-ساغلام تاپدیغینا گؤره، او اُکینچیه بورجلو اولدوغونا فیکیرلشدی. او بویدا سورونون ایچینده، تکجه، قیچینین بیرى چولاق اولان بیر کئچی چوبانین اؤزونه عاید

^{۱۴} هؤولهسک: شتابزده.

ايدى. چوخ زامانلار اونو قوجاغيندا دولانديرار، يورولاندا يئره قوباردى. چوبان اؤزو ايله - اكينچى نين منه اتنديى يارديم جاوابسىز قالمالى دير؛ داها ياخشى سى بودور كى، من بو كئچيدن طاماح ديشىمى چكىب، اونو اكينچيه پاي وئرم - دوشونوب، سورونو اؤزو كيمى قولاقلارى اثىتمه ين اكينچى نين زميسينه سارى سوردو.

هاوا، داها ياخشىجا سربله ميش، اكينچى زميسينين ايچينده شيرين - شيرين ايشله ييردى. چوبان قيچى سينيى كئچينى سورودن آيرىب، قوجاغينا آلدى. سونرا اكينچيه ياخينلاشاراق، بير داها سالام وئردى. كئچينى يئره قويوب دانىشماغا باشلادى:

- آى قارداش سنين ايشين راست اولسون؛ نئجه دئميشدين ائله ايدى. سورونون ياريسىنى ساغدان، ياريسىنى سولدان تاپديم؛ ايندى سنين يانينا چوخ ساغ اول دئمك اوچون گلميشم؛ سنين منه اتنديين يارديم^{۱۵} چوخ دىرلى دير. من ده قورو-قورو تشككور ائتمك اوچون بورايا گلمه ميشم. دوزو چوخ وارلى بيرى دئيىلم، آما اوره ييم بؤيوك دور؛ بو بؤيوكلوكده سورودن تكجه بو كئچى منيم دير...

چوبان، كئچينين سينيى قيچينى گؤستره رك آرتيردى:

- نه يازيق كى، گؤردويون كيمى اونون دا بو قيچى سينيى دير. نئيىله مك، «يوخسولون اولدوغوندا»! منه اتنديين ياخشىليقدان اؤترو، بو كيچيك هديه نى مدن قبول ائت...

^{۱۵} يارديم: كمك.

اُکینچی ائشیتمه دیینه گۆره، چوبانین سۆزلریندن بیرجه کلمه بئله آنلامادی. او بئله دوشوندو کی چوبان، کئچنین قیچنین سیندیغینا گۆره اونو گوناھلاندیرماق ایسته یه رک، -کئچنین قیچینی سن سیندیریبسان- دئیر! قایدیب اونا دئدی:

- یوخ قارداش، من سیندیرمیشام؛ أصلن من بو گون سنین سورونو گۆرمه میشم کی کئچی نین قیچینی دا سیندیرام. اوسته لیک او سینیق دا هئچ تزه سینغا اوخسامیر؛ چوخدان سینمیش اولدوغو بللی دیر... نه یازیق کی، چوبان دا کیشنین دئدیکلرینی باشا دوشموردو؛ او دا بئله ظن ائتدی کی، اُکینچی قیچی سینیق کئچینی بیهنه میب، ساغلام بیر کئچی ایسته ییر! اونا گۆره دئدی:

- سنین منه آندین یوخ دور قارداش؛ واللله من اؤنجه ده دئدیم، من یوخسول بیر آدامام؛ کئشکه سوروده ساغلام بیر قوچوم اولایدی، اوندا اینان اونو سنه وئره دیم؛ آما بو کئچنین قیچنین سینیقی دا بیر شئی دئیل؛ باخ، باغلامیشام، بیر-ایکی هفته ایچینده بو دا باشقالارینا تای اولار...

اُکینچی بئله دوشوندو کی، چوبان اؤز سۆزونده ایصرارلی دیر. اونا گۆره ده سسینی بیر آز قالدیریب دئدی:

- موسلمان! نییه تئز-تئز کئچنین سینیق قیچینی منه گۆستریرسن؟ بیر کره دئدیم کی، منیم خبریم یوخ دور. نه دیلله سنه دئیم کی من سیندیرمیشام...

چوبان دا بیر قدر سسینی اوجالتدی:

- کیشی اینصافین اولسون؛ منیم کی سنه یالانیم یوخدور؛ بیر یول دئدیم، منیم بو سورودن وار-یوخوم بودور؛ باشقاسینین قویونونو توتوب سنه وئره بیلمرم کی. خاطا اولمادی کی منه بیر یاردیم ائتدین...

نه چوبان دئیینه کی اُکینچی باشا دوشوردو، نه ده اُکینچی دئیینه کی چوبان. آنجاق هرهسی یاراشدیردیغینی اورتایا قویوب، گئت-گئده هر ایکی طرفین سسینین تونو یوکسلیر، آز قالیردی اُل به یاخا اولسونلار. بو های-هارایدا، بیر آت اوغروسو، قونشو کئندن گؤزل بیر آت اوغورلاییب، اوزاق ماحاللاردا ساتماغا آپاریردی. اوغرو، آتی چاپدیراراق اونلارا یاخینلاشدی. اُکینچی کیشی اؤزو ایله -اولماسا بو غریبه دن، بیزیم آرامیزدا داورلیک ائتمه سی اوچون یاردیم آلیم- دوشونه رک، دایانمادان اونا طرف قاچیب، اَللرینی یوخاری قالدیریب، اونا ساخلاتدیردی. آتینین نوختاسیندان یاپیشیب، آندان ائتمه سینی ایسته دی. اوغرو آندان ائتر-ائتمز هم اُکینچی هم ده چوبان، اؤز سؤزلرینی اونا دئمیه باشلادیلار. شانس سیزلیقدان، او اوغرو دا یولوخوجو خسته لیکدن آماندا قالما ییب، او دا کار اولموشدو؛ آت اوغروسو هئچ بیرینین سؤزونو ائشیتمه دن بئله دوشوندو کی، اونلار آتی تانییب، اوغورلوق اولدوغونو آنلایاراق، آتی اوندان آلق ایسته بیرلر! اونا گؤره ده دئدی:

- سیز هر ایکینیز حاقلیسینیز! آت اوغورلوق دور، آما آلاها آند اولسون کی، اونون یهری ایله نوختاسی اؤزومونکودور. من بو آتین لوتونو اوغورلامیشام؛ نئلیک قویون اؤزومه عاید اولانلاری گؤتوروم، سیز ده آتی بییه سینه چاتدیرین!

چوبان ایره‌لی یئرییب بیر داها سۆزلرینی تکرار ائتدی؛ اُکینچی ده اوغرونون یاخاسیندان یاییشیب، اۆز سۆزلرینی دئدی. اوغرو بئله ظن ائتدی کی، اونلار اونون مصلحتی ایله راضیلاشمایب اونو محکمه‌یه وئرمک ایسته‌ییرلر. ساعاتلار، بو چکیش-برکیشلرله، دئیشمه‌لرله سووولوب آخشام اولدو. او اوچ کیشی هر نه تهر ایدی بیر-بیینه قاندریدیلر کی، گئدیپ کندين قاضی‌سینین یانیندا مسأله‌لرینی حل ائتسینلر. چوبان، اوغرونون آتینی سوروسونه قاتیب یولا دوشدو؛ اُکینچی ده آت اوغروسونون قولوندان یاییشیب سورونون آرخاسیجا گئتدیلر؛ کنده بیر آز قالمیش، ائویندن کوسوب، قونشو کنده باجیسی‌گیله گندن بیر خانیم راستلاشدیلار. خانیم، ائوده یولداشی ایله دئیشندن سونرا، بوخچاسینا بیر-ایکی دست پالتار باغلایب، ائودن چیخمیشدی. او گله‌رک خیالی-خیالی دئییب، آللرینی اؤلچوردو. اوغرو اوزاقدان قادینی گؤرونجه، قولونو اُکینچینین آلیندن اوزوب، اونا طرف قاچدی؛ یئتیشینجه ده اونا یالوارماغا باشلادی:

- آی خانیم بلکه ده سن بونلاری تانییرسان، سن بیل بالالارینین جانی، بونلارا دئ آتی گؤتوروب، منیم یهریمله نوختامی وئریب، قویسونلار من گئدیم؛ بیر غلط ایدی ائله‌میشم...

چوبانا اُکینچی بئله ظن ائتدیلر کی، اوغرو اونلارین مسأله‌سی حاقدان قادینا دانیشیر. اونلار دا ایره‌لی یئرییب، هر بیر اۆز سۆزونو دئدی. آما نه یازیق کی، او قادین دا کار اولدوغو اوچون اونلارین دئیینی ائیتیمیردی. قادینین عاغلینا بئله گلدی کی، یولداشی اونلاری

آراچیلیق ائدی، کوسوب گتمهینه أنگل اولماق اوچون یولالایب دیر.
دئدی:

– یوخ، قاییداسی دئیلم! داها «بو خینا او خینالاردان دئیل». گئدین
او ننه سی اوغلونا دئین کی، من بیر ده او ائوه قاییتما یا جاغام. ائوینه باشقا
بیر آرواد تاپسین. گۆره ک من دۆزدوکلریمه باشقاسی دا گلیب
دۆزهرمی؟!...

دئییلر «آدادا»^{۱۶} قورد آز ایدی بیرینی ده گمی ایله گتیردیلر! مسأله
چۆزولمک یئرینه، درد اوسته درد قالاندی؛ داها ایکی نفر کار یوخ، تام
دۆرد نفر کار، بیر-بیرینی ائشیدیب دوشونمه دن دانی شیردی لار. سورو کنده
طرف گتیدیینه گۆره، او دۆرد نفر ده دایانا بیلمه ییب، ائله دئییشه-دئییشه
سورونون آرخاسیجا گتیدیلر...

سورو کنده یئتیشیب، حیوانلار تئیلندیلر^{۱۷}. کندیلیرین هر بیر اؤز
داوارلارینی^{۱۸} آیریپ طؤیله سینه آپاردی. گۆنش، آستا-آستا باتماغا
دوغرو گئدیردی. چوبان اؤزونون قیچی سینیق کئچیسینی سورودن
آیریپ قوجاغینا آلدی. حیوانلارین هامیسی بیله رینه چاتدیریلاندان
سونرا، او اوچ کیشی ایله بیر قادین، اوغورلانا آتی دا آپاراق کندین کار
قاضی سینین ائوینه طرف یوللان دیلار؛ اونلار، قاضینین ائوینه چاتینجا،
گۆنش بوتوو داغین آرخاسینا کئچمیش، هاوا دا قارالمیشدی. اذان

^{۱۶} آدا: جزیره.

^{۱۷} تئیهلمک: جدا کردن احشام.

^{۱۸} داوار: گوسفند و بز.

چکلیب، اوروج توتانلار، اوروجلارینی ایفطار ائتمیشدیلر. قاضی تزهجه بیر کاسا آشینی ایچیب قورتارمیشدی کی قاپی دؤیولدو؛ قاضینین اوغلو کار دئییلدی؛ گئدیپ قاپینی آچدیغیندا هر دؤرد نفر قاضینی تعجیلی گۆرمک ایسته دیکلرینی دئدیلر. اوغلان قاییدیپ آتاسینی چاغیراراق اونا آنلاتدی کی، قاپی آغزیندا اونو گۆرمک ایسته ینلر واردیر. قاضی ایفطارینی یاریدا قویوب، قاپیا چیخدی؛ اوغلو ایسه سوفره باشیندا اوتوروب یئمەیینین قالانینی یئمەیه باشلادی. قاضی قاپیا یئتیشن کیمی، هر دؤرد آدام اؤز سۆزونو دئمەیه باشلادی؛ اکینچی، موسلمانلارین بیر چوخونون عادتی اولدوغو کیمی گۆیو گۆستریب، آند ایچهرک دئدی:

– آند اولسون بو واختین صاحابینا کی، من بو چوبانین سوروسونو هئچ گۆرمەمیشم، هله قالسین کی، اونون کئچیسینین قیچینی ووروب سیندیرام!

اوغرو ایرهلی یئرییب، او دا گۆیویو گۆستریب آند ایچهرک دئدی:

– آند اول گۆیو-یئری یارادان آلاها، آتی اوغورلامیش اولسام دا، یهر ایله نوقتاسی اؤزومونکودور؛ آنجاق بیلیم نیه بونلار منه اینانمیرلار...

خانیم ایرهلی گئدیپ او دا گۆیه باخیب آند ایچهرک دئدی:

– جناب قاضی، منیم بولداشیمی تانییرسینیز؛ نه قدر غضبلی اولدوغونو دا بیلیرسینیز؛ آند اولسون آلاها من بیر داها او ائوه قاییتماق ایسته میرم، آنجاق بونلار آل چکمرلر...

سون اولاراق، چوبان قاباغا یئرییب، قوجاغینداکی کئچینی یئرە

قویاراق دئدی:

- قاضی جنابلاری، من سورومو ایتیردییم یئرده، بو اَکینچی قارداش منه یاردیم ائدیب اونلارین یئرینی منه گؤستردی؛ سیز منی تانییرسینیز؛ آند اولو بو گۆیلری یارادان آلاها، منیم بو کئچیدن باشقا بیر حیوانیم یوخدور؛ اونون دا قیچی سینیب دیر؛ نه ائدیم یوخسولون اولدوغوندان! من بونو زحمت یانا کیمی بو اَکینچییه وئرمک ایسته ییرم، آنجاق او ساغلام بیر قویون ایسته ییر. من هارادان گتیریم ساغلام قویونو؟!

هامی سؤزونو دئییب قورتولاندان سونرا، قاضی ده اونلارین سؤزلرینی ائشیده بیلمه دیی اوچون، اؤز ذهنینده بئله دوشوندو کی، اونلار گۆبو گؤستره رک اوروجلوقدان سونرا گلن شوال آیینین هیلالینی گۆردوکلرینی دئییرلر! قاضی اوغلونو چاغیردی؛ اوغلان گلنجه اونا بئله دئدی:

- اوغلوم! اوچ عادیل کیشی ایله بیر قادین شوال هیلالینی گۆردوکلرینی ایقرار ائتدیکلرینه گۆره، داها منه شوبه ه یئری قالمادی کی، آرتیق اوروجلوق آیی چیخیب، صاباح شوالین ایلک گونودور. بو کئچینی ده صاباح، فیطر بایرامینین ناهار ضیافتی اوچون گتیریبلر! اونا ایچریه آپاریب، طؤیله ده کی حیوانلارا قات، صاباح کسبب شورباسینی بیشیره ریک. اؤزون ده دامایا چیخیب اُدان وئر؛ اُدان قورتارانان سونرا، کندین اهلینه بو خبری اعلان ائدیپ دی کی، صاباح آغ ساققالار ناھارا بیزه بویورسونلار!...

اوغلان کئچینی آپاریب طؤیله ده کی باشقا حیوانلارینا قاتدی؛ سونرا

دا اُذان وئرمک اوچون داما چیخدی؛ قاضی ده گلنلری یولا سالیب
قاپینی باغلادی...

سن سوسماليسان...

والى يە، ياخينلاردا شاھين ويلايتدن گۇرۇش ائتمە يە ماراقلى اولدوغونو بيلديرديلر. او ويلايت، اۆلكە نين اُن يوخسول ويلايتلريندن بيرى ساييليردى. شاھين اوجقار^۱ ويلايتلرە الى باغلى اولدوغو بير ياندا قالسين، دوغانين^۲ دا اورايا ھىچ اوزو گولمەميشدى. شورانلىق، سوسوز تورپاقلاردان نە بکلنە^۳ بيلر؟! جاماعات آغير دورومدا كئچينير، دورومو ياخشىلاشديرماق اوچون دە آللريندن بير ايش گلמידى. اونلار آزاراق خالچا توخوماق، دميرچىلىك، باخيرچىلىق^۴ ياخود باشقا آل ايشلريندن بير تىكە چۆرك تاپيرديلار. اكينچيلر، باغچيلار چتين ليكلە، آنجاق اۆز ويلايتلرى قدر حاصيلات اورەتە^۵ بيليرديلر. پولسوز لوقدان، آيش-وئريش ايشلريندە دە بير او قدر پارلاقلىق گۆزە ديميردى.

والى شاھين گلە يىنين خبرىنى ائشيدىنچە، حاضيرلىقلار باشلادى. ويلايتين بوتون باش بيلنلرينى عاجيل توپلانتيا چاغيردى. مسالەنى اونلار انالداراق، تهلوكە سىزلىك سوروملوسونا اوز توتوب دئدى:

- شاھ ويلايتە گلدىي زامان اۆزون دە، آلىنين آلتيندا ايشلەين مأمورلارين دا، گۆزونوزو دۆرد آچين. ھىچ قارما-قارشىقلىغا يول

^۱ اوجقار: دور، متهى اليه.

^۲ دوغا: طبيعت.

^۳ بکلەمک: منتظر شدن. بکلەمک: انتظار داشتن، توقع داشتن.

^۴ باخيرچىلىق: مسگرى. باخير: مس.

^۵ اورەتمەك (Ürətmək): توليد کردن.

وئریلمه مه‌لی دیر. کیمسه‌دن شوبه‌له‌نیرسینیزسه، شاه گل‌مه‌دن توتوب
دوستاقلاردا ساخالیین. البته شاه گلیب گئندن سونرا اؤتوره‌رسینیز. هئج
سهوینیز باغیشلانمایا جاق دیر.
- باش اوستونه.

سونرا تشریفات سوروملوسونا سس‌لیب دئدی:
- شاه حضرتلری گلیب گئدینجه، هر شی موکمل اولمالی دیر.
خیابانلار، محله‌لر گونده سوپورولسون. شاهین یولو دوشه بیلجک
یوللارین هامیسی بزه‌ن سین. جاماعاتا شاه گلن زامان یوللارین قیراغیندا
دوروب آل سالاماقلارینا، خزانه‌دن پول وئریلسین. شاه فایتونوندا
ائیب، اؤتدویو بوتون یوللارا قیرمیزی خالچالار سالینسین. موسیقی
قروپلاری حاضیرلیقلی اولاراق، شاد ماهنیلار مشق ائتسینلر. باشقا
ویلايتلردن یاخشی لووغلار^۶ چاغیرلسین. آیدین دیرمی؟
- آیدین دیر آنجاق...

- آنجاق نه؟

- والی جنابلاری ساغ اولسون! خزانه‌ده بو ایشلرین هامیسی
گۆرمه‌یه ییترلی پول یوخ‌دور. بیر ده او قدر قیرمیزی خالچانی هارادان
گتیرک؟ بوتون ائولرین خالچالارینی دا ییغیب توپلاسا ق یئنه گۆرمز!
- منه ناغیل دانیشما. تاپشیریق‌لاریمی یئرینه ییترمه‌لیسن.
کسین لیکله بیر یولونو تاپارسان! نه بیلیم جاماعاتدان، باشقا ویلايتلردن

^۶ لووگا (Lovga): دلقک.

پول بورج ائله. جاماعاتا دا شاه گليب گئدينجه يوللاردا دايانيب آل ساللاماقلاری خصوصدا گوج ايشلت. تهلوكه سيزليک باشقانی سنه يارديم ائدر. قالانیني دا اوزون فيکيرلش، بير يولونو تاپ.

– أمر ائدرسينيز والی یی.

سونرا والی باشقا حاضیر اولانلارا اوزونو توتوب آرتیردی:

– شاهین بورادا اولدوغو گونلرین مؤحتشم کئچمه یی اوچون، کیمسه آلیندن گلنی أسیرگه مه سین^۷. بونو دا تاپشیرمالییام کی، کیمسه یه شاها دورومدان گیلئی لنمه حاققی وئرمیرم. أمرلردن چیخانلارین سوچو باغیشلانمایاجاق. شاها هر شئیین اؤز یئرینده اولدوغونو، جاماعاتین کئف ایچینده کئف چکدییینی دئییه جکسینیز، آنلاشیلدیمی^۸؟

هامی آنلاشیلدی دئیهرک، قالخیب ایشلرینین باشینا گئتدیلر. تانینمیش موخالیفلر توتولوب، دوستاغا سالیندی. خیابانلار سوپورولوب، گؤز قارشیسیندا اولان، تعمیرى گرکن یئرلره باخیلدی. خیابانلارین هر ایکی طرفی ألوان پارچالارلا بزه ندی. ائولردن بوتون گؤزه گلیم خالچالار زور ایله توپلاندى. شهرین وارلیلاریندان زور گوجونه اوسته له مه^۹ وئرگیلر^{۱۰} آلیندی. جاماعاتا شاهین گلیب، گئده جه یی زامان خیابانلارا گلیب اونا آل ساللامالاری حاقدان تاپشیریقلار وئریلیب، گلمه ینلره آغیر

^۷ أسیرگه مک: مضایقه کردن، دریغ کردن.

^۸ آنلاشیلماق: مفهوم شدن، معلوم شدن.

^۹ اوسته له مه: اضافه بر، مازاد، اضافی.

^{۱۰} وئرگی: مالیات.

جزالار قراری کسیدلی. قونشو ویلايتلردن آلی سازلا، آغیزی آوازلا،
داورانیشی لووغالیقلا تانیس اولان شخصلر چاغیریلدی...

سونوندا، گونلرین بیرینده جارچیلار شاهین گلمه یینین خبرینی
خیابانلاردا جار چکدیلر. خالچالار یئر دوشندی. آنجاق ایشه یارایان
خالچالارین سایى آز اولدوغو اوچون، ایییرمی نفر ده، شاه اوستوندن
سوووشاندان سونرا، همین خالچالاری چییینلرینه آلیب آرخا یولقلاردان
قاچیردی، قاباقدکی کتچیدلره^{۱۱} سرمکلری اوچون ایشه آلیندیلار.
شاهین فایتونو شهره گیرن زاماندان والی ده اونون یانیندا اوتوردو .
فایتون خیابانلار اوزونو ایره لی گتتدی که، جاماعات خیابانلارین هر ایکی
طرفینده اونا آل سالالیب، هورا چکیدیلر. آددیم باشی مأمورلار اوزو
جاماعاتا طرف دوروب، اونلاری هیجانا گتیریدیلر. والی آردیجیل
دانیشاراق جاماعات، شاهین یولونو نه هوسله گۆزلهدیییندن دئییردی.
نئچه خیاباندان اؤتدوکدن سونرا، فایتون والینین ائوینه گئدن یولاغین
باشیندا دایاندی. شاه ایله والی آشاغی ائترکن، شهرین بوتون بؤیوک
آداملاری اونلارین یولونو گۆزله ییردیلر. شاه هامیسی ایله گۆروشه رک،
والی اونلاری شاها تانیئتیدردی. گۆروش سونا چاتینجا هامی قیرمیزی
خالچالارین اوستونده آدیملایاراق والینین ائوینه ساری یولا دوشدولر.
یولقلارین هر بوروغوندان دؤنر-دؤنمز، ایشچیلر توو ایله خالچالاری
بوکوب چییینلرینده قاچیرداراق، نئچه یولاق او طرفده یئنین سالیردیلار.

^{۱۱} کتچید: گذر، عبور، معبر، گذرگاه.

سونوندا والينين ائوينه چاتديلار. هامى ايچرى كئچدى. ناھارا بير شئى قالميردى . شاه، گلنلرين هاميسينين اوتورماسيني امر ائتىدى. اۋزو ايسه آل-آياغينا سو چالماق اوچون خيطة چيخدى. شاه قايدىب گلنده، سوفره دۋشهيب يئمكلر سوفريه دوزولموشدو. يئييب ايچندن سونرا سوفره ييغىليب، يئنە دە ھەرە اۋز يئرینده اوتوردو . والى آزاجيق اورادان-بورادان دانیشيب، ویلايت حاقداءا اويدورما^{۱۲} راپورتلار^{۱۳} وئردن سونرا، شاهدان، دانیشيب اورادا حاضیر اولانلاری فیضه یئتیرمه سینی خاهیش ائتىدى. شاه دانیشماغا باشلاييب، اۋلكه نین دورومونو حاضیر اولانلارا آچيقلادى. سونرا اولنلارین ویلايتی حاقداءا بير آز دانیشيب، والی یه اوز چئوپره رك سوروشدو:

- یاخشی والی بى، بير دئ گۈره ك سیزین ویلايتین اكين-بيچینی نه حالدادير؟

- شاه حضرتلری ساغ اولسون، هر شئى لاپ اءلا درجه ده دير. اينانين هر كول بوغدادان يوزدن چوخ بوغدا گۈتوروروك. اكينچيلر ویلايتين لاپ وارلى شخصلريندن دير. ویلايتين مصرفيندن باشقا، قونشو ویلايتلره ده حاصیلات ساتيلير؛ بونلار هامیسی اءلا حضرتين دیرلى تدبيرلريندن قايناقلانير.

- چوخ گۈزل؛ منيم سالامیمی اكينچيلرينيزه يئتيرين؛ اولنلاردان سونسوز درجه ده ميننتدار اولدوغومو دئيین.

^{۱۲} اويدورما: ساختگی، جعلی، تخیلی.

^{۱۳} راپورت: گزارش.

بو آرادا، ویلایتین اورادا حاضیر اولان باش بیللنلری، والینین سۆزلرینین بؤیوک یالان اولدوغونو یاخشی بیلیردیلر. آنجاق کیمسه ده دانیشیب، قارشى دورماق جسارتى یوخ ایدی. آنجاق سونوندا دمیرچیلر بیرلییینین باشقانی^{۱۴} بو حاقسیزلیغا دؤزه بیلمه دی؛ اوزونه اوز باغلاییب، آياغا قالخدی؛ دانیشماغا ایذین ایسته یه رک، والینین سۆزلرینه اعتراض ائتمه یه باشلادی:

- شاه حضرتلری ساغ اولسونلار، والینین بو سۆزلری تام اویدورمادیر. بیزیم ویلایتین یاغینتییسی^{۱۵} چوخ آز، اُکینچیلرین ده اوسلوبو چوخ اُسکی دیر. اُکینچیلر چوخ آجیناقلی^{۱۶} دورومدا کتچینیرلر. یاون چۆره یی بئله، چتین تاپارلار...

- سن کیمسن آی کیشی؟

- من دمیرچیلر بیرلییینین باشقانیام.

شاه اوزونو والی یه توتوب سوردو:

- والی بى، بو کیشی نه دئییر؟

- شاه جنابلاری، او کیشی بیر یالانچی دیر، هامی اونو تانیییر...

اوتوروما^{۱۷} گرگینلیک^{۱۸} دوشدو. والی ایله باشقان بیر-بیرینه گیردیلر؛

سۆز قالمادی بیر-بیرینه ساییلما میش. شاهین سسی اونلاری یئرینده

^{۱۴} دمیرچیلر بیرلییینین باشقانی: رئیس اتحادیه ی فلزکاران.

^{۱۵} یاغینتی: بارش، باران.

^{۱۶} آجیناقلی: فجیع.

^{۱۷} اوتوروم: نشست، جلسه.

^{۱۸} گرگینلیک: تنش، وخامت.

قوروتدو:

- جلادا!

- قوللوغونوز دایام قوریان.

- بو دمیچیلر بیرلیسینین باشقانی توتون، آیقلارینی فلکه باغلایب،
اللی آج آیقلارینین آلتینا دۆشهیین کی، بیر ده دیلی یالانا آچیلما سین.
- امر ائدر سینیز...

کیشی دانیشماق ایسته دی آنجاق شاه دایانمایب سالوندان چیخدی.
یازیق کیشینین آیقلارینین آلتی چالینان آججلارین ائتکی سیندن
شیشدی. یئریه بیلمه دیی اوچون، یولداشلاری قولتوقلارینین آلتینا
گیریب ائونه یئتیردیلر. شاه ایکی گون ویلایتی گزدی. او، ایکینجی
گونون آخشامی والی یه یئنه بیر شام چاغیریشی^{۱۹} دوزنله ییب^{۲۰}، شهرین
باش بیلنلرینین چاغیریلما سیننی امر ائدرک، دمیچیلر بیرلیسینین باشقانی
دا چاغیریلانلار ایچینده اولماسی خصوصدا اؤزل تاپشیریق وئردی.
قوناقلار گلیب چا ندیلار. شام سوفره سی سالدی؛ یئمکلر یئیلیب
سوفره ییغیشیلدی. چایلار ایچیلرکن شاه والیدن ویلاйте مالدارلیق
دورومو حا قدا سوروشدو:

- شاه حضرتلری ساغ اولسونلار، بیزیم ویلایت، مالدارلیق
ساحه سینده اؤلکه ده بیر قوطب ساییلیر! داوار سورولری ساید-حسابا گلمز؛
ناخیرلاریمیزین سوت-قاتیغی بیر او قدر بول دور کی، ناخیرچیلاریمیز

^{۱۹} چاغیریش: دعوت، احضار، فراخوانی.

^{۲۰} دوزنله مک: ترتیب دادن، سازمان دادن.

گون چیخاندان گون باتانا باش قاشیماغا ماجال تاپا بیلمز لر... والی بو یالانلاری سایارکن، حیرص، دمیرجیلر بیرلیسی باشقانینین باغیرساقلارینی کسیردی. دیشلری بیر-بیرینه قیفیلا نیش، قان اوزونه بیغیشیب، اوزو چوغوندورا بنزه بیردی. آیاقلارینین آلتینین آغریسی بوتوو توختاماسا دا، دانیشماسایدی بلکه پارتلایاجاق ایدی. سونوندا دایانا بیلمه ییب، یئنه اعتراض ائتدی:

- شاه ساغ اولسون، بو کیشینین بوتون سۆزلری یالان دیر؛ ویلایتده بیتگی یوخ دور کی، مالدارلیقدا بیر حرکت اولسون؛ بوتون حیوانلارین قارینی کوره یینه یاپیشیب. آج حیوانلاردان سوت-قاتیق آلماق اولارمی؟ شاه کیشینین سۆزلرینین قورتولماسینی گۆزله مه ییب، جالادلارینی چاغیردی. یئنه کیشینین آیاقلارینی فلکه باغات دیریب، سکسن^{۲۱} آعاج آیاقلارینین آلتینا وورماقلارینی امر ائتدی. اؤزو ده درحال سالوندان چیخدی.

سفرین سونونجو گونونون آخشامی، یئنه ده شام حاضیرلیقلاری گۆرولدو. شاه ویلایتین بوتون باش بیلنلرینین چاغیریلماسینی امر ائتدی. یئنه ده دمیرجیلر بیرلیسینین باشقانینین چاغیریلماسی حاقدا اؤزل تاپشیریکلار وئردی. چاغیریلانلار آستا-آستا گلیب چاتدی لار. دمیرجیلر بیرلیسینین باشقانی ایسه آیقلاری باغلی، آخسایاراق، چتین لیکله اوزونو قوناقلیغا چاتدیردی. شام یئیلیل سوفره بیغیشیلاندان سونرا، شاه والیدن

^{۲۱} سکسن (Səksən): هشتاد.

ويلايتين صنعتى دورومو حاقداسوروشدو:

- شاه حضرتلرى، صنعتچى لريميزين بورادا اولان باشچيلارى تانيق^{۲۲}
اولدوقلارى كيمى، ويلايتيميزده صنعت، بۇيوك گليشمه دۇنمىنى^{۲۳}
كتچيرير؛ ويلايتده گۆزل خالچالار توخونوب، باشقا اۆلكه لره بئله ساتيلير.
باخيرچيلاريميز ميسدن گۆزل شئيلر دوزهلديب ساتيرلار؛ ديميرچيلرين
ايشينده هاميدان چوخ گليشمه يه تانيغيق...

والى دورمادان اويدورمالارى آرديجيل ساير، شاه ايسه باشينى
دوغرولاما^{۲۴} ايشارتى گۆسترهرك ترپه ديردى. ديميرچيلر بيرليينين
باشقانى ايسه دانيشماق ايسته ينده، بير طرفدن قانا بويانميش آياقلارى
ياديندا دوشور، باشقا طرفدن ده ساغ-سولوندا اوتوران يولداشلارى ديزينى
باسيرديلار. سونوندا زور ايله اؤزونو ساخلاييب دانيشمادى.

بير آزدان مجلس تاماملاندى. چاغيريلانلار داغيلماق ايسته ينده،
شاه، والى يه ديميرچيلر بيرليى باشقانين ساخلانيلماسينى ايشاره ائتدى.
جاماعات داغيليشاندان سونرا، شاه والينى ده مورخص ائديب، كيشييه اوز
توتوب دئدى:

- آى قورخماز كيشى! بس بو گئجه نييه ديله گليب، اعتراض
ائتمه دين؟!

- شاه حضرتلرى ساغ اولسونلار، اعتراضين نه فايداسى وار كى؟

^{۲۲} تانيق: شاهد.

^{۲۳} دۇنم: فصل، موسم، هنگام.

^{۲۴} دوغرولاما: تأييد.

آياقلاریمین یاراسی هله توختاماییب.

شاه گولومسونوب دئدی:

- آنجاق سنی جزالاندیردیغیمین نه دنینی هئچ بیلدینمی؟!

- سیز منه اینانمادینیز؛ منی یالانچی سانیب، آنارشییست^{۲۵} اولدوغومو

دوشوندونوز، یوخسا باشقا نه اولاییلر؟

- یوخ، سنین یانلیشینین^{۲۶} بیرى ده ائله بوراسیندادیر. سن هئچ

جزانین نه دنینی ده بیلمه ییسن.

- قوریان بلکه من باشا دوشمه میشم، سیز منی باشا سالین لوظفن.

- سنه وورولان آغاجلار، منی آخماق یئرینه قویماغینا گؤره ایدی.

- استغفورالله، نجه یعنی؟! منیم ائله بیر جسارتیم اولاییلمز.

- کیشی، سنجه من کور بیریم؟ ویلایتینیزه گلدییمده، یول اوزونو

چؤل-بایرینیزین دورومونو گؤرمه دیممی سانیبسان؟ یوخسا قویون

سورولرینی، ناخیرلارینیزی گؤزدن کئچیرتمه دییمی ظن ائدیسن؟ یا دا

شهره گیرهرکن آددیم باشی مأمور دایاندیغینا، جاماعاتین قاش-قاباغینا

فیکیر وئرمه دیممی دوشونوبسن؟ سنجه، او آلابزک خالچالارین نه آنلام

داشیدیغینی بیلیرممی؟ چیینلرینده خالچا داشییان حاملالارین

قاچدیغینی گؤرمه ییب، آياقلارینین تاپا-توپونو ائشیتمه ییب، یاخود

خالچالارین تکرارلانماسینا فیکیر وئرمه دییمی ده دوشوبسنسه یانلیبسان

دوستوم! آما نییه والینین اویدورمالارینا ایناندیغیمی سوروشسان، هئچ

^{۲۵} آنارشییست: هرج و مرج طلب، آشوبگر.

^{۲۶} یانلیش: خطا، اشتباه.

اينانماڊيم دٿيهجهيم، آنجاق بونا سياست دٿيهرلر. اٿله من او ساياق
 سورماليام، او دا او تهر جاواابلاماليدير، بو آرادا سنله سنين کيميلر ده
 سوسماليسيز! ايندي گئت، بوينونو جلالداريما تاپشيرماديغيما گوره شوکر
 ائت. بوندان بٿله ده بورنون کٽچمهين دلييه باشيني سوخما...

بیز توپ آتاما زدیق...

«صفوی» لر سیلسیله سینین شاهلاریندان اولان بیرینجی «شاه عباس» سونرالار اؤز آدی ایله تانینان لیماندا^۱ (بو گونکو عباس لیمانیندا) اولدوغو زامان، اینگیلیس دؤولتی طرفیندن، او اؤلکه دن گؤروش ائتمه یه چاغیریلیمیشدی. حاضیلیقلار گؤرولوب، شاه، ایمپراطورلوقون سیاست آداملاریندان، تاجیرلریندن هم ده صنعت آداملاریندان اولوشان^۲ بؤیوک بیر قروپلا، او سفره یوللاندى. سفر چوخ اوزون سفر ایدی، آنجاق مقصده چاتینجا، اینگیلیس لیلرین اونلاری مؤحشم قارشیلادیقلاریندان، یورغونلوق جانلاریندان چیخدی. هئیائی آپاران گمی، ساحیلین یاخینلیغیندا قارماق^۳ سالدی؛ قاییقلار سویا سالینب، شاهلا یانینداکیلار گمیدن سالانان نردیوانلار واسیطه سی ایله قاییقلارا ائدیله. قاییقلار ساحيله بیر آز قالاندا، توپلار سسلندی. تام ایییرمی بیر توپ آتیلدی. گئدنلر اؤنجه دیکسیندیله؛ بیر خطر اولمادیغیندان آرخایینلاشانان سونرا، شاه عباس اوز توتوب تشریفات باخانی^۴، سوروشدو:

– باخان بو توپ آتیشلاری نه دیر بئله؟

^۱ لیمان: بندر.

^۲ اولوشان (Olusan): متشکل، ساخته شده. اولوشماق: ساختن، تشکیل دادن.

^۳ قارماق: لنگر کشتی، قلاب ماهیگیری.

^۴ باخان: وزیر.

- قوربان قورخولاجاق بىر شى يوخ دور؛ بو اۆلكەدە، اۆنملى قوناقلار قارشىلايان زامان توپ گۆللەسى آتیشى، ايكي آنلام داشيىير: بىرىنجى سى قوناغا حۆرمەت ائديب، «خوش گلدین» دۆمك دىر؛ قوناغىن ائو بىيەسىنە دىرى چوخالدىقجا، آتيلان توپ گۆللەلرىنن دە سايىسى آرتار؛ اُن دىرلى قوناقلارین حۆرمەتىنە تام ايىرمى بىر توپ گۆللەسى آتيلار. ايکىنجى اماجدا، اۆلكە منسوبلارى بو آتیشلارلا جاماعاتا بىر نۆع خبردارلىق چاتدىرىرلار؛ بلكە دىيرلر: آى جاماعات، بىلىب آگاه اولون، سلطنت اراضىسىنە، باشقا اۆلكەدن اۆنملى شىخصىتلر گلىلر...

شاه عاباس باشىنى تصدىق علامەتىنە توولايلاق، بو دىبى چوخ بىيەنىب، بوندان بئله او دا ايمپراطورلۇغوندا بو دىبى ايشلەتمەيى دوشوندو. قايىقلار ساحىلە يئتىشىدىلر؛ قوناقلار ساحىلدە ائىب، بۆيۆك بىر سايىق ايلە قارشىلاندىلار. شاھلا سفرداشلارى، گۆزل بىر قصرە آپارىلىپ اورادا يئرلشدىرىلدىلر؛ او گون، دىنجىلىب سفر يورغونلۇغونو جانلارىندان چىخارتماقلا صاباح اولدو.

صاباحىسى گوندن چوخ جىددى دانىشىقلار آپارىلىپ، موقاويلەلرە قول چكىلدى. آرا-سىرا كراللىق سوروملۇلارى اونلارى كراللىق اراضىسىندە گزدىرىپ، گۆرمەلى يئرلرى گۆستىرىپ، ھىچ بىر قوللۇقدان اُسىرگەمەدىلر. اون گونلۇك سفر، بىر گۆز يوموب آچىنجا سونا چاتىپ، قايىتماق گونو اولدو. ايكي ھىئات، سون گۆرۈشلرىنى ساحىلدە ائديب، بىر-بىرىنن اَلنى دوستجا سىخدىلار. ساغوللاشىپ بىر-بىرىندن آيرىلان چاغ، شاھ، قارشىلىقلى اولاراق اينگىلىس طرفىنى اۆز ايمپراطورلۇغوندان گۆرۈش

ائتمه‌یه رسمی شکیلده چاغیریب، اونلارین قوناق گلمه‌یی خصوصدا چوخ ایصرار ائتدی. اینگیلیس طرفی ده ممنونیتله دعوتی قبول ائدی، یاخین گله‌جکده سفره چیخاجاقلاری حاقدا سؤز وئردی. هئیأت قاییقلارا اوتوروب، گمییه ساری یولا دوشدو. یئنه توپلار آتیلماغا باشلادی. ایییرمی بیر توپ گولله‌سی آتیلیب قورتولونجا، گمی یولچولارینی میندیریب یولا دوشموشدو...

شاه عایباس، دربارینا چاتار—چاتماز، باخانلارینی عاجیل توپلانننیا چاغیریب اونلارا بئله دانیشدی:

- بئ‌لر، گوردیونوز کیمی اینگیلیس طرفلری بیزی چوخ یاخشی قارشیلادیلار. من ایسه اونلاری بیزیم اۆلکه‌دن گۆروش ائتمک اوچون چاغیرمیشام؛ اونلار دا یاخین گله‌جکده گلیب اۆلکه‌میزی گۆرمک‌لری حاقدا سؤز وئریلر؛ تشریفات باخان‌ی!

- قوربان...

- سندن ایسته‌ییرم گونو بو گوندن حاضیرلیقلارا باشلاياسان. هر شئی چوخ گۆزل اولمالی‌دیر؛ آذربایجان‌دان گۆزل خالچالار، اوستا آشچیلار گتیریلسین، آن یاخشی یئمکلر باشاران آداملار ایسته‌ییرم. اوستا صنعتچیلر، اۆزل هدیه‌لر دوزه‌لتسینلر. موسیقی‌چیلر، اونلار گلینجه چالشیپ یاخشی ماهنیلار حاضیرلاسنلار.

- آمر ائدرسینیز...

- ساواش باخان‌ی!

- قوربان...

- اونلار بیزی قارشیلاییب یولا سالاندا، آن یوکسک سایقی آنلامیندا ایییرمی بیر توپ گولله سی آتدیلار؛ سندن ایسته ییرم اونلار گلیب گئندنه آن آزی ایییرمی ایکی توپ گولله سی آتیلسین.

- باش اوستونه...

شاه باشقا باخانلارا دا گرکن تاپشیریقلاری دئییب اونلاری مورخص ائتدی. گونلر بیر-بیرینین آردیندان گلیب کئچدیلر؛ آیلا ر سووولدو. گونلرین بیرینده اینگیلیس لیلرین عابباس لیمانینا طرف یولا دوشوب گلمکلرینین خبری شاها یئتیریلدی. قوناقلارین گمیسی ساحیلدن گؤرونديو زامان، شاه عابباس بیر سیرا باخانلاری ایله ساحيله توپلاشیب، اونلاری قارشیلاماغا حاضرلاشدیلار. ساحیلدن باشلا یاراق شاهین قصرینه قدر، قیرمیزی خالچالار سالینمیشدی. جاماعات یولون ایکی طرفینده توپلاشیب آل سالاماغا حاضر دایانمیشدیلا ر. اولکهنین آن یاخشی آتالاری، فایتونلارا باغلانمیش، فایتونلار شن بویالی وسیله لرله بزه نمیش، حاضر دایانمیشدیلا ر. اینگیلیس لیلرین گمیلری یاخینلاشیب، قارماق سالدی؛ قاییقلا ری دنیزه ائندیریردیلا ر. شاه، قولاغینی یاتیردی ب توپ گولله لر ی آتیشینین سسینی گؤزله ییردی. قاییقلا ر دولدو؛ کوره کچیلر، کوره ک چکمه یه باشلا دیلا ر. توپ آتیشیندان خبر یوخ ایدی. قاییقلا ر ساحيله چا دیلا ر. یئنه ده بیرجه توپ گولله سی بئله آتیلما دی. قاییقلا ردا کیلا ر ساحيله ائدیلا ر. یئنه توپلاردان خبر اولما دی؛ شاهین فیکرینی توپ گولله لرینین آتیلما دیغی ائله او زونه مشغول

اټمیشدی کی، هئچ بيلمه‌دی قوناقلارین قارشیلانماغی نټجه کټچدی. گلنر بیر هفته اؤلکه‌ده قوناقلانیدیلار. اؤندن پالانلانمیش گرکن یئرله آپاریلدیلار. یئنه ایکی طرفلی موقایله‌له قول قویولدو. توپ آتیشیندان باشقا، قالان حاضیرلیقلار موکمل شکیلده گؤرولوب یئرینه یئتیریلدی.

بیر هفته سونرا، آرتیق قاییتماق واختی گلیب چاتمیشدی. قوناقلار، فایتونلارلا ساحيله آپاریلدیلار. اونلارا دیرلی هدیه‌لر ده وئریلدی. آنجاق شاه عابباسین یئنه ده قولاغی سسده‌یدی. ایکی هیأت یئنه ساحیلده بیر-بیرینین آلینی قارداشجاسینا سیخاندان سونرا، اینگیلیس لیلر قاییق‌لارینا میندیلر؛ قاییق‌لار گمییه طرف یولا دوشدو؛ آما توپ آتیشیندان خبر اولمادی؛ قاییق‌لار گمییه چاتیب ایچینه کیلر نردیوانلاردان یوخاری چیخدیلار؛ آنجاق یئنه توپ آتیشیندان خبر چیخمادی؛ قاییق‌لار گمینین ایچینه چکیلیب، قارماق قالدیریلدی. گمینین فیتی سسلندی، آما یئنه ده بیرجه توپ بئله سسلنمه‌دی؛ یولا دوشدولر. گمی گؤزدن ایتینجه، شاه عابباسین هله ده قولاغی سسده‌یدی، آما هئچ قوش توفنگی ده بئله آتیلمادی! شاه چوخ غضبلندی. قصره قاییدار-قاییتماز ساواش باخانینی چاغیرتدیردی. باخان هؤله‌سک شاهین قولوغونا گلیب ایکی قات تعظیم ائله‌دی. شاه اوجا سسله باغیردی:

- آچاغین تکی...، بس من سنه آمر ائتمه‌میشدیممی، اینگیلیس لیلر بیزه قوناق گلنده، ایبرمی ایکی توپ گولله‌سی آتیلسین؟
- بویورموشدونوز قوربان...

- بس نه اولدو؟ «پیشیک آسقیردی؟» دی گوروم نییه توپ‌لارینیز

لال اولدو؟ ایندی سنین او یوغون بوینونو جلادا تاپشیریممی؟
 باخانین آل-آیاغی اُسمه یه باشلادی؛ بیر آن دیلی توتولدو. سونرا
 چتین لیکله اؤزونو آله آلیب دانیشماغا باشلادی:
 - قوربان قوللوغونوزا عرض ائتمه لیم کی، بیز مین بیر نه دنله
 اینگیلیس لیلر بوراداکن توپ آتا بیلمز ایدیک.
 - سنی ائشیدیرم،
 - بیرینجیسی، بیلدیینیز کیمی باروتوموز توکهنیبدیر؛ باروتوموز یوخ
 ایدی...
 اوزو قووق کیمی شیشیب، پۇرتموش شاه عابباسا سانکی ایینه
 باتیردیلار. حیرسی کئچیب گولومسه یه رک باخانا دئدی:
 - قالان مین نه دینی ده اؤزونه ساخلا. ائله بو بیر دلیل منی گۆرهر.
 اونوتوموشدوم دوغروسو.
 بئله لیکله شاهین آجیغی کئچیب، باخان ی مورخص ائله دی...

سونجوقلایان قودوق...

اونیوئرسیتتده، «مهدی»نین اوتوردوغو اوتوراجاغین یانینداکی اوتوراجاقدا اوتوران یولداشی، «کلئیر» ماحالیندان ایدی. دوغال اولاراق، اونلار بوش واختلاریندا اورادان-بورادان دانیشاردیلار. مهدینین یولداشی، درس اوخوماق اوچون کلئیرین اطرافیندان تبریزه گلمیشدی. شهر اوشاقلارینین عکسینه، او، اونیوئرسیتت اوتوراجاغیندا اوتورماق شانسینی، چوخ چتین لیکله آلدّه اتمیشدی. «رؤوشن»ین عالیلهسی کلئیر ماحالینین ائلاتلاریندان ایدی. اونلارین حیات طرزی همیشه مهدینی ماراقلاندیریر، بوش واختلاردا رؤوشندن چئشیدلی سورغو-سواللار سوروشاردی. رؤوشن ایسه ائلاتلارین چادیرلاردا یاشادیغیندان، یایدا داغ اُنکترینه (یایلاغا)، قیشدا آزاجیق هاواسی ایستی اولان آرانا (قیشلاغا) داشیندیقلاریندان، هر داشیناندا وار-یوخلارینی، چادیرلارینی، ساخلا دیقلاری مال-داواری دا بئله داشیماق مجبوریتینده اولدوقلاریندان، بو ایشلرین نه قدر چتین اولدوغوندان دانیشاردی. رؤوشنین عالیلهسی بوتون کؤچری ائلاتلار کیمی، یایدا چادیرینی، قوردوغو یئردن ییغیب، قیشلاغا داشیییب، یئیندن قوراردیلار، قیشدا ایسه عکسینه، یوک-یاپلارینی توپلاییب، یایلاغا قاییداردیلار. اونلارین کتچینه جکلری، حیواندارلیقدان ایدی؛ مال-داواری اوتلاقلاردا^۱ دولاندیریب، دوغوزدوروب، اونلارین آتینی، سوت-قاتیغینی،

^۱ اوتلاق: چراگاه.

کره سینی، سوتدن اوره تیلن پئندیرینی، چوودارلارا، هم ده اونلارین ایزینی ایزله یین باشقا آل-وئرجیلره ساتماقلا حیاتلارینی سوردوره ردیلر. مهدی، شهر اوشاغی اولاراق، عؤمرونده بو سایاق حیات طرزینی گؤرمه دیینه گؤره، همیشه آچیق آغیزلا، بو حاقدا دانیشیلان خاطیره لره، سؤیله ن حئکایه لره قولاق آساردی.

«قورا بیشیرن»^۲ آیینین سون گونلری ایدی. اونیوئرسیئت سیناقلارینین^۳ یئکونلشمه سینه^۴ بیر شئی قالمیردی. اونلار، داها آنجاق سیناق گونلری بیر-بیرلرینی گؤره بیلیردیلر. مهدی گیلین عالیله سی تبریزده یاشادیغینا باخاراق، او، عالیله سی ایله بیر ائوده یاشاییردی؛ آنجاق رؤوشن اونیوئرسیتتین یاتاقخانا سیندا^۵ قالیردی. اونلار آنجاق صینیفده^۶، سیناق اؤنجه سی بیر-بیرینی گؤروب، سیناقدان فرقلی زامانلار چیخدیقلارینا گؤره، چوخ واخت سیناقدان سونرا گؤروشه بیلیمیردیلر. هر سیناق قورتولدوقدا، سونراکینا حاضیرلانماق گرکیردی؛ واختی اؤلدورمک اولمازدی، اونون اوچون سیناقدان چیخانلار بیرباشا ائوه گئدی، سونراکی سیناغا حاضیرلانماغا باشلاییردی. سونونجو سیناق گونو ده گلیب چاتدی آرتیق. رؤوشن سیناق اؤنجه سی مهدینی گؤروب سالاملاشانلار سونرا، اوندان ورقه سینی تئز وئره رسه اونیوئرسیتتین حیطینده اونو

^۲ قورا بیشیرن: تیرماه.

^۳ سیناق: امتحان.

^۴ یئکونلشمک (Yekünleşmek): جمع و جور شدن، تمام شدن. یئکون: نهایی.

^۵ یاتاقخانا: خوابگاه

^۶ صینیف (Sinif): کلاس درس.

گۆزله مه یی تاپشیردی. —من ایسه تئز چیخارسام سنین چیخماغینی گوده جه یم- دئدی.

رؤوشن، مه دیدن قاباق ورقه سینی تحویل وئریب، حیطه چیخدی. بیر آزدان مه دی ده ورقه سینی وئریب حیطده اونا قوشولدو. اونلار آزاجیق ظارافاتلاشانان سونرا «شاه گؤل» یه گئدی، بیر آز گزیشیب، «دووغا آشی» ایچمه یه هوسلندیلر. شاه گؤل همیشه کی کیمی قیمیلا داییردی؛ هاونین ایستیزی عالیله لر ائولریندن ائشییه اؤتورموشدو. چئشیدلی اونیوئرسیتئرله، مکتبلرده اوخیان، سیناقلارینی قورتاران، قیزلی-اوغلانلی گنجلر ده سانکی شاه گؤلویه دولوشموشدولار. رؤوشنله مه دی آشچی دوکانین ائشیینده چتین لیکله بیر جوت بوش اوتوراجاق تاپیب اوتوردولار. اؤنجه قرارلاشدیقلاری کیمی، مه دی آشلاری سفارش وئرمک اوچون گئدی، ایکی کاسا آشین پولونو حسابلاشیب، گتیریلمه سینی تاپشیراندان سونرا، اوتوراجاغینا قاییتدی. آشلار گلینجه دانیشماغا باشلا دیلار:

- یاخشی، دوست دانیش گۆره ک سیناقلارین نجه ایدی؟...

- ائی یی، پیس ساییلماز؛ سن نجه؟

- من ده سنه تای.

- هر نه ده اولسا، بیر تئرمی ده بیتیردیک، آزیندان ایکی آی دینجله ریک.

- خوش حالینا، سن ایکی آی دینجل، آنجاق من اونیوئرسیتئته اولارکن دینجلیرم ساییلیر. چادیریمیزا قایدینجا آغیر ایشلیرم

باشلاياچاق...

- دوزدور جانيم، هئچ ياديمدا دئييلدى. آما بير طرفدن ده خوش حالينا، آن آزی ايکي آي بؤيوک شهرين توستوسوندن، اوتومبيللرين سسيندن، آغير ترافيکدن ياخان قورتولاچاق. ايکي آي مال-داوارين، تويوق-خوروزون، چؤل قوشلارينين، بيرجه کلمه ده دوغانين دوغال^۷ سسلري قولاقلاريني اوخشاياچاق. هورمونسوز ات يئيه جکسن، ياغي آلينماميش سوت ايچه جکسن، ساخلاييجي^۸ آرتيريلمماميش، آنانين آلي ايله تزه به تزه حاضيرانميش يئيه جکلر يئيه جکسن...

- دوزدور يولداش، اوراسي دا واردير. ياخشي يادما دوشدو، سن نيبه ايکي-اوچ گون بيزيم چاديرا قوناق گليرسن؟ سن کي بو قدر داغ-داشا ماراقليسان، بير گل گور بيزلر نئجه ياشايريق، هم ده بير آز گزيب دولاناريق...

سؤز بوراسينا چاتاندا آش کاسالاري سيني ده گتيريليپ، هرهنين کي اؤز قاباغينا قويولدو. اونلار آشلاريني ايچه رک ده دانيشيغين آردی توتولدو؛ مهدي دئدی:

- نه دئييم دوست، بيليرسن کي، اورالاري گليب گورمه يي نه قدر ايسته ييرم. «يا نصيب يا قيسمت». بلکه ده بير گون گله بيلديم...

رؤوشن اوتوردوقلاري چاديرين دقيق آدرسيني وئريب، بير داهي دؤنه-دؤنه مهدينين اونلارين ماحالينا قوناق گلهمه سینه ايصرار ائتدی.

^۷ دوغال: طبعی.

^۸ ساخلاييجي: مواد نگهدارنده.

ایکی یولداش آشلارینی ایچیب، ایکی ایستکان دا چای ایچندن سونرا، پارکدا، گؤلون دؤوره‌سینده بیر آز گزیشدیلر. آخشام چاغی مهدی رؤوشنی اوتوبوس ترمینالینا یئتیریب، اوندان آیریلدی...

ایکی یولداشین بیر-بیریندن آیریلماقلاریندان اوچ هفته اؤتدو. آخشاملارین بیرینده مهدی اوتاغیندا تک اوتوردوغو یئرده، رؤوشنله دانیشدیغی سون سۆزلری خاطیرلایب، بیر آن اونلارین چادیرلارینا قوناق گئتمه‌یه هوسلندی. اوتاغیندان چیخب، مسألنه آتا-آناسی ایله ده آرایا قویدو؛ اونلار دا راضیلیق وئردن سونرا، یانیندا گۆتوره‌جک شئیلری حاضیرلاماق اوچون اوتاغینا قاییتدی.

او، صاباحیسی گون سحر یئمہ‌یینی بیتیرندن سونرا بالاجا ساکینی گۆتوروب، ترمینالا طرف یولا دوشدو. کلئیره گئدن اوتوبوسون بیلیطینی آلیب، واختیندا اوتوبوسا چیخب، اوتوراجاغیندا اوتوردو. اوتوبوس یولا دوشدو. مهدی یولچولارین هامیسینی نظیرندن کئچیرتدی؛ اونلارین گئیملرینه دیققتلی باخیردی. اونون فیکرینجه ائلاتلارین اؤزونه‌مخصوص گئیملری اولمالی ایدی؛ هم ده دوشوندو، اونلار بیر-بیرلریندن خبرسیز اولمامالی دیرلار. او، هئچ ده یئرسیز دوشونمه‌میشدی؛ اوتوبوسدا اوچ-دؤرد ائلات عالیه‌سی وار ایدی. او عالیه‌لرین بیرى رؤوشن‌گیلی تانییب، اوسته‌لیک چادیرلاری دا بیر-بیرینه چوخ یاخین اولدوغونو بیلدیردیکلری اوچون، مهدی چوخ شانسلی ایدی. اونلار مهدی‌یه -بیز ائندییمیز یئرده سن ده ائترسن- دئدیلر.

اوتوبوس كلئيره بير آز قالميش، سوروجو اوتوبوسو رؤوشن گيلين قونشو عاليله سينين ايسته يي ايله ساخلادی؛ مهدي ده او عاليله ايله بيرليكه اوتوبوسدان ائندی. اونلار بير آز داها پيادا يول گئندن سونرا، بير سيرا قورولموش چاديرلارا چاتديلار. او عاليله نين كيشی سی چاديرلارين بيرینی مهدي یه گؤستره رک، -باخ او چادير رؤوشن گيله عالیددير- دئدی. مهدي اونلاردان آيريليپ، چاديرين گيريشينه طرف گئتدی. چاديرين گيريشينه چاتينجا، اؤسكوروب يا آلا له دئیه رک، اورادا اولدوغونو ايچريده كيلره بيلديريب، بيرينين ائشييه چيخاراق اونو قارشيلاماغيني گؤزله دی. ايچريدن بير خانيم قيز سسلندی:

- كيمن؟ كي می ايسته بيرسن؟

مهدي اؤزونو تانيتديراراق، رؤوشنی سوروشدو؛ قيز آناسینی چاغيردی:
- آی آنا بيری گليب رؤوشنی سوروشور...

رؤوشنين آناسی، ائلاتلارا اؤزل گوللو شلته سی اينينده، باشينا دولاديغي لئچه يی باشيندا، چاديرين قاپی اؤرتوبونو قيراغاً وئريب قوناقلا سالاملاشيپ، اونا خوش گلدين دئدی. اوغلونون چاديردا اولما ديعینی، بير آز خيريم-خيردا آماق اوچون كلئيره گئتدييني بيلديردی. آنجاق چوخ ايصرارلا مهدي یه دئدی:

- آی اوغول، يای گونلری، ائشيك ده چوخ ايستی دير؛ سن ده منيم بير اوغولوم؛ يولدان تزه يتتشميش، يورغون اولما ليسان؛ بويور چاديرين ايچينه؛ سن بير-يکی ايستان چای ايچينجه رؤوشن ده گليب چيخار.

مهدی تشککور ائدی، چادیرین ایچینه کئجدی. اونون آلتینا آلاپاچا^۹ بیر کئچی دریمی سالیب، آرخاسینا دا ایکی میتکهکهنی اوست-اوسته قویدولار. سونرا ائشیه چیخیب، چای حاضیرلاماغا باشلادیلار. مهدی، بو ماجالدا چادیرین ایچینه بیر گۆز گزیدردی؛ ائشیکده هاوانین ایستی اولماغینا باخمایاراق، ایچریده دوغال بیر سرینلیک وار ایدی. چادیرین پارچاسی قیرمیزی بویالی ایدی؛ اونون اوستونه ایپ تلیسدن، باشقا بیر لایهده چکیلمیشدی. شکلی دایره اولان چادیرین بیر طرفینه یورغان-دۆشک باغلاماسی ییغلمیش، بیر طرفینده قاب-قاجاق دوزولموش، قبالارین یانلاریندا ایسه یئکه بیر سو سهنگی^{۱۰} وار ایدی. بیر آزادان رۆوشن باجیسی بیر سینی چای ایله ایچری گپردی؛ سینی مهدیه ساری توتدو. مهدی چای ایستکانینی گۆتورنده، قیز بیردن گوله رک اوجا سسله آناسینی چاغیریب دئدی:

– آی ننه، آی ننه، قوناغیمیزین آلرینه باخ! تولا میزین آلری کیمی
آغ آپاق یوموشاق دیر!

آناسی ایسه اوزاقدان اوجا سسله اونا جاواب وئردی:

– معلوم دور قیزیم، ائله ده اولمالی دیر. او شهر اوشاغی دیر. بیزیم
کیمی چادیردا یاشاییب، مال-حئیوان ساخلامیر کی؛ بیزیم کیمی بورادا
یاشاسایدی آلری پاراغیمیزین^{۱۱} آلری کیمی قارالیب، قارت اولاردی!

^۹ آلاپاچا: ابلق.

^{۱۰} سهنگ (Sehəng): سبو، کوزه.

^{۱۱} پارق: بیر جوره چوخ توکلو کۆپک دیر. دریسین توکو چوخ اولدوغونا گۆره، سویوق هاوا یا چوخ ←

مهدينين قاشلاري چاتيلدي؛ حالي يامان توتولدو؛ عجب! دوستونون باجيسي اونو تولالارين، آناسي ايسه پاراقلارينا اوخشاديردي، آما ساخلاشيب بير شئي دئمه دي. يالنيز آجي-آجي گولومسوندو. چايلاريني ايچندن سونرا، گتيريلن بير كاسا تزه ساغيلميش سوتو ده ايچدي. بير آز كئچمه دن چاديرين ائشيبينده مهدينين آياق قابيلاريني گوروب تانيان رۇوشن سئوينجك ايچري گيردي. ايكي يولداش گوروشوب، قوجا قلاشديلار. رۇوشن اوزوندن، مهديني اورادا گورونجه چوخ سئويندي، آپ-آيدين سئچيليردي. اونلار بير-بيرينين يانيندا اوتوردولار. رۇوشن باجيسي ايله آناسي ائشيبه چيخيب ايكي دوستو باش-باشا بوراخديلار:

- ياخشى، دوست تعريف ائت گوره ك تبريزده نه خبر؟ هئچ اينانمازديم گله سن! عجب انديب گلميسن...
- نه خبر اولاجاق؟ ساغليق، گوردويون تبريزدير...
- باري سنه چاي-ماي وئربيلرمي؟
- هه، ايچميشم ساغ اول.

ايكي يولداش بير آز اورادان-بورادان، اورتاق يولداشلاريندان دانيشديلار. مهدينين جاوابلاري چوخ قيسا، قورو، قاش-قاباقلي ايدى.

← داوامي واردير. اتالار سؤزودور، بير شخص ياخود بير شئي چوخ جاني برک، داواملي اولسا بلله دئهرلر: «ايت اولر، پاراق اولمز!» يني چوخ شاختالي هاوادا نرمال ايتلر سويوقدان اولسلر ده، پاراغا سويوقدان اولوم يوخ دور...

رؤۋشن دانیشیق آراسی اونون توتقون اولدوغونو باشا دوشوب، نه دینی سوروشدو:

- دوز دانیش گوروم نه اولوب؟ انام، باجیم سنه بیر سؤز دئییلرمی؟

- اؤتور گئتسین، ائله بیر شئی دئییل...

- یوخ، بوراخان دئییل؛ من سنی تانییرام، یئرسیز قاش-قاباغینی ساللامازسان؛ کسین بیر شئی اولوب دور. دئمەسن آل چکن دئییل.

رؤۋشن مەدینی سیلکله ییب، اؤز جانینا آند وئردی؛ سونوندا او چارەسیز قالیب، اولوب-کئچنلری آنلاتدی؛ رؤۋشین باجیسی اونو تولالارینا، آناسی دا پاراقلارینا بنزه تددییندن دانیشدی. مەدینین سؤزلری قورتولونجا رؤۋشن اوجا بیر قەقەهە چکیب دئدی:

- ائله بودور سنی بو قدر اوزەن؟! هله من ده دئدیم بس نه اولوب! دوغرودان اونلارین سؤزوندن بو قدر توتقونسان؟! سندن تعجبوب ائدیرم. بیلیرسن کی، پیس نیتله دئمە ییبلر. بوش وئرمە لیسن یولداش؛ ایستەسن راحت اولاسان، او سایاق سؤزلری ائشیدندە، «سونجوقلایان قودوق» کیمی بو قولاقدان آلیب، او بیرى سیندن اؤتورە جکسن دوستوم!...

ايتى - قوردو منيم اوستومه كوشكورتمه^۱...

«غلامحسين» يىن اۆلوموندن قيرخ نئچه گون كئچىردى. اۆلومونون قيرخ تۇرنى نئچه گون اۋنجه هم مزارى اوسته، هم ده مسجدده كئچىرىلمىشىدى. او، ياسىندا كىمسەنىن قارا گئىمە مەسىنى، ياس تۇرنلرىنىن ده اوزالدىماماسىنى وصيت ائتمىشىدى؛ امما دىرى باش اينسانلار يىن سۆزونه باخىلمايان يىردە، اۆلۈب دونيادان الى اوزولن بىر شىخىن سۆزونه كىم باخار؟! جاماعاتىن چوخو، آنجاق اۋز خىرىنە دلى اولاراق، اۋز قازانجلارىنى گودور؛ ايشلىرى ده فىكىردن، عاغىلدىن قايناقلا نىمادان، عادت اوزره دىر^۲. عادتىن ايسه بوراخاماسى چوخلارىنا چتىن دىر. ائەهە، هله اۆلدىن سونراسى اۋز يىرىندە قالسىن، يازىق كىشىنى دىرىلىيىندە ده حسابا قويان يوخ ايدى. اۆلۈمون اوچونجو گونو مسجدىندە، اوغلو «موراد»، قارا كۆينك گئىب مسجدە گلنلرىن بىرىنە آتاسىنىن قارا كۆينك گئىمەمك حاقدان اولان وصيتىنى چوخ خاطىر-خۇرمەتلە خاطىرلادىنجا، بئله جاواب ائىتتىمىشىدى:

– آتان پ...خ يىبب آتاسى ايله؛ اۆلۈيه خۇرمەت ائدرلر!...

نە ايسه آتاسى ساغ ايكن، مورادىن هئچ اۋزونون دە آراسى اونونلا چوخ ياخشى دئىلىدى. گون اولمازدى بىر خىردا مسالە اوستوندە دئىشمەسىنلر؛ آنجاق بوتون بونلار باخمايلاق، موراد هر جومعه آخسامى

^۱ كوشكورتمك: بە حملە واداشتن، برانگىختن سگ.

^۲ اوزره: طبق، مطابق، روى.

آتاسینین مزاری اوسته گنډیر، اونون روحونا فاتحه اوخووردو. آتاسینین قیرخیندان قاباق مزار اوسته گنتمکده تک اولموردو. قیرخ تۆرنیندن سونراکی ایلک جومعه آخشامی، یئنه مورادین اورهی دؤزمه ییب عادتی اوزره آتاسینین مزارینین زیارتینه گتدی؛ قدیمدن دئییلر «تورپاغین اوزو سویوق اولار»؛ سانکی غلامحسین کیشی ده داها اونودولوب، اونودولانلارا قوشولموشدو. او گون اونون مزارینا گندن تک آدام، اوغلو ایدی.

موراد باش داشینین یانیندا چۆمبهلهتمه اوتوردو. بیر تیکه داش گۆتوروب، مزارین قاپیسینی دؤیدو: -آتا قالخ آیاغا؛ سنه فاتحه پای گتیرمیشم- دئییب، بیر «حمد»، اوچ «قل هوالله» اوخیوب پوفله دی. او آندا بیرسی قرآن قولتوغوندا اونا یاخینلاشدی:

- سلام علیکم...

موراد باشینی قالدیریب آرخایا باخدی:

- علیکم ألسلام؛ نه ایشین وار؟

- آلاسه اولوب گندنینه رحمت ائله سین، ایکی مین تومن وئر اونا بیر «یاسین» اوخیوم. آتان دیرمی؟

- ساغ اول قارداش. آلاسه سین ده اؤلنلرینه رحمت ائله سین. هه آتام ایدی...

موراد آیاغا قالخدی. آلینی جیبینه آپاریب، پوللارینین ایچیندن بیر ایکی مین تومنیلیک، آیریپ اونا وئردی؛ ایکسی ده قیبرداشینین ایکی طرفینده اوتوردولار. کیشی قرآنی آچماق ایسته ینده، موراد دئدی:

- وئر منه ایکی مین تومینیمی، پئشمان اولدوم؛ ایسته مز اوخویاسان!

- بس نه اولدو؟!

- هئج، اَدالاری یادیم دوشدو!

کیشی پولو قایتاریب، باشینی توولایاراق اوزاقلاشدی؛ مورد یئنه ده باش داشینین یانیندا اوتوروب بیر توو درین خیالا جومدو. خئلیک زاماندان سونرا آتاسی ایله دانیشماغا باشلادی:

- آتا، آی آتا! سسیمی ائشیدیرسنمی آی کیشی؟ نه بیلیم بلکه ده روحون بو أطرافدا گزیشیر. باخ، یئنه ده من؛ قالاتلار سنی اونودوب گتتدیلر. نئلیک داها یاخشی؛ قوی چوخ زامانلاردان سونرا آتا-اوغول بیر توو دردلشک. آنجاق نه فایدا، بو گون آنجاق من دانیشا بیلرم، سن ایسه ائشیده جکسن. أمما چوخ دا اینصافسیر دئیلم هاا! سنه سؤز وئیریم هردن بیر سنین دیلینجه ده اؤزومله دانیشام. نه بیلیم بلکه ده بیر عؤمور منه دانیشماق حاققی وئرمه دییین اوچون، بو ساعات ائله بو سایاق دانیشیغیمیز داها عدالتلی اول! آی دده، یادیندادیرمی ساغ ایکن هئج منی یولا وئرمزدین؟!... یادیندادیرمی من اوشاق ایکن یولاغیمیزدا بوتون اوشاقلارین چارخی اول-اولا، سن منه چارخ آلمادین؟!... هله چارخ بیر قیراقدا قالسین، بؤیویوب موتوسیکلئت تصدیقی آلاندان سونرا -منه بیر موتوسیکلئت آل - ایسته بیمه، نه جاواب وئردیینی خاطیرلاییرسانمی آی دده؟ ایندی کی کیمی یادیمدادیر -موتوسیکلئتین بوتون جکلرینی آزاد ائدیپ آللرینی ده اؤتور؛ او وسیله اون ثانیه اؤزونو آیاق اوسته ساخلایا بیلسه، سنه سؤز وئیریم آلاجاغام -دئمیشدین! منسه، -کیشی داها

بیربولوق دئنه آل میرام دا!؛ ائله ایشین ایمکانسیز اولدوغونو اؤزون مندن یاخشی بیلیرسن- دئیهنده، دئدین کی: اوغلوم، اؤزونو اون ثانیه آیاقدا ساخالایا بیللمهین وسیله، نئجه بیر ظفر توخونمادان سنی ساعاتلار اوستونده ساخالایا بیلر؟! دوزدور، او زامان چوخ اوزولسم ده، بو گون سؤزون بیللمه هم گولونج گلیر، هم ده داها عاغلیما ایشله بیر. آتا، او گون سندن چوخ آجیقلى اولسام دا، بو گون سنه چوخ حاق وئیریم، لوظفن او حاقدا منی باغیشلا.

موراد بو خاطیره لری بئینینده دولاندریب، یاواش-یاواش زومزومه ائده رک، اوزونون خطلرینین شکلی هر آن دیشیردی؛ گاه دوداقلارینین اوجو قاچیر، آجی گولومسونور، گاه دا قاشلاری چاتیلیر گۆزلرینه یاش دولوردو. آستا-آستا اوره بیینه آغیرلیق ائدن غم، گۆزلرینه داشینیپ، گۆزلریندن دامجی-دامجی قیبر داشینین اوستونه سوزوب، داشین یازیلارینین ایچینده گیزلنیردی.

- اؤز آرامیزدا دانیشیریق، ائولهنده ده منی آز اینجیتمه دین ها! بلکه ده آنام اولماسایدی، سئودییم قیزا هئج قووشامازدیم. آما کئشکه بو یاسلی گونلرده یئنه منیم خانیمیمین هئج آیاغی یئره گلمه دینی قالخیب گۆره بیلهدین...

موراد، یاریم ساعات قدر آتاسی ایله دردلشدی؛ هر دن بیر اورهی کؤوره لیب^۳ آغلا بیردی. گۆز یاشلاری قیبر داشینین اوستونه دامیب،

^۳ کؤوره لمک: به حال گریه افتادن، متأثر و متالم شدن.

داغیلیردی. تخمینن یاریم ساعات اوْتندن سونرا، قیبر داشینین اوستونو گتیردی سو ایله یودو. یئنه ده داشین اوستونه بیرآز بوغدا داغیتدی. داغیدارکن ده بوغдалاری دنلهیب، کیفیرکارلیق ائدن قوشلارا آجیقلائیب، بیر پارا سۆزلر دئدی. دوروب گلکم ایستهینده، آتاسینا یاسین اوخوتدورمادیغی یادینا دوشوب، یئنه اورهی توتولدو. گئدیپ یان-یۆرده دولانیب، همان قرآن قولتوغوندا دولانان کیشینی تاپدی؛ اونا فیکرینین دیشیلدیینی، یاسین اوخوتماق ایستهیینی آنلاتدی. کیشی ایله بیرلیکده مزارین باشینا قایتدیلار. مورد قیتمیرلیغینی ائله آتاسیندان ایرث آپاردیغینا گۆره، قایدارکن بیر اوخ ایله نچه نشان وورماغی دوشونوردو. قیبر داشینین یانیندا اوتورمادان، ایکی مین تومن جیبیندن چیخاردیب کیشیه وئردی. کیشی پولو جیبینه قویوب چۆمبهلهتمه اوتوردو. او، قرآنین یاسین صحیفهسینی آختارارکن مورد دئدی:

- زحمت اولماسا عمیمی ده اوخودوغون یاسین ده شیرکت وئر!

- باش اوستونه.

- أعوذ بالله من الشیطان الرجیم...

- دئیرم ائله او بیرسی عمیمی ده شریک ائتسن یاخشی اولار!

کیشی باشینی ترپهدهرک سانکی-اولسون- دئدی...

- بسم الله الرحمن الرحیم...

- داییلاریم دا بو مزارلیقدا یاتیب. اونلارا دا اوخودوغون یاسیندن بیر

پای چیخ!

بو حالدا کیشی قرآنی بوکوب، آیاغا قالخدی. آل آپاریب، جیبیندن

موراد وئردییی ایکی مین تومنلییی چیخاردیب مورادین اوستونه
تونله یه رک دئدی:

- کیشی آل پولونو ایتی—قوردو منیم اوستومه کوشکورتمه!...
بو سؤزلری دئیهدن سونرا دا، دایانمادان اورادان اوزاقلاشدی؛ موراد
ایسه آغیزی آچیق، دایانیب آنجاق اونون اوزاقلاشدیغینا باخدی...

«مرثیه پرئس خبر آژانسی...»

جناب «قنوی» سککیزینجی صینیفین اوشاقلارینا بیولوژی درسینین آغیر، اؤنملی بؤلوملرینین بیرینی سونماقدایدی^۱. آنجاق نه دنسه اوشاقلارین بیر سیراسی، او گونکو درسین چتین اولدوغونا باخاراق، داها دیققتلی قولاق آسماق یئرینه، بیر-بیری ایله پیرچا-پیرچ ائتمکده دیدیلر! بلکه ده قولاق آسماقلاری، دئییلنلردن باش آچماماقدان، حؤوصله لری قاقیب، دؤزوملری توکندییندن^۲ قایناقلا نیردی^۳. هردن اولار، اینسان تحویل آلا بیلمه دییی بیر قونونو^۴ ائشیتمه یه مجبور قالیرسا، داریخیب، باشینی بیر تهر قاتماق ایسته ییر؛ او گونون درسینده ده، او سایاق بیر دوروم وار ایدی. جناب قنوی چوخ زکی بیر اؤیرتمن^۵ ایدی. اونون درسلی سونماقدا اؤزونه مخصوص^۶ بیر ذبی وار ایدی. صینیفده هر هانسی بیر آنلاشیلما مازلیق گؤرسه ییدی، درس دیاندیریپ، چئشیدلی خاطیره لر دانیشماقلا، صینیفه یئی بیر احوالی-روحیه باغیشلا یاردی. دئیهردی: اوشاقلار، بیزیم اُصیل درسیمیز کیتابلاردا یازیلان ماتریاللار دئییل! بلکه تمل درسیمیز، حیات درسلی اولمالی دیر. ائله او گون ده نئچه

^۱ سونماق: تقدیم کردن، ارائه کردن.

^۲ توکنمک: پایان یافتن، تمام شدن.

^۳ قایناقلانماق: سرچشمه گرفتن.

^۴ قونو: موضوع.

^۵ اؤیرتمن: معلم.

^۶ اؤزونه مخصوص: منحصر بفرد.

دفعه اوشاقلارا —سوسون! درسه قولاق آسین- دئییب، بیر نتیجه
آلمایاندان سونرا، آئینده کی گچی قاراتاختانین قاباغینا آتیب، آلرینی بیر-
بیرینه چالیب توزونو تمیزله یندن سونرا، اوشاقلارا اوز توتوب سوروشدو:
- اوشاقلار هانسینین منه دونیانین آن گوجلو خبر آژانسینین آدینی
دئیه بیلر؟!

صنیفه همهمه دوشدو؛ داها آنجاق دؤرد-بئش نفر یوخ،
صنیفده کیلرین هامیسی یانینداکیلارلا پیچیلداشیر، سسلر بیر-بیرینی
بوغوردو:

- آغا ایجازه، فرانس پرئس،

- یوخ!

- آسوشییئیتید پرئس،

- یوخ!

- ایتارتاس؟

- دوز دئییل!

- فاکس نیوز؟

- یوخ!

...

اوشاقلار قولقلارینا دیدییی بوتون خبر آژانسلارینین آدینی
سایدیلار، آنجاق جناب قنوی هئچ بیر یایله راضیلاشمادی. سونوندا
دئدی:

- یوخ اوشاقلار، تأسوفله سیز سایدیقلارینیزین هامیسی، چوخ

«نادیر شاه» ین قارداش اوغلوسو نادیر شاهین قتلی نیتی ایله سیستاندان خوراسانا ساری یولا دوشور. مشهده یئتیشدیکده خبردار اولور کی، نادیر شاه «قوچان»-دا باش وئرن بیر قالخیشی^۸ یاتیرتماق اوچون، اورایا گندیبدیر. او دا اورایا گئدیر. نادیر شاهین حؤکومت آداملارینین ایچینده نئچه نفر خالین دوستو وار ایمیش؛ اونلارا تاپشیریقلارینی وئرندن سونرا، اؤزو مشهده قاییدیب گؤزله ییر. اونلار، گئجه چاغی نادیر شاهى اؤلدوروب، باشینی کسیرلر. بو آرادا بیر نفر تتز شاهین باشینی آتینین خورجونوا یئرلشدیریب، گئجه گؤزو آت چاپدیرارق، یاتیب دینجلمه دن یولا دوشور کی، شاهین اؤلومونون خبرینی هامیدان اؤنجه علیقولو میرزه یه چاتدیریب، اُنعامینی آلسین! آت یورولور، آتلی یورولماییر؛ یول اوزونو ایکی دفعه آتینی دیشیر. او، خورجونو دا هئچ اؤزوندن آیرمیردی. آتلی، بئش-آلتی ساعات امانسیز آت چاپدیراندان سونرا، سحر ساعات آلتیدا شهرین دروازالارینا یئتیشیر. قصره گیرمه دن اؤنجه، خورجونو چییننه آتیب، یوخولو، توز-تورپاق باسمیش اوز-گؤزونه سو چيله ییب، توزلو باشینا بیر آل چکسین دئییه بولاق باشینا گئدیر. سحر اثرته سی، بولاق باشیندا ایکی خانیم پالتار یوماقدایمیش. اونلار ایش آراسی بیر-بیری ایله دانیشیرمیشلار. آتلی اونلارین دانیشیقلا رینی ائشیدیر. بیری او بیریسینه دئیردی:

- باجی باجین اؤلسون، هئچ بیلیرسن نه اولوب؟

^۸ قالخیش: خیزش، شورش

- یوخ! نه اولوب دور کی؟

- ائشیتیمیشم نادیر شاهى اۆلدوروب باشینی کسیبلر!

... -

آتلی بو سۆزلری ائشیتدیکده آل-قولو سوستالیر. نادیر شاهین باشی ایچینده اولان قانلی خورجونو چیینندن تاققیلتی ایله یئره دوشور. -من بئش-آلتی ساعات تامام یاتمادان، یئمهدن، ایچمهدن آت چاپدیرمیشام کی، بو خبری هامیدان اۆنجه قصره چاتدیریب انعامیمی آلام، آما گۆرونور خبر مندن اۆنجه قصره چاتدیریلیمیش اولمالی دیر- دئییه فیکیرلشیر. آل-اوزونه سو چالیب، اوز-گۆزونون تورپاغینی تمیزلهدن سونرا، خورجونو یئیندن یئردن گۆتوروب آتینین یهرینین اوستونه سالیر. داها او قدر ده تلمیریمیش. سایقلايان آداملار کیمی تنز-تنز اۆزو ایله بو جوملهنى تکرار ائدهرک قصره طرف یولا دوشور:

- بس بو قادینلار، بو خبری هارادان بیلیرلر؟!...

جناب قنوی حكايةنى تعريف ائندن سونرا اوز توتوب اوشاقلارا

دئدى:

- ايندى اوشاقلار! بو حكايةنى تعريف ائتمكدن آماجيم بو ايدى كى،

دئیهم، سیزدن او خبر آژانسینا یاخشی موخیرلر اولاییلر!

سۆز بوراسینا چاتاندا، مکتبین زنگی چالینیپ، اۆیرنجیلر دالغین

فیکیرلرله، سسیز-سمیرسیز صینیفدن چیخماغا باشلادیلار...

دنه-دنه یئیلن میوه‌لر اونلاردیر!...

باغچا-باغین سون گولوشلری، باغ-بستان حاصیلاتینین قورتولوش چاغلاری ایدی. کئندن باغلارا گئدن جیغیرین^۱ ساغ-سولوندا قوچون، قاریز، پامادور، خیار بستانلاری دوزولموش، جیغیرین سون دوراغیندا^۲ اوزوم قانالاری^۳ یئرلشمیشدی. قوشلار آغالارین بوداقلاریندا اوخویور، چکیرتگه‌لر^۴ اوتلارین ایچینده گیزلن قاچ اوینایردیلار.

قوجا کیشی ائششه‌یین نوختاسیندان یاپیشیب، اوزوم قانالاریندان کنده ساری گئدیردی. ائششه‌یین اوستونه ایکی دولو دویشو^۵ اوزوم چاتیب، بازاردا ساتماق اوچون آپاریردی. قارشى طرفن، آیری ماحالدان گلیب او یولدان اؤتن بیر گنجله قارشى-قارشیا گلدیلر. جاوان اوغلان، ناهار واختین سووولماغینا باخمایارق، هله بیر یئمک یئمهمیشدی. هم چوخ آج هم ده چوخ یورغون ایدی. اوغلان قوجا کیشیه بئش-اون آددیم قالمیش سلام وئردی:

- سلام عمی جان؛ آلاسه قووات وئرسین.

- آی علیکم‌السلام اوغول؛ آلاسه عؤمور وئرسین؛ خوش گلدین.

- ساغ اول عمی جان.

^۱ جیغیر: راه‌باریکه، کوره‌راه، راه مالرو.

^۲ دوراق: ایستگاه.

^۳ قانا: مزرعه، کرت.

^۴ چکیرتگه، چبیرتکه: ملخ.

^۵ دویشو: سبد حمل انگور.

- اوغلان، بویلا نیب دویشولره بیر باخیم باخیب آرتیردی:
- عمی جان دویشولرینده نه آپاریرسان؟
- کیشمیش اوزومودور اوغول؛ بویور بیر سالخیم گوٲور...
- اوغلان بیر آز دایانیب دئدی:
- ساغ اول عمی جان، آما بیر سالخیم آنجاق منیم دیشیمین دیبینی دولدورار. دئییرم گل باشقا بیر ایش گوٲره ک...
- نه ایش آی اوغول؟
- عمی جان، اوزوملری ساتماق اوچون آپاریرسانمی؟
- هه، ائله دی اوغول، بازارا آپاریرام.
- دئییرم گل یوکونو بیر آز یونگول لشدیرک...
- باشا دوشمورم، نٲجه یعنی؟
- عمی جان نٲجه وئیریم، دویونجا اوزوملریندن یئییم؟ سن ده اونلاری بازارا آپارماق زحمتیندن قورتول...
- کیشی بیر آن دوروخدو. سونرا دئدی:
- اوغول اوزوملر توزلو-تورپاقلی دیر؛ آخی خسته لنمه ییندن قورخورام...
- اوئللی دئییل عمی جان؛ قورخماغینا گرک یوخ؛ قاباقجا دا یئیمیشم،
- بیر شئی اولماز!
- کیشی بئینینده حساب گٲتمه یه باشلادی:
- (یاخشی، دویشولرده آن چوخو ۱۰ کیلو قدر اوزوم اولار، آما بو جاوان یئیه ر بیر کیلو، یئیه ر ایکی کیلو، داها داش چاتلاسا آن چوخو یئیه ر اوچ کیلو. اوزومون کیلوسونو ایکی قیران سالساق اولار آلتی قیران...)

بو حساب-کیتابی ائندن سونرا، قاییدیب اوغلانا دئدی:

- نه دئییرم اوغول، بیر تومن وئر، باجاردیغین قدر یی! جانینا نوش اولسون. آنجاق قادان آلیم، سئچیب اوزوملری ازمیه سن هاا، ائله بیر اوجدان باشلا یی.

- آرخایین اول عمی جان؛ بیر اوجدان یئیه رم.

گنج اوغلان، اؤنجه آل آتیب جیبیندن بیر تومن پول چیخادیب قوجایا وئردی؛ سونرا دویشولری ائششہیین اوستوندن ائندیریب، جیغیرین قیراغیندا یئرہ قویدو. اؤزو ده اوتلارین اوستونده یئرہ اوتوردو. آجلیق، داها لاپ آمانینی کسمیشدی. آجلیغین ائتکی سیندن هر سالخیم اوزومو ساپاغیندان^۶ گۆتوروب آغزینی گۆیه طرف آچارق، سالخیمی آغزیندا یئرلشدیرندن سونرا، آغزینی یوموب ساپاغی ائشییه چکیردی. آلینده قالان تک ساپاغی آتیب، باشقا سالخیمی گۆتوروردو. بیر سالخیم، ایکینجیسی،... بئشینجیسی،... یئددینجیسی... بیرینجی دویشونون یاریسیندان چوخو قورتولدوقدا، قوجانی فیکیر گۆتوردو. اوغلانین دویماق نه دیر بیلمه دییینی، تووونون آزالما دیغینی گۆرونجه، هله مرجلشمه یی اودوزدوغو بیر قیراقدا قالسین، آلینین زحمتینی، باغنین حاصلینی اوجوز ساتدیغینی فیکیرلشدی. سانکی قازانچ آختاردیغی یئرده ضرر وئرکمده یدی. آما نه ائده بیلردی؟ کیشیلر کیمی سۆز دانیشمیشدی؛ کیشیین ايسه باشی گئدر، بیر سۆزو ایکی اولمازا! بیردن بیر شئی عاغلینا

^۶ ساپاق: دسته، محل انحراف و انشعاب.

چاتدی؛ جاوانين تووونو آلماق نيتينده ایدی. بلکه دۇماسا دا، يورولوب آل چکسين دئیە دوشونموشدو. اوز توتوب جاوانا دئدى:

- اوغول، نه قدر يئيه جهينده سؤزوم يوخ دور هااا! بيز سؤز دانيشميشيق؛ من ده سؤزومدن قاچان آدام دئييلم؛ أمما دئيرم نه تلسيرسن؟ ائله چوپلو-فيلانلى يئمه، ايراق جانيندان خسته لرسن. آخى اوزوم بو ساياق يئيلمز كى! منجه دنه-دنه گيله لرى قوپارت، چؤپونو ده آيير، سونرا يى...

اوغلان بير آن دايانيب، قهقهه چكيب گوله رك، ساغ-سول بوستانلاردا اولان قوچون-قارپيزلارى گؤستريب دئدى:

- يوخ عمى جان، يانيليرسان؛ سن دئيه ن او دنه-دنه يئيلين مئيوه لر، اونلاردير! من، اوزومو ائله بو ساياق يئيرم. اوزوم آن چوخ سؤدييم مئيوه دير.

قوجا باغچى داها بير شى دئمه دى. دايانيب آنجاق دويشونون سالخيملارينين آزالماغينا تاماشا ائديردى. بيرينجى دويشو قورتولهاقورتولدا، يئنه دؤزه بيلمه ييب دئدى:

- اوغول، باخ يئنه دئيرم، واللا خسته لنه جكسن هاا. اؤزو ده گؤرونور، بو ماحالدا غرييسن. نه اولور يئديين اوزوملرى دنه له يى...

اوغلان بيرينجى دويشونون سون سالخيمينى آغزينا يئرلشديريب، ساپاغينى چكندن سونرا، ايكى اوووردو^۷ دولوكن دئدى:

^۷ اووورد: لپ، گونه.

- سندن چوخ خوشوم گلیب دیر عمی جان. کیشی آدامسان. منیم
 ساغلیغیمی بئله دوشونورسن. بؤیوکسن، آغ ساققالسان؛ اونا گۆره ده
 سۆزونو یتره سالا بیلرم. سنه سۆز وئیرم، اکینجی دوشونون
 اوزوملرینی، سن بویوران کیمی، دنه له ییب یئییه جم!...

ساری یاغ کوپه‌سی...

بیر داها یای گونشی همیشه کی یئرده دالدا لاندی؛ سانکی داغین
 آرخاسیندان آسلاناراق آشاغیا ائئیردی. چوبان، قویونلاری ساغ-سالامات
 چۆلدن قایتارمیشدی. هر کس اۆز قویونونو تئئله‌دی. دئمک، او گونلوک
 چوبانین گۆره‌وی بیتیمیشدی. یورغون-آرغین ائوینه قایتدی. تولومبانین
 یانیندا آل آغاجینی یئره قویوب، تولومبانین ایچینه بیر آفتافا سو تۆکدو؛
 سونرا تولومبانى ایشلتمه‌یه باشلادی. اۆنجه آفتافانی یئیندن دولدوروب،
 بیر کنارا قویدو؛ سونرا حووضو یاریسینا قدر دولدوردو. آینه، اوزونه سو
 چيله‌دی. جورابلارینی چیخاردیب، آیقلارینی، جورابلارینی، چاریقلارینی
 دا بئله یودو. یاریم‌جان روحو سانکی یئیندن دیریلیب، نفس آماغا
 باشلادی؛ اۆزو ایله سبو سو دئییبن، اۆلونو بئله دیریلدر، بس اۆلویویانلار
 اۆلونو یویارکن، اۆلورلر نییه دیریلیرلر بیلیرم!- دئییه دوشوندو.
 گولومسه‌ییب، دینه‌نینی یئردن گۆتورندن سونرا، عادتى اوزره ائوه
 گئتمه‌دن اۆنجه، بوش طؤیله‌سینه باش ووردو. طؤیله‌نین فانیسینی
 یاندیریب هئره‌یه^۱ قویدو. طؤیله، بیر او قدر ده بۆیوک اولمادیغینا
 باخمایاراق، هله‌لیک بوش ایدی؛ نچه تایی سامان بیر بوجاغینا
 قویولموش، بیر یئکه کوپه ده تاوانیندان آسلانمیشدی. او، آلدیغی
 معاشدان بیر قدرینی آیریب کره آلیردی. گۆزه‌گلیم میقدار اولدوقدا،

^۱ هئره: طاقچه.

بیخیلان کره‌لری اُریدیپ، ساری یاغینی همین کُپه‌یه دولدوروردو. قاریشقا داراشماسین دئییه، کُپه‌نی تاواندان آسمیشدی. احتیاطلا کُپه‌نین ایپینی آزاجیق بوشالیدیپ، بیر آز اونو ائندیره‌رک ایچینی یوخلادی؛ کُپه‌نین دولماسینا داها بیر شئی قالمیردی؛ سونرا یئنه ده ایپی چکیپ، برکیتدی. سامان تایلارینین بیرینی آلتینا چکیپ کُپه‌نین قارشیسیندا اوتوردو. دَیه‌نه‌یینین اوجونو یَیره قویوب، اَللَرنی اوست-اوسته دَیه‌نه‌یین اوستونه، چَنه‌سینی ده اَللَرنین اوستونه قویراق، درین بیر فیکره جومدو:

– (داها دولماغینا بیر شئی قالمایب‌دیر؛ یالنیز بیر کره^۲ ده ساری یاغ باشینا وئرسم دولار. قوی بیر دولسون، اوندان سونرا ایشیمین باشینی تاپارام. هئچ ده وئرمه‌سلر، اونا بیر قوزو وئره‌رلر کی! بیر ساغلام دیشی قوزو آلاجاغام اؤزومون اولسون. اونو سورویه قاتاچاغام؛ من کی ذاتن او سورونون چوبانیام، نه فرق ائدر قویونلارا بیرى ده آرتیریلسا؟ آلاهیین ائوی آباد! او گوْیرتدییی یئمدن اوتلایاجاق، آخیتدیغی بولاقدان سو ایچه‌جک، سونرا قویروغونو قاتلاییب گلن ایل بو زامانادک عملی – باشلی بیر قویون اولاجاق. اونا اؤزل باخاچاغام. بلکه باشقا دیشی قویونلار اونو قیسقاندیلار، آما ائرککلر اونو سئوه‌جه‌ییندن آرخایینام! نه ده اولسا آخی او چوبانلارینین اؤز قویونو اولاجاق... بیر ایل سونرا، قویونوم منه آن آزی بیر قوزو دوغار. دئمک اولماز، بلکه ده تانرینین کرمی جوشدو، ایکیسینی دوغدو بئله! توتاق هله بیرى ائرکک اولسون بیرى دیشی؛ او

^۲ کره: دفعه، مرتبه.

بیریسی ایل، هم آناسی دوغار، هم ده بالاسی. بئله گئتسه، هئج اون-اون
ایکی ایل کئچمه‌دن منیم قویونلاریم، ائله اؤزلری بیر سورو اولارلار. او
زaman منه داها چوبانلیق یاراشماز؛ بو ماحالدا، کیمین تک‌جانینا بیر سورو
قویونو واردیر کی؟! او‌هوی‌ی، یعنی او زمان من اؤزومه گۆره بیر خان
(اولارام...)

چوبان دوشوندوکجه، گۆزلری ایشیق‌لانیر، دوداقلاری گولوردو.
گاهدان چنه‌سینی آلرینین اوستوندن گۆتوروب، طؤیله‌نین دؤرد بوجاغینا
باخیب یئنی بیر طؤیله تیکمه‌یه ده فیکیرلشیردی. بیر داها باشینی
آلرینین اوستونه قویوب، خیال دنیزینه قاییتدی...

- (سورومه بیر چوبان توتاجاغام؛ آلبته بونلاردان اؤنجه، بیر یئکه
طؤیله دوزهدلم گرک، یوخسا بوراسی آنجاق بیر-ایکی ایلیمه ایش وئره.
أصلن بو ائوین هامیسی طؤیله‌یه قاتارام، آخی او زمان داها بو ائو منه
یاراشماز. ائو اوچون کن‌دین یوخاری باشیندا، کندخودانین ائوینین دوز
اوزبه‌اوزونده یئکه بیر یئر آلیب، تیکدیره‌رم. بیر آز دا اُکینه‌جک اوچون
یئر، گزب-دولانماق اوچون ده باغ آلا بیلرم. سونرا کدخودانین قیزینا
ائلیچی گۆندره‌رم؛ یالوارسین منه وئرسین، او زمان بلکه کدخودانین
اؤزوندن ده وارلی اولدوم. آخی یالینز قویونلار دئیل کی؛ اونلارین سوتو،
قاتیغی، کره‌سی، پئندیری، قایماغی، ایرانی دا بئله اولاجاق. کدخودانین
قیزی ایله ائولنن گون، شاهانه بیر توی توتاجاغام. او، کیچیک آدمین
قیزی دئیل کی؛ دوشونمز مییم؟ منیم ائویمه گلندن سونرا دا، گرکمز
ألینی آغدان-قارایا وورسون. اونون قاباغیندا ایشله‌ییب ائو ایشلرینی
گۆرمک اوچون کنیز، آغیر ایشلری ده گۆرمه‌یه نؤکر توتاجاغام.

کدخدانین قیزیندان اوشاقلاریم اولاجاق! بس دیر بو قدر تکلیک، اوشاغیمیز چوخ اولسون ایسته بیرم. سونرا اوشاق باخجی سی^۳ دا لازیم اولاجاق؛ ایندی اُسکی زامانلار دئیل کی، اوشاقلاریمیز یاخشی تربیت آلسین گرک. باشقا بیر اوشاق باخجی سی دا اوشاقلاریمی ساخلاماغا توتاجام. آنجاق بیر اوشاق سئوهر خانیم اولسون گرک؛ اوشاق مسأله سی چوخ حساس دیر، شوخلوق گؤتورمز؛ باخجی نین نه حددی وار منیم اوشاقلاریم گولدن آغیر سؤز دئسین؟! گرک بیزیم مهربانلیغیمیزدان سوئی-ایستیفاده ائتمه سین. من، چوخ دؤزوملو بیر آدام، آنجاق منیم ده دؤزومون حددی واردیر؛ ایشدی بیر زامان او باخجی، یا ایشله نیلرین هر بیرسی آیاغینی جیزیغیندان قیراغا قویوب، جسارت ائدیپ، اوشاقلاریمین بیرینه گولدن آغیر بیر سؤز دئیهرسه، باخ بو دینه ک دیر اونون جانی...

چوبان اؤزو ایله بو سؤزلری زومزومه ائده رک، دینه یینی توولا هاوایا قالدیردی؛ دینه یین اوجو تاواندان آسیلان کپه دن توتوب اونون تکی نی سیندیردی. کپه نین سینماسینین جینگیلیسی، بوش طؤیله ده دفعه لرله سسلندی؛ بلکه ده چوبانین اوره یینین سینماسینین سسی ده اونا قاریشدی. بیر گؤز قیرپیمیندا، کپه ده کی ساری یاغین هامیسی طؤیله نین تکی نه سوزوب تزکلره^۴ قاریشدی. بئله لیکله یازیق چوبانین آرزو ائوی ده، یوکسک درجه لی دئپرمه^۵ اوغرامیش کند ائوی کیمی باشینا اوچدو...

^۳ اوشاق باخجی سی: پرستار کودک.

^۴ تزک: پشگل، سرگین، تهاله ی گاو و گوسفند که با کاه آغشته و برای مصرف سوخت خشک می کنند.

^۵ دئپرم: زلزله، زمین لرزه.

قارىنپا...

«حسین» ئاتىنى ئۇ كىچىك اوشاغى ایدی. اتاسى ايله بۇيوك قارداشى هر گون سحر اثرته دن چۆله، اكين-يىچين ايشينه گئدر، آناسى ايله باجيلارى دا ائوده قاليب ائو ايشلىرى ايله ايلگى لندريلر. آناسى تنديرده چۆرك ياپار، يئمك حاضيرلايار، باجيلارى ايسه ائوين تميزليينه باخيب، ياپپا^۱ ياپار، قاب-قاجاق، پالتار يويوب، بئله ايشلرله مشغول اولارديلار. آنجاق حسين مکتبه گئتديى اوچون نه ائو ايشى گۆرهردى نه ده چۆله گئدردى؛ اونون ايشى درس اوخوماق، يئييب، ايچمکده خولاصه اولوردو. او، ايکى هفته سحرلر ساعات سکزذن اون ايکى ياريمادک، ايکى هفته ايسه ناهاردان سونرالار ساعات بيردن، بئش ياريمادک مکتبه گئدردى. باجيلارى هميشه اونو قارىنپاليقلا سوجلايارديلار. اما آنالارى اونلارا آجيقلاناراق دئهردى:

– حسين بالاملا ايشينيز اولماسين؛ درس لر اونو سيخير؛ چوخ يئمهيئين ده سببى اودور!

بیر گون حسين سحرلر اولان زامان، مکتبدن قايتدى؛ ناهار سوفرهسى سالىنماق ايدى. باجيلارين بيرى دئدى:

– بيز نه قدر بو ائوده ايشليه جه يیک، حسين ده آنجاق اوزونو بۇيوده جک؟ ياللاه حسين، دور سن ده يارديم اتت سوفرهنى آچاق!

^۱ ياپپا: تپاله.

- من یورولموشام، دورا بیللمرم. بیر بیلهدینیز درس اوخوماق نه قدر چتیندیر! گرک عینی زاماندا هم دیلین دانیشماغینی اویرنک، هم اوخوماغینی، هم ده یازماغینی...

اونلار بیر توو دئییشدیلر؛ سونرا حسین کوسوب حیطة گئتدی. اورادان دا دیرماشیب داما چیخدی. تندیره سرین باجاسیندان گۆزلرینی آچیلان سوفره یه تیکدی. یامان آج ایدی، آمما غرورو، قاییدیپ سوفره باشیندا اوتورماسینا ایجازه وئرمیردی. حاضیرلیقلار تاماملاندی. آناسی ایله باجیلاری سوفره نین دؤوره سینده اوتوردولار؛ آناسی شوربانی بؤلمه یه باشلادی. حسینین ده پایینی بیر کاسایا چکیب قیراغا قویدو. حسینله دیل به دیل چالان باجیسی دئدی:

- آنا، آخی اُسکیدن بیر مثل وار، دئیهرلر: «کوسنین پایینی یئیهرلر»...
- کس سسینی! بالام آج دیر. بیر آزدان گلیب یئیهر؛ نییه منیم سون بئشیییمی یولا وئرمیرسیز؟!

حسین ایسه تندیره سرین باجاسیندان سسلندی:

- من بیللمیرم او پای کییه چکیب قیراغا قویدونوز، آمما هر کییه ده چکیب سینیز، آزدیر!

سوفره دؤوره سینده اوتورانلار گولوشدولر؛ بؤیوک باجیسی یئریندن قالخیب، حیطة چیخدی؛ حسین دله توتوب سوفره باشینا گتیردی.

حسین مکتبه ناھاردان سونرالار گئدنده، یئمک مسألہ سی لاپ چتینه دوشردی. مکتبه گئدن زامان اونون ناھارا میلی اولمادیغی اوچون،

ناهارینی قاییداندان سونریا ساخلایاردیلار؛ آنجاق هر نه قدر ده چوخ
ساخلاسایدیلار، حسین یئنه اعتراض ائدیب -آزدی- دئیهردی!

بیر گون، داها آناسی دا اونون قارینپالیغیندان جانا گلیب قیزلارا دئدی:
- بو گون حسین مکتبدن گلینجه، کیمسه ناهار یئمیهجک؛ دویو
قابلاماسنین هامیسینی اونون قاباغینا قویماق ایسته بیرم؛ گوروم یئنه ده
دئیهرجک سوزو، اعتراضی اولاجاقمی؟!

قیزلار دینمه دیلر؛ آنجاق هرهرسی سوفره دن بیر تیکه چورک
گوتوروب، اوستونه بیر آز پئندیر یاخیب، آج قالماسینلار دئیهر، یئدیلر.
ساعات بش یاریم اولدو. حسین، مکتبدن چیخینجا قاچا-قاچا ائوه
قاییتدی. چانتاسینی بیر طرفه آتیب سوفره باشیندا اوتوردو. آناسی دویو
قابلاماسینی اونا طرف ایتله ییب دئدی:

- بویور حسین آغا! بو گون کیمسه ناهار یئمهییب؛ هامیسینی سنه
ساخلا میشیق، یئنه سوزون وارمی؟

حسین بیر قابلامایا باخدی، بیر ده آناسینا، باجیلارینا باخیب آغلاماغا
باشلادی. آناسی سوروشدو:

- آی بالام بس یئنه نه اولدو؟ نییه آغلاییرسان؟

حسین ایچینی چکهرک دئدی:

- سیز هامینیز یالانچی سیز؛ گور نه قدر دویو واریمیش کی، هله بو

قدری ده منه قالیب!...

اۆلكهده ایستی اوت دادمایان یوخ دور^۱...

صفویلر سولاله‌سیندن^۲ اولان بیرینجی شاه عاباسین دؤورونده، گونلردن بیر گون، شاه، بیلجی باش وزیرى آلاهوردى خانلا اوتورموش، اۆلكهده ایشلرین نتیجه یوللاندىغی حاقدا دانیشیرمیشلار. شاه، وئردییی آمرلردن، وزیرین ده تدبیرلریندن ممنون قالدیغینی وورغولاییب^۳ دئییردی:

- شوکورلر اولسون کی، سنین اؤنردیین تدبیرلر، منیم آلدیغیم قرارلار گوجونه، آییق-ساییق بیر اۆلكهده یاشاییریق. هامی اۆلكهده نهین نهسی اولدوغونو بیلیر؛ جاماعاتین هامیسی بیر توؤ برکه-بوشا دوشسهلر ده، ایندی راحت-راحت یاشاییرلار!

آنجاق آلاهوردى خان توپلوم آراسی شاهدان چوخ دولاشدیغی اوچون، شاهین باخیشلارینا راضیلیق گؤستمه‌یه‌رک، چوخ یوموشاق قارشیلیق وئریب دئدی:

- شاه جنابلاری ساغ اولسونلار! البته کی، چوخونلوقلا سیزه قاتیلیرام، آنجاق اینانین هله ده بو اۆلكهده، بو شهرده بئله، تکه-توک کال گلیب، کال گئدنلر، زمانه اواجیندا بيشمه‌میش اینسانلار، ایستی اوت دادمایان

^۱ ایستی اوت داماق: برکه-بوشا دوشمکدن، تجروبه بییه‌سی اولماقدان کینایه‌دیر. ایستی اوت: فلفل،

خردل (فلفل سیاه)

^۲ سولاله: سلسله پادشاهی.

^۳ وورغولاماق: تأکید کردن.

قوجا آدمالار تاپیلیر.

شاه آراجیق غضبلنه رک دئدی:

- سن نه جورأتله منیم باخیشیما راضیلاشمیرسان؟ بونجا زاماندان

سونرا، بو سوچون باغیشلانماز اولدوغونو بیلیمیرسنمی؟

- شاه ساغ اولسون! نه ایتیم سیزه قارشى بیر سۆز دانیشام. آنجاق

دئدییم سۆزه تانیق گتیره بیلرم.

- اوندا دایانمادان گتیر. شاه ایله قارشى چیخدیغینین باغیشلانیب،

گوناھیندان کئچمه ییمین تکجه شرطى، همین سۆزونو آچدیغین

یونولما میس آدمالاردان، ایستی اوت دادمايان قوجالاردان بیرینی

قوللوغوموزا گتیرمک اولسون! گتیره بیلدییین تقدیرده سنه دیرلى خلعتلر

ده باغیشلا یا جاغام؛ آنجاق گتیره بیلمه دییین حالدا، یوخسا عادى

بیریسینی گتیریب، منى آلداتماق ایسته دییین دورومدا، بدلىنى باشینلا

اۋدهمه لی اولدوغونو دا بیل! سنه اوچ گون فورصت وئیریم، دۆردونجو

گون همین شخصله حضوروموزدا اولمالیسان!

آلاه وئردى خان دئدیى سۆزه پئشمان اولدو؛ آنجاق دئدیییندن

قاییتماغى، اونو داها دا آغیر دوروما گتیریب، چىخاردا جاغىنى دوشونه رک

دئدى:

- شاه ساغ اولسون! من دئدییم سۆزون اوستونده وارام. ایندى منله

باشقا آمرینیز یوخ دورسا، قوللوغونوزدان گتتمک ایذنى ایسته ییرم.

دۆردونجو گون دئدییم خصوصیتلى بیر شخصله قوللوغونوزدا حاضر

اولا جاغیمدان آرخابین اولاییلرسینیز...

شاه عابباس آرخاسی آلاهوئردی خانا اولدوغو حالدا، هئج بیر سوژ دانیشماییب دؤنمه‌دن، ساغ آلی ایله اونون گئده بیلجه‌یینی ایشاره ائتدی. وزیر دالی-دالی گئده‌رک، درباردان چیخیب، شاهدان آیریلدی. واختی یوباتمادان پالتارلارینی دَییشدی. اؤز-اؤزو ایله -بئله بیر یرسینی تاپماق اوچون، شهردن ایراغا چیخماغیم گرکیر- دئییه دوشوندو. -داغدا-باغدا یاشایان تک اینسانلارین آراسیندا گزيب اختارمالییم- دئدی...



او، اوچ گون تامام عاغلینا چاتان هر بیر یئره باش چکدی. یان-یوره‌ده قووزاییب، آلتینا باخمادیغی داش دا بئله قالمادی. اوچونجو گونون سون ساعاتلاریندا کور-پئشمان، بوتون اومیدینی آلدن وئرمیش دورومدا، قصره ساری قایدیدردی. آرتیق یاواش-یاواش بوینونون آرخاسی گیجیشیردی. بونجا ایل شاه عابباسا قوللوق ائندن سونرا، اونون توتدوغو قراردان دؤنمییه‌جه‌ییندن آرخایین ایدی. گونش، سانکی داغین آرخاسیندا گیزلنمه‌یه، همیشه‌کیندن داها آرتیق تلسیردی. بو حالدا شهر دروازالارینین یاخینلیغیندا، کؤرپولرین بیرینین آلتیندا بیر قوجایا گؤزو ساتاشدی. اومیدسیزلیکله اونا یاخینلاشدی. گئده-گئده قوجا اونون سون شانسى اولدوغونو دوشونوب، آلاها یالواریردی. قوجانین آلتینده بیر جانلی دیه‌نه‌یی، اینینده ایسه رنگی-روحو قاچمیش پالتاری وار ایدی. کؤرپونون آلتینی آياق‌یولو^۴ کیمی قوللانديغیندان، یان-یوره چوخ پیس قوخوردو.

^۴ آياق‌یولو: توالت.

وزير بونلارا فيكىر وئرمەن سالام وئردى. قوجا دا عليكم السالام دئيب،
-هە، دئ گۇروم منلە نە ايشين واردير؟- سوروشدو. وزير، بير آز قوجانى
دانىشديرىپ، اورادان-بورادان سۇز آچدى. قوجانين كيمسە سىز اولدوغونو،
تەك باشينا ائلە او كۇرپونون آلتيندا ياشايدىغىنى بىلەن سونرا، اۋز-اۋز
ايله بئلە دوشوندو: -(بادا-بادا! شاھين حضورنا آپاراجاغىم كىشى، ائلە بو
قوجا اولاجاق دير). اونون اوچون دە، قوجادان ياخشى آل موزدو
قارشىلىغىندا، صباح سحرئرتەسى اونو گۇزەلمەينى اېستەدى. قوجا دا
هئىچ نە سوروشمادان قبول ائتتى.

گئجە سردىيى اولدوزلو يورغانىنى يىغار-يىغماز، آلاھ وئردى خان
ھەمىن كۇرپونون آلتىنا قايدىپ، قوجا كىشى ايله بيرلىكە، شاھين
قصرىنە دوغرو يولا دوشدولر. آنجاق وزير، گتتىكلرى مقصدى، اۋزونون
كىم اولدوغونو، نە اوچون گتتىكلرىنى كىشىيە بىلدىرمەيپ، هئىچ قوجا دا
بو خصوصلاردا بير شئى سوروشمادى. گتت-گتتە اورتام دېيىشردى،
اۋزلىكلە شاھين قصرىنە گىرەن سونرا، دوروم بوتۇ ئانامدا فرقلىپ،
قوجا كىشىنەن لاپ اغىزى آچىق قالامىشى. حىطدە، اُتەيىنەن سو آخان
يام-ياشیل آغاچلارى، ألوان گوللرلە بزەنن باخچانى، سحرىن شئەلى
ھاواسىنى كئفلندىرن گوللرىن قوخوسونو، ھەرەسى بير ھاوا ايله اوخويان
رەنگ بەرەنگ قوشلارین جەھەھەسىنى، اطرافدا توز قدر دە بئلە زىر-
زىبىلین اولمادىغىنى عۇمرونە گۇرمەيپ، ائشیتەمەيشدى. قصرىن

ایچینده ایسه اوزون، اوجاتاوانلی^۵ سالونلار، قیزیل توخوناقلی آسیلان پردهلر، پار-پار پاریلدايان مرمر داشلار، قیزیل-گوموش قابلاردا داشینان چئشیدلی یئمکلر، دوواریلاردان آسیلمیش ریزلی، ایپک خالچالارلا رسیملر قوجانین گۆزوندن قاچا بيلمزدی. نه ایسه، چوخلو سالوندان-سالونا، اوتاقدان-اوتاغا کئچدیکدن سونرا، شاه عابباسین تاختی اولان بؤیوک هالین قاپیسینا چاتدیلار. قاپی قوروجولاری وزیر ی گۆرچک تانیدیلار. شاه، اونلارا وزیر ی گۆزله دییینی تاپشیریپ، وزیرله قوناغی گلدیکه، ایذین ایسته مه دن ایچری بوراخماقلارینی دئمیشدی. قاپیلارین هر تاغینی قوروجولارین بیر ی آچارق، وزیر ایله قوجا ایچری کئچدیله. شاه، گۆز قاماشدیران، زرنیشان بیر پالتار گئیپ، ایری داش-قاشلی تاجلاریندان بیرینی باشینا قویوب، تاختینین اوستونده اوتورموشدو. وزیر سلام وئریپ، ایکی قات آییلدی. قوجا ایسه شاها هوروت-هوروت باخماقدا گۆزلی تیکیلیپ قالمیشدی. شاه عابباس اُتکدن-یوخاریا قوجایا باخیردی. خئیلک سس سیزلیکدن سونرا قوجا شاهدان سوروشدو:

- تانری سان؟

- یوخ!

- تانرینین پیغمبری سن؟

- یوخ!

- ایماملاردان بیرین؟

^۵ تاوان: سقف.

- يوخ!

قوجا بونلارى سوروشوب جاوابلارى ائشيدندن سونرا، ماجال وئرمەدن دېھنەينى باشى اوستونە قالدیریپ، شاهین اوستونە یوگورەرک دئدی:
- اونلارین هئچ بیرى دئییلسن سە، بس آلاھین جنتینین یوخارى باشیندا نە غلط دارتیرسان؟!

قۇرۇجولار قوجانى توتدولار. قوجانین هئچ اۆلكە نەدیر، شاه کیمدیر، قصر نە دئمکدیر کیمی شئیرلى بيلمەدییى اورتایا چیخیپ، بیر سۆزلە دئسک قوجانین -لاپ او اىستى اوت دادمايانلاردان بیرى- اولدوغو ثبوتاً يئتیشمیشدی. سانكى قوجا اۆلدویونو، آلاھوئردى خان ملکلردن بیرى، اوراسى ايسە دە، سۆزو وئریلن جنت اولدوغونو سانمیشدی!
آلاھوئردى خان دیرلى بیر خلعت شاهدان قازاندی؛ شاه ايسە بیر داھا اونون ایش بیلن لیینه أحسنت دئدی...

من هئج نه بیلیمیرم...

حکایه‌میز اُسکی زامانلار قاییدیر؛ او زامانلار کی، توپلومون بؤیوک چوخونلوغو ساوادیسیزیدیلار. اونلارین بیلینج قاینالاری آتا-بابالاری ایله اؤز حیاتلاریندان قازاندىقلاری تجروبه‌لردن عیبارت ایدی. بیلینج دایره‌لری ایسه آنجاق دوغانین چئوره‌سینده اولاردی. بو گونه تایی چئشیدلی علملر یارانیب، بیر-بیریندن آیریلما میشدی. چوخ آز تاپیلان ساوادللی عالیم‌لرله آراشدیرماجیلار، چوخلو دولانار، گۆردوکلری اولایلار دیققت یئتیره، فیکیرلشیب سونوجلار وارانیدیلار. البته بو سونوجلار، بو گون ده اولدوغو کیمی، همیشه دوز چیخما ییب، یئنی دلیلر آیدینلاشینجا باشقالاری ایله یئرینی دییشردی. هله کاغیز ایداع اولمادیغینا گۆره، آراشدیرمالارین سونوجلاری اؤزل قایدالارلا اوره‌تیلیمیش دریلرین اوزه‌رینده یازیلاردی. او زامانکی ایمکانلاری دوشونه‌رک، بو اؤزل چئشید دریلری اوره‌تمک هئج ده آسان ایش دئییلدی. دریلرین آز یئر توتماسی، هم ده یانیندا داشیماق اوچون چکیسی یونگول اولماغی اؤنملی شرطلردن ایدی. بونلارلا رغن کاغیزلا توتوشدوراندا، او دریلرده اولوملو^۱ بیر اؤزلیک ده وار ایدی: بیر زامان آراشدیرماجیلار بیر خصوصدا آدیقلاری سونوجلاردان ممنون قالما ییردی لارسا، راحتلیقلا دریلرده یازیلانلاری سو ایله یویوب، همین دریلری باشقا یازیلار یازماق اوچون

^۱ اولوملو: مثبت.

قوللانا بيلرديلر.

ائله او اُسكى دؤورلرده، آدليم تدقيقاتچيلاردان^۲ بيري، اُن آزي ايكي دؤنه دريلرين اوستونه يازديغي آراشديرما سونوجلاريني بولاغين سويونا تاپشيرمالى اولموش دور. منيم اَمين اولدوغوم كيمي، سانيرام حكايله ر اچيليب سونوجا واراندان سونرا، سيز ده بورادا سؤزو گئدن قاوراملارين، بونجا علم اينكيشاف ائتديكدن سونرا، يئنه ده چوخ گيزلرله دولو مؤوضوعلار اولدوقلاريني قبول ائده جكسينيز.



يايين اورتالارى، هاوانين دا لاپ ايستى گونلرى ايدى. بونونلا بئله، گون اورتالار هاوانين چوخ ايستى اولماغينا باخمىاراق، ساعاتلار گون اورتادان اوزاقلاشديقجا هاوانين حيرصى سويويور، لطافتلى، سرين يئل اُسمه يه باشلاييردى. آراشديرماچيميز^۳ هميشه اولدوغو كيمي سفرده ايدى. گوردوكلرينى، تجربوبه لى اينسانلاردان ائشيتديكلرينى توپلاييب، آلينه گلن سونوجلارى دريلرين اوستونه يازيوردى. او اوزون گونلرده، گون باتانا اُن چوخو ايكي-اوچ ساعات قالميش يول اوستو بير سو دَيرمانينا چاتدى. دَيرمانين بير دووارينين يانيندان گؤزل بير آرخ آخماقدا ايدى. دوواردا قالان ايزلردن، يايين ايستى گونلرينده سويون چوخلو آزالماسيني راحتليقلا باشا دوشمك اولوردو؛ آنجاق آرخدا، همين آز آخيشلا، هله ده دَيرمانين سودا اولان تاхта تكرينه قوشولو اورتا اندازه لى

^۲ تدقيقاتچى: محقق.

^۳ آراشديرماچى: محقق، پژوهشگر.

بیر دَییرمان داشینی فیرلادیب ایشه سالماق اوچون کیفایت قدر گوج وار ایدی. او آرخدا آخان سویون برکتیندن، اؤزلیکله آرخا یاخین اولان یئرلر، یام-یاشیل ایدی. یارپاقلارلا دولو قوجامان^۴ آغاجلار، کۆلگه‌لرینی چئوره‌دن اُسیرگه‌میردی. آرخین اوجالیقدان آخیب تۆکولمه‌سی، کیچیک شالهلر یاراتماقلا، دوغانین آن ائشیتلمی، اوریه یاتان سیمفونیالاریندان بیرینی دایانمادان چالماقدا ایدی.

ساعاتلار اۇنجه تدیقاتچیمیزین ایچمه‌لی سویونو ساخلاماق اوچون یانیندا داشیدینی سهنگین سویو قورتولوب، جانی دا بئله قوروموشدو. یانغی آمانینی کسمیشدی. آخان سولارین هم ایستی هم ده ایچمک اوچون گووئیلمز^۵ اولماسی، اونو او سولاردان ایچمکدن چکیندیریردی. اؤز-اؤزو ایله بئله دوشوندو:

- (لاپ یاخشی. بو دَییرمانین بییه‌سیندن هم بیر آز ایچمه‌لی سو آلارام، هم ده گئجه چاغینی دوغانین بو صفالی بئشیینده کئچیریب، صاباح یولومون آردینی توتارام. حتی بیر آز دا تزه اونون تزه چۆره‌ییندن یولوما آلا بیلرم...).

بو فیکیرلرله دَییرمانین قاپیسینا یئتیشیب، قاپینی دؤیوب دایاندی. ایچریدن ائشیدیلن دَییرمان داشینین سسی اوجباتیندان، سانکی قاپی دؤیوشونون سسی ائشیدیلمه‌دی؛ بیر داها قاپینی داها سرت دؤیدو. آز کئچمه‌دن دَییرمان داشینین سسی کسیدلی:

^۴ قوجامان: کهنسال، والا، عالی.

^۵ گووئیلمز: غیر قابل اعتماد.

- قاپی دؤین؟ (یعنی کیم اولا بیلر بو گون باتان چاغی)
- یولدان کئچن بیر آلاسه بندهسی، قاپینی آچارمیسینیز لوظفن؟
- نه ایشین وار؟
- بیر کاسا ایچمه‌لی سو ایسته‌ییردیم اولورسا!
- قاپنین ایشگیلی آچیلاراق، تاغی دا یاریمچیق آچیلدی. قاپنین آرخاسیندان باشینا چارقات ساریمیش بیر کیشینین اوزو آغاردی. کیشینین سانکی باشباشینی آغ بویاییب یاخود اوْنا باسیب چىخارتمیشدی‌لار. اوز-گؤزو، قاشلاری آغ‌آپاق ایدی. گئیملری ایله باشینداکی چارقاتین أصل بویاسی سئچيلمیردی...
- سلام اوستا؛ آلاسه قووات وئرسین.
- علیکم‌السلام؛ ساغ اولاسان قارداش، خوش گلدین.
- دَییرمانچی تدقیقاتچیمیزین دوروشوغونو گؤرونجه آرخابیلایب، قاپینی بوتؤو آچدی. اونون گئییمی اوزون بیر آرخالیق‌دان عیبارت ایدی. باشینا دا بیر باشلیق سارییب، بیر دسماللا بوش سهنگی‌نی چینی‌نین سول طرفیندن، بوخچاسینی دا باشقا بیر دسماللا ساغ طرفیندن بونونا سالمیشدی.
- اوستا، بورالاردان کئچن بیر یولچونون، یانغیسینی سؤندوره‌جک بیر کاسا سرین سویون وارمی؟
- نه‌دن اولماسین! بویور ایچری گتیریم؛ آنجاق پالتارلارینین اوْئلو اولماسیندان گؤزله...
- آراشدیرما‌جی ایچری کئچدی. دَییرمانچی دَییرمانین بیر بوجاغیندا

دووارا دایادىغى يئكە سېھنگە سارى گىتتى. تاخچادان بىر كاسا گۆتۈرۈپ، سېھنگىن تېجەيىنى^۶ آغزىندان گۆتۈرۈپ سونرا، اۇنچە سودان بىر آز كاسايا تۆكۈپ كاسانى يايخالادى. سونرا كاسانى بوتۇ دۈلدۈرۈپ قايىتتى. بو آرادا، تەدقىقاتچى دا يان-يۈرەيە اُتكەن-باشا دىققەتلى بىر گۆز گزديردى.

- يامان سوساميشا بىزەيىرسىن، دويونجا ايچ؛ قانيق وئرمەسە بىر داھا دۈلدۈرۈرام.

- ساغ اول اوستا.

كىشى كاسانى آليپ، بىر باشا باشينا چكىدى. كاسانى اوستايا طرف اوزالديپ دئدى:

- اوستا زحمت اولماسا بىر كاسا دا وئرين لۇطفن.

دېيرمانچى كاسانى آليپ سېھنگە طرف گىتتى:

- اۈزۈنو تانيتدېرمادين غريپە. سنى بورالاردا هئچ گۆرمەميشم. نە عجب بو طرفلردن؟...

تەدقىقاتچىمىز آدينى، آتاسىنين آدينى دئيب، ھارالى اولدوغونو دا بيلديرەرك، آرتيردى:

- منيم ايشيم آراشدېرماجىلىق دىر. گنج اولماغىما باخمايلاق، بىر چوخ يئرلى گزىپ دولانميشام. گزىپ دولانلاق، گۆروب-ئشيتدىكلريم حاقدى آراشدېرمالار آپايرام. سئچدييىم سون مۇۋەزۇع حاقدى آپارديغىم تەدقىقاتىن

^۶ تېجەك: دېپوش شيشە و كوزە.

سونلاريندايام. اونلارى درى اوستونده يازيب جاماعاتا سونماقلا، سونراكى نسلين يولونا ايشيق سالماق ايستهييرم...

- سؤزلريندن، او قدر ده باش آچماسام نئليك، ياخشى بيرينه بنزهييرسن؛ هر نهچيسن سنه اوغورلار ديلهييرم. آل بو كاسانى دا ايچ، دويماسان اوتانما دئ يئنه ده دولدوروم.

كىشى كاسانى آليب نئچه قورتوم ايچندن سونرا، كاسانى آلينده ساخلاييب دئدى:

- گورونور تك ياشايرسان؛ ائلهديرمى؟

- ائلهدير؛ يولداشيم دونيادان كؤچوب، اوشاقلار ايسه ده هرهسى بير طرفه داغيليپ، عايله قوروبلار.

آراشديرماجى سويون قالانينى دا ايچيب، كاسانى دَيرمانچيا قايتارارق، تشككور انديب دويدوغونو بيلديردى. سونرا اوندان ائشيكدهكى آغاجلارين كؤلگهسينده اوتوروب، يازى-پوزوسونا باخماق اوچون ايدين ايستهدى:

- راحتينا باخ! ايستهديين باشقا بير شئى ده اولورسا، من بورادايام. صاباح ييبهسينه قايتاراجاق بير آز دنيم قاليبدير. من ده اونلارى دارتاجام.

آراشديرماجيميز دَيرمانچيدان آيريليپ، دَيرماندان آزاجيق آراليدا، دولغون بير سؤيود آغاجينين كؤلگهسينده بوخچاسيندا اولان پارچاسينى

یئره سرب، اوستونده اوتوراراق دری دفترینی قارشیسینا آچیب، لکدن^۷ اولان قلمینی آینه آلاندا سونرا درین بیر فیکره جومدو. دیرمانچی یئیندن دیرمانینی ایشه سالاراق دنلرینین قالانینی دارتماغا مشغول اولدو...

گون باتان چاغی گلیب چاتدی. رنگی پورتوموش تالا-تالا یورغون بولودلارین گۆزلرینین اؤنونه، گونش داغلارین آرخاسینا آخماقدایدی. دیرمانچی بیر توو اؤنجه ایشینی قورتاریب، بیر-ییغیشا دا باخمیشدی. گئیملرینی دیشیب، ائشییه چیخدی. آل-آیاغینی آرخدا یوباندان سونرا، چئورهیه گۆز گزدریب آراشدیرماجیمیزی گۆردو. اونا ساری گتدی:

- بی! گۆرونور گئجهنی بورادا کئچیرتمک نیتیندهسن. ائله دیسه ایچری گل؛ دوزدور کی منیم دینجله جک اوتاغیم دیرمانین ایچینده اولدوغو اوچون بیر آز اولودور، آنجاق سانیرام بورادا قالماقدان داها یاخشی اول؛ هم ده سنین خطرینه آزاجیق تمیزلیک ایشلرینه باخدیم.

- ساغ اول اوستا. بو گئجه بورانین هاواسی چوخ گۆزلدیر. چاغیرماغینا گۆره تشککور ائدیرم. گئجهنی ائله بورادا یاتاچاغام.

- ائله منیم دعوتیم ده هاوانین دورومو ایله باغلی دیر. بو گئجه یاغیش یاغاچاغینا شوبهم یوخدور. ایسلانماغیندان، اؤزونو سویوغا وئرمه ییندن قورخورام. آخی من گوونجیم اوچون گئجه لر دیرمانین

^۷ لک (lələk): پیر پرندگان.

قاپيسىنى باغلایار، آرخاسىنا دا آغیر بیر دَییرمان داشى ایتلهلیرم. یوخوم دا چوخ آغیردیر. گوندوزلر آغیر ایشله دییمه باخراق، گئجه لر اؤلۇ کیمی دوشوب یاتارام؛ هم قاپینی دؤیسن ائشیتیرم، هم ده ائشیدیب آچماق ایستەسم ده، داشى قیراغا چکیب قاپینی آچینجا یئترینجه^۸ ایسلانارسان! تدقیقاتچیمیز باشینی قالدیریب بیر-ایکی دؤور فیزلانراق، هاوانین دورومونا گۆز گزدیردی. اوزاقلاردا تالا-تالا گۆرونن بولودلاردان باشقا، یاغیش یاغدیراجاق اؤنملی بولود ایزی گۆرونموردو. میلیار دلارجا اولدوز آستا-آستا آشکارا چیخیب گۆز وورماغا باشلامیشدی. آى گولومسە ییردی. آراشدیرماچیمیز دا گولومسونوب اوستایا دئدی:

- یانیلیرسان اوستا! بو گئجه یاغیش یاغماغا ذرەجه ده احتیمال گۆرمورم. دئدییم کیمی من بیر تدقیقاتچیم. ایشیم چئشیدلی قاوراملاری آراشدیرماق دیر. ایللر اؤنجه دن آراشدیردیغیم مۇوضوع ایسه هاوا دورومودور. تدقیقاتیمین سون صحیفه لرینی یازیرام. تجروبه لریمه دایاناراق، اُن آزی بو گئجه اوچون هاوانین یاغیشلی اولاجاغی ایمکانسیزدیر!

- نئیلک، مندن سؤیلمەسی؛ داها چوخ ایصرار ائتمیرم. دئمک ایستەدیکلریمی دئدییم؛ قالانینی اؤزون بیلرسن. گئدیم سنه بیر آز یئمک گتیریم؛ اوندان سونرا دا یاتمالیام.

تدقیقاتچیمیز تشککور ائدی، دَییرمانچی ایچری قایتدی. بیر آز

^۸ یئترینجه: به اندازه ی کافی.

پئندیر-چۆرکله ایکی بیشمیش یومورتا بیر ده بیر یورغان گۆتوروب،
تدقیقاتچیا گتیردی. اونا یاخشی بیر گئجه ایله شیرین یوخولار
آرزولایاندان سونرا آیریلیب، دبییرمانا قاییدان کیمی، قاپینی باغلايیب
دالینی برکیتدی. آز کئچمه دن ایچریده کی فانیسارین سؤنمه سی
دبییرمانچنین یاتدیغینی گؤستردی. تدقیقاتچیمیز دا اؤزونه بیر یاتاق
حاضیرلايیب، آی ایشیغیندا اولدوزلارا باخا-باخا یوخویا دالدى.

گئجه دن اوچ-دۆرد ساعات کئچدیکن سونرا، باتیدان آستا-آستا
یئل اُسمه یه باشلادی. اُسدیکجه، قارا بولودلاری دا اؤزو ایله گتیریب
اولدوزلارین اوزونه چکدی. بولودلار سانکی ساواشیب، بیر-بیرینین اوزونه
شاپالاق چکه رک گلیردیلر. ضربیندن گۆزلریندن قور آتیلیب ایلدیریم
شاخیردی. بیر آز کئچمه دن شیددتلی یاغیش یاغماغا باشلادی.
تدقیقاتچیمیز دیکسینیب شیرین یوخوسوندان دیک آتیلیمیشدی.
شاشقین-شاشقین بیر آن ایچینده هاوانین دیشیلمه سینه باخیردی.
شیددتلی یاغیش یاغماغا باشلايینجا، آل-آیاغینی ایتیردی. قارانیقدا بیر
توو او یان-بو یانا قاچیب سیغینماغی اوچون تاوانلی بیر یئر آرادی.
دبییرمانچی نین دئدی یی سون سۆزلری یاخشی خاطرلاماغینا باخمایارق،
دبییرمانین قاپیسینی شیددتله دؤیوب اونو آییلتماغا چالیشدی؛ آنجا ق
اونون دا بیر فایداسی اولمادی. سونرا چاره سیزلیکدن، یالیز دولغون بیر
آغاجی سئچیب، اونون یارپاقلارینین آلتینا سیغینماغی باشا بیلدی؛ آما
نه یازیق کی، او یارپاقلار دا اونون ایسلانماغینی اؤنله یه بیلمه دی.
شیددتلی یاغان یاغیشین یاغماسی، بیر ساعتدان آزاجیق چوخ چکدی.

ياغيشدان بو توؤ ايسلانيب، جانينا اوشورتمه اوتورموشدو. ياي گونلري اولماغيغا رغمن، ديشلري بير-بيرينه ديب، شاققيلدايirdي. ياغيش كسندن سونرا، يارپاقلاردان سوزولن دامجيلار هله كسيلمه ميشدي؛ اونون اوچون ده آغاجين آلتيندان چيخيب، ديرمانين قايسينين يانيندا اوتوردو. كور-پشمان دووارة داياناراق، تئزليكه سحر آچيليب ديرمانين قايسينين آچيلماغيني آرزو آنديردي.



آراشديرماچيميز سحر آچيلينجا ايسلاق گئيملرينين ايچينده تير-تير آسدي؛ سحر چاغي گون چيخاندان بير آز سونرا ديرمانين قايسينين آرخاسيندان، داشين ديغيرلانماغينين سسيني ائشيدهرک، سئوينجک آياغا قالخدي. قاي آچيلجاغين اوزگون بير دورومدا ديرمانچيني سالاملادي. ديرمانچي گولومسه يهرک سالاميني آليب دئدي:

- آي آمان! تدقيقاتچي قارداش يامان ايسلانميسان! بئله قالسان آغير خسته ليرسن؛ ايچري گل سنه قورو گئيملر گتيريم.

تدقيقاتچي هئج نه دئمه دن ايچري كئچيب، ديرمانچي درحال گئديب بير دست پالتار گتيريب آينه وئردی. كيشي پالتارلاريني ديشينجه كلمه دانيشمادی. ديرمانچي سحر يئمهيinin حاضيرليقلارينا باشلادی. هر شئيدن اؤنجه چايداني سو ايله دولدوروب اودون اوستونه قويدو. اوشوموش اينسانا ايستي چاي هر نه دن چوخ فايدالي اولدوغونو دوشوندو. چايدان قايناچاغين چاينيكه قورو چاي توكوب اوستونه قاينار سودان آرتيريب، دمه قويدو. سوفره آچيلينادک تدقيقاتچي دا گئيملريني

دیشمیشدی. اوستا ایله بیرلیکده سوفره باشیندا اوتوروب، یئمیه باشلادیلار. یئمک آراسی اوستا تدقیقاتچیا باخیب دئدی:

- یولداش، کئچن آخشام سنه یاغیشین یاغاغاغیندان، یاغماغا باشلایاندان سونرا سنه قاپینی آچا بیلیمیه جه ییمدن دانیشماسایدیم، سنی قانادلاری ایسلاق سئرچه کیمی گۆرنده چوخ اوزوله بیلردیم؛ آما من سنه دئدیم آخی؛ آنجاق سن منه اینانمادین.

تدقیقاتچی باشینی آشاغی سالاراق بیر توو دانیشمادی؛ سونرا دئدی:

- سن حاقلیسان اوستا، سندن بیر گیلئیم یوخ دور؛ ایسلانماغیم اؤز سوچوم دور، اؤزو ییخیلان ایسه آغلاماز. آنجاق بو آرادا منی ماراقلاندیران بیر مقام واردیر؛ کئچن گئجه باشاباش منی یاغیشدان داها آرتیق اینجیدن بو اولوب دور کی، آخی سن او دوم-دورو هاوادا، منیم بو قدر آراشدیرمالاریمایا رغمن، یاغاغاغینی تخمین ائده بیلمه دییم یاغیشین تۆکه جه یینی هارادان بیلیردین؟! آخی هاوادا یاغیش یاغماغا دایر هئج بیر ایشارت یوخودو! اولمایا سن، اؤزونه گۆره دیرمانچی قیلیغنا گیرمیش بؤیوک بیر عالیمسن؟ ائله دیسه لوطفن بیلگیلیرینی منیمله ده بؤلوش نه اولور!

دیرمانچی اوجا سسله گولوب دئدی:

- یوخ قارداش، من عالیم فیلان دئیلم، دیرمانچی اوغلو، نوه سی دیرمانچیام. یاغیشین یاغاغاغینی دا من بیلمه دییم.

- هئج باشا دوشمورم نه دئییرسن!

- دئیجه ییم؛ بیلیمرم دونن گلرکن فیکیر وئردین یا یوخ، منیم بورادا

بیر کۆپه‌ییم واردیر. منه هم قورویوجو کیمی‌دیر، هم ده منی تکلیکدن چیخاردان یولداشیم کیمی. او، گنجه-گوندوز ائشیکده قالار؛ یالنیز یاغیش یاغان گنجه‌لر، آخشام دَییرمانین قاپیسینی باغلامامیش ایچریه گلیب، آستانادا اوتورار. ایللردیر بو عادت اوندا واردیر؛ بیر دفعه ده اولسون بئله یانيلماییب‌دیر. اۆتن آخشام او ایچری گلینجه، گنجه چاغی یاغیش یاغاجاغینا داها بیر شوبهم قالماییب، سنین سوراغینا گلدیم. بلکه اؤزونله —بس نییه بونلاری منه دونن دئمه‌دین؟— دئییه‌سن؛ دوغروسو قورخدوم منه گولوب سؤزومه اینانمایاسان! فیکر ائدیرم سحر چاغی قاپینی آچینجا او ایتین ائشییه قاچماغینی دا گۆردون!

آراشیرماجی داها بیر سؤز دئمه‌دی. درین بیر خیالا جومدو. سونرا یئریندن قالخیب چاتتاسینین سوراغینا گئتدی. دری کیتابچاسینی چیخاردیب، آخان آرخین قیراغیندا اوتوردو. کیتابین صحیفه‌لرینی، ایللردن بری ائتدییی تدقیقاتین سونوجلارینی، آرخین سویوندا یویاراق، اؤزو ایله بئله دوشوندو:

— (بیر تدقیقات کی، اونون سونوجلاری منه بیر کۆپک قدر بیلگی وئرمیه‌جک، اونون بشریته هئچ بیر خئیری اولما بيلمزا!)

ایللر داها کئچدی. تدقیقاتچیمیزین چئشیدلی، دیرلی آراشیرمالاری اولوب، اینسانلارا سونولوردو. سون واختلار یئنه اؤنملی بیر قاورام سئچیب، اوستونده تدقیقات آپاریردی. او، قادینلار حاقدا بیلگیلر توپلاییردی. سونوجلاری عالیه‌لره فایدالی اولاجاغینی دوشونموشدو.

سئچدیي مؤوضوعا باخراق، قادین خایلاغی ایله یاخیندان دانیشیب، قایناشماغی گزکیردی. آنجاق بو مسأله، او گونکو دؤنمده هم ده سوبای بیرینه هئچ ده راحت ایش دئییلدی. سفرلری عرضینده هر تورلو خانیملا راستلاشیب، باجاردیغی قدر بیلگیلر توپلایاراق کیتابچاسینا یازیردی. یئنه گونلردن بیر گون، یولونون اوستونده بیر شهرین دروازالارینا چاتدی. گوناورتا چاغی شهرین گیریشینده کیمسه ائشیکده دئییلدی. اؤزو ایله، قاپیلارین بیرینی چالیب بیر-ایکی چۆرک آلماغی دوشوندو. ائولره گۆز گزديریب، آن لوکس ائوی سئچیب قاپیسینی چالدى. قاپی آرخاسیندان بیر گلینین سسینی ائشیتدی:

- قاپی دؤین؟

- شهرینیزدن کئچن بیر یولچویام^۹. وارینیزدیرسا منه بیر-ایکی چۆرک وئرین. پولو دا نه اولسا اؤده یرم...

قاپی اچیلدی. تدقیقاتچیمیزین قارشیسینا گنج، اوجابوی، چاتماقاش، یونولموش هئیکلی بیر خانیم چیخیب سالام وئردی:

- علیکم‌السلام. راحتسیز ائتدییمى باغیشلايین. منه بیر-ایکی

چۆرک وئره‌مبسینیز لوطفن؟ دیلنچی دئییلیم، پولو دا نه اولسا وئره‌م.

- واردیر، وئره‌جه‌یم، پول دا ایسته‌مز. آنجاق اورادا دورماغینی صلاح گۆرمورم. بورا خیردا بیر شهردیر، من ده بیر تزه‌گلینم. سنی اورادا گۆروب سۆز ائدرلر. زحمت اولماسا ایچری بویور، من ده گئدیم چۆرکلری گتیریم.

^۹ یولچو: مسافر.

تدقیقاتچیمیز تشککور ائدیب حیطه کئچدی. خانیم قاپینی
 آرخالاریجا باغلادی. خانیملار خصوصدا آراشدیرما آپاران تدقیقاتچیمیزا،
 بو قارشیشماق گۆیدن گلن بیر فورصت کیمی اولاییلردی. اونا گۆره
 ده، آله گلن بو فورصتدن یاخشيجا یارارلانماغی^{۱۰} دوشونوردو. گلین
 اوندان سوروشدو:

– اؤزونو تانیتمیرمادین بی. گئییمین اؤنملی بیرى اولدوغونو گۆستریر.
 کیم اولدوغونو بیلیمه مارقاقلانندیم.

کیشی اؤزونو تانیتمیریب، ایشینی آنلاتدی:

– ایشیم آراشدیرماق دیر. همیشه سفردہ اولارام. یئردہ-گۆیدہ
 ماراغمی چکن هر بیر شیئی آراشدیرارام. اولدوزلارین حرکتیندن توتدو
 خسته لیکلرین درمانینادک...

– چوخ یاخشى. حال-حاضیردا نه حاقدآ تدقیقات آپاردیغینی سوروشا
 بیلریمی عالیم؟

– خانیملارین خولق-خاصیتلری حاقدآ چالیشیرام.

خانیم بو سؤزلری اثشیتجک هیجانلانیب تدقیقاتچیمیزا دئدی:

– بی، آراشدیرمالارینین آیریتتیلارینی اثشیتمهیه چوخ مارقاقلانندیم.
 بوراسی یاخشى دئیل. داها یاخشىسى بودور کی، ائوین ایچینه گئدک،
 سن دانیشاسان، من ده سنه وئرهجه ییم چؤرکلری سوفردن گۆتورم.
 سانیرام بیر ایستکان چای دا سفردن تزه گلن یورغون آداما چوخ

^{۱۰} یارارلانماق: استفاده کردن، بهره بردن.

یا پیشار...

اونلار ائوبن ایچینه کئچدیلر. خانیم اوتاغین یوخاری باشینی
گۆسترهرک دئدی:

- اورادا ایلشین لوظفن. اؤنجه سیزه بیر چای گتیریم، سونرا دئیین
گۆروم خانیملار حاقدآ آراشدیرماق نه دئمک دیر؟

ائوبن ایچریسی نئچه ایچ-ایچه اوتاقدان عیبارت ایدی. هامبسیندان
یئکه اولان بیرینجی اوتاقدآ اوتوردولار. قالان اوتاقلارین دا قاپیسی
همین اوتاغا آچیلیردی. اوتاغین اورتاسیندا بیر آعاج دیرک، هر دووردا بیر
تاخچا وار ایدی؛ تاخچالارین هئره سینه سلیقه ایله تیکیلیمیش دۆردقولا
اؤرتوکلر سالینمیشدی. تاخچالارین ایچینه چئشیدلی شئیلر دوزولموشدو.
اوتاغین بیر بوجاغیندا جفته سینه قیفیل وورولموش بیر دمیر صانددیق دا
وار ایدی. یوخاری باشدا دووارین قاباغینا بیر دۆشکچه سالینیب،
دۆشکچه نین اوستونده ایکی میته ککه اوست-اوسته دووارا دایانمیشدی.
میته ککه لرین یوخاریسیندا، ایکی قیلینج چارپاز^{۱۱} دورومدا دووارا
میخلانمیشدی. تدقیقاتچیمیز خانیمین گۆستریشی ایله کئچیب
دۆشکچه نین اوستونده اوتوردو. خانیم اوجاق باشینا کئچیب سینیه بیر
ایستکانلا بیر قندقابی قویدو. چاینیکده کی چایدان ایستکانا بوشالیدی،
قوناغین قاباغیندا سینینی یئره قویاندان سونرا دئدی:

- یاخشی، ایندی قولاغیم سیزیله دیر. بویورون...

^{۱۱} چارپاز: صلیب، مقاطع.

- دډيبيم کيمي خانيملارين خولق-خاصيتلريني، نه يي سئويب-
سئومه دیکلريني، نه دن خوشلانديقلاري يا خود خوشلانماديقلاريني،
أرلري ايله اولان موناسيتلريني، خولاصه، اونلارلا ايلگيلي اولان هر
شئي آراشدير ميشام. حتی بو حاقد ا بير کيتاب دا يازميشام. يعني دئمک
اولار اوزوم کيشي اولدوغوما باخميا راق، ايندي داها قادينلار حاقد ا
بيلمه ديبيم بير شئي يو خ دور.

تدقيقاتچيميز بونلاري دانيش اراق، قنديقانلار بير تیکه قنډ آغزينا
قويوب چاينني ايچمه به باشلادی. ايلک قورتومو ايچر-ايچمز حيط
قايسى دؤيولودو. خانيم آل-آياغيني ايتيره رک آياغا قالخدی:

- دده وای بو منيم آريم اولمالی دير. سنی بورادا گؤره رسه ايکيميزی
ده قيلينج دان کنچيردر!

تدقيقاتچيميز ين رنگی-روحو آتدی. ياريمچيق چايی ايستکانين
نعلبکی سینه بوراخي ب دیک آياغا قالخدی. سسی تيترييه-تيترييه
سوروشدو:

- مگر سنين آرين کيم دير؟

- آريم اوردو کوموتانی دير. هميشه قيلينج-قالخانی يانيندا اولار.
کيشينين آز قالدی باغری چاتلايا. اوز-گؤزوندن سويوق تر آخماغا
باشلادی:

- ياخشی ايندي بيز نئيله یک؟ ائوين آرخا قايسى يو خ دورمو؟

- يو خ، يو خ دور. بير آن دينمه، گؤروم باشيما نه داش سالي رام!

قاي داها شيددتلی کسبنتی سيز دؤيولوردو. خانيم تاخچالارين بيرينه

طرف گئدی، اؤرتویون آلتیندان بیر آچار گؤتوردو. آچاری بوجاقداکى صانديغین قیفیلینا تاخیب بوردو. قیفیل آچیلینجا صانديغین قاپاغینی قووزاییب، آچدی. سونرا تدقیقاتچیمیزا دئدی:

- نه دایانیسان؟ تئز گل گیر بو صانديغین ایچینه! آریم ائوده کن جینقیرین بئله چیخماسین. یئریندن ده ترپشمه.

کیشى صانديغا گریب، یئرلشمه یی اوچون، یوماق کیمی ییغیلدی. گلین دایانمادان قوناغین آستاناداکی آیاق قابیلارینی دا گؤتوروب صانديغین ایچینه آتاندان سونرا، قاپاغینی باغلائیب، یئنی دن جفته سینه قیفیلی تاخیب قیفیلادی. آچاری تاخچایا آتیب، حیط قاپیسینی آچماغا قاچدی. حیط قاپیسی آچیلینجا، کوموتان ایچری گله-گله های-هارای سالماغا باشلادی:

- بس هارادا اولوب قالیسان آرواد؟ نییه قاپینی آچمیرسان؟
- هارادا اولاجاغام کیشى! بو ائوده آیاق یولونا گئتمه یه ده ایضاحات وئرمک گرکیر؟ یانیلما بورا قیشلان^{۱۲}، من ده عسگرلریندن بیرى دئیيلم هااا!

اونلار بیرلیکده ایچری کئچدیلر. تدقیقاتچیمیز اینمز-دینمز چؤنبهله تمه حالنده صانديغین ایچینده بیر بؤیرو اوسته اوزانیب، بوتون دانیشیقلاری ائشیدیردی. کوموتان اؤنجه قیلینج-قمه سینی اؤزوندن آیریپ، اوتاغین بیر قیراغینا بوراخدی. تدقیقاتچیمیز اونلارین بیر-بیرینه

^{۱۲} قیشلا: پادگان.

دَييب شاققيلداماسيندان بونو باشا دوشوب، تير-تير اُسدى. بير آن
كوموتانين گوزو ياريم ايچيلميش چايا دوشوب دئدى:

- خانيم...

- هه؟

- او ياريم ايچيلميش چاي كيمه عايددير؟ هم ده منيم يئریمده
اوتوروب ايچيرميش دئمك!

- اوزومه توكموشدوم. بير قورتوم ايچديم، چوخ داغ اولدوغو اوچون
ياريمچيق نعلبكيه اوتوروب آياق يولونا گتديم.

- خانيم ائودن غريبه قوخولار دا گلير! ائوه كيمسه گل ميشديمي؟!

- مثلن نجه بير قوخو؟!

- بيلميرم، نجه دئيم، هييم م ... ايندييه دك هئچ دويماديغيم بير
ايي دير...

- آمان كيشى سن نه هوشلو-باشلى بيريسن! هئچ نه يى سندن
گيزلتمك اولمور. دوغرودان دا سنه كوموتانليق ياراشير. دوغروسونو
آختارسان سندن بير آز اؤنجه، ياراشيqli بير گنجى ائوه سالميشديم.
خوش دانبيشيقلى بيرى ايدى. مندن ده چوخ خوشلانيردى...

كوموتانين رنگى پورتدو. قان گوزلرينين اؤنونه ييغيشدى. ائوين
كونجوندن قيلينجينى گؤتوروب قينيندان سييرهرك باغيردى:

- نه؟! بونلار نه دير دانبيشيسان ...؟ ايندى هاراددير او ننهسى اوغلو؟

- كيشى حيرصلنمه... سن گلينجه ايكميز ده آل-آياغيميزى
ايتيرديك. باخ اونو او صانديغين ايچينه ساليب، قاپيسيني قيفيلاميشام.

آجیغین توتماسین، بودور بو دا آچاری...

خانیم بونلاری دئندن سونرا، آل آتیپ تاخچادان صاندیغین آچارینی
گوٲتوروب، آرینه ساری اوزالتدی. تدقیقاتچیمیز صاندیغین ایچینده
اٲیتدیکلرینه مات قالمیشدی. قورخوسوندان اوٲونو ده باتیردی بٲله...
حیاتینین سون آنلارینی یاشادیغینی دوشوندو. آنجاق سس سیز قالیب
ایشینین سونونو گوٲزله مکدن باشقا نه انده بیلردی؟! کوموتان چوخ غضبله
آچاری خانیمین آلیندن آلار-آلماز، خانیم چوخ سٲوینجک آشاغی-
یوخاری آتیلاراق باغیردی:

- اوتدوم... اوتدوم... گوٲردون هٲچ یادیندا دٲیلدی! آماندی دبله مه

هاااا...

بللی اولاییلدی کیمی، او آر-آرواد بیر شئی اوسته مرجلشیب،
چکیشمیشدیلر. کوموتان خانیمین بوتون دٲدیکلرینی مرجی اوتماق
اوچون دیققتله پلانلاندیغی اویونون پارچالاری ساندی. او پلانی باشا
دوشمه یه رک اودوزماغینین حیرصیندن، صاندیغین آچارینی اوتاغین بیر
بوجاغینا تونله یندن سونرا، قیلینجینی یٲنیدن قینینا تاخیب، قمه-
قالخانینی دا گوٲتوروب، غضبله حیط قاپیسینی آرخاسیجا چیرپاراق، اٲودن
چیخیب گٲتدی. او قاپیدان چیخما یینجا، خانیم دا آغزینی دینج قویما ییب
اونا ساتاشاراق، آتماجالار آتیپ گولوردو. کوموتان گٲندن سونرا، گلین
صاندیغین باشینا قایتدی. آچاری اٲوین بوجاغیندان تاپیب صاندیغین
قاپیسینی آچدی. تدقیقاتچیمیز ایسلاق سیچان کیمی بوزوشوب
قالمیشدی. هم یامان ترله میش، هم ده اسیم-اسیم اسیردی. صاندیغین

ايچى ياشارميش، كيشينين قىچلارى توتولموشدو. خانيم اونا صانديقدان
 چيخماغى اوچون ياردديم ائندن سونرا دئدى:
 - ياخشى آراشديرماجى قارداش! دئييردين، قادينلار حاقددا داها نه لر
 بيليرسن؟!

كىشى تيترك سسله، دىلى توتولا-توتولا دئدى:
 - آمان دير من هئچ نه بيلميرم، تكى بوراخين منى گئديم! چؤرك
 فيلان دا ايسته ميرم.

تدقيقاتچى بونلارى دئييب، تلم-تلسيك آياق قاييلارينى دا
 گؤتوروب آرخاسينا باخمادان ائودن قاچدى. بيرينجى آرخا يئتيشركن،
 قادينلار حاqqيندا يازديغى يازيلارى سويلا تاپشirdى...

اووچودور سوچلو!...

اُسكى زامانلاردا، قدار شاهلارين بيرينين حوكم اتديى گونلرين بيرينده، گتجه چاغى بير اوغرو بيرينين ائوينين دووارينا ديرماشيب، ايچرى كئچمك ايسته ييردى. دوواردان حيطه آتيلان زامان، قيچى بورخولوب سيندى. ائو ييهه سى رحم گويول بيرى اولدوغو اوچون اوغرونون حالينى گؤره رك، اونو محكمه يه وئرمكدن واز كئچدى، امما صاباحيسى گون، اوغرو محكمه يه گئديب، همين ائو ييهه سيندن شيكايت ائئدى. اوغرو شيكايت ورقه سينده ائو ييهه سينين حيط دووارينين اوجاليغينى، قيچينين سينماسينين سببى يازيب حاكيمدن اونون جزالانديريلماسينى ايسته ميشدى! او اوزدن حاكيم بيرينى يوللايب، ائو ييهه سينى محكمه يه چاغيرتديردى. يئتيشر-يئتيشمز هده-قورخو ايله شيكايت احوالاتينى كيشيهه آنلاديب، دووارين او قدر اوجا اولدوغونون نه دنينى سوروشدو. كيشينى قورخو كارىخديردى. سؤزونون اصلينى ايتيريب دئدى:

- حاكيم جنابلارى ساغ اولسون. ائوى بنا تيكيب دير. دوواري بو قدر اوجا قالديرديغينين نيهه سيندن هئچ منيم ده خبريم يوخ دور. يوخسا دووار آزاجيق آلچاق اولسايدى، منيم قويدوغوم خرج ده يونگول چيخاردى.

حاكيم آزاجيق دوشوندن سونرا اونون سؤزلرينى حاقلايب، بنانين گتيريلمه سينى ايسته دى. بير نفر گئديب بنانى ايش اوستوندن ائنديريب محكمه يه گتيردى. حاكيم بنادان ائو ييهه سينين حيط دووارينى او قدر

اوجا ایشله دییینین سببینی سوروشدو. بنا دئدی:

- منیم قراریم دیر، هر دووارا اَللی لای کریچ دوزه رم. ائله او دووارا دا اَللی لای دوزموشم. آدام یوللایب، سایدیرا بیلر سینیز. نه بیلیم بلکه کریچلر قالینیمیش!

حاکیم، کیشیدن بنانین سۆزلرینین دوز اولوب-اولمادیغینی سوروشدو؛ کیشی-سانیرام بنا دوز دئیر، من ده لایلارین ساییسینی او قدر بیلیرم- دئدی. حاکیم یئنه کیشیدن سوروشدو:

- کریچلری کیمدن اَلمیشدین؟

- ائویمیزین یاخینلیغیندا بیر مصالح ساتان واردیر، اوندان اَلمیشام. بنا دا او دوکانی تانییر.

بنا حاکیمه اوز چئویریب دئدی:

- حاکیم جنابلاری! منه باشقا سورغونوز اولماسا گئتمک ایذنی ایسته ییرم. آخی مالاتیم قاتیلی، ایشچیلریم ایسه ده ایندی ایشسیز- گوجسوز قالیلار. بیلدیینیز کیمی مالات قالارسا برکییب، داها وئجه گلمز.

- یوخ سندن هله لیک باشقا سوروم یوخ دور. گئت، آنجاق یولونون اوستونده او یاپی مصالحی ساتان آدمی عاجیل بورایا یوللا...
- باش اوستونه.

بنا محکمه دن چیخیب، بیرباشا مصالح ساتان کیشیین دوکانینا گئدهرک اونا عاجیلن محکمه یه گئتمه یینی تاپشیریب، ایشیین اوستونه قایتدی. دوکانچی درحال دوکانینی باغلایب محکمه یه یوللاندی.

حاکیمی گۆروب سلام وئردی:

- علیکم‌السلام. بو کیشینی تانییرسانمی؟

- هه، قونشوموزدور.

- او یاپی سینین کریپجلرینی سندن آلیب دیرمی؟

- هه، مندن آلیب، نئجه؟ نه اولوب کی؟ بو مسأله ایللر اؤنجهیه

قاییدیر. کریپجلری ساتیب، پولونو دا آلمیشام.

- ئئلیک، قولاق آس! بو کیشی ایله بناسی او کریپجلرین نرمالدان

قالین اولوغونو ایددیعا ائدیرلر، بو دوزدورمو؟

- دوزدور جناب حاکیم.

- هئچ بیلیرسن او قالین کریپجلری بو کیشیه ساتماقلا نه آغیر بیر

سوچو اؤز عؤدهنه آلمیسان؟

کیشی شاشارق حاکیمه باخیردی. حاکیم اوغرونون دوواردان

یخیلیب قیچنین سینماغینین أحوالاتینی دانیشیب، گوناھی دوکانچنین

بوینونا ییخماق ایستهینده، دوکانچی بئله دئدی:

- یادیمدا بیر دؤنه کوره دن آلدیغیم کریپجلر، ایکی سانت قالین

ایدی. بلکه ده موشکول او کریپجلرین قالیلاریندا ییمیش! کوره چی -

قالیب دوزهلنده سانکی اولچوده کاریخمیشام- دئیردی!

بو کره حاکیمین آمری ایله گئدیپ قالیب دوزهلدنن چاغیردیلار. او دا

گلیب بئله دانیشدی:

- حاکیم جنابلاری! من ایشیمده اوستاد صنعتچیم. آنجاق بیزیم

ایشیمیزه چوخ دیققتله سس سیزلیک گرکیر. بیردن بیری گلیب دوکانین

قاباغیندا های-هارای سالاندا، بئله ایشلر ده اوز وئره بیلیر. من محکمه یه گله رک یاخشی فیکیرلشدیم! سونوندا او گونو یادیم سالیب، نه باش وئردییینی خاطیرلادیم؛ اوجا قالیبلاری اؤلچدویوم زامان، تانیدیغیم بیر قادین اوجا سسله اؤز-اؤزونه دانیشاراق، دوکانین قاباغیندا وار-گل اندیردی. دیل آلتی بیر شئیر دئییب آغلامسینیردی. سؤز اولماسین دئییه هئچ بیریمیز ایره لی گئتمه دیک. آنجاق بیر تورلو^۱ فیکریمیزی ده باشیمیزا ییغا بیلیمیردیک. منیم بیر آن فیکریم او قادینا گئدینجه یاهاالیب، قالیبلاری ایکی سانت اوجا اؤلچموشدوم. ایش-ایشدن کئچمیشدی. قالیبلار کوره یه گئدیب، بیر-ایکی کوره ده کرپیچ دوزه لمیشدی. او کرپیچلر ایسه بو کیشینین شانسینا چیخدی. اصلینده بو کیشی وئردییی پوللا داها قالین کرپیچ آلدیغینا گؤره آزاچیق دا قازانجلی اولدوغوندان ممنون قالمالی دیر. نه ایسه بو آرادا بیر سوچ ایشلنمیش اولسا دا سوچلو من یوخ، دوکانیمین قارشیسیندا او های-کوی سالان قادین دیر!

سؤز بورا چاتدیقدا حاکیم، قالیب دوزه لدن کیشیدن قادینین دقیق کیملییی ایله آدرسینی سوروشوب، نئچه نفره تاپشیریقلار وئره رک، گئدیب او قادینی آختاریب گتیرمه لرینی ایسته دی. سونوندا همین خانیم دا یولداسی ایله بیرلیکده محکمه یه گلیب، حاکیمین قارشیسیندا دایاندیلار. حاکیم قادینی سورغو-سوالا توتوب او گونو خاطیرلاماغینی، نییه اؤز-اؤزوايله دانیشیب، قالیبچی نین دوکانینین قارشیسیندا وار-گل

^۱ تورلو: (Türlü) انواع، اقسام، متنوع. بیر تورلو: به نوعی.

اڏيڻ اونو ڪاريخدير ماڻيڻ نه ڏينئي سوروڻو. خانيم بير توو ڏاڻاڻيڻ،
يولداشينيڻ اوزونه باخندان سونرا ڏاڻيشماڻا باشلاڏي:

- حاڪيم جناڻلاري! آخي من اؤزومله ڏاڻيشماييم، بس درديمي ڪيمه
ڏئييم؟ باخ، يالانيم يوخدور، يانيندا، اوزونه ڏئييرم. منيم اريم يازاردير.^۲
سحردن آخشا ايشي اوخويوب، يازيب پوزماق دير. نه اؤزو ائشييه چيخار
نه ده بيزي بير يئر آپارار. اونون گؤردويو ايشلر آنجاڻ ائوده اوتوروب،
اوخويوب، چاي ايچيب، سيغار چڪيب توستوسونو ده بيزه ساري
اؤتورمڪ دير. البته ڪي، بير ده يازماق. اوشاقلار دا، من ده قول-ڪنيز
ڪيمي قارشيسيندا ايشله مهليليڪ. بير زامان بير سؤز ده ڏسڪ، بيه يامان
توخونوب، بيزه آجيقلاڻار. اونون اوچون ائله گون اولوب، سؤزلشميشيڪ.
او زامانلار، بعض چاره سيزليڪدن ائشييه چيخيب، اؤز-اؤزومله ڏاڻيشيب،
آغلايب اوره ييمي بوشالتميشام! موطلق سؤزونو ڏاڻيشديغينيز گون ده ائله
او گونلردن بير يي ايميش.

قادين بو سؤزلري ڏئييب، چادراسيني اوزونه چڪهرڪ هؤنڪورتو ايله
آغلاماڻا باشلاڏي. او ڏاڻيشاراق، يولداشي اينمز-دينمز قولاق آسير، آرا-
سيرا گؤزلويونون اوستوندن بير يولداشينا، بير ده حاڪيمه باخيردي. حاڪيم
قادينا توختاقلق وئريب، اوندان اوتورماڻيني، يا دا چيخيب ائشيڪده آل-
اوزونه بير سو چيله مهسيني ايسته دي. سونرا غضبلي بير باخيشلا قادينين
يولداشينيڻ خطاب ائدهرڪ ڏئي:

^۲ يازار: نويسنده.

- سنین يازدىقلارين باشينا ديسين! گۆز ايشلىرى ھاراي گتيريب چاتديريسان؟! سنین يازى-پوزونون اوجباتيندان، قالييلار اوجا چيخيب، كرپيجلر قالين اولوب، دووار حدديندن آرتيق اوجا قالخارق، بير آلاھ بىندەسى دە او دوواردان يىخىليب قىچى سىنىپ؟ ايندى من سنلە ئئىلەيىم؟!

يازىچى اۋزونو ايتىرمىشىدى. نە دئەجەينە شاشيب قالمىشىدى. بير طرفدن دە مسألەنين آيرىنتىلاريندان خبرسىز ايدى. سونوندا اۋزونو توپارلايىپ، درين بير آھ چكىب دئدى:

- حاكيم جنابلارى ساغ اولسون! بىز يازىچىلارين بويىنو قانونلار قارشىسىندا قىلدان اينجەدير. نە دئە بىلرم؟! سوچومو بويىنوما آلىر، حۇكمونوزە باش آيىرم. حاكيم بير آز توموب دئدى:

- سنین حۇكمونو چوخ آغير نظره آلمىشىدىم، آنجاق سوچونو بويىنوننا آلىپ، پئشمانچىلىق دويدوغون اوچون بير درجە ائندىرىملە گوناھىنين قارشىلىغىندا، سول گۆزونون چىخاردىلماسىنا حۇكم وئىرىم. يوخسا ايكى گۆزونو دە چىخارتدىرماليدىم!

كىشىنى غم باسدى. درين بير فيكىرە جومدو. گۆزلىرى دە بئلە دولدو. سونرا سانكى بير شئى يادىنا دوشموش كىمى دىك آتىلىپ حاكيمە دئدى:

- حاكيم جنابلارى! يولداشيم بىلدىردىيى كىمى من بير يازارام. ايشىم اوخوماق، بير دە يازماق دىر. يئنە بىلدىينىز كىمى يازارلارا ھر شئىدن

اۋنجه، ايكي ايشيقلی گۆزون اولماغی گرکلی دیر؛ آنجاق منیم بیر اووچو یولداشیم دا واردیر؛ او اوو ووراندا همیشه سول گۆزونو یومار. دئمک، اونون هئچ کۆکوندن سول گۆزونه احتیاجی یوخدور! بلکه اولماماغی اولماغیندان، داها دا یاخشی اولا حتی؛ چونکو گۆزونو یومماق دا جیبینده قالار. دئییرم مصلحت گۆرسه یدینیز، منیم یئریمه اونون گۆزونو چیخارتسایدیلار اولمازدیمی؟...

حاکیم باشینی یئر تیکیب بیر آز فیکیرلشیب دئدی:

- نئیلک قوی ائله اولسون!

بئله لیکله ضابطلر گئدیپ هر شئیدن خبرسیز اووچونو گتیریب، سول گۆزونو چیخارتدیلار کی، بیردن عدالت ترهزیسینین دنگه سی^۳ پوزولماسین!...

^۳ دنگه: تعادل، موازنه، بالانس.

اونوتما، شاه هر نه وئرسه یارییق...

نئجه گون ایدی شاهین حالی یوخ ایدی. اونون حالی اولمایان واختلار، کیمسه گۆزونه گۆرونمک ایسته‌مزدی. اُسکی زامانلار شاهلیق اۆلکه‌لرده، یاسالار^۱ شاهین آمرلریندن عیبارت ایدی. او فرمانلارین نئجه‌لییی ده شاهین روحو دورومو ایله بیرباشا باغلیلیغی اولاردی. دئمک، شاهین کئیفی یئرینده اولان ساعاتلاردا، مقاملار، ویلايتلر، قیزیل توربالار، اُن آزی دا خلعتلر پایلاناردی! حتی بعضی آغیر سوچلو دوستاقلار دا باغیشلاناردی. آنجاق آمان اونون حالی اولمایان واختلاردان! یاسالار دَییشیلر، باشلار گۆۆده‌لره آغیرلیق ائدر، وئریلن مقاملار گئری آلینار، دوستاقلار، یئنی قوناقلارینا خوش گلدین دئیهر، اُن آزی فلکلر باغلانیب آیاقلارین آلتی چوغوندور کیمی قیزاراردی!

کیمسه شاهین حالینین یاخشیلاشماغینا آلیندن گلنی اُسیرگه‌میردی. باش وزیر، هامیدان چوخ شاهین قوللوغوندا اولدوغونا باخاراق، شاهین حالینین دورومو هامیدان آرتیق اونو ایلگی‌لندیریردی. اونون اوچون ده شاهی سئویندیریب، نرمال حالا قایتارماق اوچون ائدیلن بوتون چابالارا، او باشچیلیق ائدیردی. اؤنجه قصرین ایچینده همیشه حاضیر اولان لووغالار گلدیلر. شاه، هئج اونلارا ایشلرینی باشلاماق حاققی وئرمه‌دی:

^۱ یاسا: قانون.

- ایتیلین گۆزومون اؤنوندن! او قدر اوزونوزو گۆرموشم کی، بیر داها گۆرنده اوره ییم بولانیر!

لووغلار دایانمادان دیشاری^۲ چیخدیلار. باش وزیر، آدلیم بیر سیرک قروپو گتیردی. اونلار دایانمادان قورخا-قورخا ایشلرینه باشلادیلار. آنجاق شاهین حالی یاخشیلاشمادان، بیر آز دا پیسلشدی. اؤزلیکله قروپون آسالنی نعره چکینجه، شاه قروپون باشچیسینا اوز توتوب دئدی:

- نییه بو حیوانینا -شاهین قوللوقوندا ائششک کیمی آنقیرمازلار- دئمه میسن؟!

سونرا امر ائتدی، قروپون باشچی سینی فلکه باغلایب، آیاقلارینین آلتیندان یوز آغاج وورسونلار! یازیق کیشینین هارایی گۆیه گئیدردی. یوز ووروش قورتولدوقدا، قصرده آنجاق دؤرد آل-آیاق چیخا بیلدی.

باش وزیر، مطبخده کی آشچیلارا شاهین آن چوخ سئودی یئمکlerden حاضیر ائتمه لری حاقدا تاپشیریقلار دا وئرمیشدی. آنجاق اونون دا بیر فایداسی اولمادی. شاه یئمکlerden ده دوشموشدو. باش وزیرین عاغلینا داها بیر شئی چاتمیردی، بیر طرفدن ده شاه، باغیرااق -داها هامینیز ایتیلین گۆزومون اؤنوندن، کیمسه گۆزومه گۆرونمه سین- دئییردی. باش وزیر بوتون وزیرلرینی، دانشمانلارینی^۳ عاجیل بیر توپلانتییا چاغیریب دورومو اونلارا آنلاداندان سونرا، اونلارین دا اؤنرلرینی ایسته دی. هره بیر سؤز دئدی:

^۲ دیشاری (dışarı): خارج. ایچ (iç): داخل، دیش (dış): خارج.

^۳ دانشمان: مشاور، مصلحت گزار.

- بس لووغلار بو قصرده ایشسيز-گوجسوز نیه دولانیرلار؟!
اونلارین وارلیغی، عارسيز-عارسيز بسلنمه‌لری بو گوندن اؤترو دئیلمی؟
ایش، اونلارین ایشی‌دیر!

- اونلار گلدیلر، شاه حضرتلری هئچ آغیزلارینی بئله آچماقلارینا
ایذین وئرمه‌دی.

- موسیقی قروپو گتیرسک؟ چالسینلار، اوخویوب اویناسینلار، بلکه
ایشه یارادی.

- عاغلیم کسمیر، های-کوی بیر آز دا حالینی پوزور.

...

بو آرادا تشریفات وزیر ی دانیشماغا باشلادی:

- بی‌لر! من، آلدیغیم گؤره و اوزره، چئشیدلی مجلسلرده، چئشیدلی
آداملار گؤرموشم. تپه‌دن دیرناغا لووغا بیر کیشینی تانییرام.
جاماعات‌آراسی اونا لووغلار کرای لقی وئریلیب‌دیر. او اولان هر
مجلسده، مجلس تاماملانینجا، اورادا اولانلارین بیر چوخو او قدر گولرلر
کی، اوچ گون قارین آغریسی چکرلر. منجه شاه ی گولدوروب، نرمال حالا
قایتارماق آنجاق اونون ایشی‌دیر.

باش وزیر دئدی:

- بس بو قدر آرخابین اولدوغون حالدا، نیه دایانیبسان؟ دئ گل‌سین
دههه!

- آخی آرادا کیچیک بیر چتین‌لیکلر واردیر.

- مسأله نه‌دیر؟

- موشتیرسی بول اولدوغو اوچون، یامان پولچودور. هم ده شاهین قوللوغونا گلهمیینی ائشیتسه، طاماحی بیر آز دا آرتاجاق.
- اولسون، او بو مسألەنی حل ائتسه، شاهین حالینین خوش واختی آلی آچیق دیر. اونو بوش قایتارماز.

- بیر ده...

- بیر ده نه؟!

- بیر ده بلکه منیم سؤزومه اعتبار ائدیپ گلهمدی. دئدیم آخی بیر آز دا منجیل دیر. اؤزونوز دالینجا گئتسه نیز داها یاخشی دیر.

- آرانیزدا بیر مسألە وارمی یوخسا؟

- یووو، اؤنملی بیر شئی دئییل، آنجاق بیر-ایکی یئرده منه ده آتماجالار آتینجا، آزاجیق سؤزلمیشیک.

باش وزیر دینمەدی. اؤزو ایله دوشوندو:

- (من بو اؤلکهنین باش وزیرى اولاراق، اؤزوم بیر لووغانین دالینجا گئتمهیم یاخشی دوشمهسه ده، چاره نه دیر؟ گلهمی ایشه یارایاجقسا، نییه گئتمهیم. تکی شاهین حالی نرمالا قایتتسین، یوخسا هئج بیریمیزین قورتولاغاغیمیز اولماز...)

باش وزیر، همین لووغا کیشینین آدرسینی آلدی. دالینجا گئدیپ، اونو تاپدی. اونونلا دانیشاراق، مسألەنی اونا آنلاتدی. آنجاق بیر آن طاماحلانیب اونا بئله دئدی:

- شاهین کدرینی آرادان قالدیرماقدا اوغورلو اولسان، او سنه چوخ دَبرلی هدیه لر وئره جک، من شاهین باش وزیرى اولدوغوم حالدا

گۆرورسن کی، اؤزوم سنی قوللوغونا آپارماغا گلمیشیم، اونا گۆره ده اونوتما، شاه سنه هر نه باغیشلاسا، یاریسینی منه وئرمه لیسن!

کیشی قبول ائدیب، بیرلیکده شاهین قوللوغونا گتدیله. باش وزیر ایکی قات آییلیب، حؤرمت ائندن سونرا، بئله دانیشدی:

- شاه حضرتلری ساغ اولسونلار، بو کیشیه ائل آراسی لووغلار کرالی دئییرلر. اونون دئدیینه گۆره، اوندا شاهین حالینی خوش احوالی-روحه یه قایتارماق یئته نه یی واردیر. ایذین وئرسه نیز، ایشینی باشلا سین.

- نییه منی بیر آن اؤز حالیم بوراخمیرسیز؟

- شاه حضرتلری، آخی سیزین کئفینیز یئرینده اولمایاندا، بوتون اولکهنی غم بورویور.

- آی کوپک اوغلو، آل چک بو یالتاقلیغیندان!

- یالتاقلیق نه دیر قوربان؟ عینی اوره ک سؤزوم دور.

- اولسون باش وزیر، نه دئییرم، باشلا سین بونو دا گۆره ک.

وزیر بیر داها آییلیب، بیر قیراغا چکیلدی. کیشی لووغالینا باشلادی.

آنجا ق هر نه ائتدیه ده شاهین دوداغی بئله قاچمادی. عکسینه گئت- گئده حالی بیر آز دا پیس ل شیردی. سونوندا داها دایانا بیلمه ییب جالادلارینی چاغیردی:

- جالادلا! گلین منی بو یاراماز لووگادان قورتارین. اونو فلکه باغلا ییب، ایکی یوز آغاچ آیاقلارینین آلتیندان دؤشه یین.

جالادلا ر گلدیلر. شاه بویوردوغو کیمی یازیق کیشینی فلکه باغلا ییب آیاغینین آلتینا آغاچ وورماغا باشلادیلار. ایکسی وورور، بیر ایسه

سایردی:

- بیر، ایکی، اوچ ... اون...ایبیرمی...دوخسان...دوخسان دوققوز،
یوز...

جلاد یوز دندیکده، لووگا آل-ایاق چالاراق شاهدان بیرجه دقیقه
آمان ایسته دی - قیبله یی عالم ساغ اولسون، بیرجه عرضیم وار- دئدی.
شاه، جلادلارا باخیب، ساغ آلینی یوخاری قالدیریب دئدی:

- بیر آن وورماین گؤروم بو یارامازین سؤزو نه دیر.

لووگا تیتراک دوداقلارلا، زاریاراق دانیشماغا باشلادی:

- شاه حضرتلری ساغ اولسونلار! باش وزیر جنابلاری منی بورایا
گتیره رکن، من ایله بیر قرار کسمیشدیلر. -شاه حضرتلری سنه هر نه
وئرسه منیمله یاری بؤلمه لیس- دئمیشدیلر. من ده بو قراری قبول
اٹمیشدیم. ائله دیسه، منجه قالان یوز آغاجی، اوشاقلار اونون آیاقلارینا
وورمالی دیرلار. من ده اؤزومه گؤره بیر کیشیم؛ آخی وئردیییم سؤزدن
قاچا بیلرم!

بیر آن شاهین دوداگی قاپیب، اوز توتوب باش وزیره دئدی:

- هه باش وزیر، دوز دئییرمی بو لووگا؟

باش وزیرین رنگی آتدی. بیر سؤز دئمه دن باشینی آشاغی سالیب،
باشینی آشاغی-یوخاری ترپتمکله لووغانین سؤزلرینی دوغرولادی. شاه،
اوجا سس ایله گولمه یه باشلایب، جلادلارا، لووغانی فلکدن آچیب
یئرینه باش وزیرین آیاقلارینین فلکه باغلانماسینی امر ائتدی. قالان یوز
آغاجی وزیره ووردوردو. لووگا ایسه بیر قیراقدان دوروب، وورولان

آغاچلاری ساييردی. ظارافات يانا هردن بير کاريخديغيني گؤستريب،
 ساييني نئچه دؤنه ده تکرار ائديردي، هر آچاج وزيرين يوموشاق آياقلارينا
 ديدیکجه، وزير ناله ائدير، شاه قاريني توتاراق اوجا سس ايله گولوردو. بير
 او قدر گولدو کی، گؤزلريندن ياش گلدی. سونرا لووغانی حضورونا
 چاغيريب، اونا يوکسک ديرلي هديه لر وئريلمه سيني امر ائديب، اونو
 مرخص ائتدی...

«میکروب عمی»...

۱۳۴۰-نجی ایللر ایدی. دؤولت آداملاری چوخ آراشدیرمالاردان سونرا، رادیو یایینلارینی سینیر دیشینا^۱ یایماق اوچون، بیناب شهرینی آن اویغون شهر سئچدیلر. قرارلار آلینیب، تیکینتی، قوراشدیرما ایشلری باشلادیلدی. یئنی استانسسیانین^۲ یاییسی تیکیلیب، یاپنین یانیندا چوخ اوجا بیر دیرک ده قالدیریلدی. دیرک قالدیریلاندان سونرا، قار-یاغیشدان قورونماغی اوچون، اونو بویاتدیرماق گرکیردی؛ استانسسیانین سوروملولاری، بو ایشه بیر «ائتدیریم یاریشی»^۳ دوزنلهییب، بؤلگه ده اعلانلار یایاراق، ماراقلی اولان شخصلردن، بویاچی شیرکتلریندن، او یاریشا قاتیلیب آلاجاقلاری آل موزدونو اؤنرمکلرینی ایسته دیلر. دوغال اولاراق، هامیدان آشاغی پول ایسته یین شیرکت، یاریشی قازانیب ایشی توتاجاق ایدی. بؤلگه نین، اؤزلیکله ده تبریزین بوتون آدلیم بویاچیلیق شیرکتلری بو یاریشا قاتیلدیلار. چوخ هوندور، آل وئریشسیز یئرده ایشله مک گرکجه سی اولدوغو اوچون، یوخاری رقم لر اؤنریلدی. او زامانین پول دیری ایله، بیرى اوتوز مین، باشقاسی ایییرمی دوققوز مین بئش یوز، بیر آیریسی ایییرمی سککیز مین تومن، ... ایسته دیلر. بو آرادا لقب باز بیناب اهلینین ایچینده، «میکروب عمی» آدی ایله تانینان بیر محله

^۱ سینیردیشی: برون مرزی.

^۲ استانسسیا: ایستگاه رادیو تلویزیونی.

^۳ ائتدیریم یاریشی: مناقصه.

بویاچیسی دا وار ایدی. یولداشلاری، او ائندیریم یاریشیندا اونون دا ایشتراک ائدی، بیر قیمت اؤنمه سینی ایسته دیلر. —سونو بودور کی، قازانمازسان، آنجاق قازانارسانسا، بلکه بو ایشده نئچه ایلینین پولونو تاپا بیلرسن— دئدیله. ساده لؤوح کیشی، ایشین نه دورومدا اولدوغونو سالیب— چیخمدان، ایشه بیر گؤز آتیب، اینانیلماز آشاغی بیر قیمت اؤنردی. میکروب عمی اؤزو ایله بئله دوشونموشدو: —(بو ایش لاپ چوخ آپارسا، ایکی مین تومنلیک رنگ آپارار؛ اؤزومه ده دؤرد مین تومن آل موزدو قالسا پیس اولماز...) او بونلاری دوشونوب یاریش ورقه سینده «آلتی مین تومن» یازدیردی!...



میکروب عمی چوخ ساده، صمیمی، آلی ایله ایشله ییب، آیین تری ایله حالال پول قازانان بیر کیشی ایدی. بویاچیلارین ایشلری همیشه ألوان بویالارلا اولار؛ آغ، قارا، ساری، قیرمیزی... اونلار نه قدر ده تمیز ایشله سه لر، ایش واختی گئیدیکلری گئیملر، چئشیدلی بویالارا باتمامیش اولماز. بیر توو ایشله یندن سونرا، اونلارین ایش پالتارلاری چرشنه بازاری کیمی آل—ألوان اولار. آنجاق اونلارین هامی سینین ایش گئیملری ایله ایشله مه دیکلری واخت گئیدیکلری گئیملر، فرقلی اولار. ایشی باشلارکن عادی گئیملرینی چیخاریب، بیر نایلونا بوکوب، ایش گئییمینی گئیهرلر؛ عکسینه، ایشدن چیخان کیمی ایش پالتارلارینی چیخاریب، آل—اوزلرینی، آیاقلارینی یوبوب، یئنه عادی گئیملرینی گئیهدن سونرا، ایش یئرلرینی ترک ائدرلر. ایش یئری دیشیلمه یینجه، ایش پالتارلاری ائله

ایش یئرینده قالار.

آما میکروب عمی بو قایدانی پوزموشدو. اونا ائشیک گئییمی، ایش گئییمی، قوناقلیق گئییمی دئییه بیر شئی یوخ ایدی. ایش یئرینه یئتیشر- یئتیشمز، ائله آیینده کی پالتارلارلا ایشه باشلار، همین پالتارلارلا دا ائوه قاییداردی. قوناقلیغا، ایل بایرامی گؤروشلرینه بئله، همین یئددی بویا پالتارلارلا گئدردی. بایرام گؤروشلری کیمی چوخ اؤنملی بیر قوناقلیق اولسایدی، همین بویالی گئیملرینی خانیمینا یودوردوب، گئییب گئدردی. اونا گؤره ده بیناب اهلی ایچینده «میکروب عمی» لقبینی قازانمیشدی...

راديو استانسىيا مودىرى بو اينانيلماز آشاغى قيمتى ائشيدىنجه، شاشيب يئرینده قورودو. اؤنجه ساوادميز كيشينين يانيلديغىنى، يا دا يازان ادامين كارىخديغىنى دوشوندو. آدام يوللايىب، ميكروب عمىنى چاغىرتدى. اؤزو اوندان سوروشوب، يئنه ده آلتى مين تومن رقمىنى اؤز آغيزىندان ائشيدندن سونرا آرخايين اولوب دئدى:

- چوخ ياخشى، بو ايش سنین اولسون.

مودىر، درحال موقاويله نين يازىليب گتيريلمه سىنى ايسته دى. ميكروب عمی مودىرين يانيندا بير-ايكى ايستكان چای ايچيب، شيرينلىك يئىنجه، موقاويله يازىليب، قول قوبولماق اوچون حاضيرلانمىشدى. هر ايكى طرف موقاويله يه قول قويدو؛ يازىلى قرارا اساسن، پول، اوچ مرحله ده ايش توتانا وئريله جكدى: بيرىنجى حيصه (پولون اوچدن بىرى)، موقاويله ايمضالاناركن، ايكىنجى اوچدن بىر، ايش يارىيا چاتاندا،

اوچونجو، یعنی سونونجو حیصه ايسه ایشین تحویل وئريلمه زامانی. بئله لیکله میکروب عمی موقاویله نین بیرینجی مرحله اؤده نیشینی ده (ایکی مین تومن) آلیب جیبینه قویاندان سونرا، استانسیا یاپی سیندان چیخدی...

موقاویله نین ایضاسیندان ایکی هفته سووولماغینا باخمایاراق، هله هئچ بیر ایش گؤرولمه میشدی. گونلر بیر-بیرینین آردیندان اؤتور، پاییز گونلری یاخینلاشیردی. گوز^۴ یاغیشلاری باشلا سایدی، ایشده چتین لیکلر تۆرنه بیلردی. ایکی هفته دن سونرا، مودیر یاپنین قورویوجوسونو یانینا چاغیریب اوندان سوروشدو:

- او بویاچی کیشیدن خبرینیز وارمی؟ هئچ بیر وسیله بورایا گتیریب دیرمی؟

- یوخ مودیر جنابلاری! هئچ بیر شئی گتیرمه ییب دیر. آنجاق اؤزو، نئچه گوندن بیر، آخشام چاغلار یالین آل ایله گلیب دیره یین دؤوره سینه فیرلانیب گئدیر.

مودیر بیر قدر توموب، فیکیرلشدی. سونرا آرتیردی:

- یاخشی؛ بیر ده گلرسه، اونو گؤرمک ایسته دیییمی دئیهرسن؛ ایداره واختی یانیم گل سین. اولدومو؟
- اولدو؛ باش اوستونه.

^۴ گوز (güz): پاییز.

- اونوتما؛ گنده بیلرسن...

نچه گون بو دانیشیقدا سونرا، یئنه ده آخشاملارین بیرینده، میکروب عمی ایشدن چیخیب دیرهیین یانینا گلدی. دیرهیه باخیب قاییتماق ایستهینده، قورویوجو قارشیسینا چیخدی:

- سلام علیکم عمی؛ یورولمایسان...

- علیکم‌السلام بالا؛ چوخ ساغ اول، اؤزونو ده یورولمایسان...

- چوخ ساغ اول؛ عمی استانسسیانین مودیری سنی گؤرمک ایستهیر؛ زحمت اولماسا صاباح ناهاردان اؤنجه اونو گؤرمهیه بیر آباق گلرسن...
- آخی سحرلر منیم ایش واختیمدیر... هیمممم، باخیم گؤروم نه ائده بیلرم...

میکروب عمی بو سؤزلری دئییب، قورویوجو ایله ساغوللاشدی. صاباحیسی ایشه گئتمه میشدن اؤنجه، ساعات یئددی یاریم حدودوندا استانسسیایا گئدیب، مودیرین قاپیچی سیندان، مودیره اونون گلدییینی خبر وئرمه سینی ایسته دی. قاپیچی خبر وئرنجه اونو ایچری گؤندردی. مودیر میکروب عمی نی گؤرن کیمی، آیاغا قالخیب اونولا سالاملاشیپ، گؤرۈشدۈ. اونا اوتورماغی اوچون یئر گؤستریب سونرا دئدی:

- آی مشهدی، گوز گلیر هااا! بس نییه ایشینی باشلامیرسان؟!

میکروب عمی ایسه بینابین او شیرین لهجه سی ایله دئدی:

- قاغا! ائله اولماز کی؛ ییخون یئییه یه هلییییم دااا! (قارداش! ائله اولماز

کی؛ ییخین یئرہ رنگله ییم دااا!)

اوهوی، ایش نه یئرده اولدوغو، میکروب عمینین بو قدر آز رقم

اۋزردییینین نه دنی آشکارا چیخدی؛ دئمک، ساده لۇوح کیشی بئله گومان
 ائدیرمیش کی، او هوندورلوکده، او آغیرلیقدا دیره یی، مین بیر زحمت ایله
 قالدیریلاندان سونرا، اونون بویاماغی اوچون، یئنیدن یئرہ ییخاقلار!
 هامی گولوشدو. آرتیق، ایش میکروب عمینین ایشی اولمادیغی بللی
 اولوب، باغلانان موقاویلہ پوزولدو...

او گوندن میکروب عمینین بو سۆزو، بینابلیلارین آغیزینا دوشوب، او
 رحمتلیییہ دوکان اولدو! آرتیق کیشینین لقبیندن باشقا، بیر ده دوکانی وار
 ایدی. اونو غضبلندیرمک ایستہ ینلر، اۋز دئدیگی جوملہ نی اونا دئییب،
 دایانمادان قاچاردیلار. رحمتلیک کیشی، چوخ زامان دیر رحمتہ گئدیبدیر،
 أمما ایندی ده بئله، بو جوملہ بیناب شہرینده بیر مثل کیمی ایشلہنیر...

اینام...

آخان چای، کندی ایکی حیصهیه بۆلموشدو. چای اوزونو، ائولر بیر-بیرینه باخیر، گتجهلر اوتای-بوتاییندا تیکیلن ائولرین چیراقلاری، بیر-بیرینه گۆز ووروردو. بیر او قدر درین، دالغالی اولماسا دا، بۆیوک آداملارین دا بئله کۆرپوسوز، چایدان کئچمکلی اولاناقلی^۱ دئییلدی. کندیلر چایین اوتای-بوتایینا کئچمک اوچون، یوغون ایپلرله تاختالاری بیر-بیرینه باغلایاراق ایکی کۆرپو دوزهلدیب، چایین هر طرفینده یئره سانجیلان دیرکلر آسیب، گت-گل یولو دوزهلمیشدیلر. کۆرپولرین آرالاری مین بئش یوز متر اولاردی. شانس سیزلیقدان، آرسلان گیلین ائوی تخمینن ایکی کۆپونون آراسیندا یئرلشمیشدی. آلتی یاشلی آرسلان، قرآن درس لرینی اؤیرنمک اوچون هر گون چایدان کئچمه لی ایدی. یئنه باشقا بیر بخت سیزلیکدن اونون قرآن صنیفینده ایشتیراک اتدی یی موللا فیض الله گیلین ده ائوی، چایین او تاینندا، دوز آرسلان گیلین ائوینین اوزبه اوزونده ایدی. بونا باخمایاراق، چاره سیز اوشاق، هر گون کیلومتر یاریم یول گئدر، بیر او قدر ده قاییداردی. خیردا اوشاق گئندنه ائله یورولاردی کی، چوخ زامان درس دئییلن وخت مورگوله یردی^۲؛ قاییدینجا دا یورغونلوقدان بعضن شامسیز، باش یاستیغا قویاردی. گونلر بو

^۱ اولاناقلی: ممکن، امکان پذیر.

^۲ مورگوله مک، پینک له مک: چرت زدن.

سایاق اۆتوردو؛ گونلرین بیرینده، موللا فیض الله یئنه اُرسلانی مورگوله یرکن گۆروب، اونا آجیقلا نازاق دئدی:

- آی اوشاق! بس دیر بو قدر اُسنه ییب^۳، مورگوله دییین! یاواش-یاواش منی ده اُسنه دیرسن. دور گئت حیطده اوزونه بیر سو چال، قاییت. بو سایاق درس اؤیرنیلمز کی!

اُرسلان یئریندن قالخدی. گئدیپ حیطده اوزونو یویوب قاییتدی. درسین آردی توتولمادان اۆنجه، اوزونو موللایا توتوب دئدی:

- آخی بیلیرسن موللا دایی، یولوم اوزاق دیر. گونده بو قدر یولو گئدیپ، گلینجه یورولورام. منی یورقونلوقدان یوخو باسیر؛ اَلیمده دئیل؛ یوخسا سیزه حۆرمت سیزلیک ائدرمی یم هئج؟!

- اوغول، مگر ائوینیز دوز بیزیم ائوین اوزبه اوزو دئیلمی؟!
- ائله دیر موللا دایی، آنجاق چایین او تایندا! بیلیرسینیز، کۆرپو بیزیم ائودن اوزاقدادیر؛ کئشکه کۆرپو قاپیمیزین اؤنونده اولایدی، اوندا بو قدر یورولمازدیم.

موللا فیض الله بیر آن اُرسلانی لاغا قویماق ایسته دی:

- سن اؤزون بیر کۆرپو سال دا نه اولار!

- نئجه یعنی؟!

- ایلک درس لریمیزده حمد سوره سیننی اؤیرنمیسن، اونو تماردین کی؟

- یوخ، اُزبریم دیر.

^۳ اُسنه مک: خمیازه کشیدن.

- ياخشى، بيزه گلندە، گل چايين قيراغينا، حمد سورەسىنى اوخويوب
چايا پوفلەيندن سونرا بو تايا كئچ؛ گئندە دە يئنه چايين قيراغيندا دايان،
حمد سورەسىنى اوخويوب ئوينيزه قاييت؛ او دا اولسون سىنن اۋزل
كۆرپون!

موللا بو سۆزلىرى دئيىب گولدى؛ سونرا دا درسىننن آردىنى توتدو.

او گوندن ارسلان هاميدان ائركن صينيفه گلير، چوخ دىرى باش
درسره قولاق آسىردى. آسنەيىب مورگولەمەيىندن دە بير ايز
قالمامىشىدى. ائودە ايسە چوخ سئوينجك ايدى. اونون حاليندا اولان بو
دئيشىكلىك، آناسىننن گۆزوندن يان قالمادى. آناسى بير گون اونو
چاغىرىپ سوروشدو:

- اوغلوم ارسلان، بو گونلر سنى چوخ سئوينجك گۆرورم. دوزدور
سىنن سئوينجين مى دە سئويندىرير. آنجاق سنى بئله شنلندىرن
مسألەنى بىلمەيە چوخ ماراقلانمىشام.

ارسلان آيرىنتىلار كئچمەدن دئدى:

- آى آنا، بو موللا فىض الله داينىنن نه ياخشى كىشى اولدوغونو هئچ
سن بىلمىرسن! بيزه ائله ياخشى اۋيودلر^۴ وئير كى، اينانيلماز؛ هم
ايشىمىزى راحتلادىر، هم دە يولوموزو ياخىنلادىر. كئشكه يا بير گون
سن دە منىملە صينيفه گلەيدىن، يا دا بير زامان اونو ائويمىزە قوناق

^۴ اۋيود: نصيحت، پند.

چاغیرا بیلهدین؛ آخی من اونو چوخ سؤیرم.

- آی بالا آخی منی سیزین صینیفه قویمازلار کی، گلمه‌ییم اولاناقلی دئییل؛ آما ئئلیک، قوی آتانا دا دانیشیم، راضیلیق وئرسه دئیهرم بیر گون موللا دایینی ائویمیزه شاما چاغیرارسان. هم زحمتلریندن تشککور ائدریک، هم ده آتانا اوتوروب بیر آز دانیشارلار.

أرسلانین آناسی، اوغلونون سؤزلرینی ائشیدینجه، او سؤزلر اوخودوغو درسلیکلره باغلی اولدوغونو ظن ائتدی. یولون یاخینلاشماغیندا دانیشاندا، گونده گئت-گل ائدی یولو گؤز اؤنونده توتدوغونو هئچ عاغلینا گتیره بیلمه‌دی. ذاتن اونا دا هئچ بیر سوچ ساییلمازدی؛ کؤرپولر یئرینده، ائولر ده یئرینده ایدی. کنده یئنی بیر تیکینتی یاخود دیشیکلیک یوخودو. خانیم، آری ایله صلاحلاشیب، اونون دا راضیلیغینی بیلندن سونرا، موللانی چاغیراجاقلاری گونو بللی ائدیله. سؤزو گئدن گون، أرسلان مکتبه گئتمه‌یه حاضیرلاشاندا، آناسی اونو چاغیریب، قاییدارکن موللا فیض‌اللهی دا شاما گتیرمه‌سینی تاپشیردی. أرسلان سؤینجک مکتبه گئدیپ، درس باشلامدان اؤنجه، آناسینین تاپشیریغینی موللایا دئدی. موللا -چوخ ساغ اول اوغلو، باخاریق- دئییب درسینی باشلادی. او گونون درسی بیتدیکده، بیرلیکده أرسلان گیله ساری یولاندیلار. أرسلان موللاگیلین قاپیسیندا چیخینجا، چایین قیراغیندا دایانیب حمد سوره‌سینی اوخویوب پوفله‌یدن سونرا چایین ائیندن یئریه‌رک، او تایا کئچدی. موللانین آغزی آچیق قالمیشدی. شاققینلیق ایچینده آرخادان اونو سئیر ائدی. اوشاق چایین

او تايينا چاتاندىن سونرا، موللا دايى ھاچاندىن-ھاچانا اۋزونه گليب، كۆرپويە سارى يولا دوشىدو. بو دۋنە، سيرا ارسلاىن شاشاراق اونا ايرى-ايرى باخماسىندايدى! اۋزو ايلە بئلە دوشونوردو:

-(بس موللا دايى نيبە منە اۋيرتىدى يولو اۋزو قوللانمادان، بو قدر يولو كۆرپويە سارى يىرىيب اۋزونو زىمتە سالىر؟!)

گۆردويونە گىچ قالمىشىدى؛ سوالىنا جاواب تاپا بىلمىردى؛ گۆردوكلرى، كۆرپە عاغلىنا سىغىشمىردى! موللانىن قوجالىغى، آدىملارنىن تووونو آلىردى؛ اونا گۆرە دە ارسلان، چايىن قارشى طرفىندە خىلىك اونون گليب چاتماسىنى گۆزلەمەلى اولدو. سونوندا، موللا دايى دا كۆرپودن كىچىدىن سونرا، گليب اونا چاتدى؛ موللا يىتىشەر-يىتىشمز، اوشاق اۋزونو ساخالاي بىلمەيب اوز توتوب موللايا سۈرۈشدو:

- موللا دايى بس سىن اۋزون نيبە چايىن ائىنىدىن سوووشماق يىرىنە، بو قدر اوزون يول گىدىپ كۆرپودن گلىدىن؟!

موللانىن نفسى تۈۋشەيىردى. نفسى يىرىنە گلەيى اوچون بىر آز دايانىپ سونرا دىدى:

- نە دىيىم اوغول! اىلىنە باخلىرسا، گۆرونور من اۋزوم ھلە سىن قدر اينانمايمىشام...

اونلار بىرلىكدە ائە گىدىپ شاملارنى ارسلان گىلدە يىدىلر؛ آنجاق او گوندىن برى، داھا ارسلان دا چايىن ائىنىدىن كىچمەيە جىسارت ائتمەدى...

من «برمکی» لردن دئییلیم...

«هارون الرشید»، «عباسی» لر سیلسیله سینین آن آدلیم شاهلاریندان بیرری ایدی. اونون «یحیی برمکی» آدلی، چوخ بیلیجی، باجاریقلی، نفوذلو بیر وزیرری وار ایدی. یحیی برمکی وزیر اولدوغو سوره جده، ایمپراطورلوغون بوتون ایشلرینی بیلیجی لیکله یولاندیریر، بوتون حساس، اؤنملی مقاملاری دا برمکی لر طایفاسی آراسیندا پایلامیشدی. ایمپراطورلوغون اوردو کوموتانلیغیندان توتدو، آن کیچیک مکانلارین سوروملولوغونادک، هامیسی برمکی لر آلینده ایدی. هارون، یحیی نی چوخ سؤهر، ایکی گؤزو قدر اونا ایناناردی. هئج بیر ایشی اونولا مشورت ائتمه میش گؤرمزدی. اونون وئردییی مصلحتلره یوکسک دیر وئره ردی.

گونلر، آیلار، ایللر بو سایاق اؤتوردو. چوخونلوقدا هارونلا یحیی نین ایستر اوزگون، ایستر سئوینج دولو زامانلاری بیرگه کئچیر، اونلار سانکی آیریلماز ائکیز قارداشلار کیمی گؤرونوردولر. یایلارین بیرینده، هارون یحیی ایله بیرلیکده اون گونلوک دینجلمک، احوال-روحیه دیشمک اوچون، ایمپراطورلوغون باغلارینین بیرینه گتتمیشدیلر. او باغین باغبانباشی سی دا بئله، برمکی لر طایفاسیندان ایدی. او، آغ ساققال، تجربوبه لی، ایشینده چوخ اوستاد بیر قوجا ایدی. باغا چوخ گؤزل باخیلمیش، چئشیدلی مئوه لر یئتیریلیمیش ایدی. آغاجلارین بوداقلاریندان سالالانان گیلالارلا آلبالیلار، گلینلرین قولاغینا تاخیلمیش سیرغالارا

بنزه بیردی. آلمالار، جنت قوخوسونو باغا پای گتیرمیشدی. اوزوملر یئل
 اُسدیکجه یاشیل اؤرپه یینی بیر قیراغا ووروب، گۆرنلرین اوزونه گولور،
 باخانلارا گۆز ووروردو. چئشیدلی فصیلره عالید اولان بو مئوه فستیوالی،
 آنجاق باجاریقلی باغبانین یوکسک مهارتیندن دانیشیردی. باغین
 اورتاسینداکی حووضدا اؤردکلر اوزوردولر؛ حووضون قیراغیندا ایسه
 سُرچهلر یویونوردولار. ألوان قانادلی قوشلار، بوداق-بوداق آغاجلاردا
 قووالاشیب، اویناماقدان دؤیموردولار.

شاه ایله وزیر، اون گون او باغدا شاهانه دینجلیب، اوشاقلار کیمی
 اویناییب، سولاشدیلار؛ حووضدا اوزدولر؛ یئدیله، ایچدیله؛ اون گونلوک
 حؤکومتدارلیق قایغیسینی^۱ اونودوب، خوش کئچیرتدیله. اؤز أللری ایله
 آغاجلاردان مئوه لری دریب، تپ-تزه یئدیله. تر تره وزلردن^۲ بیشیریلن
 آشلارین، یئمکلرین دادینی دویونجا داددیله.

او اون گونون بیرینده، باغبانباشی باغدا دولانارکن، غریبه بیر دوروم
 گۆردو. شاشیب آغیزی آچیق قالمیشدی؛ یحیی برمکی هارون الرشیدین
 بونونا مینیب، آغاجدان ألما دریردی! اونلار، آلمالاری دره رکن
 گولوشوب، بیر-بیری ایله، أدب-نزاکت قایدالارینا اعتیناسیزجاسینا،
 هر سایاق ظارافاتلاشیردیله. قوجا باغبان بو دورومدان هئچ
 خوشلانمادی؛ آنجاق اوزونه گتیرمه ییب، اونلارین گۆزونه گۆروشمه دن
 ردد اولوب ایشلرینین دالیجا گتدی.

^۱ قایغی: اضطراب، تشویش، دلهره، وظیفه.

^۲ ترهوز: سبزیجات.

اون گون، دئییب گولمکله، یئییب ایچمکله، بیر گوژ قیرییمیندا تاماملاندی. شاه ایله یانیندا گئدن هئیأت قاییتماغا حاضیرلاشدیلار. هارون الرشید، چیخمادان اوْنجه باغبانباشینی قوللوقونا گتیریلمه سینی امر ائتدی. قوجا باغبانباشی گلینجه، اونو اوْز یانیندا ایلشدیریب، اونونلا بئله دانیشدی:

– ائی قوجا باغبان! بو اون گونده بیزه چوخ خوش کئچدی. الحق کی، سنه تاپشیردیغیمیمیز امانتی یاخشی ساخالیبسان؛ سنین زحمتلرینین اوجباتیندان عؤمروموزون اینانیلماز یاخشی اون گونونو بورادا کئچیرتدیک. اونون اوچون ده چکدیین زحمتلر، قارشیلیق سیز قالمامالی دیر؛ دیله^۳ مندن نه دیلرسن.

– شاه حضرتلری ساغ اولسون، سیزین وارلیغینیز منه بس دیر. من بو قوجا واختیما، سیزدن نه ایسته یه بیلرم کی؟!

– یوخ، سن بو باغا چوخ اُمک بسله ییسن. بیلزمیم؟ اصلینده بیزه بو اون گونون ایچینده بو گوژل آنلاری یاشادان سنسن. آنجاق اوْزون اوچون بیر شئیلر ایسته مه یین گرکمیر. عالیه نه ده هر نه لازیم دیرسا مندن ایسته، وئره جه یم.

بو آرادا یحیی برمکی ده دانیشیغا قاتیلیب باغبانا دئدی:

– بو ساعات، اُلی حضرتین اُن خوش آنلاریندان بیریدیر. اوتانمادان هر نه کؤنلوندن کئچیر ایسته.

^۳ دیله: بخواه. دیله مک: آرزو کردن، خواستن، طلب کردن.

- باغبان بیر قدر فیکیرلشدی. خیال عالمینده نئجه گون اوُنجه باغدا
 دولانارکن گۆردویو منظره یادینا دوشندن سونرا دئدی:
- شاه حضرتلری ساغ اولسون، هر نه ایسته سم وئره جکسینیز؟
 – هر نه اولسا...
- ائله دیسه لوظف سببینی مدن سورمادان، أمر ائدین سیزین
 مۆهورونوزله منه بیر کاغیز وئرسینلر. او کاغیزدا منله عالیم، برمکی لر
 طایفاسیندان اولمادیغیمیز یازیلین!
- بیر آن هارون الرشید یحیی یا، یحیی هارون الرشیده باخدیلار. هر
 ایکسی باغبانین بو گۆزلیلمز ایسته یینه مات قالمیشدیلار. شاه، بیر قدر
 دینمه دی. درین بیر فیکیره جوموب سونرا دئدی:
- آی کیشی بو نه سایاق ایستک دیر؟! سن هئج بیلیمرسن کی،
 برمکیلر، منیم ایکی گۆزومون ایشیغی دیرلار؟ اونلاری چوخ سؤهرم. بو
 حالدا، سنین او جرگه دن چیخماق ایسته دییینین نه دنینی هئج باشا
 دوشمورم!
- شاه ساغ اولسونلار، هر حالدا منیم ایسته ییم تکجه دئدییم دیر،
 وئرسه نیز چوخ مینتتار اولارام، وئرمه سه نیز ده، بوینوم آمرلرینیزه قیلدان
 اینجه دیر...
- نه دئییم؟ بو بیر شئی دئیل. ایندی کی ایسته یین بودور، اولسون.
 سنه سؤز وئرمیشم؛ قوی نئجه ایسترسن ائله ده اولسون. سن دنیا
 گۆرموش بیر قوجایا بنزه ییرسن؛ یقین کی ایستکلرینه ده عاغیلا سیغان
 بیر نه دنین واردیر...

هارون الرشید باش کاتیینی چاغیردی. اونا، باغبانباشینن ایسته دییی
متنی کاغیذا یازیب گتیرمه سینی أمر ائتدی؛ سونرا دا اؤزو او کاغیذا قول
قویوب مؤهورله یندن سونرا، کاغیذی باغبانباشییا وئردی. بیر داها
باغبانباشیدان مینتتدارلیغینی بیلدیریب، فایتونونا میندی؛ فایتون سورنلره
-سور- دئدی. فایتونلار حرکت ائدی، باغدان چیخاراق، قصره طرف
یولا دوشدولر.

گونلر، بیر-بیرینی قووالادیلار؛ هفته لر، آیلار، او اولایدان کئچدی. بیر
زاماندان سونرا هارون الرشیدین اطرافیندا برمکی لردن اولمایان یاخین
آداملار، آن باشدا یحیی برمکی اولماقلا، برمکی لری شاهین گؤزوندن
سالماغا چالیشدیلار. آغیر ایشله ییب، سندلر توپلا ییب، دئدی-قودولار
یاپدیلار. گؤزده-قولا قدا دایاناراق، برمکی لرین، اؤزلیکله ده یحیی
برمکی نین ایشینده اولان آن کیچیک چاتیشما مازلیقلارینی بؤیودوب،
شاهین گؤزونه سوخدولار. اونلارین دوروب-دایانماز چابالاری
اوغورلا سونوجلانیب، آستا-آستا برمکی لر شاهین گؤزوندن دوشدولر.
آنجا ق برمکی لرین دوشمنلری بو قدره راضیلاشمادیلار. اونلارا
قارشى هارون الرشیدده او سایاق بیر نیفرت یاراتدیلار کی، شاه آجیمادان
یحیی برمکی نین بوینونو ووردوردو. آنجا ق یئنه ده غضبی کئچمه دی؛
ایش ائله بیر یئر گلیب دایانمیشدی کی، أمر ائتدی، برمکی لرین نسلینی
یئر اوزوندن کس سینلر؛ کیچیکلی-بؤیوکلو، قوجالی-جاوانلی، کیشیلی-

قادینلی، گۆز قیرپمادان هامیسینین بوینونو وورسونلار؛ ائله ده ائدیلهردی. آنجاق لشکر آداملاری همین باغداکی قوجا باغبانباشی ایله عالیه سینین سوراغینا گئدیپ، اونلاری دا قیلینجدا کئچیرتمک ایسته ینده، باغبانباشی اونلارین قارشیسینا چیخیب دئدی:

– نه ایسته ییرسینیز؟

گئدنلرین باشچیسى آتینی ایره لی سوروب دئدی:

– حیاتلا ساغوللاشمالیسینیز آی قوجا! شاهدان، بوتون برمکی لرین نسلینی یئر اوزوندن تمیزله مه یه داایر آمریمیز واردیر.

– یانیلیرسینیز آی جاوان! آخی بیز برمکی لردن دئییلیک کی؛ سیز هانسی سوچلا منله عالیه می اؤلدورمک ایسته ییرسینیز؟

– بوش-بوش دانیشما آغ ساققال؛ ماحالدا هامی سیزین برمکی لره منسوب اولدوغونوزو بیلیر. بیلیرم جان شیرین اولار؛ گۆزلریمیز آیدین اولسون، ایندی اؤلوم قورخوسوندان اصلینی ده دانیرسان؟ عاییب اولسون سنه!

باغبانباشی گولوب، جیبیندن شاهین مؤهورلو دستخطینی گلنلره گؤستره رک دئدی:

– ئئلیک، منه اینانماق ایسته میرسن اینانما؛ آما گؤروم اعلیٰ حضرتین اؤزونون ده سؤزونو دانا بیله جکسنمی؟ شاهین بو فرمانی تاریخدن، منله عالیم داها برمکی لردن سایلمیریق. اونا گؤره ده شاهین برمکی لر حاقدا وئردییی أمر ده بیزی توتماز آرتیق...

عسگرلرین باشچیسى کاغیذی آلیب، دیققتلی باخدی؛

هارون الرشیدین ایضاسی ایله مؤهورونو تانیدی؛ قوجا حاقلیندی. دورومو آنلادیب یئنی أمرلر آماق اوچون، عسگرلریندن بیرینی هارون الرشیدین یانینا یوللائیپ، او قاییدینجا همین باغدا اوتوراق ائتدی. بو موددتده قوجا باغبانباشی دا قوللوغونو اونلاردان اسیرگه مه دی. شاه، ائلچی عسگرین سؤزلرینی ائشیدینجه، هر شیئی خاطیرلادی. باغدا اولدوقلاری زامان، اونونلا باغبانباشینین آراسیندا دانیشیلان سؤزلرین خاطیره سی بئیینده جانلاندی. ائلچی عسگره، همین باغبانی حضورونا گتیره جکلری باره ده أمرلر وئریپ یولا سالدی. عسگرلر درحال باغبانباشینی شاهین حضورونا آپاردیلار. باغبانباشی شاهین حضورونا چاتینجا، ایکی قات اییلیب سالام وئردی. هارون الرشید اونو گۆرن کیمی تاختیندان قالخدی. اؤنجه عسگرلرین هامیسی گئدیپ، اونلاری یالنیز بوراخماقلارینی ایسته دی؛ سونرا آللرینی آرخاسیندا بیرلشدیریپ، قصرینده باغبانباشییا طرف آدیملایاراق، بئله دانیشیغا باشلادی:

- آی قوجا باغبان! سونوندا... سنین او گونلوکده مندن ایسته دییین مکتوبون نه دی... بو گون بیزه آچیقلا ندی. منه ائله گلیر کی، او گونلر سن گله جکده نه لر باش وئره جه یینی اؤندن گۆرورموشسن؛ آنجاق نه نیشانه لردن بو سونوجا واردیغینی بیلمه یه چوخ ماراقلیام. سنه بیز آمان وئرمیشیک؛ سؤزوموزون ده اوستونده واریق؛ اما بیر منه آچیقلا گۆروم، او زامان سن نه لر گۆردون، نه فیکر ائتدین کی، او کاغیزی مندن ایسته دین؟

قوجا یئنه ده تعظیم ائدیپ دئدی:

- اُعلیٰ حضرت ساغ اولسونلار، دوغروسو سیز یحیی ایلہ باغدا دولانان گونلرین بیرینده، چوخ غریب بیر منظره گۆردوم. یحیی سیزین بوینونوزا چیخیب آغاجدان آما دریردی. بو دوروم نرمال بیر دوروم دئییلدی؛ اُصلینده اونون عکسی اولمالی ایدی. اؤزومله بئله دوشوندوم: -
بیر وزیر کی، اؤز حددینی بیلمه‌ییب، شاهینین، سرورینین بوینونا دیرماشدی، گون گلر تپه‌سی اوسته یئرہ دیر! اؤزومله فیکیرلشدیم، ائله بیر گون گلیب چاتدیقدا، برمکی‌لرین باشینا گلن قادا-بلا منله عالیله‌مه توخونماسین. او مکتوبو دا، او نه‌دنه سیزدن آلدیم...

هارون الرشید قوجا باغبانین او قدر بیلجی اولدوغونو چوخ بیہ‌نیب، اونو آلقیشلادی. اونون اوچون دیرلی خلعتلرله هدیہ‌لر گتیرمک‌لرینی أمر ائتدی. اونا، چوخلو میقداردا قیزیل-گوموش سیککه باغیشلادی؛ سونرا دا اوندان ایشینین باشینا قاییتماغی، گۆره‌وینی قاباقجا اولدوغو کیمی داوام ائتدیرمه‌سینی ایسته‌دی...

«صیدی خالاقیزی»...

یادیمدادیر ۱۳۵۲-نجی ایله، آتام ائویمیزه هیتاچی مارکالی آغ-قارا تیلویزیون آلمیشدی. اونو، بیز اوشاقلارین اوتوروب، یاتدیغی اوتاقدان قوردولار. تیلویزیونون دؤرد قیچلی بیر کومودو، کومودونون ایسه ایکی تاغلی قاپیسی وار ایدی. هر تاغین اؤزو، بیر-بیرینه لولوا واسیطهسی ایله قوشولموش ایکی تیکه‌دن عیبارت ایدی. سول طرفده کی قاپیسی کیچیک بیر سورمه ایله کومودون اوست تاختاسینا باغلانیر، ساغ طرفده کی تاغی ایسه ده، ایکی-اوچ میلیمتر آرا ایله اوست تاختایا قیفیلانیردی. او زامانلار چوخ آز ائوده تیلویزیون تاپیلاردی. نه‌دنلری قالسین، بیر آز فیکیرلشیب بوئوکلریندن سوروشان هر کس نه‌دنلرینی باشا دوشر. تیلویزیون یاینلاری، آخشام بئشده باشلایار، گئجه ساعات بیرده ده قورتولاردی. بیز اوشاقلارین، آخشام ساعات اون بیردهک وئرلیشلره باخماغا ایذیمیز وار ایدی. هر گئجه ساعات اون بیرده آتام گلر، تیلویزیونو سؤندوروب، کومودونون قاپیسینی قیفیلاییب، آچارینی آپاراردی. دئمک، هم گئجه‌لر واختلی یاتیب، صاباحلار راحت-راحت یوخودان دورا بیلمه‌ییمیزی دوشونردی، هم ده او ساعاتدان سونرا یاینلانان فیلملره باخماغیمیزی اویغون گؤرمزدی؛ قالسین کی بیزلر، یعنی ائوین یئددی دجل اوشاغی، بیر قدردن سونرا، قایچنین اوجو ایله تیلویزیونون کومودونون سول طرفده کی تاغینین سورمه‌سینی آچیب، هامیمیز اونون سول طرفینه ییغیشیب وئرلیشلرین سونونادک باخیب،

سونرا یئنه اونو باغلاييب ياتاردیق...

معلوم دور، شهرلرین چوخ ائولرینده تیلویزیون اولمایان یئرده، کندلرده چوخ آدام هئچ تیلویزیونون آدینی دا ائشیمه ییب، نه اولدوغونو بیلمیردی. آلاسه اؤلنرینیز ایله بئله رحمت ائله سین، آتامین «صدیقه» آدلی بیر خالاقیزی وار ایدی. آدینی قیسالیدی، اونا «صیدی خالاقیزی» دئیهردی. او، یاشلی بیر قادین ایدی. او زامانلار کندلریمیزده یاشایان بوتون یاشلی قادینلار کیمی، باشینین همیشه اؤرتولو اولماغینا چوخ اؤنم وئهردی. همیشه باشیندا آغ رنگلی یئکه بیر لئجه بی اولار، اونونلا آغزینین دا بئله اوستونو اؤرتدی. آنجاق او قدر اؤرتولو گئییمه یی ایله بئله، بلکه ده اونون حساین، باشینا چادرا سالماياندان اؤرتویو بوتوؤلشمیردی. ائوه یاد بیر قوناق گلنده یوبانمادان قاجیب لئجه یینین اوستوندن، باشینا بیر چادرا اؤرتدی. آتام، یایلاردا هردن بیر کنده گندیب، قایداندان اونو دا قوناق گتیره ردی. صیدی خالاقیزی گلیب اون بئش — ایییرمی گون قالیب، قایداردی. ائله سؤزونو دانیشدیغیم ایله ده ائویمیزه تیلویزیون آلیندان سونرا، صیدی خالاقیزی بیزه قوناق گلیمشدی. هر آخسام ساعات بئشه، تیلویزیون آچیلدیقا، صیدی خالاقیزی تزجه قالخیب چادرالانیردی. ایلك گونلر بیزیم هئچ بیریمیز بو مسأله یه فیکیر وئرمه میشدیک؛ چونکو او چالیشاردی تیلویزیون آچیق اولان ساعاتلاردا، بیزیم اوتاغیمیزا دولانماسین.

گئجه لرین بیرینده شام سوفره سینی بیزیم اوتاقتا آچدیلار. صیدی خالاقیزی یئنه چادراسینی بورونوب گلدی. تیلویزیون آچیق، خبرچی ده

ساعات دوققوز خبرلرینی اوخویوردو. خالاقیزی ایلک سوفره‌نین اوست طرفینده اوتوردو. بیر آزدان گۆز آلتی تیلویزونا باخاندان سونرا، دوروب یئرینی دیشیب، سوفره‌نین سول طرفینه کئچدی؛ یئنه آزاجیق سونرا بیر آن تیلویزونا باخیب، دوروب سوفره‌نین ساغ طرفینه کئچدی. چوخ دا کیپ یاشماق توتمودو؛ سانکی بیر خیل^۱ یاد کیشینین ایچینده ایلشیدیر. آخیردا بو دوروما گۆز قویان آتام سوروشدو:

- هه خالاقیزی! نه اولوب اولمایا یئرین راحت دئیل؟

- یوخ خالوغلو، راحتام...

- آخی بس نییه تئز-تئز یئرینی دیشیرسن؟

خالاقیزی تیلویزوندا خبر اوخویانی گۆستره‌رک دئدی:

- ائه‌هه... خالوغلو دیشسم ده نه فایدا! گۆرمورسنمی، بو لووا قالمیش

کیشی، من هارادا اوتورورام ائله منه باخیر...

بیر آن سانکی سوفره‌باشیندا گولوش بومباسی آچیلدی؛ هامیمیز اوجا سسله گولدوک. آتام بیزه آجیق‌لاراق، مسأله‌نین نه اولدوغونو، تیلویزونداکینین بیزی گۆرمه‌دیینی او رحمتلییه آجیق‌لاییب، آنلاتماغا چالیشدی؛ آنجاق بو ایضاحاتین بیر فایداسی اولمادی. صیدی خالاقیزی چادراسینی باشیندان آچیب یئر قویمادی کی، قویمادی. سونوندا، چاره‌سیزلیکدن ساعات دوققوز خبرینین خئیریندن کئچیب، تیلویزونو سۆندوروب شامیمیزی یئمیه‌یه باشلادیق...

^۱ خیل (xıl): خیل، دسته، گروه.

لوطو اسکندر...

نوصرت خان ماحالین بؤیوک خانلاریندان ایدی . ائشیتدییمیز باشقا خانلارلا توتوشدوراندا، بیر او قدر ده پیس آدام دئییلدی. آن آزی خالقین ناموسونا توخونمازدی. آنجاق خان ایدی دا... زوراکیلیق، چوخ ایشله دیب آز پول وئرمک کیمی حاقسیزلیقلار، ائله اونون دا خویوندا وار ایدی. هله اوژونون نئجه آدام اولدوغو بیر قیراقد قالسین، فرامرز آدلی سیرتیق بیر اوغلو دا وار ایدی . ائله مکتبه گئدن زاماندان، هم مکتبه کی اویرنجیلره، هم ده اویرتمنلره^۱ گۆز وئرهردی، ایشیق وئرمزدی. مکتبی ایکیه بؤلومشدو: اونولا یولداش اولانلار، بیر ده قارشى دورانلار. دئیهردی طرفسیز یوخوموزدو! منیم تۆره مم^۲ اولاجاقسینیز، اولمازسانیز قارشیمدا دوردوغونوزا ایناناجام. اوژونه یامان دۆوره ییغمیشدی. هر کسده بیر شئی سؤسهیدی، زورلا، یا دا حوققابازلیقلا آلیندن آلاردی. اوژنهیین، کاسیب عالیله لرینین بیرینین اوشاغی دا او مکتبه گئدردی. جیلرینده یا دا چانتاسیندا هئچ زامان دیرلی بیر شئی اولمازدی، آنجاق آناسی هر گون چوخ یئمهلی بیر یاغلی کؤکه بیشیریپ، اوشاغی مکتبه آج قالماسین دئی، چانتاسینا قویاردی. او اوغلان فرامرز دن بیر آز یئکه پر ایدی؛ ائله اونا گۆره ده فرامرز اونولا بونوز-بونوزا دایانماقدان چکینردی. فرامرز هر گون حيله-حوققا ایله او کاسیب اوشاغین کؤکه سینی آلیندن چىخاراردی.

^۱ اویرتمن: معلم.

^۲ تۆره مه: مشتقات، زائده، عقبه، دنباله رو.

گونه او اوشاق كۆكه سىنى يىمك ايسته ينده دئيه ردی:

- كۆكه نى وئر دوه قايريم!

كۆكه نى آلب، ديشى ايله دوه شكلى ياراتماق اوچون ديش-دیش
اىردى، آنجاق سونوندا، همين قيراقلارنى ديشله دىيى شكيلين بير گون
بو قيچينى، بير گون او قيچينى، بير گون بوينونو آيب دئيه ردی:
- حئييف اولسون خاراب اولدو. صاباح كى كۆكه نده داها آرتيق
ديقتلى اولارام!

بو سۆزلى دئييب كۆكه نين قالانىنى دا آغزينا باسيب يئيه ردی. هر
گون تۆره مه لرى ايله بيرگه مكتبه گنديب، قايداردى. يول اوزونو بو قيزا،
او قيزا ساتاشاردى. اونون اوچون، اونو گۆرن قيز-گيلنلر، قاچيب
گيزلنرديلر.

گونلر بير-بيرينين دالينجا اۆتدولر. فرامرز اوتوز ياشينا چاتينجا،
نوصرت خان يامان كئفسيزله دى. حكيملر اونون ساغالماياجاغىنى دئديلر.
نوصرت خان عۆمرونون سون ساعاتلاريندا، اوغلو فرامرزى يانينا
چاغيريب اونا بئله وصيت ائتدى:

- اوغول، منيم عۆمرومدن داها بير شئى قالمير! مندن سونرا سن بو
ماحالين خانى ساييليرسان. سنه تاپشيريرام جاماعاتين ناموسونا دولاشما؛
لوطولارنى اندازه ده ساخلا. چاليش هميشه دوستلارينين سايبسى
دوشمنلريندن چوخ اولسون. بير ده ايكي شخصى آلينده ساخلاماغى
ايسته ييرم، بيرى امنييه باشقانى، او بيريسى ده كندين موللاسى دير. اونلار

سنىن آرخاندا دايانارسا، كىمسە سەنە گۆزون اوستە قاشىن واردىر دئە بىلمز. گۆزلە اونلارنىن قويروغونو آياقلاماياسان. بىر دە يادىمدان چىخامىش بونو دا دئىيم كى، ماحالدا «اسكندر» آدى بىر لوطو واردىر، سانىرام ياخىندان اونو گۆرموش اولماسان دا ، شوبهەسىز آدىنى ائىتىمىش سن. او حاقدە سەنە تاپشیریغىم بودور كى، اونولا فەمل-فەمل كىچىنمەيە چالىش. اونون اۆزونون دە تۆرمەلرى آز دئىل؛ جاماعات آراسىندا، موللانىن دا يانىندا اعتىبارلى بىر شەخس دىر...

دانىشدىقجا، خان رەنگ-روحدان چىخىر، دئىيى كەملەرىن آراسى چوخالىردى. فرامزىن گۆزلرى ياشارمىش، آتاسىنىن آلنى آلرىنە آلىب، آغلار گۆزلرىنى اونون آغزىنا تىكىمىشدى. خانىن خىسلىتلى سسى گت-گندە ضەيفلەيىردى. او دئىيى سۆزلرە، بىر نەچە عالەلەيە اۆزل سۆز دە آرتىراندان سونرا، سون جوملەسىنى تاماملايا بىلمەدن، گۆزلرىنى يوموب بىر داها آچمادى.

خانىن اۆلمەيىنىن خەبرى تئزلىكلە بوتون ماحالا يايىلدى. اونو كندىن مزارليغىنىن اۆزل بىر بۆلوموندە تورپاغا تاپشیریپ، ياشادىغى كند ایلە ماحالىن دۆورە كندلرىندە اونون خاطىرەسىنە طنطنەلى ياس تۆرنلرى دوزنلەدىلر. دفن مراسىمىندە قونشو ماحاللارنىن خانلارىندان توتدو، دؤولت آداملارىنادك اىشتىراك ائتمىشدىلر. گلنلر نوصرت خانا تانىردان رحمت دىلەيىپ، فرامز خانا دا باش ساغلىغى وئىردىلر. خانلارنى بىر نەچەسى دە اۆز ماحاللارىندا نوصرت خانىن اۆلومو موناسىيتىنە مجلسلر قوروب يئنى خانى دعوت ائتدىلر.



فرامرز خان، آتاسینین دفنی ایله باغلی تۆرنلردن قورتولوب، دوروم بیر قدر آرام اولاندان سونرا، اۆز یولداشلارینی، تۆرمه‌لرینی مشورته چاغیردی. ماحالین خانى اولاراق، اونلارین دوستلوغونا داها آرتیق احتیاجی اولدوغونو وورغولادی. ماحالدا آتاسیندان داها چوخ ایقتیدارلی اولماغی اوچون، اونلارین باخیشلارینی، اؤنریلرینی دینله‌مه‌یه حاضیر اولدوغونو بیلدیردی؛ هره اۆز فیکرینی دانیشدی، سونرا خان اۆزو دانیشماغا باشلادی:

- بى لر! بیلدیینیز کیمی، آتام چوخ اورهی یوموشاق بیرى ایدی! اونون اوچون ده بعضیلر، حدلریندن آشیردیلار. آتام مندن لوطولاری اندازه‌ده ساخلاماغیمی ایسته‌ییب، بیر ده لوطو اسکندر ده دولاشماغیما گۆره اؤیود وئریب. آنجاق سیز صاباحدان لوطولارین هامیسینى، او اسکندرى ده بئله سئچمه‌دن، بیر-بیر توتوب بورایا گتیره‌جکسینیز. اونلارا یئنی آغلارینی تانیتماق ایسته‌ییرم؛ هر بیرى منه قارشى دورمازسا هئچ، قارشى دورانا آمما بیر درس وئره‌جیم کی، عۆمرو وارکن اونوتماسین. اونلار گرک بیلسینلر کی، نه‌یین نه‌سی دیر.

تۆرمه‌لر -باش اوستونه آغام- دئییب، صاباحیسیندان ماحالین جانینا دوشدولر. باشلار ایچینه باش اولان هرکسی توتوب خانین قوللوقونا گتیریدیلر. ماحال چاخناشماغا باشلادی. گتیریلن لوطولاردان، دیل ایله فرامرز خانا ایلیب، نۆکرچیلیی بویون آلانلاری اؤتوروب، ایلمه‌نلری بیر او قدر ووردولار کی، داها قد آچا بیلمه‌سین. سیرا لوطو اسکندر

یئیشینجه، اونو گتیرمه یه تۆرمه لرین هامیسی گتدی؛ اونو کندن
چایخاناسیندا، بیر نّچه یولداشینین یانیندا تاپیب، خانین اونو گۆرمک
ایسته دییینی دئدی. لوطو اسکندر اؤنجه تۆرمه لره -منیم خانینیزلا
ایشیم یوخ دور، اونون منله ایشی واردیرسا، بویورسون، گل سین گۆره ک نه
دئیر- دئدی. گلنر آل چکمه دیلر. -بو نه سیرتیلیق! سن کیمن کی،
آغامیز دوروب سنین آیاغینا گل سین؟- دئدی؛ لوطو اسکندر اؤزونو آله
آلیب، غضبلنمه مه یه چالیشیردی. اونلارین سۆزلرینه باشینی قالدیرمادان
قولاق آسیردی. سونوندا تابلاشما یارقا اوجا بیر نره چکیب، باغیراق
دئدی:

- آده، گئدین آغانیزا دئیین منیم آل-آیاغیما دولاشماسین. دیمه منه،
دیمه یم سنه کتچینسین، یوخسا هئچ بیریمیزه یاخشی اولماز...

آنجا تۆرمه لرین آلی بوش قاییتماق نیتلری یوخ ایدی؛ بورونو یئلی
تزه خانین قارشیسیندا، لوطو اسکندر توتوب آپارما ماغین آغیر جزالارا
نه دن اولاجاغینی یاخشی بیلیردی. اونا گۆره ده لوطو اسکندرله
یولداشلارینی دۆوره له مه یه باشلادیلار. لوطو اسکندر اونلارین نیتلرینی
باشا دوشندن سونرا، آیاغا قالخدی. تۆرمه لرین هامیسی بیر آندا اونلارین
اوستونه یوگوردولر؛ لوطو اسکندر چایچییا آغیر خسارت دیمه سین دئییه،
آله یاخالاشماغی چایخانانین ائشیینه چکدی. آغیر چکیش-برکیشدن
سونرا، تۆرمه لرین سای قات-قات لوطو اسکندرگیلدن چوخ اولدوغونا
باخراق، لوطویا زور گلهمه یی باشاریب، آل-قولونو باغلادیلار. چتین لیکله،
سورویه-سورویه اونو خانین قوللوغونا آپاردیلار. فرامرز خان او گونه دک

لوطو اسکندری یاخیندان گۆرمه میشدی؛ اونو گۆرچک یاخین گلیب بئله
دانیشماغا باشلادی:

- یاخشی، بس لوطو اسکندر سن ایمیش سن؟ فیکریمده سنی بوندان
هئیکلی نظره آلمیشدیم. بیر او قدر ده کورکلی دئیلمیشسن!

- ائله اونون اوچون اون بئش نفرینی پئشیمدن یوللامیشدین؟

- یوللامیشدیم دا یوللامیشدیم! ایندی بوراداسان، بو گوندن ده
آغانی، باشینن یییه سینی تانیمالیسان. گۆرونور آتام سنه چوخ اوز
وئرمیش دیر. آنجاق او اؤلوب آرتیق، من ده کیسه نین حؤرمه سیزلیینه
دۆزن بیرى دئیلم.

لوطو اسکندر اوجا سسله گولوب آرتیردی:

- باشیمین یییه سی سن اولورسان؟! آی رحمتلیک اوغلو، سنین
آغزندان هله سوت اییی گلیر. سن، اؤز باشینی بوینونون اوستونده چتین
ساخالایارسان!

فرامرز خان بیر قدر اوتوراجاق اوستونده اوتوران، آلی-قولو باغلی
لوطو اسکندره یاخینلاشیب، گۆزلرینی گۆزلرینه دیره ییب دئدی:

- آتام سنی منه اؤزل تاپشیریب دیر؛ منیم ده سنی اؤزومه تابع ائتمه یه
اؤزل یوللاریم واردیر!

بو حالدا لوطو اسکندر ده -گۆره جه ییک- دئییب، خافا خافدان خانین
اوزونه توپوردو؛ فرامرز خان جیبیندن دسمالینی چیخاردیب، اوزونو
سیله رک غضبله چیغیردی:

- نه دوروبسوز! بو ناموس سوزو اؤلومونه دک دؤیون.

تۆرمه‌لر تۆكولوب يورولونجا آدمى ووردولار، آنجاق بيرجه آهين
 ائشيتمه‌يينه ده بئله حسرت قالدیلار. سونرا خانين امرى ايله اسکندرين
 اوتوردوغو اوتوراجاغين آلت تاختاسينى چيخارتدیلار، بئله‌ليکله
 اوتوراجاقدان آنجاق دؤرد قيچ بير ده داياناجاغى قالدی. داها جاندان
 دوشن کيشينى، يئنيدن اورتاسى بوش اوتوراجاغين اوستونده اوتورتدولار.
 اوزونه بير دولچا سو سپديلر؛ يئنه خانين گؤستريشى ايله مانقال دولسو
 کؤزهرميش کؤمور حاضيرلاييب، اوتوراجاغين آلتينا قويدولار. ايستى،
 آشاغيدان لوطو اسکندرين اوتوراجاغينى قيزيشديرىب، آز کئچمه‌دن
 گؤؤده‌سيندن، اوزوندن تر آخماغا باشلادی. بير قدر سونرا خان اوز توتوب
 لوطويا دئدى:

– هه لوطو! گؤره‌ک ايندى حالي‌ن نئجه‌دير؟

لوطو اسکندر ديلي توتار–توتماز دئدى:

– خان! آتان چيى–چيى يئميشدى، گؤرونور سن بيشيرىب
 يئيه‌جکسن!

بو آرادا لوطو اسکندرين توتولوب خانين ائوينه آپاريلماسى خبرى
 بوتون ماحالا ياييلىب، ماحالدا اونو سؤنلر بير آرايا توپلاشيپ، لوطو
 اسکندرى خانين آليندن قورتارماق اوچون، خانين ائوينه سارى گليرديلر.
 خانا خبر گتيريلدى کى، چوخ ساييلى بير توپلوم، هره‌سينين آلينده آن
 آزى بير ديه‌نک، خانين ائوينه سارى گليرلر. خان، آل–آياغا دوشوب،
 لوطو اسکندردن بيرجه کلمه بئله يوموشاق سؤز ائشيتمه‌دن، اونو
 بوراخماق مجبوريتينده قاليپ، آتاسينين سؤزلرينين حیکمتسيز اولماديغىنى
 باشا دوشدو...

قورخما سنین باشینی کسمرم...

گون اورتا چاغی ایدی؛ سیاح، دنیا گزیسینده^۱ اییک یولونون^۲ بویونجا، دوغودان^۳ باتیا طرف گئیدردی. یول اوزونو چوخلو کندلردن، شهرلردن اؤتوب، چئشیدلی آداملارلا اوزبه اوز گله رک تجروبه قازانیردی. یاز گونلری اولماغینا باخمایاراق، ناهار چاغینا یاخینلاشدیقجا هاوا قیزیشیر، گونش، آران-داغ فرقی قویمادان گوجونو یئرہ سریردی. بئله بیر دورومدا، یولچولار، گونشین غضبلی باخیشیندان تک سیغیناجاق یئر، آغاجلارین کؤلگه سی اولا بیلر. سیاح آلا قارانلیقدان، سحر یئمہ یینی یئیپ یولا دوشموشدو. بیرباشا آت چاپدیردیغینا گؤره، هم اؤزو، هم ده آتی آج، سوسوز، یورغون ایدیلر. آتین نوختاسینی چکیب، اونو دایاندیردی؛ ائله آتین اوستونده کن، سول آلی ایله نوختانی توتوب، ساغ آلینی آلتینا قویوب، گؤز لرینه کؤلگه لیک ائده رک، دؤرد دؤوره سینہ گؤز گزدیردی. گؤز ایشله دیکجه آرپا-بوغدا تارلاسی گؤرونوردو. ساری سونبولر گونشین باخیشلاری آلتیندا پاریلدا ییردی. سانکی یئرہ قیزیل توخوناقلی خالچالار سریلیمیشدی. ساغ طرفده، بیر تپه نین دؤشونده گؤرونون یاشیللیق، باخیشلارینی اؤزونه ساری چکدی. اورادا آغاجلارین اولدوغونو، همین آغاجلارین کؤلگه لرینده ناهار ائدیپ گون اورتا چاغینی کؤلگه لنیب،

^۱ دنیا گزیسی: جهانگردی.

^۲ اییک یولو: راه ابریشم.

^۳ دوغو: گون دوغان، گون چيخان، شرق.

دینجله بیلدییینی دوشونوب آتینین نوختاسینی او یانا طرف چئویردی. اونون گومانی دوز ایدی؛ اورایا یاخینلاشاراق، آغاجلار گۆز لرینده بؤیویور، اورهیی سرینله ییردی. ائله بیر آغاجسيز چۆلده همین بئش-آلتی آغاج دا بؤیوک غنیمت ساییلیردی. آنجاق او کۆلگه لیکلر اوندان اؤنجه توتولموشدو. اون دۆرد-اون بئش یاشلی بیر چوبان، داوار سوروسو ایله بیرلیکده اورادا دینجلیردیلر. چوبان، آغاجلارین بیرینین آلتیندا پالازینی یئره آچیب، ناھار منده سینی^۴ ائششهیینین خورجونندان گۆتورمکده ایدی؛ قویونلار دا باشقا آغاجلارین آلتیندا دینجلیردیلر. قویونلارین بیر سیراسی دا، کۆلگه لیکده یئر اولمادیغیندان، گونشین شوعاغلارینین آلتیندا باشلارینی بیر-بیرینین قیچینین آراسیندا گیزلتمیشدیلر. سیاح چوبانا یاخینلاشیب، سلام وئردی:

- اوغول آلاھ قووات وئرسین.

- سلام مندن دیر عمی جان؛ خوش گلدین...

- بیر نئچه ساعاتلیق کۆلگه لیینده منه ده یئیرین وارمی؟

- بس نه دن اولماسین! بو کۆلگه لیک آنا طبیعته عایدیر؛ من ده

تکلیکدن چیخارام، اوسته لیک، ناھار قوناغیم دا اولار سینیز؛ سوفره میزده بیر تیکه یاوان چۆرک ایله سوت تاپیلار. قووتماش^۵ بیشریمک

^۴ منده: سفره.

^۵ قووتماش: بیر چئشید چوبان یئمهی دیر؛ چوبانلار، نئچه دنه یوموروقدان بیر آز کیچیک یومورو داش تاپیب، تمیز یویاندان سونرا، یانار اوجاغین ایچینه آتارلار. داشلار یاخشيجا قیزیشنجا، قویونلارین سوتونو بیر کاسایا، یا دا بستیه (پایدایا) ساغیب گتیره لر. داشلار عمللی داغلاشیب، قیزاراندان سونرا اونلاری ائله داغ-داغ سوتون ایچینه سالارلار. بیر آن یامان بیر جیزیلتی سسی ائشیدیلر؛ داشلار، ←

ایسته بیرم. سانیرام سیز ده هله ناهار یئمهمیسنیز، گلین بیرلیکده ناهار ائدک.

- چوخ ساغ اول اوغول، نه دئییرم. آلاسه سنی ساخلا سین...

سیاح آتیندان ائیب، آتینی قویونلارین ایچینه بوراخی؛ پاپاغینی باشیندان گۆتوروب، آرخالینی دا آییندن چیخارتدی. ایکیسینی ده، چوبان اوستونده اوتوردوغو پالازین اوستونه قویاندان سونرا، آغاجین نچه مترلییینده آخان آرخین قیراغیندا چۆمهلهتمه اوتوروب، آینه، اوزونه سو ووردو. سولو آلرینی باشینین توکلرینه چکیب، ترینی، توز-تورپاغینی تمیزله یندن سونرا چوبانین یانینا قاییدیپ، آفاق قابیلارینی چیخاردیب، پالازین اوستونده اوتوردو:

- یا آلاسه عمی جان.

- یا آلاسه اوغول، آلاسه کۆمه یین اولسون.

- یامان یورغون گۆرونورسن عمی جان؛ هارادان گلیب، هارایا گئدیرسن؟

- من بیر سیاحام؛ دنیانی گزیب، گۆردوکلریمی یازیرام. اوزاقلاردان گلیب، اوزاقلارا گئدیرم.

سیاح دانیشاراق گۆزو چوبانین آلرینه باخیردی. چوبان، آینده کی سوغانین قایغینی سو یوردو. آنجاق آینده کی بیچاق، نرمال بیچاقلاردان

«سوتون سویونو هاوایا اوچورداراق سویویارلار. قابدا قالان سوت، قووتماش آدلی قاتی، چوخ لذتلی بیر یئمک دیر...

دئییلدی. جئیران بونوزونون تیکه لری ایله بزه‌نن توتاغینین^۶ اوزه‌رینه، اوستالیقلا ناخیشلار ایشلنمیشدی. تییه‌سینین^۷ فورماسیندان، پاریلدایان ایستیلیندن، «زنگان»ین لاپ اویل صنعتچی لرینین بیرینین آل ایشی اولدوغونو دویماق اولوردو. آیریجا، اوغلانین ساغ آلینین اورتا بارماغیندا، بلکه ده او یاشدا اوشاغا یاراشمایان چوخ دیرلی، ایری‌قاش بیر اوزوک وار ایدی؛ آن آزی سیاح بئله دوشونموشدو. بو ایکی شئی، ائله اوتوران آندان سیاحین ایلگیسینی اؤزونه چکدی. سیاح اونلارا باخدیقجا آستا-آستا طاماح اونو توولاییردی. یاواش-یاواش اونلاری نه سایاق اوغلانین آلیندن چرخارتماغی دوشونوردو. قوناغین گؤزو ائله اونلاردا قالیمیشدی. اؤنجه بیچاغی نه تهر آله کئچیره‌جه‌یینه فیکیرلشدی؛ اؤز-اؤزونه بئله دوشوندو:

- (اشاق‌دیر؛ گؤزومو بره‌لدهرم^۸، بیچاغینی آلیندن اؤتوره‌ر، گؤتوره‌رم).
سونرا اوزویو نئجه آله کئچیرمه‌یینه پلان تۆکوردو:

- (بیر آز نوخود-کیشمیشدن، قوزدان^۹، فیلاندان اوووجونا تۆکوب
آلارام)!

دؤنوب چوبانا ترس باخیب، گؤزونو آغارتدی؛ چوبان مسأله‌نی باشقا
جور دوشونوب دئدی:

^۶ توتاق: دستگیره.

^۷ تییه: تیغه، بخش فلزی چاقو.

^۸ بره‌لتمک: چشمها را برای ترساندن گشاد کردن، چشم غره رفتن.

^۹ قوز (qoz): گردو.

- قورخما عمی جان! سوغان سویورام. سنين باشینی کسمه یه جم!

سونرا قهقهه چکیب گوله رک آرتیردی:

- عمی جان، سنله ظارافاتلاشدیم، اؤزونه آلم! داش تیکه لری داغلاشیب آرتیق؛ زحمت اولماسا منده ده گۆزون اولسون کی، قویونلار اونا داراشماسین؛ من ده دوروم قویونلاردان بیر آز سوت ساغیب گتیریم... چوبان، بیچاغین تییه سینی ایچینه قاتلایب، جیبینه قویدو؛ آباغا قالخیب بایدانی گۆتوردن سونرا قویونلارا ساری گئتدی. سیاح، چوبانین ساندیغی کیمی صاف^{۱۰} اولمادیغینی باشا دوشدو؛ اؤزو ایله دوشوندو:

- (سانکی بو اوغلان آییق-ساییق اوشاق دیر، ایش چتین اولاجاق...) چوبان سوتو ساغیب گتیرندن سونرا، قووتماشینی حاضیرلایب، منده سینی آچدی. یئمیه باشلادیلار. یئمک آراسی، آرا-سیرا دانیشیقلار داوام ائتدی. قوناق گزیب دولاندیغی یئرلردن، گۆردویو ماحاللاردان دانیشاراق، اوغلاندان قویونلارین هانسی کنده عالید اولدوغوندان، یاخود چوبانین عالیه سیندن سورغولار سوروشدو. قوناق سۆزو دولاندیریپ، سونوندا چوبانین بارماغینداکی اوزویه چاتدیردی:

- اوغول، بارماغیندا اولان اوزوک نه گۆزل دیر؛ دوزدور، بیر او قدر ده دیرلی، قیمتلی دئییل، آنجاق گۆزل دیر. سندن بیر یادیگاریم اولسون دئییه ایسته سم، اونو منه وئره رسنمی؟ باخ! من ده سنين جیلرینی نوخود-کیشمیشله، قوزلا دولدورارام.

^{۱۰} صاف: در اینجا ساده لوح.

- یوخ عمی جان! بو اوزوک بۆیوک بابامدان منه قالان یادىگاردير؛
اونو نوخود-كىشميشه، قوزا وئره بيلمرم.

سياح، چوبانين بو ساياق جاواب وئرمه سيندن، بوتون قاپيلارين
باغلانمايغيني دوشونوب، اوميديني ايتيرمه دي؛ سونرا آرتيردى:

- بير آز شوبهه لى دانىشدين اوغول؛ سانكى باشقا شئير آلماقلا اونو
منه وئره بيله جكسن؛ ائله ديرمى؟ هر نه ايسته سن، وئهرم!

چوبان بير آز فيكي ره جومدو، سونرا دئدى:

- آنچاق بير شرطله بو اوزويو سنه وئره جه يم...

سياحين گۆزلى ايشيقلاندى؛ چوبان ايسه آرتيق اونون
طاماحكارليغيني باشا دوشوب، اونا اونودولماز بير درس وئرمك نيتينده
ايدى. چوبانين عاغليندان نه كئچدييىنى بيلمه ين سياح ماراقلا سوروشدو:

- نه شرط ايله؟ هر نه اولسا يئرینه يئتمه يه حاضيرام.

- بس اوندا ياخشى قولاق آس! تك شرطيمى ده آدبسىزلىك حسايينا
قويم؛ اوزونو قوزئيه، گونئيه، دوغويا، سونرا دا باتيا چئويريب دؤرد دفعه
ائششك كيمي آنقىراجاقسان! اوندان سونرا اوزويو سنه وئره جه يم؛ تك
شرطيم بودور...

كىشى بير آن دوروخدو؛ بئله بير شرطى ائشيتمه يى هئچ گۆزله مزدى.
اؤنجه قاشلارى چاتيلدى؛ -بو نه آلچاق ايش دير كى، بير آشيقجا بويو
اولان اوشاق مندن ايسته يير؟! - دئيه دوشوندو؛ سونرا آزاجيق اؤزونه
گليب، دوداغينين اوجو دا بئله بيلر-بيلمز قاچاراق اؤزو ايله بئله
فيكىرلشدى:

- (كیم بو ماحالدا منیم بۇيوك بىر سياح اولدوغومو بيلير؟ ياخود بيليب، تانيسالار بئله، سونرالار كیم بو اوشاغين دئديیی سۆزلره، بو دیرلی اوزویو آله گتيرمك اوچون منیم ائششك كیمی آنقىرماغیما اینانار؟! داها ياخشى، اوزویو منه وئرمك اوچون قیزیل-گوموش ايسته يه جه يینی سانمیشدیم؛ بئله ليكله سيككه لریم ده جییمده قالار!...)

سياح چوبانين شرطی ايله راضیلاشدیغینی بیلديریب، آياغا قالخدی. اۇنجه دۇرد طرفه گۆز گزديریب، اونلاردان باشقا كیمسه اُطرفدا اولمادیغیندان آرخابين اولماق ايسته دی؛ آرخابينلاشاندان سونرا اوغلانين ايسته دییی كیمی دۇرد طرفه اوز توتوب، آنقىردی. سونرا قايیدیپ چوبانا باخراق، اوغلان اوزویو بارماغیندان چیخاردیب اونا وئره جه يینی گۆزله دی. آنجاق چوبان آلرینی داراقلايیب، بوینونو چینینه قویوب گولومسه يهرک، «عاغیلینین سفئه باخدیغی سایاق» اونا باخیردی! بىر آزدان سياح دیله گلیب دئدی:

- اوغول، بس نه اولدو؟ اولمايا سسیمی بیه نمه دین؟! نه ايسته دیینی ائتدیم؛ ایندی سیرا سنده دیر. نییه دایانیسان؟ توت سۆزونو، وئر اوزویونو... چوبان دئدی:

- یوخ قوناق قارداش! سن منی نه سانیسان؟ اولمايا سن ائششک لیپینده بو اوزویون دیرینی بیلدیین یئرده، من آداملیغیما بیلیمرمی دوشونورسن؟! آما یانیلما! من بو اوزویون دیرینی سندن ياخشى بیلیرم؛ گل قوووتماشیمیزی سویومادان، آغیزدان دوشمه دن یئیک؛ اونوت گئتسین اوزوک مسأله سینی...

سیاحین آغیزی، بو جاوابی ائشیتمکله آچیق قالمیشدی؛ آتالار
 دئمیشکن - «مسجید، ائششک باغلامالی یئر اولمادیغینی» باشا دوشوب،
 بو اوشاغا حریف اولایلمه یه جه یینی آنلادی. بو اولایلاردان سونرا، داها
 اورادا اوتورا بیلمه ییب، چوبانین قالب یئمه یینی بیتیرمه یی ایصرارینا
 رغن، چول-پالازینی آتینین اوستونه آتاندان سونرا، آتینا مینیب، توولا
 اورادان اوزاقلاشدی...

سنی ھېچ بۇيوميھ يېدىن...

اُن آزی بیر-یکی یوز ایل گئرییه قاییتساق، چوخ شئی فرق ائدر. او فرقلرین اُن اؤنملی لریندن بیر یوللاردیر. آسفالت یوللارلا دمیر یوللارین چکیلمه سی بیر باخیشلا اینسانلاری مدنیتلرله، اؤلکه لرله یاخینلاداراق، میللتلر آراسی آلیش-وئریشی راحتلاشدیریبدیر. یوز ایل بوندان اؤنجه، هله اوجقار کندلر بیر قیراقدا قالسین، شهرلرین چوخوندا دا بئله، یاخشی یوللار یوخ ایدی. اونون اوچون ده، هر ماحال آنجاق اؤزوندە یاخود ایقلم، جوغرافیا قونشولوغو اولان ماحاللاردا اورە تیلن اورە تیملردن فایدالاناراق، چوخ نادیر حاللاردا یئنیلیکلرله توشلاشاردی. اؤلکه نین گوئیینه اؤزل اولان یئیجه کلری، قوزئیده کیلر نه یئمیشدیله، نه تانییاردیلار؛ البته ترسه سی ده دوز ایدی.

ائله او گونلرده، یوردوموزون اوجقار کندلرینین بیرینده، عؤمرونده آیاغی قونشو کندلردن اوزاغا دیمه میش «أبأذر» آدلی بیر کیشی واریمیش. معلوم دور، او دا کندیلرین بیر چوخو کیمی، اکینچیلیک، حیواندارلیقلا اؤزو ایله عالیه سینین حیاتیینی سوردورورموش.

یای گونلرینین لاپ او ایستی گونلری ایدی. گون اورتا چاغی گونشین تتلری هر شئی به باتیب، بئیننه قدر ایره لیله ییردی. أبأذر عمینین یایبان قیش باشیندا بیر توخونما بؤرکو اولاردی. بؤرکون ایچی ترله سه ده، اُن آزی باشینی گونشین آجیغیندان آزاجیق ساخلا ییردی. چؤلده، او قدر ده گؤروله جک ایش قالما میشدی. اونون، کندن بیر آز آرالیدا بیر باغی وار ایدی. أبأذر عمی هوا نین او جیزلا ماسیندا اولاغنین اوستونده اوتوروب، قیچلارینی توولایاراق باغینا باش چکیب، آغاجلاری سوارماغا گئدیردی. باغ یولونون اورتالاریندا، ائله اولاغین

اوستوندهكن، يترده، قارابويالى كىچىك بىر حىوانا بنزەر بىر شى گۇردو. اۇنجه اوندان سووولدى؛ ائله سووولان كىمى ده نه اولاييلهجهيىنى فيكىرلشدى:

– (گۇرەسن پىسپىسايدىمى؟ يوخ، اولاييلمز، اوندان بىر آز يئكه ايدى. بلكه ده كۇمور تىكهسى ايدى؟ يوخ، گونشېن ايشيغىندا پاريلدايىردى. بس نه اولاييلر؟...)

ائششك آدديملاراق، اباذر عمى اوزو ايله حياتىندا بىرىنچى كرە گۇروب نه اولدوغونو بىلمەدى شى حاقدان آراشدىرما آپارىپ، اوزوندن سورغو-سوال سوروشوردو. اوندان دوغان مارق، سايمازيانا گۇردويو شىين نه اولدوغونو بىلمەن، گتدىي يولون آردىنى توتماغىن قارشىسىنى كسدى. ائششەيىنى باشىنى چتورىپ اونون يانىنا قايتدى. ايللرېن تجربەسى، اونا احتياطلۇ اولماغى خاطرلا دىردى. بو باخىمدان، قايداراق ائششەيىن ھوركوب-ھوركەيەجەيىنە ده فيكىر وئرمەي دوشونوردو. امما ائششەكدن بىر تىكى^۱ گۇرسنمەدى. اونا گۇرە، اولاقدان يترە ائتمەدن بىر دۇور ائششەيى اونون دۇورەسىنە دولاندىردى. ائله اولاغىن اوستوندان او قارا شىيە بىر ده دىقتلى باخدى. دۇوروسو عۇمرونە او تهر بىر شى گۇرمەمىشدى. بىر توو ائششەكدن ائتمەكدن قورخدى. ائىندەكى آغاجىن اوجو ايله ائھمالجا اونو او يان-بو يان چتورىدى. يوخ، هر نه ايدى حركتسىز ايدى. اولاقدان دوشوب اونون يانىندا چۇمبەلەتمە يترە اوتوردو. بىر تىكه چۇپ ايله اوستونە آزاجىق باسدى. شىرەبە بنزەر بىر شى گونشېن قارشىسىندا پاريلدادى. احتياطلا بارماغىنىن اوجونو اونا ووروب، سونرا بارماغىنىن اوجونو يالادى. بىر آن داددىغى شىرىنلىيە والئە اولدى. اونو ائىنە گۇتوروب، اوستونون تورپاغىنى تىمىزلەيىپ آغزىنا قويدو. عۇمرونە دادمادىغى بىر دادى وار ايدى. ھم چوخ

^۱ تىكى (təpki): عكس‌العمل.

شىيرىن، ھەم دە چوخ لذتلى ايدى. اۆزۈ ايلە دوشوندى:

- (بو جنتين مئۈھلریندن اولمالى دیر. بلکه دە آلاھین یاخشی بندەسى اولدوغوم اوچون، گۆیدن منیم یولوما دوشوب دور.)
أللرىنى گۆیه طرف قالدیریب، تانرییا مین مرتبه شوکر ائتدی. یئدیى مئۈھنین چردهیینی اُکمک اوچون ساخلايیب، یازدا اونو باغین بیر بوجاغیندا اُکمەیی دوشوندى. چردهیی آرخالیغینین جییینە قویوب، یئنە دە ائششەیینە مینیپ یولا دوشدو.

أبازر عمی عۆمرونده گۆرمەدیى، یئمەدیى «خورما»نى دادمیشدی. دؤولت آدمالاریندان بیرى خورما یئیه رکن اورادان سوووشوب، گئدەرک بیرینی سالمیشدی؛ تورپاغا بلشیدیینه گۆره دە داھا قاییدیپ گۆتورمەییندن واز کئچمیشدی. او زامانندان ھمین بیر دنە خورمانین دادی، أبازر عمینین داماغیندا قالدی. اوتوردوغو ھر مجلسدە، ائشیدنلرین ایچیندە اونا گولنلر اولماغینا باخما یاراق، دۆنە-دۆنە یئنە او جنتدن گلن مئۈھدن دانیشاردی. یوللاردا گئدەرک دە آنجاق یئرە باخار، او یئمکدن آختاراردی.

بیر ایل او اولاییں اوستوندن اؤتدو. گوز، قیش، یاز، بیر-بیرینین آردینجا گلیب کئچدی. أبازر کیشی یازدا ساخلادیغی چردهیی باغینین لاپ یاخشی یئریندە یئرە اُکیب، گۆیرمەیینی گۆزلەدی. بیر گون آرا اونون دییینە سو وئیردی؛ ایکی گۆزو کیمی اُکدیى یئرە یئتیشیردی؛ عۆمرونده قازاندیغی بوتون تجروبه لردن فايدالانسا دا، اورادان ھىچ بیر شئی گۆیرمەدیىنى گۆرونجه، بیر داھا او مئۈھ گۆیدن، جنتین لاپ اۆزوندن اونون یولونا دوشمەییندن آرخاییں اولدو. آرتیق بیر یای داھا گلیب چاتدی.

گونلرین بیریندە، یئنە أبازر عمی ھمین باغ یولوندان کئچیردی. ھمیشە کینە

تای، اولاغین اوستوندن یان-یۆره یه باخا-باخا گئدیردی. بیر آن اوزاقدان گۆزو همین کئچن ایل کی یئمه یه بنزه ر بیر شئی ساتاشدی. آنجاق بیلدیر گۆردویوندن چوخ یئکه ایدی. گونشین ساچاقلارینین قارشیسیندا پار-پار پاربلدا بیردی. اۆزو ایله بئله دوشوندو:

- (اۆزودور، آنجاق یئکه سیندن. بلکه ده عمللریم یاخشی اولدوغونا گۆره، بو ایل یئکه سینی یوللا ییلار!)

بو دؤنه داها دۆزومسوز-احتیاطسوز، اولاغی اونا چاتمامیشدان تئز یئره آتیلدی. اونو یئردن گۆتوروب تئزجه بیر دیش کسیب، چئینه مه یه باشلادی. آنجاق یئدییینین یامان آجی اولدوغونو دویونجا، یئره توپوروب، آلینده اونون قالانینا باخاراق دئدی:

- گۆروم سنی هئچ بۆیومییه یدین؛ خیردالیقدا بوندان شیرینیدین کی!
 أباذر عمینین بو دفعه یئدییی، یئنه عۆمرونده دادمادیغی، بادیمجان ایدی...

سۆزلۈك

A-a – آ

آجینا جاقلى (acınacaqılı): فجيح.

آچىقلاماق (açıqlamaq): توضیح دادن. آچىقلاما: توضیح.

آدا (ada): جزیره.

آراشدیرماجى (araşdırmacı): محقق، پژوهشگر.

آران (aran): جلگه، دشت، زمین پست.

آرخا (arxa): پشت، عقب.

آرد (ard): ادامه، دنباله.

آغارتماق (ağartmaq): سفید کردن، فاش کردن، برملا کردن.

آغیز (ağız): لهجه.

آلاپاچا (alapaça): ابلق.

آلاتورانلىق (alatoranlıq): گرگ و میش.

آنارشىست (anarşist): هرج و مرج طلب، آشوبگر.

آنلاشيلماق (anlaşılmaq): مفهوم شدن، معلوم شدن.

آياق يولو (ayaqyolu): توالى.

آياق آلتى (ayaqaltı): دمپایى.

آيرىنتىلى (ayrıntılı): با جزئیات. آيرىنتى: جزئیات.

أ - Ə-ə

- اُسکی (əski): قدیمی، کهنه.
 اُسنه مک (əsnəmək): خمیازه کشیدن.
 اُسیرگه مک (əsirgəmək): مضایقه کردن، دریغ کردن.
 اُمکداش (əməkdaş): همکار.
 اُلوئیشلی (əlverişli): مساعد، مناسب، مهیا، در دسترس.

ای، ای، او، او، او، او

E-e, İ-i, Ö-ö, Ü-ü, O-o, U-u

- اَتکی (etki): تأثیر.
 اَندیریم یاریشی (endirim yarışı): مناقصه.
 اِستانسییا (stansiya): ایستگاه رادیو تلویزیونی.
 اَلکتریک چیخیشی (elektrik çıxışı): پریز برق.
 اوتلاق (otlaq): چراگاه.
 اوتوراجاق (oturacaq): صندلی.
 اوتوروم (oturum): نشست، جلسه.
 اوجباتیندان (ucbatından): به دلیل، به علت.
 اوجقار (ucqar): دور، منتهی الیه.
 اورتاقلیق (ortaqlıq): شراکت. اورتاق: شریک.
 اورتام (ortam): محیط.
 اوردو کوماندانلیغی (ordu kumandanlığı): فرماندهی ارتش؛ کوماندان: فرمانده.

- اوره تمک (ürətmək): تولید کردن.
- اوزاق کوماندان (uzaq kumandan): کنترل از راه دور.
- اوزره (üzrə): طبق، مطابق، روی
- اوسته له مه (üstələmə): اضافه بر، مازاد، اضافی.
- اوشاق باخچی سی (uşaq baxıcısı): پرستار کودک.
- اوشونمک (üşünmək): ترسیدن.
- اوغراشماق (uğraşmaq): با یک امری مشغول شدن، در باره ی چیزی تلاش کردن.
- اوغور (uğur): موفقیت، خیر، برکت، شگون.
- اولاناقلی (olanaqlı): ممکن، امکان پذیر.
- اولای (olay): واقعه، حادثه، اتفاق.
- اولو (ulu): بزرگ، متعالی.
- اولوشان (oluşan): متشکل، ساخته شده. اولوشماق: ساختن، تشکیل دادن.
- اولوملو (olumlu): مثبت.
- اولئد تیوی (OLED TV): یکی از جدیدترین نوع تلویزیونها انواع منحنی و OLED TV می باشد که از وضوح بالایی برخوردار است.
- اونوتقان (unutqan): فراموشکار، کم حافظه.
- اووورد (sapaq): لپ، گونه.
- اویدورماق (uydurmaq): فریب دادن، گول زدن
- اویدورما (uydurma): ساختگی، جعلی، تخیلی.
- اؤیرتمن (öyrətmən): معلم.
- اویوماق (uyumaq): خوابیدن، ساکت و بی حرکت شدن، غافل بودن.

- اؤدول (ödül): جایزه.
- اؤدەمک (ödəmək): تادیه کردن، پرداخت کردن.
- اؤرنه یین (örnəyin): بعنوان مثال.
- اؤزل (özəl): خصوصی، ویژه.
- اؤزلیکلە (özəlliklə): مخصوصاً، بویژه.
- اؤزونو الە آلماق (özünü ələ almaq): به حال عادی برگشتن، خود را جمع و جور کردن.
- اؤزونە مخصوص (özünəməxsus): منحصر بفرد.
- اؤلوم آراییشی (ölüm arayışı): گواهی فوت.
- اؤن (ön): جلو، پیش.
- اؤنری (önəri): پیشنهاد.
- اؤنلەمک (önləmək): پیشگیری کردن، ممانعت کردن.
- اؤنمسه مەک (önəmsəmək): اهمیت دادن.
- اؤنملی (önəmli): مهم، ضروری. اؤنم: اهمیت، لزوم.
- اؤیرتمەن (öyrətmən): معلم.
- اؤیکو (öykü): حکایت، داستان.
- اؤیود (öyüd): نصیحت، پند.
- ایپک یولو (ipək yolu): راه ابریشم.
- ایچرمک (içərmək): شمول، احتوا. ایچرمکده اولماق: شامل شدن، محتوی بودن.
- ایز (iz): اثر، نشانه.
- ایستی اوت دادماق (isti ot dadmaq): برکه—بوشا دوشمکدن، تجروبه

يېيەسى اولماقدان كېنايەدېر. ايستى اوت: فلفل، خردل (فلفل سياه)
 ايلك (ilk): ابتدا، اول.
 ايلگى لنمك (ilgilənmək): ارتباط برقرار كردن، مشغول شدن، با شور و
 شوق كار كردن.
 ايلنجه (əyləncə): تفریح.
 اينترنليک (internlik): انترنى؛ طيب تحصيلينين سونونجو آشاماسى اينترنليک
 دؤورهسىدير؛ بو دؤورهينين بير ايلي عرضينده، اؤيرنجيلر چئشيدلى
 تخصصوصلرين خسته خانالاريني دولانيب، خسته لرله بيرباشا قارشىلاشاراق،
 عملى تجروبه لر قازانارلار.
 اينجه (incə): ظريف، باريك.
 اينجه لهمك (incələmək): تحليل كردن، بررسى كردن.

ب – B-b

باتى (batı): غرب.
 باخان (baxan): وزير.
 باخيرچيلىق (baxırçılıq): مسگرى. باخير: مس.
 باسقى (basqı): فشار، تضيق.
 باشليق (başlıq): عنوان، سرفصل.
 باغيرماق (bağırmaq): فرياد زدن، نعره كشيدين.
 بره لتمك (bərəltmək): چشمها را برای ترساندن گشاد كردن، چشم غره
 رفتن.
 بكله مك (bəkləmək): منتظر شدن. بكلنمك: انتظار داشتن، توقع داشتن.

بکلنتی: انتظار، توقع.

بوراق (buraq): پیچ. (فارسجادا «پیچ» آدلانان سۆزجویه، باخدیغیم سۆزلوکلرده هئج بیر قارشیت (معادل) تاپا بیلمه‌دیم. حتی آذربایجان جمهوریتینده یاشایان سویداش، دیلداشلاریمیز دا بو لوغت اوچون روسجadan آلینمیش «Vint» سۆزجویونو ایشلتمکده‌دیرلر. اونا گۆره ده دیلیمیزده «بورماق» (پیچاندن) کؤکونون اولدوغونا باخاراق، او آنلامی یئتیرمک اوچون، بیرینجی کز اولاراق «بوراق» سۆزجویونو اؤنرمه‌یی اویغون گۆردوم. سانیرام بو سۆزجویو قبول ائدرسک، فارسجادا «پیچ‌گوشتی» دئییلن آلته ده «بوراق‌آجان» ایشلتمک هئج ده یئرسیز اولمایاجاق‌دیر.)

بۆجک (böcək): حشره.

بۆلمه (bölmə): بخش، قسمت، شعبه.

بیتمک (bitmək): پایان یافتن، تمام شدن.

بیر گۆز قیرپیمیندا (bir göz qırpımında): در یک چشم به هم زدن.

پاراق (paraq): بیر جوره چوخ توکلو کۆپک‌دیر. دریسینین توکو چوخ اولدوغونا گۆره، سویوق هاوایا چوخ داوامی واردیر. آتالار سۆزودور، بیر شخص یاخود بیر شئی چوخ جانی برک، داواملی اولسا بئله دئیهرلر: «ایت اؤلر، پاراق اؤلمز!» یعنی چوخ شاختالی هاوادا نرمال ایتلر سویوقدان اؤلسه‌لر ده، پاراغا سویوقدان اؤلوم یوخ‌دور.

پالیدی (palıdı): قهوه‌ای کم رنگ، به رنگ بلوط.

پانج (panc): ابتدا، اول، نخست.

پشه‌کار (peşəkar): حرفه‌ای.

پلاتئر (plater): صفحه.

ت – T-t

- تارلا (tarla): مزرعه، كشتزار.
- تانسیون (tansiyon): فشار خون.
- تانیق (tanıq): شاهد.
- تاوان (tavan): سقف.
- تپكى (təpki): عكس العمل.
- تپه‌جك (təpəcək): درپوش شیشه و كوزه.
- تدقیقاتچی (tədqiqatçı): محقق.
- تره‌وز (tərəvəz): سبزیجات.
- تزك (təzək): پشگل، سرگین، تپاله‌ی گاو و گوسفند كه با كاه آغشته و برای مصرف سوخت خشك می‌كنند.
- تمل علملر (təməl elmlər): علوم پایه، ایکی ایل سورهن حكیملیك تحصیلینین بیرینجی آشاماسی.
- توپلو (toplu): مجموعه.
- توپلوم (toplum): جامعه.
- توتاق (tutaq): دستگیره.
- توتوم (tutum): تصمیم.
- تورلو (türülü): انواع، اقسام، متنوع. بیر تورلو: به نوعی.
- توكنمك (tükənmək): پایان یافتن، تمام شدن.
- تومارلاماق (tumarlamaq): نوازش كردن، تیمار كردن.
- تهله‌كه‌سيزلیك قورشاغی (təhlükəsizlik qurşağı): كمربند ایمنی.

تۆرن (törən): مراسم، مجلس.

تۆرەمە (törəmə): مشتقات، زائده، عقبه، دنباله‌رو.

تۆۋشەمەك (tövşəmək): نفس-نفس زدن، له‌له زدن.

تییه (tiyə): تیغه، بخش فلزی چاقو.

تیله‌مەك (teyləmək): جدا کردن احشام.

ج - c-C

جیگیر (cığır): راه‌باریکه، کوره‌راه، راه مالرو.

چ - ç-Ç

چاپیق (çapıq): اثر زخم، جای زخم.

چاتیشمامازلیق (çatışmamazlıq): نارسایی، عدم کفایت، نقص، ایراد.

چاخناشماق (çaxnaşmaq): بهم خوردن، متلاطم شدن، متشنج شدن.

چارپاز (çarpaz): صلیب، متقاطع.

چاغیریش (çağırış): دعوت، احضار، فراخوانی.

چکیرتگه، چَییرتگه (çəkirtgə, çəyirtgə): ملخ.

چیمچشمک (çimçəşmək): چندش آمدن، مشمئز شدن.

چَشیدلی (çeşidli): متنوع، مختلف. چَشیید: نوع، جور، طور.

چئوره (çevrə): محیط، پیرامون، دور و بر.

خ - x-X

خافاخافدان (xafaxafdan): يکھويى، بطور ناگھانى.
خيل (xıl): خيل، دسته، گروه.

D-d – د

دان يئرى سۆكۈلمک (dan yeri sökülmək): كناية از طلوع آفتاب. دان:
فجر، سپيدهدم، صبح كاذب.
دانيشمان (danışman): مشاور، مصلحت گزار.
داوار (davar): گوسفند و بز.
داورانيش (davranış): رفتار، سلوك.
دميرچيلر بيرليسينين باشقانى (dəmirçilər birliyinin başkanı): رئيس
اتحاديهى فلزكاران.
دنگه (dəngə): تعادل، موازنه، بالانس.
دوشوك (düşük): افتاده، تنزل يافته، پست.
دوراق (duraq): ايستگاه.
دوروخماق (duruxmaq): مكث كردن، به فكر فرو رفتن، درنگ كردن.
دوروم (durum): وضعيت، موقعيت.
دوزنلهمك (düzənləmək): ترتيب دادن، سازمان دادن.
دوستاق (dustağ): زندان، محبس.
دوغا (doğa): طبيعت.
دوغال (doğal): طبيعى.
دوغرولاما (doğrulama): تأييد.
دوغو (doğu): گون دوغان، گون چيخان، شرق.

دولاییسی ایله (dolayısı ilə): بنابراین، بدین سبب، با جهتِ
 دنیا گزیسی (dünya gəzisi): جهانگردی.
 دویشو (düyşü): سید حمل انگور.
 دویماق (Duymaq): حس کردن، درک کردن.
 دؤنم (dönəm): فصل، موسم، هنگام.
 دیرشمک (dirəşmək): دست و پنجه نرم کردن.
 دیشاری (dışarı): خارج. ایچ (iç): داخل، دیش (dış): خارج.
 دیله (dilə): بخواه.
 دیلەمک (diləmək): آرزو کردن، خواستن، درخواست کردن.
 دئپرەم (deprəm): زلزله، زمین لرزه.

ر - R-r

راپورت (raport): گزارش.
 رئاکسییا (reaksiya): عکس العمل.
 رئیپورتئر (reporter): گزارشگر.
 رئاکتور (redaktor): ائدیتور، ویراستار.

ز - Z-z

زولاق (zolaq): خط، پرتو، شعاع، نوار.
 زینقیروو (zıncırov): زنگوله، جرس.

س - S-s

- ساپاق (sapaq): دسته، محل انحراف و انشعاب.
- ساخلايىچى (saxlayıcı): مواد نگهدارنده.
- سارساق (sarsaq): احمق، ابله.
- سالاما قىفيل (sallama qıfıl): قفل آویز.
- سرت (Sərt): سخت، محکم.
- سکسن (Səksən): هشتاد.
- سوچ (suç): گناه، تقصير.
- سوروملو (sorumlu): مسؤول.
- سورون (sorun): مسأله.
- سولاله (sülalə): سلسله پادشاهی.
- سونماق (sunmaq): تقديم کردن، ارائه کردن.
- سونولماق (sunmaq): تقديم شدن، ارائه شدن.
- سونوج (sonuc): نتیجه، عاقبت.
- سويودوجو (soyuducu): سردخانه، يخچال
- سهنگ (Səhəng): سبو، کوزه.
- سيناق (sınaq): امتحان.
- سيناماق (sınamaq): امتحان کردن، سنجیدن، آزمایش کردن.
- سينير (sınır): مرز.
- سينيرديشى (sınırdışı): برون مرزی.
- سزمک (sezmək): متوجه شدن، زیرچشمی نگاه کردن.

ش – Ş-ş

شاشقین (şaşqın): حیرت زده، سرگردان، گیج، منگ، متعجب.
 شالاله (şəlalə): آبشار.
 شیریم (şırım): شیار.

ص – S-s

صاف (saf): هموار، ساده لوح.
 صینیف (Sinif): کلاس درس.

ف – F-f

فیزیوپاتو (fiziyo-pato): فیزیوپاتولوژی. حکیملیک تحصیلینده تمل علملردن
 سونراکی آشاما؛ فیزیوپاتو دؤنمی دؤرد ایل دیر.
 فاکت (fakt): واقعیت، سند، مدرک.

ق – Q-q

قارشى (qarşı): مقابل، روبرو.
 قارماق (Qarmaq): لنگر کشتی، قلاب ماهیگیری.
 قالخیش (qalxış): خیزش، شورش.
 قانا (qana): مزرعه، کرت.
 قاورام (qavram): مقوله، معنا، محتوا، فهم، مفهوم.
 قایا (qaya): سخره، سنگ.
 قایغی (qayğı): اضطراب، تشویش، دلهره، وظیفه.

قaynaqlanmaq): سرچشمه گرفتن.
 قو دئیردین قولاق توتولوردو (qu deyirdin qulaq tutulurdu): کنایه از سکوت.

قوجامان (qocaman): کهنسال، والا، عالی.

قورا بیشیرن (qora bişirən): تیرماه.

قورخونج (qorxunc): ترسناک، مخوف.

قورویوجو (qoruyucu): نگهبان.

قوز (qoz): گردو.

قوشقو (quşqu): تردید، شک.

قوللانماق (qullanmaq): بکاربردن، بهره جستن.

قونو (qonu): موضوع.

قووتماش (qovutmaş): بیر چئشید چوبان یئمه‌یی دیر؛ چوبانلار، نئچه دنه یوموروقدان بیر آز کیچیک یومورو داش تاپیب، تمیز یویاندان سونرا، یانار اوجاغین ایچینه آتارلار. داشلار یاخشیجا قیزیشینجا، قویونلارین سوتونو بیر کاسایا، یا دا بستیه (بایدایا) ساغیب گتیره‌رلر. داشلار عمللی داغلاشیب، قیزارانندان سونرا اونلاری ائله داغ-داغ سوتون ایچینه سالارلار. بیر آن یامان بیر جیزیلتی سسی ائشیدیلر؛ داشلار، سوتون سویونو هاوایا اوچورداراق سویویارلار. قابدا قالان سوت، قووتماش آدلی قاتی، چوخ لذتلی بیر یئمک دیر...

قیرقیرا (qırqıra): کرکره.

قیشلا (qışla): پادگان.

قیلاووز (qılavuz): راهنما، راهبر، بلد.

ک - K-k

- کتیل (kətil): چهارپایه.
- کرا (kral): پادشاه، سلطان.
- کره (kəre): دفعه، مرتبه.
- کسگین (kəsgin): قاطع، جدی.
- کل (kəl): گاومیش نر، گاومیش اخته، پر قدرت، زورمند.
- کوپ، کوپه (Küp, küpə): خمره، کوزه‌ی بزرگ.
- کوشکورتک (küşkürtmək): به حمله واداشتن، برانگیختن سگ.
- کوکسو اوتورمک (köksü ötürmək): آه کشیدن.
- کووره‌لمک (kövrəlmək): به حال گریه افتادن، متأثر و متألّم شدن.
- کیملیک وره‌قەسی (kimlik vərəqəsi): کارت شناسایی.
- کئچید (keçid): گذر، عبور، معبر، گذرگاه.

گ - G-g

- گئیل (genəl): عمومی.
- گدیک (gədik): گردنه، بلندی کوه.
- گرگینلیک (gərginlik): تنش، وخامت.
- گرنشمک (gərnəşmək): خمیازه کشیدن.
- گله‌نک (gələnək): عرف، رسم، سنت.
- گنج (gənc): جوان.
- گوره‌و (görev): وظیفه، منت، ادب.
- گوز (güz): پاییز.

گوزگو (güzgü): آئینه.
 گولش (güləş): كشتى، گولشمك: كشتى گرفتن.
 گوونج (güvənc): اطمینان.
 گوونمك (güvənmək): اعتماد كردن.
 گوونيلمز (güvənilməz): غير قابل اعتماد.
 گوۋدە (gövdə): بدن، نەش.
 گيز (giz): راز، سرّ.
 گييرمك (gəyirmək): آروق زدن.

L-l – ل

لاغ (lağ): مسخره، استهزاء. لاغا قويماق: مسخره كردن.
 لئد تيوى (LED TV): تلويزيون LED
 للک (lələk): پر پرندگان.
 لووگا (ovğa): دلّق.
 ليمان (liman): بندر.

M-m – م

ماراقلانديرماق (maraqlandırmaq): علاقمند كردن. ماراقلانماق: علاقمند شدن.
 مرجلشمك، باغلاشماق (mərcləşmək, bağlaşmaq): شرطبندی.
 منده (məndə): سفره.
 مورگوله‌مك، پينك‌له‌مك (mürgüləmək, pinəkləmək): چرت زدن.

مئشه (meşə): جنگل.

و - v - V

وارماق (varmaq): نائل شدن، رسیدن.

وردیش (vərdiş): ورزش، تمرین.

وورغولاماق (vurğulamaq): تأکید کردن.

وئرگی (vergi): مالیات.

وئرلیش (veriliş): پخش (رادیویی)، برنامه‌ی رادیو و تلویزیون.

ه - h - H

هامارلاشدیرماق (hamarlaşdırmaq): صاف کردن.

هوروت-هوروت (Hürüt-hürüt): گیج و منگ، مات و مبہوت.

هؤوله‌سک (hövləsək): شتابزده.

هئرہ (herə): طاقچه.

ی - y - Y

یاپا (yappa): تپاله.

یایی (yapı): بنا، ساختمان. از مصدر یایماق بمعنی ساختن، درست کردن.

یاتاق خسته‌سی (yataq xəstəsi): بیماری که در بستر خود خوابیده و قادر به

حرکت نیست.

یاتاقخانا (yataqxana): خوابگاه.

- یارارلانماق (yararlanmaq): استفادە کردن، بهره بردن.
- یارارلى (yararlı): مفید، مناسب، شایسته.
- یاردیم (yardım): کمک.
- یاردیمچی (yardımcı): کمک کننده.
- یازار (yazar): نویسنده.
- یاسا (yasa): قانون.
- یاغیتى (yağıntı): بارش، باران.
- یاماج (yamac): دامنه‌ی کوهپایه، سرآشویی کوه.
- یانلیش (yanlış): خطا، اشتباه.
- یانیت (yanıt): جواب، پاسخ.
- یانیلماق (yanılmaq): اشتباه کردن، خطا کردن، سهو کردن، منحرف شدن.
- یان-یۆره (Yan-yörə): دور و بر، اطراف، حول و حوش، محیط پیرامون.
- یئترینجه (yetərinçə): به اندازه‌ی کافی.
- یئکۈنلشمک (Yekünleşmək): جمع و جور شدن، تمام شدن. یئکۈن: نهایی.
- یئنمک (yenmək): مغلوب کردن، مغلوب شدن.
- یولچو (yolçu): مسافر.
- یولوخوجو (yoluxucu): مسری، واگیردار.
- یۈن (yön): جهت، سمت، سو.
- یۈنلتمک (Yönəltmək): سوق دادن، جهت دادن، برگرداندن.
- یۈنلمک (yönəlmək): جهت گیری کردن، سویی رهسپار شدن.
- یووارلانماق (yuvarlanmaq): جمع شدن، گرد آمدن.

